

ЗОКИРЖОН МАШРАБОВ

**БОРИ ЭЛГА ЯХШИЛИФ
ҚИЛҒИЛ**

*Мақола ва сұхбатлар,
ёзниималардан намуналар*

Faafur Fulom nomidagi nashriyot-matbaa ijodiy uyi
Toshkent – 2013

УЎК 821.512.133 (094)

КБК 20г

М 34

Машрабов, Зокиржон

Бори элга яхшилиғ қилғил...: мақолалар ва сұхбатлар, ёзишмалардан намуналар/ З. Машрабов. – Тошкент: Faafur Fулом номидаги нашриёт-матбаа ижодий уйи, 2013. – 304 б. + 24 б. вкл.

ISBN 978-9943-03-550-8

Хурматли ўқувчи!

Қўлингиздаги ушбу китоб муаллифи, табиатшунос олим, маънавият фидойиси Зокиржон aka Машрабовинг ибратли ҳаёт йўли юртимизда кўпчиллик яхши таниш. У кишининг ташаббуси билан мустақиллитетимизнинг дастлабки йилларида, яъни 1992 йили ташкил этилган Бобур номидаги Халқаро жамоат фонди ва унинг илмий экспедицияси фаолияти бугунги кунда нафақат мамлакатимизда, балки хорижда ҳам маътуму машҳур.

Эътиборингизга ҳавола этилаётган мазкур китобдан Зокиржон Машрабовнинг турли йилларда ёзилган мақолалари, сұхбат ва интервьюлари, жаҳондаги етук бобуршунос олимлар билан ёзишмаларидан намуналар ўрин олган.

Буюк тарихимиз, улуг аждодларимиз хотирасига, уларнинг ўлмас меросига катта ҳурмат ва эҳтиром руҳи билан йўғрилган ушбу чиқишларнинг барчаси ягона мақсадга – ўтмишдан сабоқ чиқариб, бугунги тинч ва фаровон ҳаётнинг қадрига етиб, келажакка ишонч билан қараб яшашга даъват этади.

УЎК 821.512.133 (094)

КБК 20г

63.3(5Ў)

© Зокиржон Машрабов

© Faafur Fулом номидаги
нашриёт-матбаа ижодий
уйи, 2013

ISBN 978-9943-03-550-8

УМРИМ Дафтарининг саҳифалари

Мен 1933 йилнинг авжи саратонида, 21 июль куни Андижон шаҳрининг яқинидаги қадимий Ҳакан қишлоғида туғилганман. Отам – Машрабжон Қаландар ўғли қишлоғимизнинг биринчи муаллими, зиёли инсон эди. Онам Нубувватхон жамоа хўжалигига ишларди.

Болалигимни эслаганимда беғубор, ёруғ хотиралар кўз ўнгимда гавдаланиб, қалбимни нурга тўлдиради. Айни вактда 30-йилларнинг оғир мاشаққатлари, очин-тўқин кечган кунларимни ҳам яхши хотирлайман. Шулар қаторида бозорда сут сотиб, пулинни йиғиб, велосипед олганим, шу велосипедимда Жалолкудуқ – Оламушук пойгасида ғолиб бўлганим, уйимиздан етти-саккиз чақирим узоқдағи мактабга гоҳ пиёда, гоҳ от-уловда катнаганларим тасаввуримда жонланади. Отам билан Андижон театрига тушиб кўрган томошаларим, улар таъсирида ўзим ҳам мактаб ҳаваскорлик саҳнасида қўйилган «Тоҳир ва Зухра» спектаклида Тоҳир ролини ўйнаб олкиш олганим, яхшигина созанда бўлган Дарвишхон амакимга ҳавас килиб, най, доира чалишни ўргангандарим бу даврдан ёруғ хотиралар бўлиб қолган. Ўша пайтларда ўргангандарим «Алпомиш» спектаклидаги «Кўриб ёрингни Алпомиш» қўшиғи, «Қаро кўзим», «Фигонким» ашулалари, мана, саксонни қоралаюпманки, ҳали-ҳануз тилимда, дилимда айланади...

Ҳали бола пайтимда, қишлоқ чеккасида ўртоқларим билан мол боқиб юрар эканман, адирларнинг ҳар

жойида ҳеч қандай бошқарувчисиз, кечасио кундузи ишлаб ётган нефть тортувчи қурилмаларга, бу «жонли темир»ларнинг тирсаклари кўтарилиб-пастлашига ҳайрат ва қизиқиш билан тикилар эдим. Бу қизиқиш бора-бора орзуга, мақсадга айлана борди. Ўрта мактабни аъло баҳоларга тамомлаб, Ўрта Осиё давлат университетининг геология факультетига ўкишга кирдим. Қунт ва чидам билан ўқидим, университетнинг жамоат ишларида фаол қатнашдим. Қийинчилик, мashaққат одамни тарбиялар экан. Кечалари, якшанба кунлари вокзалда юк тушириб, ўкиш учун пул топар эдик.

1955 йили университетни тамомлаб, Андижон вилоятидаги Жанубий Оламушук нефть конларида оддий операторликдан меҳнат фаолиятимни бошлаганман.

Ўша вақтда айрим раҳбарларнинг «Бизда факат Москвада ўқиб келганлар ишлайди», деган важ билан ишга олмасликка харакат қилғанларини эслайман. Яхши одамлар орага тушиб, иш бошладим. Касбимга бутун меҳримни бериб, катта иштиёқ билан ишлаганим натижасида тез орада участка геологи, Андижон нефть-газ бирлашмасида катта геолог вазифаларига лойик кўрилдим.

1958 йили Ўзбекистон Фанлар академиясининг Геология илмий-текшириш институти аспирантурасига кириб, «Фаргона водийсидаги литологик нефть ҳавзаларининг истиқболлари» мавзусида номзодлик диссертацияси устида иш бошладим. Лекин, тақдир экан, бир йилдан сўнг отам вафот этди.

Бундан бирмунча муддат аввал, мактаб директори вазифасида ишлаб юрган кезларида, отамни «мактабда сумалак пиширтирди» деган айб билан ишдан бўшатишган, ўша пайтда «урф» бўлган «ёза-ёз»лар у

кишининг соғлиғига жиддий путур етказган эди. Охир-оқибат отам 48 ёшида оламдан ўтди. Биттаю битта фарзанд бўлганим учун онамни ёлғиз ташлаб, Тошкентда илмий ишни давом эттиришга имконим йўқ эди.

Мақсадимни билдириш учун ўша вақтда институт директори бўлган таниқли олим, академик Иброҳим Ҳамробоевнинг қабулига кирганман. Дастьлаб, домла «Вилоятдан келган барча ёшлар ўқиши ташлаб кетаверса, ўзбек илмининг келажаги нима бўлади», дея фикримдан қайтаришга уринди. Лекин вазиятимни, аҳволимнинг чинданам танглигини тушунгач, аспирантурани сиртдан давом эттиришни маслаҳат берди. Сўнгра ўрнидан туриб, сейфдан бир даста пул олиб узатди. Бу ўша пайтда хийла катта пул эди. Рад этмоқчи эдим, «мархумнинг маърака-маросимлари кўп бўлади, ишлатарсиз», деб кўнмади.

Кейинчалик, домла берган пулни орттириб, у кишининг ҳузурига кирганим кечагидек кўз олдимда. «Бу катталардан кичикларга ўтиб, айланиб турадиган дунё, – деган эди ўшанда устоз. – Ҳали сизнинг ҳаётингизда ҳам ёрдамга муҳтож ёшлар учрайди. Бу пулни ана шундай ёшлардан бирига берасиз.» Бу улуғ инсоннинг чинакам одамийлик сабоги эди.

Шундан сўнг олти йил давомида «Андижоннефть» бирлашмасида катта геолог бўлиб ишладим. 1966 йили Сурхондарё ва Қашқадарё вилоятлари ҳудудларида фаолият кўрсатувчи «Жарқўргон нефть» бошқармасига бошлиқ қилиб ишга жўнатишди. Икки йилдан сўнг Республика Министрлар Советининг оғир саноат бўлими бошлиғи ўринбосари лавозимига тайинлашди. Бу ерда ишлаш жараёнида юртимизнинг турли конларини чуқур ўргандим, бошлаган илмий ишимни муваффақиятли ҳимоя қилишга имкон топдим.

1970 – 1992 йилларда «Андижоннефть» бирлашмаси бошлиғи, вилоят пахта тозалаш бирлашмаси раҳбари, Андижон шаҳар ижроия қўмитаси раиси, Ўзбекистон Фанлар академияси қошидаги илмий ишлаб чиқариш маркази бош директори лавозимларида меҳнат қилдим. Шу йиллар оралиғида «Перспектива обнаружения литологических залежей нефти и газа Ферганской долины» номли китобим Тошкентда нашр этилди.

Буюк давлат арбоби, улуғ олим ва шоир Захиридин Мұхаммад Бобур шахси ва фаолиятига бўлган қизиқишим туфайли аввалрок Ҳиндистонга сайёҳлик йўлланмаси билан бориб келиш учун навбатга ёзилиб қўйган эдим, Андижон шаҳар ижроия қўмитаси раиси лавозимига ўтиб иш бошлаганимдан сўнг навбат келиб қолди. Оилас билан йўлга чиқдик. Дехли, Бомбей, Кашмир, Аграда бўлдик. Собиқ Иттифоқдан борган сайёҳларга ўзим гид бўлиб, тақдир такозоси билан Ҳиндистонни ватан тутган улуг аждодимиз Бобур Мирзо ва унинг авлодлари хақида тўлиб-тошиб хикоялар сўзлаб бердим.

Жаҳоннинг етти мўъжизасидан бири ҳисобланмиш Тожмаҳалнинг шундок ёнгинасидаги меҳмонхонага жойлашган эдик. Севги ва садокат рамзи бўлган бу машхур обиданинг бемисл гўзаллиги ва улуғворлигидан бир ҳайратга тушсам, айни пайтда, уни ўзимизнинг аждодларимиз бунёд этганидан кўнглимда улкан ғурур ва ифтихор ҳис килар эдим.

Сафарга атокли адибимиз Пиримқул Қодировнинг «Юлдузли тунлар» асарини ўзим билан олиб кетган эдим. Романинг охирги бобларини Тожмаҳалнинг мармар супасида, кўча фонарининг ёруғида йиглаб-йиглаб тутгатдим. Бобур Мирзонинг сўнгги кунларидаги ҳаёти, Ҳумоюн билан бўлиб ўтган сухбат, шохнинг кўзи

очиклигига тахтни ўғлига топшириши, фарзанднинг эса азбаройи отасига меҳр-муҳаббати туфайли тахтни рад этиши, уларнинг ўзаро самимий муносабати менга жуда кучли таъсир қилди. Шу жойда туриб, боболаримизнинг улуғлигига яна бир карра амин бўлдим ва Андижонга боргач, Бобур Мирзо номини абадийлаштиришга қаттиқ киришаман, деб аҳд қилдим.

Ўша пайтдаги расмиятчиликларни кўринг, қайтишимида самолётимиз Тошкентга қўнган бўлса-да, бизнинг тушиб қолишимизга рухсат бермадилар. Тошкентда ёқилғи қуйиб олган самолёт Москвага учди. Москва орқали қайтадан Тошкентга келдик. Андижонга келгач, сафар таассуротлари мени Бобур ҳазратларининг хотирасини абадийлаштириш ишига жиддий киришишга ундади.

Дастлаб, улуғ ватандошимизнинг 500 йиллик юбилейига бағишлиб, Андижон шаҳрининг ёзлик боғида атоқли олимлар ва адиблар, машҳур ҳофизлар иштирокида «Бобур лирикаси ва мақом кечаси»ни ташкил этдик. Шундан сўнг шаҳар марказида, «Арк ичи» маҳалласида Бобур уй-музейини барпо этишга киришдик.

Бобур Мирзо 1502-1503 йиллар оралиғида Андижонни тарк этиб кетаётib, Ўш йўлидаги адирда хуфтон намозини ўқиган экан. Шунда адирнинг тепасидан ўнг томонга қараганида шаҳарда лип-лип ёниб турган чироқларни кўрган ва яқинларига: «Агар насиб этиб Андижонга қайтсан, шу ерда бир ажойиб иморат курадим», деб орзу қилган экан. Бобомизнинг бу армонини рўёбга чиқариш учун катта ҳажмдаги ишлар амалга оширилиб, бу ерда Бобур боғи ташкил қилинди. Боғда ёшлар учун 500 ўринли оромгоҳ қурилди. Етти ярим йил мобайнида боғ худуди узра ўша вактда собиқ

иттифоқдаги энг узун бўлган осма сим йўли тортилиб, шаҳар аҳолиси ва меҳмонларига хизмат кўрсата бошлади. Андижоннинг марказий қўчаларидан бирига Бобур Мирзонинг номи берилди.

Бобур уй-музейи ҳовлисига улуғ шоиримизнинг ҳайкали ўрнатилиши эса – бу алоҳида тарих...

Шаҳарнинг марказий майдонига Лениннинг янги монументини ўрнатиш бўйича область партия комитетининг қарори чиқкан бўлиб, унга асосий масъул сифатида мени бириктириб қўйишган эди. Ушбу монумент Москвада тайёрланаётгани учун у ёққа тез-тез бориб турардим.

Шу оралиқда «енг ичида» иш битириб, Бобур Мирзонинг ҳайкалини ҳам тайёрлашга киришдик. Москва вазирликлари ва маҳкамаларида иш битириш осон бўлмади, тўғрисини айтганда, бу масалада марказга «коробка», яъни совға-салом ташийвериб кўлларим қаварган.

Охир-оқибат Бобур ҳайкалини Митиши шаҳрида қўйдирадиган бўлдик. Ленин ҳайкалидан хабар олиш баҳонасида Митишига серқатнов бўлдим. Улуғ бобомизнинг ҳайкали қўйилаётганини сир саклардик. Буни бир мену бир ҳайкал муаллифи Абдурашид Сулаймонов билардик. Афсуски, ҳайкал тайёр бўлганда, юқори доираларда Бобур шаънига яна қайтадан салбий фикрлар билдирила бошланди. Унга нисбатан «феодал шоҳ», «босқинчи» деган тавқи лаънатлар матбуотда пайдар-пай чиқиб турарди. Табиийки, бундай пайтда Бобурнинг туғилган шаҳрида унинг ҳайкалини ўрнатиш ҳақида гап бўлиши ҳам мумкин эмас эди. Марказий Қўмитада ўтирган айрим раҳбарларнинг «Бобур ҳайкалини тайёрлаш учун ким рухсат берди сенга! Ҳали бунинг учун калланг билан жавоб берасан!»,

деган дағдағаларини эшитдим. Ва ниҳоят, мени ишдан ҳам бўшатишди.

Лениннинг 34 тонналик ҳайкали Москвадан зўр тантаналар билан келтирилиб, Андижоннинг бош майдонидан жой олгани ҳолда, Бобур Мирзо ҳайкалини яширинча, қутига солиб олиб келишга ва омборхонада сақлашга мажбур бўлдик. То юртимизда истиқлол тонги отгунига қадар бобомиз сиймоси бу овлоқ гўшада банди бўлиб ётди...

Захириддин Мұхаммад Бобурнинг киндик қони томган юртда айрим ғаламис одамлар унинг хотирасига маломат тошларини отиб турган бир вақтда, буюк аждодимизнинг дунё маданий оламидаги шон-шуҳрати ва қадр-қиммати ниҳоятда баланд экани, бу улуғ зот ҳақида хорижда «Бобур – йўлбарс», «Тож кийган дарвеш», «Андижон шаҳзодаси» сингари ўнлаб-юзлаб китоблар ёзилганидан озми-кўпми хабардор эдим. Ўша вақтлардаёқ «Бобурнома» жаҳоннинг йигирмадан ортиқ тилига таржима қилинган эди. Бу шахс ҳақиқатан ҳам худо берган, улуғ инсон бўлмаса, қаранг, бирор тарғибу ташвиқ қилмагани ҳолда ҳам шунчалик машҳур бўлармиди!

Минг шукрки, юртимиз мустақилликка эришгач, ҳақиқат қарор топиб, буюк аждодларимизнинг шаъни-шукухи, номи ва мероси қайта тикланди, эл аро улар муносиб қадр топди. Истиқлолнинг илк даврларида, яъни, 1992 йилда муҳтарам Юртбошимиз Ислом Абдуганиевич Каримовнинг юксак эътибор ва рағбатлари билан Халқаро Бобур жамғармаси тузилиб иш бошлади.

Давлатимиз ва шахсан Президентимизнинг фаол қўллаб-куватлашлари ва Жамғарма саъй-ҳаракатлари билан Бобур номли халқаро илмий экспедиция ташкил

этилди. Илгари Ўзбекистоннинг бир вилоятида экспедиция тузиб, бирорта хорижий мамлакатга чиқиш Ойга чиқиш билан баробар гап, собик Марказ бунга умуман рухсат бермас эди.

Истиклол берган бебаҳо имкониятлар туфайли илмий экспедициямиз жуда кўп чет эл давлатларида бўлиб, буюк аждодларимиз босиб ўтган йўллардан юриб, кенг кўламдаги тадкиқот ва тарғибот ишларини амалга оширишга, тарихимизнинг бизга маълум бўлмаган қирраларини, маънавий ва моддий манбалар, тарихий ва меъморий обидаларни ўрганишга киришди.

Шулар қаторида Андижон шаҳрида 300 гектарлик Бобур боғи, Арк дарвозаси, «Бобур ва жаҳон маданияти» ва «Андижон шаҳарсозлик маданияти тарихи» музейлари бунёд этилди. «Бобур ва жаҳон маданияти» музейи Бобур ва бобурийларга дахлдор минглаб китоблар, қўлёзмалар, альбомлар, расмлар, осори атикалар ва бошқа экспонатлар билан тўлдирилди. Андижоннинг маркази – Бобур майдонида бобомизнинг суворий ҳайкали, Бобур боғида эса ўша Митиши шаҳрида қўйдириб келинган шоирона сиймоси қад ростлади.

Энг муҳими, Бобур Мирзонинг Агра шаҳрида дастлаб дафн этилган жойи ва Кобулдаги мангуборгоҳидан тупроқ келтирилиб, Андижонда унинг рамзий қабр-мақбараси барпо этилди. Экспедициямизнинг кейинги сафарлари давомида Абу Райхон Берунийнинг Газна шаҳридаги, Аҳмад Фарғонийнинг Қоҳирадаги қабрларидан хок-тупроқ олиниб, Беруний тумани ва Фарғонага келтирилди.

Айни пайтда, Жамгармамизнинг Афғонистон, Ҳиндистон, Покистон, Бирлашган Араб Амирликлари,

Германия, Россия, Қирғизистон каби бир қатор хорижий давлатларда ҳам бўлимлари ташкил этилган ва у жойларда ҳам бобурийлар меросини тўплаш, ўрганиш, тарғиб қилиш юзасидан амалий ишлар олиб борилмоқда.

Жамғарманинг Халқаро Бобур мукофоти, аълочи талабалар учун Бобур стипендияси таъсис этилган. Қўлимиздан келганича ҳомийлик ишларига ҳисса қўшиб келмоқдамиз. Ўнлаб эҳтиёжманд оиласлар фарзандларининг суннат тўйлари, никоҳ тўйларини ўтказиш, мактаблар, лицей ва коллежларга, бобуршунос олим ва адилларга имкон доирасида ёрдам бериш, уларнинг асарларини чоп этишга қўмаклашиш каби ишлар шулар жумласига киради.

Камина ҳозирга кадар Халқаро Бобур жамғармасининг раиси сифатида фаолият олиб боряпман. Аждодларимизнинг меросини ўрганиш, қадимий манбаларни тўплаш, нодир тарихий қўлёзмаларни турли мамлакатлардан олиб келиш ишларига баҳоли қудрат ҳисса қўшишга интиламан. Бу борада юртимизнинг илмий-ижодий зиёлилари, давлат ва жамоат ташкилотлари билан ҳамкорликда шарқу ғарб давлатлари бўйлаб кўп бор илмий экспедициялар ташкил этдик. Аждодларимиз изидан бориб, кўп юртларни кўрдик. «Мусоғир бўлмай мусулмон бўлмас» деганларидек, сафарларда юрар эканмиз, диёrimиздаги тинч, эркин, обод ва фаровон ҳаётнинг қадр-кимматини янада теранрок ҳис килдик.

Бир гал Афғонистонга Мавлоно Лутфий қабрини излаб топиш ва обод қилиш мақсадида борганимизда, анча қийинчиликларга, талотўпларга дуч келдик. Кўз олдимизда иккита автомашина портлаганига гувоҳ бўлдик. Юртимиздан уста ва мутахассисларни олиб

бориб, бир ой деганда Лутфий бобомизнинг қабри узра кўркам мақбара бунёд этдик, ўзбекча ош дамлаб, маҳаллий аҳолига хайру эҳсон қилиб тарқатдик. Ўшанда уларнинг ниҳоятда хурсанд бўлгани, «сизлар нафақат улуғ шоирнинг қабрини обод қилиб, балки, биз учун ибрат нурини сочиб кетяпсизлар», дея ҳавас билан қўлларини дуоға очишгани эсимда.

Яна бир сафар бу жафокаш ўлкага Беруний бобомизнинг хокини олиб келиш учун борганимизда мамлакат нотинч, тўрт тарафлама жанг ичиде эди. Мақсадимизга эришиш учун ҳатто турли дала қўмон-донлари билан алоқа боғлашга тўғри келди. Ниҳоят, улардан ўзлари назорат қилаётган ҳудудларда юриш учун маҳсус ҳужжат – рухсатнома олишга эришдик. Бир жойда жангарилар йўлимизни тўсиб, машиналаримизни тўрт соатлар чамаси қамаб қўйди. Қўлимиздаги рухсатномани кўрсатсан ҳам писанд қилмайди, денг. Охири бир каттароқ раҳбари келиб, ҳужжатни кўриб қолди. Жангарилардан бирига дўқ қилиб, «Нима учун буларни ушлаб турибсан, қўлида рухсатномаси бор экан-ку, ўқимадингми?» деса, халиги аскарнинг: «Қандай ўқийман, 30 йилдан бери урушда юрган бўлсам, ўқишни билмасам», дея мунғайиб туриши ҳам кулгили, ҳам ниҳоятда аянчли эди. Мана шундай пайтларда тинчликнинг, мусаффо осмоннинг қадрига теранроқ етар экансан киши.

Мен адабиётчи ёки тарихчи бўлмасам-да, фаолиятимнинг кўп қисми шу соҳалар билан боғлиқ ҳолда кечди. Ҳозирги кунда жамғарма томонидан Бобур Мирзо ва бобурийлар ҳакида хорижда чоп этилган 400 га яқин рисола ва илмий тадқикотлар, қисса ва романлар, ҳужжатли ва бадиий фильмлар юртимизга

олиб келиниб, улар мутахассисларимиз томонидан ўрганилмоқда, тадқиқ этилмоқда, лозим топилганлари ўзбек тилига таржима қилинмоқда. Бобур асарлари библиографияси яратилгани ҳам муҳим ишлардан бири бўлди. Журналист дўстим, марҳум Собиржон Шокаримов билан ҳаммуаллифликда «Асрларни бўйлаган Бобур» номли китоб нашр этдик. Шу кунларда юртимизда илк бор катта илмий-ижодий меҳнат маҳсули бўлмиш «Бобур энциклопедияси» яратилмоқда. Илмий экспедициялар асосида ўнлаб видеофильмлар ишлачди ва телевидение орқали намойиш қилинди.

Бу ишларнинг барчасида менга, умуман, Жамғармамизнинг фаолиятига яқиндан, бегараз ёрдам берган ижодкор зиёлиларимиз, шоир ва адиблар, олимлар, оммавий ахборот воситалари ходимларидан мен доимо миннатдорман.

Кўлингиздаги тўпламдан ўрин олган мақолаларнинг аксарияти Сайфиддин Жалилов, Муҳаммад Али, Сайдбек Ҳасанов, Қамчибек Кенжа, Ваҳоб Раҳмонов, Боқиҷон Матбобоев сингари маслакдош дўстларим – экспедиция сафарларида ҳамроҳ бўлган фидойи олим ва адиблар билан ҳаммуаллифликда ёзилган бўлиб, уларга чин қалдан ташаккур айтишни ўзимнинг бурчим деб биламан.

Карийб эллик йилдан буён Бобур Мирзо ва унинг шавкатли авлодлари ҳаётини, бебаҳо меросини баҳоли кудрат ўрганиб, бобурийлар изидан уюштирилган халқаро илмий экспедициялар давомида ўнлаб хорижий мамлакатларда бўлиб, тўрт юз минг километрдан ошиқ масофани автомобильда босиб ўтиб, шунга амин бўлдимки, Бобур Мирзо нафакат Андижон, нафакат Ўзбекистон, балки бутун башарият фарзандидир. Дунёга ана шундай буюк сиймони берган халқимиз билан ҳар қанча фахрлансак арзиди.

Ўз-ўзидан аёнки, мамлакатимиз мустақилликка эришмаганида бундай халқаро сафарлар ва тадбирларни ҳатто орзу ҳам қилолмаган бўлар эдик. Буюк ватандошларимизнинг олис ва бегона юртларда колиб кетган оромгохларидан ҳабар олиб, уларнинг қабр-мақбараларини таъмирлаш, ободонлаштириш борасида Президентимизнинг берган кўрсатмалари бизни ҳамиша изланишларга руҳлантириб келмоқда.

Шу ўринда Юртбошимизнинг «Бобур ва жаҳон маданияти» музейи хотира дафтаридағи дастхати, андижонликлар ҳакидаги фикрларини келтириб ўтишни жоиз деб биламан.

«Бобомиз Захириддин Мұхаммад Бобур номи билан ҳар қанча фахрлансак арзийди. Ўзбек халқининг довругини дунёга таратган улуг аждодларимиздан бири ўлароқ, ул зот бизни тарихимизни қадрлашга, келажакка буюк ишонч билан қарашига ўргатади.

Бобур Мирзо номи билан атап миси Миллий боғнинг, шоир рамзий мақбараси ҳамда «Бобур ва жаҳон маданияти» музейининг барто этилиши – халқимиз тарихида янги, озодлик замонига қадам қўйилганидан яхши бир мусдадир.

Захириддин Мұхаммад Бобур каби мумтоз инсонларни дунёга берган халқ ҳеч қачон хор бўлмайди, муқаррар тарзда саодатга эришади.

Қадимий Андижон аҳлиниң бу каби савобли ишлари кўпайсин ва бошқа ватандошларимизга ибрат бўлсин.

Бобур Мирзо бобомизнинг сиймосини агадийлаштиришига қўл урган инсонларга самимий миннатдорчилик билдираман.

Ўзбекистон Республикаси Президенти
Ислом Каримов
1994 йил, 4 октябрь».

Бу фикрлар бизда чексиз ғуур ва ифтихор туйгуларини уйғотади, айни вактда, янги-янги сафарларга ундаиди, янги-янги орзуларга илҳомлантиради.

Ҳали олдимизда киладиган ишларимиз қўп. Жамғарма тадбирлари, экспедициянинг бўлажак сафарлари... Бобур Мирзо ва бобурийларнинг ўлмас меросини ҳар томонлама чукур ўрганиш, тарғибу ташвиқ қилиш келгуси режаларимизнинг асосини ташкил этади.

Мен чинакамига баҳтли инсонман. Тақдир менга улуғ аждодларимиз, ҳалқимизнинг асрий орзу-армони бўлган мустақиллик неъматидан баҳраманд бўлишдек буюк саодатни насиб этди. Айни истиклол йилларида камтарона меҳнатларим давлатимиз томонидан юқори баҳоланиб, менга «Ўзбекистон Республикасида хизмат кўрсатган маданият ходими» фахрий унвони, «Меҳнат шуҳрати» ордени берилди. 2000–2005 йилларда Олий Мажлис депутатлигига сайландим.

Турмуш ўргоним Мўътабархон билан қўша қариб, ўғил-қизлар ва неваралар роҳатини кўриш насиб этганидан дилимда шукронам чексиз. Қизларимиз Дилоромхон ва Азизахон шифокорлик, ўғлимиз Зоҳиджон мұҳандислик касбини танлаб, эл-юртга хизмат килмоқда. Набира ва чевараларнинг орзу-ниятлари ҳам бир олам.

Кейинги ўн беш-ийигирма йил давомида кўп юртларда бўлдим. Турфа миллат ва элат вакиллари билан сухбатлашдим. Аммо дилимдаги иқрорим шуки, Ўзбекистондек файзли юртни, ўзбек ҳалқидек самимий миллатни учратмадим.

Яратган бизга ато этган тинч ва осуда юрт, феъл-авторимиздаги бағрикенглик, дастурхонимиздаги файзу баракот абадий бўлсин!

2013 йил, июнь

ТОГЛАР ОРТИДАГИ ҲАЁТ

Хитой ўлкасига саёҳат ва ундан кейинги мулоҳазалар

Президентимиз Ислом Каримовнинг Ўзбекистонни мустақил давлат деб эълон қилиши халқимизнинг асрий орзу-ниятларини рўёбга чиқарди. Истиқлол туфайли жамиятимизда юз бераётган сиёсий-ижтимоий, маънавий-маърифий ўзгаришлар халқимизнинг унут бўлиб кетаётган қадимий тарихи, урф-одат ва қадриятлари, миллий ғурурини тиклаш имконини бермоқда.

Маълумки, Ўзбекистонимиз ер ости фойдали қазилмаларига ніхоятда бой ўлкалардан. Айниқса, олтин, уран, кумуш, нефть, газ, рангли металлар ва бошқа қазилма бойликлари, ипак, пахта, қоракўл каби жаҳон бозорида харидоргир бўлган маҳсулотлари билан ҳам машҳур. Энди бу бойликлардан фақат ўзимиз учун, юртимиз фаровонлиги, халқимиз манфаатлари йўлида фойдаланамиз.

Энди юртдошларимиз чет мамлакатларга эмин-эркин чиқиш, улар билан турли иқтисодий фойдали ҳамкорлик ришталарини боғлаш, мутараққий дунё илм-фани ютуқлари, технологик янгиликлар, ишлаб чиқариш, савдо соҳаларидаги ўзгариш ва ютуқлар билан яқиндан танишиш имкониятга эга бўлди.

Шу йилнинг сентябрь ойида Халқ депутатлари вилоят кенгашининг раиси бошчилигидаги Андижон делегацияси Хитой Халқ Республикасида расмий сафарда бўлди.

Маълумки, Хитой ер юзидаги аҳолиси энг кўп мамлакат ҳисобланиб, айни пайтда бу ерда 1 миллиард 200 миллионга яқин киши истиқомат қилмоқда. Ер майдони жиҳатидан ҳам жаҳонда учинчи ўринда туради.

Мен хизмат вазифам нуктаи назаридан, 1992 йили иккинчи марта Хитой давлатида расмий сафарда бўлишимга тўғри келди. Шу боис таассуротларим билан кенгрок ўртоқлашишни лозим топдим.

Биз ўтирган «ИЛ-62» самолёти Москвадан ҳавога кўтарилиб, Хитой давлатининг пойтахти Пекин шаҳрининг гўзал ва барча замонавий қулайликларга эга Марказий аэропортига кўнди. Бу ерда бизни ҳамкасларимиз профессор Вань Чен Мин оиласи билан ва профессор Сум кутиб олиб, шаҳарнинг шимолий қисмида жойлашган шинамгина Сянь-Юнь-Лаоу меҳмонхонасига жойлаштиришди.

Дастлаб, Пекин шаҳридаги геосейсмология маркази ишлари билан яқиндан танишдик ва олинаётган натижагуолосалар юзасидан фикр алмашдик. Шаҳарнинг бир-бирини такрорламайдиган меъморий услубдаги осмонўпар бинолари ва зилзилага бардошли қилиб қурилаётган маданий-маиший турар жой обьектлари билан танишдик.

Хитойликлар ўз ҳалқининг тарихи ва қадимиий обидаларини кўз қорачиғидек асрайди. Чунончи, бу ҳалқнинг кўп асрлик ўтмишини эслатувчи Император саройини ва миллий дам олиш истироҳат боғини зиёрат қилиш асносида бунга яна бир бор ишонч ҳосил килдик. Шаҳарнинг шимолида 75 – 80 километрга чўзилган Буюк Хитой деворини томоша қилиш, кўм-кўк тофён бағридаги Императорлар мақбараси музейини зиёрат қилиш эса, ушбу ҳалқнинг тарихи билан янада яқинрок танишишга ёрдам берди.

Айни пайтда Пекиндаги бир қатор ишлаб чиқариш, майший хизмат кўрсатиш корхоналарида бўлдик. Хитойликлар ер ости фойдали қазилма бойликлари, айниқса, тошкўмир захираси билан фахрланадилар. Оғир ва ёнгил саноат тармоқлари, электроника соҳасидаги ишлар ҳам яхши йўлга қўйилган. Одамлар хориж билан ҳамкорликда ташкил этилган корхоналарнинг самарали фаолияти ҳакида мароқ билан сўзлашарди.

Хитойнинг Ички Мўғулистон провинцияси вакиллари билан учрашдик. Уларнинг таклифига асосан, ўлканинг маркази Хоҳ-Хуто шаҳрига «Боинг» самолётида тахминан бир ярим соатда етиб бордик. Бизни автоном провинция раҳбарияти вакиллари, Хитой Халқ Республикаси «Арём Байдзен» компанияси бошлиқлари кутиб олишди. Автоном провинцияда 21 миллионга яқин аҳоли истиқомат қиласди. Чорвачилик асосий тармоқлардан бири ҳисобланади.

Расмий қабул маросимидан сўнг бир канча кийим-кечак ишлаб чиқариш корхонасида бўлдик. Шаҳарнинг тозалиги ва, айниқса, кечки-тунги очик майдондаги бозорчалар, иштаҳани қитиқловчи таомлар бизда яхши таассурот қолдирди. Шаҳарга сафаримизнинг иккинчи куни бу ердаги ишбилармонлар ва турли корхоналар раҳбарлари билан музокаралар олиб бордик.

Шу куннинг ўзида кечқурун поездга ўтириб, тахминан 12 соат йўл босиб, эрталаб Пекин шаҳрига қайтиб келдик ва тушдан кейин ҳамроҳимиз профессор Вань Чен Мин билан самолётда 2 соатда Ҷэцзян провинцияси маркази, яъни шарқий Хитойдаги Нинбо шаҳрига етиб келдик. Бизни шаҳар марказидаги шинамгина дengizchilar меҳмонхонасига жойлаштиришди. Шарқ дengизи қирғогида жойлашган Нинбо порт шаҳар ҳисобланар ва 5 миллион аҳолиси бор экан.

Эртаси куни нонуштадан сўнг шу ердаги геосейсмология ишларини олиб бориш услублари ва сейсмик ҳолатга муносиб килиб яратилаётган уй-жой ва бошқа қурилаётган иншоотлар билан танишдик. Фунхуа шахрига кетаверишда тоғ ёнбағридаги кўм-кўк қирлар, мовий денгизга туташиб кетган гўзаллик бехад кўзни кувонтиради. Шаҳар раҳбарлари қабулида, сўнг тикув фабрикасида бўлиб, иш жараёни, ишчиларнинг иш шароити билан танишдик. Шаҳар атрофидаги тарихий жойларни зиёрат қилдик.

Ҳамроҳларимиз билан биргаликда машинада асфальт йўл бўйлаб тоғ тепасига қўтарила бошладик. Кўзни яшнатувчи боғлару шолипоя, полиз далалари ортда қолиб, чой плантациялари бошланди. Ҳамроҳимиз профессор Вань Чен Мин бу жойлар Чан Кайши туғилиб ўсган юрт, у кўп йиллар мана бу шаҳарчада истиқомат қилган, деди. Шаҳарча Чико деб аталади – 500 мингга яқин киши яшайди. Биз Чан Кайши уй-музейи ва бошқа жойларни зиёрат қилдик. Хитой дәхқонлари билан сұхбатда бўлдик. Улар ердан йилига уч марта ҳосил олиши ва турмушидан рози эканлари ҳакида гапиришди.

Тушлик тоғ ёнбағрида жойлашган «Ингман» («Уйқу») номли гўзал ва шинам емакхонада бўлди. Бу ердаги сұхбатдан билдикки, Фунхуа шахрида 2 миллиондан кўпроқ аҳоли яшайди. Шаҳарда 22 та кўшма корхона бўлиб, 3 миллиард юань миқдорида маҳсулот ишлаб чиқарабар ва Хитойнинг энг бой ўлкаларидан ҳисобланар экан.

Нинбо шахри яқинидаги спорт либослари ва болалар кийими ишлаб чиқарадиган «Минда» фабрикаси иш жараёни ва чиқарилаётган маҳсулотлар билан танишдик. Фабрика ишчилари 5 йил ичида 100 кишидан 1,5 минг

кишига кўпайган ва маҳсулотининг 80–90 фоизини чет элга чиқаради. Трикотаж фабрикаси маҳсулотини кўриш учун Муцина шаҳарчасида ҳам бўлдик.

Чжэцзян провинцияси раҳбарининг иқтисод ишлари бўйича муовини Гонинг айтишича, 7-8 йил бурун ҳозир биз кўриб турган мана бу равон ва кенг йўллар, бирбиридан чиройли уйлар, магазин ва бозорлар бўлмаган. Айтишларича, 90 фоиз ер деҳқонларга хусусий мулк килиб берилгандан сўнг ерга бўлган муносабат тубдан ўзгарган ва ҳосилдорлик жиддий равишда ўсган.

Шундан сўнг автомобилда Хончжоу шаҳрига йўл олдик. Йўл бўйи ўша яшиллик, бепоён далалардан қўз қувнайди. Шаҳар кўллар орасида, баланд тоғларнинг шундок ёнбағрида жойлашган бўлиб, нихоятда гўзал. Шаҳарнинг бир қисмидан Чонто деган катта дарё оқиб ўтади. Мўътадил иклими, мусаффо ҳавоси ва аҳолининг маданий даражаси юқорилиги билан Хитойда пешқадам ҳудуд ҳисобланар экан. Ҳамроҳларимизнинг айтишича, бу ерда яшаш, дам олиш учун барча шароит ва қуляйликлар мавжуд, шу боис, хорижлик сайёхларни бу ерда кўплаб учратиш мумкин.

Маҳаллий геосейсмология бюросида кузатув ишлари билан танишиш жараёнида навбатчи геолог шундай деди: «Хитойда Буюк Ипак йўли бизнинг шахримиздан бошланган. Шахримиз ўтмишда Хитой давлатининг пойтахти бўлган». Шаҳарнинг юқори қисмida жойлашган шинамгина меҳмонхонада икки кечада тунадик ва шундан кейин бу ердан 250 километр нарида, Шарқ денгизи бўйида жойлашган Шанхай шаҳрига автомобилда жўнаб кетдик. Катта йўл ойнадек текис, икки томони полиз ва сабзавот экинлари билан банд далалар, фойдаланилмасдан турган бирор қарич ерни кўрмайсиз.

12 миллионли Шанхай шаҳрига кечки пайт етиб келдик ва Шанхай университетининг хорижлик профессорлар турадиган меҳмонхонасига жойлашдик. Чет эллик олимлар ва касбдошлар билан мулокотда бўлдик, геосейсмологик ишлар билан ўртоқлашдик. Шаҳарнинг эътиборга сазовор жойларини, денгиз ости автомобиль, метро йўлларини томоша қилдик. Марказий бозорлардан ташқари, жойларда ҳар куни эрталаб соат 4 дан 7 га қадар ишлайдиган бозорлар ҳам мавжуд. Нима хоҳласангиз бор, денгиз жонивори дейсизми ё бошқа озиқ-овқат маҳсулотлари дейсизми, ҳаммасидан бор. Тонгги соат 7 га қолмай бозор ҳудуди ювилиб, покиза қилиб қўйилар экан. Дарҳақиқат, Хитой денгиз маҳсулотлари бўйича бежиз жаҳонда биринчи ўринда эмаслигини серфайз бозорларида намойиш қилмоқда.

Шанхай, Пекин ва бошқа йирик шаҳарларда асосий транспорт воситаларидан бири шахсий велосипедлар ҳисобланиб, кенг кўчаларнинг ҳар икки томонида велосипедчилар учун алоҳида йўл ажратилган. Ҳаракат қоидаларига қатъий риоя килинади. Шу боис Хитойнинг улкан шаҳарларида ҳам автомобильдан чиқадиган заҳарли газлар дунёning кўплаб йирик шаҳарларидағига нисбатан анча кам ва бу экологик ҳолатни яхши сақлайди.

Шанхай шаҳрини 5-6 кун зиёрат қилгач, самолётда Синцзян-Уйғур автоном провинциясига парвоз қилдик. Самолёт ҳавога кўтарилиши олдидан ҳар бир йўловчига Хитойда чиқариладиган маҳсус ичимликдан чиройли идишда улашиб чиқишиди. Парвоз давомида бежирим қоғоз идишларда чақилиб тозаланган ёнғоқ ва хандон писта улашибди, сўнгра иссиқ овқат, асал, бир марта ишлатиладиган кошиқ, санчки, пичоқ, туз, мурч ва қанд

солинган кутича қолдириб кетишиди. Бир оздан кейин бир марта ишлатиладиган идиша ҳар кимнинг таъбига қараб чой ёки қахва тарқатишиди.

Урумчи шаҳрида Синцзян-Үйғур автоном провинцияси Фанлар академияси меҳмонхонасига жойлашдик.

Эртасига Сейсмология институти ва Фанлар академияси иши билан танишдик. Шаҳардаги зилзилага бардошли иморатлар, шарқона услубда курилаётган иншоотлар бизда яхши таассурот қолдирди. Табиийки, бу ерда бизга таржимоннинг ҳожати қолмади. Урфодатларимиз, тилимиз ва динимиз бир бўлгани туфайли ўзимизни эркин сезиб, бир ҳафта қандай ўтганини билмай қолдик.

Шарқий Туркистон маркази Урумчи шаҳрида ўтган расмий қабул маросимидан кейин айрим ишлаб чиқариш корхоналарида, савдо марказлари ва бозорларда бўлдик. Гарчи катта-кичик дўконларнинг барчаси турли истеъмол моллари билан тўлиб-тошиб ётган бўлса-да, одамлар негадир бозорга ошиқар экан. Серфайз кўчалар бўйида ресторан, ошхона ва бир зумлик тамаддихоналар жуда сероб. Уларда хўрандаларга асосан хамирли таомлар, яъни лағмон, манти, мампар, ер тандирида пишган қўй гўшти ва кабоб таклиф қилинади.

Бирон жойда бирор маҳсулотга навбатда турганларни кўрмайсиз, турли спиртли ичимликлар мўл бўлса-да, маст-аласт кишини учратмайсиз. Аммо тиланчи ва девоналар қўзга ташланиб турди. Синцзян-Үйғур автоном провинцияси тараққиётда марказий ва шимолий Хитойдан орқада бўлишига қарамасдан, инсон учун биринчи навбатда зарур бўлган ҳамма нарса мавжуд.

Мана шундай саёҳатлар чоғида инсон ўйлашга мажбур бўлар экан. Шарқий Туркистон бизга яқин қўшни бўлишига қарамасдан, у ердаги мўл-кўлчилик ва

биздаги етишмовчиликлар сабабини қидиришга ҳаракат қиласан. Бозор иқтисодиётига ўтгандан кейин 7-8 йил ичидә ХХР халқ хўжалигининг асосий тармоқларини комплекс ривожлантириш борасида бирмунча ютукларни кўлга киритган. Қўшни Хитой давлатида ердан унумли фойдаланиш борасида ўрганадиган жойлар кўп, амалда бўш турган бир қарич ер йўқ ва дехқонлар йилига 3 марта ҳосил олишга муссар бўлмоқда. Ерга бўлган муносабат, қатъий тартиб-интизом, энг муҳими, аҳоли фаровонлиги ошишининг бош омили 80–90 фоиз ер дехқонларга бўлиб берилгани ва етиштирилган ҳосилнинг 70 фоизини ўзи хоҳлаган жойда сотиш имкони яратилганида. Бу тадбирлар қишлоқ хўжалигини ривожлантириш йўлида мустахкам асос бўлиб хизмат қилмоқда.

Хитойда корхона раҳбарлари ва бошқа иш билар-монлар учун чет элга чиқиш ва улар билан ҳамкорлик қилиш чегараланмаган. Бинобарин, хорижликлар билан ҳамкорликда қурилган минглаб завод-фабрикалар ўзининг ижобий самарасини бермоқда. Мулкчиликнинг давлат шакли билан бир қаторда хусусий ва кооператив шакллари ҳам амалда кенг кўлланилаётгани бозору дўконларнинг озиқ-овқат ва бошқа турли истеъмол моллари билан тўлиб-тошишига сабаб бўлаётир.

Ўзбекистон худудининг бир қисми, жумладан, Фарғона водийси Помир-Тяньшань тог тизмалари ён-бағридаги текисликда жойлашган бўлиб, геотектоник тузилишига кўра Ғарбий Хитой худудига жуда ҳам ўхшаш. Зилзилани олдиндан айтиш услубини ўрганиш ишлари ҳам ниҳоятда бир-бирига яқин. Хулоса қилиб айтганда, қўшни Хитой ўлкасида зилзиладан аввал содир бўладиган белгиларни ўрганиш ва зилзилага бардошли уй-жойлар барпо этишда ўртоқлашишга муносиб ишлар олиб борилмоқда.

Бизнинг фикримизча, юртимида ҳудуднинг сейсмик ҳолати ҳисобга олиниб, шунга лойик қўшимча металл ва бошқа курилиш материалларини ишлаб чиқариш ва замонавий уй-жойлар қуришимиз керак. Бунинг учун лойиҳалаш институтлари халқимиз ижтимоий турмушини яхшилашга қаратилган янги, кулай ва мустаҳкам иморатлар лойиҳасини тайёрлаб, қурувчиларга етказиб бериши лозим.

Ўзбекистоннинг ер ости бойликлари қадимдан илм-фан, савдо ва бошқа соҳа кишилари эътиборини ўзига жалб этиб келган. Бу борада Ўзбекистонимиз сайёрамиздаги давлатлар орасида салмоқли ўринни эгаллайди.

Ҳеч шубҳа йўқки, мустақил Ўзбекистон давлати ўз Юргбошиси раҳнамолигида бу бойликларни халқимиз эҳтиёжларини тўла қондириш ва турмуш шароитини яхшилашга сарфлайди ва тез орада илғор мамлакатлар, одамлари фаровон яшаётган юртлар каторидан муносиб жой олади.

Пекин шаҳрида ўтган бир сухбатда профессор Ши Чу Фарғона водийси ҳакида гапира туриб, шоҳ ва шоир Захириддин Муҳаммад Бобурни эслади. «Бобурнома»ни инглиз тилида ўқиган экан. Бу улуғ зотнинг табиатшунослик, география ва геология илмига қўшган ҳиссасини эслаб, «Ўтмишда шундай буюк ўглонларга бешик бўлган бу юртнинг истиқболи ҳам албатта порлоқ бўлади», деди. Мен хаяжондан тўлқинланиб кетдим ва фаҳр билан шундай дедим: «Ҳа, тўғри, улуғ аждодларимизнинг ўлмас руҳи бизларни уйғотмоқда. Иншооллоҳ, истиқболимиз ёркин».

Шунингдек, фурсатдан фойдаланиб, ўрта асрнинг буюк алломаси Бобур Мирзо бобомиз ҳакида, у туғилган маҳаллада ҳозир маҳобатли ҳайкали ўрнатилгани ва уй-

музейи ташкил қилингани тўғрисида сўзлаб бердим. Улуғ аждодимизнинг 510 йиллик таваллуд тўйини ўтказиш учун Андижонда Бобур номидаги экспедиция тузилаётгани хусусида ҳам гапирдим.

Суҳбатимизга бошқа олимлар ҳам кўшилишди. Мен бўлажак автоэкспедиция маршрути Ўзбекистон, Афғонистон, Покистон, Ҳиндистон, Непал ва Ҳимолай тоғлари орқали Хитой ўлкаси бўйлаб ўтишини айтдим. Шу билан бирга, Туркистон халқлари тарихида алоҳида ўрин эгалладиган Захириддин Мухаммад Бобур бо-бомиз давридаги Буюк Ипак йўлини тиклаш мақсадида Андижон – Ўш – Ўзган – Қашқар йўли билан карвон ташкил қилиш кераклиги ҳакида фикрлар билдирилди.

Ўзбекистон мустакил давлат бўлди. Энди у бошқаларга хомашё етказиб берадиган қолоқ бир ўлка бўлмайди, аксинча, тенглар ичра тенг, бизга дўст бўлган барча халқлар билан ҳамкорлик қиласди. Айни пайтда собиқ тузумдан қолган асоратлардан тезроқ қутулиш, мавжуд танг ҳолатдан чиқиб кетиш мақсадида кўрилаётган тадбирлар сўзсиз, яқин вактлар ичida ўз самарасини беради. Ўзбекистон жаҳонда ўзининг муносиб ўрнига эга бўлади. Мутараққий давлатлар қаторига албатта қўшилади. Бугунги кунда муҳтарам давлатимиз раҳбарининг олиб бораётган оқилона сиёсати ана шундай фикрга тўла асос беради ва шундай бўлишига ишончимизни оширади.

1992

БОБУР ИЗИДАН

Маълумки, Бобур номидаги ҳалқаро илмий экспедиция ўзининг дастлабки хорижий сафарини 1992 йил июль-август ойларида амалга оширган эди. Экспедиция 1993 йил 22 июлдан 13 сентябргача навбатдаги сафарда бўлиб, 20 минг километрга яқин масофани автомобилда босиб ўтди. Афғонистон, Эрон, Покистон ва Ҳиндистон ҳудудларида Бобур Мирзо ва бобурийлар барпо этган тарихий обидалар зиёрат қилинди, ўрганилди ва керакли маълумотлар тўпланди. Кутубхоналарда, музейларда, университет ва газета таҳририятларида учрашувларда мустақил Ўзбекистон давлати, республика Президентининг олиб бораётган ички ва ташқи сиёсати хақида, ҳалқимизнинг ўтмиши, бугуни ва келажаги тўғрисида тарғибот-ташвиқот ишлари олиб борилди. Бобомиз Захириддин Муҳаммад Бобур Андижонда таваллуд топгани, Фаргона вилоятининг ҳокими бўлгани, унинг «буюк мӯғул» эмас, ўзбек ҳалқининг буюк фарзанди экани мумкин қадар уқтирилди.

Бу галги илмий сафаримиз машҳур алломалар шахри, собиқ Ҳурросон давлатининг пойтахти Ҳиротдан бошланди. Дастлаб Ҳирот вилоятининг ҳокими Амир Исмоилшоҳ қабулида бўлиб, унга сафаримизнинг мақсад-вазифалари хақида гапириб бердик. Бизни ҳурмат-эҳтиром билан ташқи ишлар бўлими меҳмонхонасига жойлаштиришди, Анвар соҳиб деган

мансадбор шахс бизга бириктириб қўйилди. Форстожик адабиёти намояндаси Абдураҳмон Жомий, Ҳожа Абдулло Анзорий қабр-мақбараларини, Алишер Навоий, Ҳусайн Бойқаролар томонидан таъмирланган жомеъ масжид-мадрасасини, Ихтиёриддин қалъасини зиёрат киъдик. Ғазал мулкининг сultonи Алишер Навоий мақбараси ғоят ачинарли ҳолатга тушиб қолган экан. Улуғ шоирнинг деворлари ўпирилган, сафана тошлари синиб, борар йўлларини ўт босган мақбараси ёнида тиловат қилдик.

Бу буюк инсон сафanasининг шу аҳволга тушиб қолгани қалбларимизни ларзага солди. Ўзбек халқининг маърифатпарвар сultonларидан бири, шоир Ҳусайн Бойқаро мақбарасини сафаримизнинг иккинчи куни ҳиротлик тарихчи олим Анвар Мавлавий ёрдамида аранг топдик. Ҳурросон давлати ҳукмдорининг қабри ҳазрати Навоий қабридан 250–300 қадам нарида экан. Минг афсуски, мақбарадан биргина қабр тоши қолибди, холос.

Ҳирот шахри ва унинг атрофидаги Бобур Мирзо қадами етган эътиборга сазовор жойларда бўлиб, керакли маълумотлар тўпланди, кино, видео, фото тасвирлар олинди. Ҳирот ҳокими Амир Исмоилшоҳ билан иккинчи учрашувда Алишер Навоий, Ҳусайн Бойқаронинг қабр-мақбарасини биргаликда таъмирлаш йўл-йўриклари келишиб олинди. Шунингдек, афгон урушида бедарак йўқолган ўзбек жангчиларининг рўйхатини топширдик. У киши бу борада имкон қадар ёрдам килишга ваъда берди.

Ашҳобод орқали Эроннинг Машҳад шахрига бордик. Тус шахрида оламга машҳур «Шоҳнома» асарининг муаллифи Абулқосим Фирдавсийнинг шарқона услугуда яратилган нихоятда гўзал қабр-

мақбарасини зиёрат қилдик, таникли инглиз олими, «Бобурнома»нинг таржимони Уильям Эрскиннинг «Эрон ва Бобур» китоби, шунингдек, бобомиз Амир Темур ҳақида яратилган асарлар билан танишдик. Захиридин Бобурнинг Эрон давлати худудида жуда оз фурсат бўлишига қарамасдан, бу ҳақда шундай катта китоб ёзилгани ва унинг форс тилида еттинчи марта нашр қилингани қувонарлидир.

Кветта, Мўлтон ва Лоҳур Покистоннинг йирик шаҳарларидан ҳисобланади. Лоҳур давлат миллий музейи директори, профессор Сайфур Раҳмон, бобуршунос Ошиқ Муҳаммадхон Дурроний ва бошқа олимлар билан сұхбатларимиз экспедиция аъзоларининг бир умр ёидан чиқмаса керак.

Покистон халқининг Бобур ва бобурийларга ҳурмати баланд. Сулола ҳақида инглиз ва урду тилларида кўплаб китоблар чоп этилган. Баҳтли тасодиф туфайли Лоҳурда Бобур ҳақидаги янги видеофильмни томоша қилдик ва Андижонга олиб келишга муваффақ бўлдик.

Ҳиндистонга ўтиш бироз қийин кечди. Чегарадаги маъмурлар автомобиль билан ўтишимизга аввалига рухсат беришмади. Дехлига (500 км.) таржимон Аҳмаджон Қосимов иккимиз поездда бориб, Ўзбекистон давлатининг Ҳиндистондаги консули Аҳмаджон Лукмонов ёрдамида Ҳиндистон Ташки ишлар вазирлигига чиқдик. Экспедиция аъзоларининг чегарада ушланиб қолгани, вақтимиз бекор кетаётганини айтиб, сафаримиз моҳиятини тушунтирганимиздан сўнг ҳинд заминига ўтиш насиб этди.

Амритсар шаҳри орқали Панипатга етиб бордик. Операторимиз шаҳардан тўрт чакиримча наридаги бир манзилда Бобур ва Иброҳим Лўдий бошлиқ аскарлар тўқнашуви акс эттирилган ўйма расм-чизмаларни

тасвирга туширди. Шу жангда ҳалок бўлган ҳамюртларимизни хотирлаб, тиловат килдик. Комплекс деворига «Бобур ва Иброҳим Лўдий ўртасидаги жанг Ҳиндистон тарихида катта ўзгариш ясаган» деган ҳаққоний эътироф қайд этиб қўйилгани бизда чукур таассурот қолдирди.

Ўша куни кечки пайт Дехлини манзил тутдик. Консулимиз Аҳмаджон Лукмонов хузурида бўлиб, дастлабки таассуротларимиз билан ўртоқлашдик. Ҳиндистон давлати худудида бажарадиган вазифаларимиз борасида фикрлашиб, маслаҳатлашиб олинди.

Эртаси куни Ҳиндистон Ташқи ишлар вазирлигига расмий қабул маросими бўлди. Мустакил Ўзбекистон давлатининг келажаги ҳакида, бобурийлар тўғрисида мулоҳазалар айтилди. Дорилфунун, кутубхона, миллий давлат музейи, газеталар таҳририятларида, Ўзбекистон-Ҳиндистон дўстлик жамиятида ўтказган учрашувларимиз жамоатчиликда катта қизиқиш уйғотди. Қомусий асар «Бобурнома», Бобур девони ва бобурийлар фармонларининг кўлёзма нусхалари билан танишиб, уларни кино, видео ва фотоловҳаларга туширдик.

Жамна дарёсининг чап қирғоғидаги Бобур яратган Зарафшон – Ором (Ром) боғи, бу улуғ инсон яшаган уйлар ҳамон мавжуд. Бобурнинг жасади вақтинча сақланған пастки хонадан ва қаровсиз қолган аввалги мақбарасидан тупрок олиниб, уни 1993 йил 5 октябрь куни Андижондаги Бобур боғида қад кўтарган рамзий қабр-мақбарага жамоатчилик иштироқида қўйилди.

Бобур номли ҳалқаро илмий экспедиция автомобилда сафарга чиққани ҳақидаги хабар матбуот ва радио орқали Ҳиндистон жамоатчилигига ҳам етиб борган экан. Шунинг учунми, Ҳайдаробод шаҳридаги қадимий

Саларжанг музейи раҳбари, доктор Гехлат жаноблари, музей қўлёзмалар бўлимнинг мудири, профессор Раҳматулло Алихон ва бошқа олимлар бизни жуда яхши қарши олишди. Бу ерда «Бобурнома» ва Бобур девонининг туркий қўлёзмалари сакланар экан. Амир Темур ва бобурийлар шажараси йирик вакилларининг суратларидан фотонусхалар олишга мұяссар бўлинди. Музей ходимлари Бобур қўлёзма асарларининг микрофильм нусхасини олиб, бизга жўнатишга ваъда беришди. Эртаси куни жаноб Гехлатнинг шахсан ўзи бизни шаҳардан 30–35 чакирим узокликдаги Кутбшоҳ қалъасини зиёрат қилдирди ва қалъанинг тарихини батафсил сўзлаб берди.

Ҳиндистон бўйлаб сафаримизнинг энг қувончли воқеаларидан бири Ҳайдаробод шаҳрида бобурийлар авлоди Лайло Уммахоним ва унинг ўғиллари Зиёвуддин, Масиҳиддин Тусийлар билан учрашувимиз бўлди. Табаррук хонадонда меҳмон бўлиб, шу нарсани англадикки, улар аждодларига нисбатан юксак эҳтиром ва садоқат туйгусини сақлаб қолишган. Захириддии Муҳаммад Бобурдан тортиб сўнгги подшоҳ – Баҳодиршоҳ II – Зафаргача бўлган шажараларини яхши билишади. Биз бу оила аъзолари билан самимий сұхбатлашдик ва уларни Андижонга таклиф этдик.

Жайпур шаҳрида Ақбаршоҳ томонидан курдирилган кўл ўртасидаги қаср ва Амир қалъани кўриб, бобурийлар яратган шарқона услубдаги тарихий меъморчилик обидаларига яна бир бор тасаннолар айтмай илож йўқ эди. Шу куни телевизорда «Ҳиндистон тарихи» номли кўп серияли видеофильмнинг Шоҳ Ақбарга бағишланган қисми намойиш этилди, меҳмонхонада кўрдик. Фильм мазмунидан ҳинд халқининг улуғ бобомиз Бобур ва унинг аждодларига хайриҳоҳлиги

сезилиб турибди. Демак, бобурйилар мавзуи Ҳиндистон олимлари, ёзувчилари, киночилари дикқатини ҳамон ўзига тортиб келяпти экан.

Бобурнинг қадами теккан тарихий жойлардан ўтган вақтимизда «Бобурнома»да тасвирланган Тянь-Шань, Помир, Ҳиндикуш, Ҳимолай тоғ тизмалари ва уларга оид географик, геологик муҳит ва жараёнларни ўрганишга, қиёслашга ҳаракат қилдик, унинг буюк сайёх, бетакрор табиатшунос сифатида билдирган фикр-мулоҳазалари, илмий қарашлари бугунги кун билан нақадар яқинлигига ишончимиз комил бўлди. Келажакда Бобур Мирзо фаолиятининг барча йўналишлари бўйича алоҳида-алоҳида илмий экспедициялар тузилиб, изланишлар, тадқиқотлар олиб борилса, мақсадга мувофиқ бўлар экан, деган хуросага келдик.

Яқин кунларда экспедиция сафарлари маҳсули сифатида уч қисмли «Бобур изидан» видеофильми ва «Бобур номли ҳалқаро илмий экспедиция» деган ҳужжатли кинолента ҳалқимиз эътиборига ҳавола этилади. Шунингдек, келажакда сафарларимиз ҳақида китоблар ёзиш ва нашр этиш ҳам мўлжалланмоқда. 1994 йили Андижон – Ўш – Эргаштом – Қашкар довони орқали түя ва отлардан иборат карvon ташкил этиш ниятимиз бор. Бу сафардан мақсад – Ҳитой билан Ўзбекистон зиёлилари, олиму уламолари ўртасидаги маданий-илмий алокаларни, савдо соҳасидаги қадимиий муносабатларни қайта йўлга қўйишdir.

«Ҳалқ сўзи» газетаси,
1993 йил 6 ноябрь

БОБУР ҚАДАМЖОЛАРИ КЎЗГА ТЎТИЁ

Бу ажойиб инсон ҳақида эшитганимга анча бўлди. Ўз даврида турли юқори лавозимларда ишлаган, Андижонда катта-катта боғларни бунёд этишда фаол меҳнат қилган, касби бўйича геология-минералогия фанлари номзоди Зокиржон Машрабов кейинги йилларда бир талай савоб ишларга бошқош бўлиб келмоқда. Унинг саъй-ҳаракатлари билан Бобур номидаги халқаро жамғарма, жамғарма қошида Бобур номидаги илмий экспедиция тузилди ва қизгии фаолият олиб бормоқда.

Зокиржон Машрабов бошлиқ экспедиция буидан бир неча кун аввал навбатдаги бешинчи сафардан қайтиб келди.

– Зокиржон ака, аввало Бобур номидаги халқаро жамғарма фаолияти ҳақида сўзлаб берсангиз.

– Жамғармамизнинг дунёга келиши, кенг кўламда иш олиб бориши мустақиллигимизнинг бир меваси, десак, тўғри бўлади. Биласиз, бутун ўзбек халқи, хусусан, андижонликлар Бобур Мирзога ниҳоятда ихлосманд. Жамғарма тузилиши ҳақидаги хабар эълон қилиниши билан бизга хайриҳо бўлган, мадад қўлини чўзган инсонлар кўплаб топилди. Шаҳар четидаги уч юз гектарлик Боғишамол мавзеида «Боғи Бобур» барпо этилди. Бир неча йилдан бери «Жаҳон маданияти ва Бобур» номли музейимиз ҳам иш олиб бормоқда. Бу ерда энг ноёб кўлёзмалар, китоблар, суратлар ва бошқа

осори атикалар жам қилинганд. Ҳазрати Бобурнинг рамзий қабрини ҳам тикладик. Кобулда қандай бўлса, шундай яратдик.

— Илмий экспедициялар давомида қандай мақсадлар кўзда тутилди?

— Беш марта илмий сафарга чиқдик. Ўнта хорижий давлатда бўлдик. Нихоятда қимматли материаллар тўпладик. Видео ва фотосуратлар олдик. Охирги, яъни бу йил сентябрь-октябрь ойларида бўлиб ўтган бешинчи сафаримиз Амир Темурнинг 660 йиллигига бағишланди. Соҳибқирон бобомиз давридаги Ўрта Ер денгизидан тортиб то Ҳинд океанингача бўлган салтанат ҳудудини бугунги кунда машинада айланиб чиқдик. Ўзбекистондан бошланган йўлимиз, Қирғизистон, Хитой, Ҳиндистон, Туркманистон, Эрон, Афғонистон, Сурия, Покистонгача давом этди. 22 кун мобайнида кўп нарсаларни кўрдик, билдиқ, ноёб топилмаларга эга бўлдик.

— Сафарингиз Қашқардан бошланганинг сабаби нимада?

— Тўғри, биз дастлаб Қашқарга юз тутдик. Андижондан йўлга чиқиб, Тошкент, Чимкент, Бишкек, Рибачье орқали Турғат довонига етиб бордик. Бизни бу ерда Ван жаноблари билан Қайсарбек исмли уйғур йигити кутиб олди. Улар сафаримизда ҳамроҳ бўлди. Биз дастлаб буюк аллома Маҳмуд Кошгари, Офок Ҳожа, Юсуф Ҳос Ҳожиб, ажойиб шоиримиз Фурқатнинг қабрларини зиёрат қилдик, мақбараларини суратга олдик. Илмий-маърифий маълумотлар тўпладик, «Бобурнома»нинг уйғурча нашрини қўлга киритдик. Шаркий ҳамда Марказий Туркистон хаётига оид қимматли манбаларни топдик.

Албатта, қаерга борсак, ўша ерда қизғин сухбатлар ўтказдик. Чунки машинамизнинг олдига «Ўзбекистон»

деб ёзиб қўйганмиз. Тепасида эса юртимизнинг азиз байроби бор эди. Бирор ҳайрат билан, бирор ҳавас билан мустакил Ўзбекистон беш йил ичида қўлга киритган ютуклар, қурилаётган муҳташам бинолар ҳакидаги ҳикоямизни эшилди. Қашқардаги Олтин масжидда – ушбу масжид Марказий Осиёдаги энг катта масжид экан – бомдод намозини ўқидик.

– Ўрни келиб қолди: сафарда сизга кимлар ҳамроҳлик қилди?

– Имом-хатиб ҳожи Мухаммад Содик, Ўзбекистон телерадиокомпаниясининг Андижон вилояти бўйича муҳбири Фаррух Расулов, ҳайдовчи Илҳомжон Мамарозиков бирга бўлдилар. Мухаммад Содик араб, форс тилларини мукаммал билади. Фаррух эса тележурналист, видеофильмни суратга олишга хам моҳир тасвирчи. Ўзимга келсак, табиатшунос олимман, зарур бўлса, ошпазлик ҳам, ҳайдовчилик ҳам килдим.

Хуллас, Буюк Ипак йўли орқали Коракурум довони сари юрдик. Хитойнинг энг чекка шаҳри Тошқўрғонда дам олдик. Тошқўрғон ниҳоятда ажойиб ерга жойлашган. Қоракурум довони денгиз сатҳидан беш километр тепаликда. Худди шу ерда буюк Помир, Ҳиндикуш, Тибет тоғлари бирлашар экан. Буни қарангки, айни шу жойдан Хитой, Ҳиндистон, Афғонистон, Покистон, Тожикистон давлатларининг ҳам чегаралари ўтар экан. Бу табиатнинг ўзи бизга берган дўстлик йўлланмаси эмасмикан, деб ўйладим.

Ниҳоят, шимолий Кашмирга кириб бордик. Гилгет водийсининг маркази Гилгет шаҳрида дам олдик. Тарихий обидалар билан танишдик. У ердан Исломободга, сўнг Покистоннинг аввалги пойтахти Равалпиндига ўтдик. Шу шаҳарда халқаро Бобур номидаги жамғармамизнинг бўлимини очдик. Раҳбарини

сайладик. Айнан шу ерда элчихонамиз ходимлари билан учрашув бўлиб ўтди.

Ҳасанабдол шаҳридаги Бобур қурган бокка бордик. Богда Гулрухбегимнинг қабри бор. Бобур даврида экилган, тахминан, 300-400 ёшга кирган азим дарахтларни кўрдик. Барчасини видеотасмаларга кўчирдик. Лоҳур шаҳрида ҳам бўлдик. Бу ерда ҳам жамғармамизнинг бўлими ташкил этилди. Раҳбари тайинланди. Айникса, дилрабо Шалимар боғига, Жаҳонгир, Нуржаҳоннинг, Покистоннинг улуғ шоири Мухаммад Иқболнинг қабри зиёратларига борганимиз бизда катта таассурот колдирди. Бу ердаги Қизил қалъа ўзининг улуғворлиги билан барчамизни мафтун этди. Энг асосий ишимиз – мумтоз шоирамиз Зебуннисобегимнинг қабрини топишга муяссар бўлганимиз, деб ҳисоблайман. Афсуски, қабр яхши сақланмаган экан. Уни тез вақтлар ичида таъмир этмаса, ўзининг бор салобатини йўқотиши турган гап. Ҳаммамиз у зотнинг руҳи покларига Қуръон тиловат қилдик. Сўнгра, Кветта шаҳрига қараб йўл тортдик. Бобур даврида машҳур бўлган Мўлтон орқали манзилга етиб келдик. Кветтадан Афғонистонга 120–130 километр масофа бор эди, холос.

— *Афғонистон турногига ўтиши ҳам сафар режасида борниди?*

— Бор эди. Мақсадимиз Қандаҳор орқали Ғазнага етиб бориш, Маҳмуд Ғазнавий ва Беруний ҳазратларининг қабрлари қай аҳволда эканлигини кўриб, ўрганиш эди. Аллоҳга шукрки, ушбу ниятимизга ҳам етдик.

Биласиз, Ғазна шаҳри Султон Маҳмуд Ғазнавий давлатининг пойтахти бўлган. Қандаҳордан Ғазнага етиб бориш учун 23 соатда атиги 350 километр йўл босиб ўтдик. Йўллар хароб, атайлаб бўлса ҳам бунча-

лар ўйдим-чукур қилиб бўлмайди. Уруш бўлгач, шундай ахвол рўй берар экан-да...

Қандаҳорнинг энг ажойиб ёдгорликларидан бири – бу Бобур Мирзо тошга ўйдириб ишлатган Чилзина – қирқ зинадир. Зинанинг энг тепасида каттакон тош уй ҳам бор. Тоғнинг ҳар ер-ҳар ерида ғазалу насиҳатлар ўйиб ёзилган. Биз бу табаррук масканни чукур эҳтиром билан зиёрат қилдик. Бобур даврида курилган Чорбоққа бордик. Тўрт боғдан иборат бу ажойиб макондан фақат пойдеворлар қолган, холос.

Шаҳарга кириб Маҳмуд Ғазнавий қабри ёнига бориб, қабр қаердалигини сўрабмиз, денг. Мақбара биздан бор-йўғи 200–300 метр нарида экан. Айтиш керакки, у яхши сақланган. Султоннинг ҳақларига дуо қилдик. Сўнгра, Абу Райҳон Берунийнинг қабрини излашни бошладик.

Сафар олдидан таникли олимлар, Афғонистонда ўн йилдан ортиқ ишлаган вақтида Беруний қабрини бориб курган Ориф Усмон, Ҳасан Қудратуллаевлар билан сухбатлашган эдик. Улар Ғазнага қандай боришни, қабрни қандай топишни, ҳозирги ахволни айтишган эди.

Сўраб-суриштирганимиздан кейин маълум бўлдики, ҳали анча йўл юришимиз керак экан. Бозордан ўтиб бир жойга етганимизда икки кўчага дуч келдик. Биз тор кўчага бурилдик. Бир километрча юрганимиздан кейин мозорга дуч келдик. Сўраб-сўраб бобокалон олимнинг қабрини топдик. «Ҳиндистон», «Геодезия», «Қадимги ҳалқлардан қолган ёдгорликлар» сингари қомусий асарларнинг муаллифи, юртимиз довруғини жаҳонга таратган даҳонинг қабри бир ахволда эканлигини кўриб, кўз эмас, юрагимиз йиғлади.

Шу лаҳзада бир уюмгина тош, тупроқ, ғишт остида ётган Беруний ҳазратларининг нидоси қулогимга

киргандек бўлди: «Авлодим, хуши келибсан, мендек гарибни йўқлаб. Неча йиллардан бери Туркистон томонга қўзларим нигорон эди. Элу юртим омонми, тинчми? Менинг руҳи покимни шунчалар эъзозлаганинг учун Аллоҳ ёрлақасин. Интизорлик торта-торта ниҳоят Ватан ҳиди руҳимга ором берди. Сен билан бирга келган Ватан тупрогининг гарди мен учун қанчалар улуглигини билсанг эди».

Гоятда афсусландик: нега бундан 25–30 йиллар олдин келмадик? Нега ҳеч бўлмаса Афғонистон тупроги тинч пайтида бобокалонимизни бирров йўқламадик? Агар тезликда Беруний қабри узра бирон ёдгорлик ўрнатилемаса, у зот қабридан ном-нишон қолмаслиги шубҳасиз.

— *Фақат Беруний эмас, бошқа улуг аждодларимизнинг ҳам қабрлари анча nocte экан, деб эшиштамиш...*

— Ҳиротда Мусалло деган жой бор. Шу ерда Алишер Навоий, Ҳусайн Бойқаро, Абдураҳмон Жомий, Улугбекнинг онаси Гавҳаршодбегим, Бойсункур Мирзонинг қабрлари бор. Яшириб нима қиласман, улар ҳам nocte ҳам аҳволда. Жиддий таъмирга муҳтоҷ.

Ҳиротдаги зиёратгоҳларга бориб эҳтиромимизни изҳор қилдик. Ҳукуматнинг Маданият ишлари вазирлиги билан тегишли шартнома имзоладик. Шояд энди кўнгилдаги ишлар юришиб кетса.

Салкам бир ой давом этган сафаримиздан мурод – халқимизнинг қанчалар улкан маънавият ва маърифат эгаси эканини оламга яна бир бор кўрсатиш, қадриятларимизни излаб топиш, авлодларга арзигулик ибрат кўрсатиш эди. Назаримда, шу мақсадларимизга етдик. Лозим бўлса, очик ҳавода ухладик. Қотган нон билан тирикчилик қилдик. Йўлимизда ҳар хил тўсиклар бўлди. Лекин ҳамиша юрагимизда аждодларимизга

бўлган эҳтиром, муҳаббатни байрок қилдик. Ватан меҳри, унинг буюк тарихи, сохибқирон ҳазратларининг авлодлари изидан бориш бизнинг кучимизга куч қўшди. Тўпланган материалларнинг хаммасини Бобур музейига қўямиз. Учта хужжатли фильм яратиш ниятимиз бор. Хуллас, қилган ишларимиз ҳақида жамоатчилигимизга албатта ҳисобот берамиз...

Зокиржон Машрабов умрини Ватан маънавиятига, унинг тарихини ўрганишга баҳшида этган инсонлардан. Хайрлашаётганда у кишининг тилаклари битилган дастхатни олар эканман, «Илоҳим, сизга ўхшаган фидойиларимиз, юрт меҳрини қалбига жо этган ватандошларнимиз кўпайсин», деган фикр қалбимдан ўтди.

(Суҳбатдош – Темур Убайдулло)

*«Тошкент оқшоми» газетаси,
1996 йил 4 декабрь*

МУҚАДДАС МАСКАНЛАР БҮЙЛАБ

Экспедициянинг бу галги сафари 1996 йил 16 сентябрда бошланиб, 12 октябрда якунланди.

Сафаримиз Хитой Халқ Республикасининг қадимий ва навқирон шахри бўлмиш Қашқардан бошланди. Борган кунимиз «Чимбоги» меҳмонхонасига жойлашганимиздан сўнг, кечки пайт шаҳар айлангани чиқдик. «Ийдоҳ» марказий масжиди атрофидаги кўчаларни ва кечки бозорни томоша килдик. Эртаси куни XI-XII асрларда яшаган улуғ мутафаккир Юсуф Ҳос Ҳожиб қабрини зиёрат килдик, керакли маълумотлар тўпладик, видео, фото тасвирларга олдик.

Сўнгра, ўз даврининг машхур уламоси бўлган Офок Ҳожа мақбараси зиёратига бордик. Бу ердаги ходимларнинг айтишича, Офок Ҳожа ҳузурида шоир Бобораҳим Машраб 20 йилга яқин хизматда бўлган, кейинчалик ўша даврнинг илм-фан ва маданият марказларидан бўлмиш Балҳ шаҳрига кетган. Сўнгра Балҳ ҳокими Махмуд Қатағон томонидан катл этилган.

XIV асрда қўқонлик Ёқуббек Қашқарни забт этиб, бу ернинг ҳокими лавозимига кўтарилади. XI асрда курилган «Рози маҳсум» мозорини ободонлаштиради, «Ийдоҳ» масжид-мадрасасини курдиради. Даврлар ўтиб, масjid кенгаяди ва ҳозирги қиёфасини олади. Бу ерда бир вақтнинг ўзида 20 минг киши намоз ўқиш имконияти бор. Қурбон ва рўза ҳайитларида бу ерга келувчиларнинг сони 80 мингга этишини таъкидлашди.

Учинчи куни ХХР Ташқи ишлар вазирлиги Қашқар бошқармаси ходими Ван Юн Куй ҳамроҳлигига 200 километр йўл босиб, Ёркент шаҳрига кириб бордик. Шарқона кўринишдаги Ёркентда эшак ва от-арава, автомашина билан бирга кўпчилик аҳоли велосипеддан фойдаланар экан. Кўчанинг икки тарафи ҳам расталардан иборат. Ана шу расталар бўйлаб Ташқи ишлар вазирлиги Ёркент бўлими идорасига бордик. У ерда бизни идора раҳбари Жалолиддин ҳожи ва идора ходими, фурқатшунос олим ва ёзувчи, асли андижонлик Файзулло ҳожи қарши олди. Шоир Зокиржон Холмуҳаммад ўғли Фурқат қабрини зиёрат қилаётганимизда Файзулло ҳожи Фурқатнинг шеърлар тўпламини нашрга тайёрлаганини сўзлаб берди. Фурқатнинг мақбараси шаҳарнинг шимоли-шарқ қисмидаги Теракбоғ маҳалласида жойлашган. Қабристон мусофиirlар мозори деб, юритилар экан. Айтишларича, адаб Фурқатнинг қабри бу ерга кейинчалик кўчирилган.

Кейинги зиёратимиз Қашқар шаҳрига туташ Тошқўрғон шаҳри йўналишидаги Маҳмуд Кошғарий қишлоғига бўлди. Урумчи университети талабалари ва домлалари иштирокида Кошғарий музейи, қабрмақбарасини кўрдик. Музей директори Абдурасул Карим Маҳмуд Кошғарийнинг туркийтилли ҳалқлар орасида тутган ўрни, қолдирган илмий мероси ҳақида сўзлади. Бу буюк инсонга ўрнатилган ҳайкални жиҳозлаш ва атрофини ободонлаштириш ниҳоясига етказилаётгани ҳақида маълумот берди.

Гес дарёси бўйлаб тоғ ёнбағридан юриб, кечкурун Тошқўрғон шаҳрига етиб келдик ва «Помир» меҳмонхонасига жойлашдик. Тошқўргон деярли тош устига курилган бўлиб, Хитойнинг шарқий қисмida

жойлашган, 30 минг аҳолиси бор. Бу ерда VI асрда хукмдорлик қилган Қурбоншоҳ қалъаси қолдиқлари сақланиб қолган.

Покистонга довон орқали ўтилади. Бунга маҳсус тайёргарлик кўрдик. Тог йўлининг табиий ва иқлим талабларига риоя қилиб, спиртли ичимлик ичиш, чекиш, тўйимли овқат тановул қилишдан тийилиш ва иложи бўлса, кислород ёстиқчалари олиш лозимлигини экспедиция аъзоларига эслатдим.

Помир тоғида Кунжироб дарёси бўйлаб автомашинада 134 километр йўл босиб, Покистон ва Хитой чегарасига етдик. Кейин Буюк Ипак йўли – Қорақурум давонини кесиб ўтдик. Бу ерларнинг табиати ғоят сўлим, ҳавоси мусаффо, суви тиник. Бир сўз билан айтганда, ҳали кимёвий кашфиётлар етиб келмаган бу жойларга.

Корли тоғлар, чуқур ғорлар, шўх дарё ва шаршаралар бўйлаб Покистон давлати ҳудудига ўтдик. Табиатан гўзал шимолий Кашмир атрофида Покистон давлати чегарачиларига юзма-юз келдик. Расмий ишларни ўринлатгач, Гилгит шаҳрига бориб, «Хомот чоок Гилгит» меҳмонхонасида ҳордик чиқардик. Нонуштадан сўнг шаҳарнинг эътиборга сазовор жойларини зиёрат қилиб, Исломободга қараб кетдик. Бу ерда бизни Бобур номидаги Ҳалқаро жамғарманинг Равалпинди шаҳридаги бўлими мудири жаноб Акбар Аҳмад Ўзганий кутиб олди.

Эртасига унинг жунни қайта ишлайдиган фабрикасида бўлиб, иш жараёни билан танишдик. Сўнг Бобур номидаги Ҳалқаро жамғарманинг бу ердаги бўлими расмий очилиб, керакли ҳужжатлар расмийлаштирилди.

Исломободдаги Ўзбекистон Республикаси элчихонасида элчи Наим Ғоипов ва бошқа ходимлар билан

учрашдик, ўз илмий режаларимиз ҳақида маълумотлар бердик. Кечқурун Исломободнинг энг шинам, гўзал «Достоний қўх» тепалигидаги ресторанда экспедиция аъзоларининг Акбар Ўзганий ва элчихона ходимлари билан учрашуви уюштирилди. Суҳбат давомида эшитганимиз Исломобод – Пешавор йўналишидаги Ҳасанабдол шаҳри атрофида Бобур зурриётларидан бири Лоларухбегим номига қўйилган боғ ва унинг мақбараси борлиги, бу оромгоҳ бобурийлар томонидан яратилгани ҳакидаги фикрлар биз учун янгилик бўлди.

Эртаси куни Акбар Ўзганий хамроҳлигига Лоларухбегим боғига бордик. Боғнинг чап тарафида катта ҳовуз ва унинг ёнига мақбара қурилган. Акбаршоҳ амри билан Панжоб ҳокими Ҳумоюн ҳам шу ерга қўйилган. Шоҳ буйруғига биноан, бурнига олтин ҳалқа тақилган 12 та балиқ ҳовузга туширилган. Балиқлар ҳозирда ҳам мавжуд. 1902 йили мақбара остидан топилган тилла буюмлар ва балиқлар бурнидаги ҳалқа ҳам давлат ихтиёрига олиб кетилган экан.

Боғнинг этагида қизил тошдан кўрғон қилиб ўралган хиёбон бўлиб, унда Лоларухбегимнинг кабри жойлашган. У тўрт киррали катта тош устига ўрнатилган. Қизил тошнинг баландлиги икки-икки ярим метрга боради. Ҳозиргача яхши сакланган. Бобурий малика Лоларухбегимнинг абадий оромгоҳига ишлатилган тошқабр ва унинг сафана тоши сангтарошлиқ санъатида ягона бўлиб, бобурийлар бунёд этган меъморчилик тарихий обидаларининг ёрқин бир кўринишидир.

Ҳасанабдол – Исломобод йўналишида «Буюк мўгуллар» боғи бор. Шу боғда шаркона усулда қурилган ҳовуз ва қизил тошдан барпо этилган шийпонлар сакланиб колган. Боғ тофнинг атрофидан чикиб турган булоқлар ўртасига қурилган. Булоқлардан йигилган сув

боғ ўртасидан ўтадиган дарёга қўшилади. Шу жойдан Исломободга қараб юрилса, Лосарбоварий деган жойда Бобур қаздирган кудукқа дуч келинади. Афсуски, бизга кудук ёнига боришга рухсат берилмади.

Қадимий шаҳарлардан Лохурда «Ал-нур» меҳмонхонасига жойлашдик. Нонуштадан сўнг экспедициямизнинг Лохурдаги дўсти хожи Абдужалилни топдик ва унинг оғисида бўлиб, ўғли Муҳаммад Шафик биз билан бирга бўлишини илтимос қилдик. У Лохур шаҳрини яхши билади, автомашинани моҳирона бошқаради ва биз учун кулай томони – инглиз, урду, форс ва ўзбек тилларини яхши билади.

Шу куннинг ўзида Зебуннисобегимнинг Лохур – Мултон йўлидаги Мултон Роуд кўчаси бўйида жойлашган мақбараси зиёратига бордик.

Бобурий малика Зебуннисобегим 1639 или Дехлида туғилган ва 1707 или вафот этган. Дехлидаги Қизил қалъанинг Кобул дарвозаси ташқарисидаги боғ ёнидаги «Зарзарий» қабристонида дафн этилган. Мақбара 1885 или инглизлар томонидан темир йўл ўтказилиши муносабати билан бузиб юборилган. Шу боис, шоиранинг мақбараси Лохурга кўчирилган. Бу қачон ва кимлар томонидан амалга оширилгани бизга номаълумлигича қолди.

Бобурийлар авлодлари орасида забардаст шоира, етук олимга, уста созандаги маҳир хаттот бўлиб етишган Зебуннисобегимнинг қабри йўлдан 50 – 60 метр чамаси ичкарида бўлиб, сағана тоши ва мақбара сакланиб қолган. Мақбара анча нураган, ички, ташки безаклари тушиб кетган, супа атрофидаги тўрт қиррали фишталар кўчиб, таъмирталаб бўлиб қолган.

Зебуннисобегимнинг ҳозирги оромгоҳини саклаб қолиш, қабр-мақбарасини таъмирлаш, атрофини кў-

каламзорлаштириб, шу жойнинг ўзида музей ташкил қилишдек ишларни амалга ошириш зарурати туғилганини қалдан ҳис этдик.

Зебуннисобегимнинг қабр-мақбарасига яқин жойда Жаҳонгиршоҳ даврида яратилган «Шалимар», яъни «Севги маскани» боғи бўлиб, 40 гектар майдонни эгаллаган, атрофи баланд тош девор билан ўралган. Боғ шарқ меморчилик ва мусаввирлик анъаналари асосида бунёд этилган. Унда тўғри геометрик шакллардан тузилган гулзор, хиёбонлар бўлиб, архитектура обидалари бир-бирига мутаносибdir. «Шалимар» истироҳат боғида кад кўтарган мармар шийпонлар, сўрилар, тўрт бурчакли ҳовузлар ўргасидаги фавворалар, шунингдек, хоналар яхши сакланган. Бу ер ҳамиша дам олувчилар билан гавжум бўлиб, боғга чипта олиб кирилади.

Афғонистонда маҳаллий қўмондонлардан бири – Дин Муҳаммадга мурожаат қилиб, Бобур номидаги Халкаро илмий экспедиция аъзолари Ўзбекистон халқининг вакили сифатида Афғонистонга маданият ва маърифат, илм-фан тарғиби билан келгани ҳамда Марказий Осиё халкларининг маънавий қадриятларини тиклаш борасида кузатув-қидирув ишларини олиб бормокчи эканлигини тушунтиридик. Дин Муҳаммад 35 ёшларда бўлишига қарамасдан, салласини бошидан олиб, чўзилиб ётиб олди ва ёнимда ўтирган ҳожи Муҳаммад Содикқа секин пичирлади. Маълум бўлишича, у ўзининг бу «беадаблиги» учун биздан узр сўрабди, урушда олти жойидан жароҳатланган экан.

Соат чамаси уч яримларда диний арбоб Абдуманнон Муҳаммад Расул ҳамроҳлигига Қандахорга йўл олдик. Автомашинани мен бошқардим. Йўл ёмон, ўйдим-чукур, баъзи жойлари эса ўпирилиб, жар бўлиб кетган.

Қандаҳорга чошгоҳда етиб келган бўлсак-да, ташки ишлар бўлимида узок туриб қолдик. Йўлда давом этиш учун янги кузатувчи олиш керак эди. Тайинланган кузатувчи келмади. Шу атрофдаги соқчилар ва бошқа кишилар билан Фарруҳ Расулов ва Муҳаммад Содик сухбатлашиб, Ғазнага ўтиш имконияти тўғрисида маълумот тўплашди. Олий маълумотли врач йигитни топиб келишди. У Ғазнага олиб бориб келишга розилигини билдириди. Биз унга келишилган хизмат ҳакини тўлаш кафолатини бердик.

Сўнгра қадимий Қандаҳор шаҳрининг ғарбида жойлашган Сарпуза тоғининг баланд чўққисига, Бобур Мирзо қурдирган меъморий обида – қирқ зина орқали чиқиладиган гумбазли айвонни зиёрат қилгани бордик. Ушбу чўққига ишланган «Чилзина» тўққиз йил давомида бунёд этилган бўлиб, қурилиш ишларида 80 нафар сангтарош иштирок этган. Лекин бу обида ҳам ярим вайрона ҳолга келган. Уруш ўз асоратини қолдирган – ўқлар, портлатилган миналар пештокларга ўз муҳрини босган. Бу обиданинг қиммати шундаки, Бобур тош деворларга ўз байтларидан ва фарзандлари Мирзо Комрон, Мирзо Аскарий ва Мирзо Ҳиндолга аталган шеърий ўгитларни ёздирган, деб айтишди.

Шундан сўнг Чорбоғга йўл олдик. Чорбоғ Қандаҳор шаҳрининг шимоли-ғарбида жойлашган бўлиб, Қандаҳор – Ҳирот катта йўлининг ўнг томонида, 1,5-2 чақирим ичкарида. Чорбоғнинг тор кўчалари, ариғу зовурлари ҳозир ҳам сақланган. Ҳумоюншоҳ Эрондан Ҳиндистонга қайтаётуб, шу боғда бир муддат тўхтаган. Ҳозир бу боғ ерлари хўжаликларга бўлиб берилган. Чорбоғда анорлар баланд ўсар экан. Унинг «тутяниш» аноридан тановул қилдик. Кұва анорини эслатади.

Эндиғи йўлими – қадими Фазнага. Йўл оғир, тез юриб бўлмайди. Бир соатда аранг 15 километр масофани босиб ўтдик, холос. Бу йўлда юрадиган машиналарга қўшимча рессор – амортизатор ўрнатишар экан. Акс ҳолда, ҳар қандай зўр машина ҳам бардош беролмас экан: бизнинг «Тойота» русумли оқ тулпор Ўзбекистон байроғини ҳилпиратганча аста-секин олға интилмоқда.

Кундуз соат 12 ларда Фазнага кириб бордик. Катта-кичик ҳарбийлар атрофимизни ўраб олиб, машинани четроққа олишимизни буюришди. Қуролланган икки ҳарбий келиб, ҳужжатларимизни текширувга олиб кетди. Бошқа бир зобит аскари билан келиб машинани тинтувдан ўтказди ва нима мақсадда келганимиз ҳақида сўраб-суриштириди. Биз улар билан иложи борича камгап бўлдик. Расмий саволларга расмий жавоб беришдан нарига ўтмадик.

Таржимонларимизнинг иккиталиги кўл келди. Диний уламолар ва кўча-кўйдаги одамлар билан сухбат ҳожи Муҳаммад Содик, расмий ходимлар билан мулоқот эса Фаррух Расулов кўмагида олиб борилди.

Бир соатдан кўпроқ вақт аскарлар ихтиёрида бўлдик. Биз бу тўсиқдан ҳам ўтиб, теварак-атрофни суриштиrsак, Маҳмуд Фазнавий мақбарасига яқин жойда тўхтаганимизни айтишди. Лекин Беруний ҳақида аниқ бир гап бўлмади. Маҳмуд Фазнавийнинг қабр-мақбараси Фазна – Кобул катта йўлининг сўл томонида, марказий бозор атрофидан 2,5-3 километр шимол тарафда жойлашган экан. Деярли яхши сақланган. Катта йўлдан тахминан 200 метр ғарбга караб зинапоя орқали баландликка қўтарилса, бир томони очиқ қабр-мақбара кўринади. Мақбара атрофи девор билан ўралган бўлиб, ҳовли ичидаги уч-тўрт туп дарахт соя ташлаб турибди. Мақбаранинг ички-ташқи безаклари шарқона услубда

ишлиланган. Биз мақбаранинг ичкарисига кирдик. Ҳожи Мұхаммад Содик Қуръони карим оятларидан тиловат қилди.

Мақбаранинг ички деворларига Маҳмуд Ғазнавий-нинг мадхи битилган мармар тошлар ўрнатилган. Пастроқда, кичкина хужрали мадрасада болалар ўқитиляпти, уларнинг мударриси билан Ғазнада сақланиб қолган тарихий обидалар тўғрисида, хусусан, Абу Райхон Беруний қабри жойлашган ҳудудга қандай бориш мумкинлиги ҳақида сұхбатлашиб, зарур маълумотлар олдик.

Тарихдан бизга маълумки, Бобур Мирзонинг укалари – Жаҳонгир Мирзо ва Носир Мирзо қадимий Ғазна шаҳрининг ҳокими бўлган ва шу ерда умргузаронлик қилган. Улар ҳақида ва уларнинг абадий оромгоҳлари тўғрисидаги қизиқишиларимиз, афсуски, ижобий натижа бермади.

Қандаҳор томонга юриб, қандайдир бозор ичидан ўтдик, арава ҳам сигмайдиган тор йўлак устида тўхтадик. Бизни бошлаб келган мударрислардан бири, чолдевор тагидаги қабрни, аниқроғи, қабрдан қолган бир уюм колдиқлар – парчаланган сағана тоши ва бузилган мақбара бўлакларини кўрсатиб, «мана шу» деганида, дастлаб кўзимизга ишонмадик. Наҳотки, бутун дунёга донғи кетган буюк инсон – Абу Райхон Берунийнинг сўнгги маскани шундай ҳароб ва ғариб бўлса?!

Маҳаллий аҳолининг айтишича, Афғонистоннинг сўнгги подшоҳи Зоҳиршоҳ даврида нималардир (эҳтимол бойлик) қидирилиб қабр очилган, унинг иккинчи бир ёнида яна бошқа одамнинг бош суюги ҳам чиқкан экан. Бу, балки Берунийнинг яқин кишиларидан бирининг суюги бўлиши ҳам мумкин, деган тахмин хаёлимиздан ўтди.

Абу Райхон Беруний нафақат ўзбек халқи, балки бутун башариятнинг буюк фарзанди. Мамлакатимизда унинг номи билан аталувчи шаҳар ва туман бор. Кўчалар, хўжаликлар, олий ўқув юртлари унинг номи билан юритилади, маҳобатли ҳайкаллар қўйилган, Беруний номидаги давлат мукофоти, стипендиялар мавжуд. Алломанинг номи ва у қолдирган мерос ўлкамизда шу қадар юксак эъзозлангани ҳолда, унинг абадий оромгоҳи ўзга юртда бунчалар ғариф ва хароб бўлиб ётгани ниҳоятда ачинарлидир.

Яратганга беадад шукрлар бўлсинки, Ўзбекистонда Президент Ислом Каримов раҳнамолигида тарихий обидалар, зиёратгоҳлар таъмирланмоқда. Улуғ аждодларимизнинг хотираси адабийлаштирилмоқда, қолдирган мероси чукур ўрганилмоқда. Биз умид қиласизки, вақти-соати келиб, қўшни Афғонистонда тинчлик-осойишталик мустаҳкам қарор топгач, бу заминда мангур ором топган буюк ватандошларимизнинг қабр-мақбараларини обод қилиш имкони туғилади. Биз бу йўлда қўлимиздан келган барча ишларни қилишга тайёр эканимизни фурсатдан фойдаланиб, яна бир бор изҳор этмоқчиман.

*«Андижоннома» газетаси,
1997 йил 14 февраль*

ЎН ОЛТИНЧИ АСР БУНЁДКОРИ

«Ўн олтинчи аср бунёдкори» номли китоб 1918 йили таниқли инглиз олимни Вильям Рашибрук томонидан ёзилган бўлиб, бу асарда Бобур буюк олим, бунёдкор шоҳ деб улуғланади.

Бобур номидаги халқаро жамғарманинг 2000 йил октябрь-ноябрь ойлари давомида сафарга чиққан илмий экспедицияси Ҳарольд Лэмбнинг «Бобур-йўлбарс», Анна Флора Стилнинг «Тож кийган дарвеш», Румер Годеннинг «Гулбадан», Уильям Эрскиннинг «Бобур давридаги Ҳиндистон», Гулбаданбегимнинг «Ҳумоюннома» ва бошқа жами 35 та ноёб китоб ва қўлёзма асарларни юртимизга олиб келишга мұяссар бўлди.

Шунингдек, «Бобурнома»нинг Ж.Лейден-Эрскин, А.Бевериж ҳамда америкалик олим У.Текстон томонидан инглиз тилига, Ж. Граммоннинг француз тилига қилган таржималари ҳам олиб келинди. Таниқли япон олими Эйжи Мано «Бобурнома»нинг танқидий матнини япон тилида яратди. Ўзбекистонлик бобуршунос олимлар ушбу асарни «илмий жасорат», деб муносиб баҳоладилар. Уч томлик ушбу асар ҳам ҳозирда Бобур богидаги музейдан жой олди.

Шу кунларда Эйжи Манодан мактуб олдик. Маълум бўлишича, у «Бобур даври» номли янги асарини ёзиб тутатган ва нашриётга топширган.

Юкорида номлари келтирилган асарларда буюк Бобуршоҳнинг дунё ҳалклари орасида тутган ўрни,

олижаноб инсоний хислатларига ҳаққоний баҳо берилган, «Бобурнома» – «Бутун тарихда яратилган ёзма ёдгорликларнинг энг бебаҳосидир», деб тан олинган. Лейн Поул Бобурни «Шарқ тарихидаги энг мафтункор шахс», бу буюк инсон яратган «Бобурнома» асарини беназир тарихий хужжат, деб қайд этади. «Ўша даврга хос воқеликни тасдиқлайдиган бирон-бир хужжат бўлмаса, бу масалада «Бобурнома»га мурожаат қилиш керак», деб ёзади у. Яна бошқа бир инглиз олими эса бу китобни «Осиёнинг ҳаққоний тарихини акс эттирадиган асар», деб таъкидлайди. «Бобурнома» дунёда яратилган автобиографик асарлар ичида энг аълоси деб ҳисобланади. Бобур «Омадли навқар бўлиши билан бирга, нозик дидли адаб, танқидчи ҳам эди. Унинг жангларидан ҳам, нафис мажлисларидан ҳам шоирлик нафаси уфуриб тураг эди», дейди бошқа бир олим.

«Осиё шахзодалари орасида Бобур билан ёнма-ён қўйиладиган шахзода бўлган эмас» ёки «у ўз даврининг энг зўр шахзодаларидан эди». «Унинг тарихдаги ўрни ўтмишдаги шохлар орасида энг катта мақтовга сазовордир». «Ислом дунёси тарихидаги энг жозибадор шахслардан эди»... Бобур Мирзо ҳақида жаҳон миқёсида айтилган бундай юксак таърифларни яна кўплаб келтириш мумкин.

Бобур садоқатли ўғил, меҳрибон ота, вафодор эр, содик дўст ва оқибатли қариндош эди. У кекса хешларининг хурматини жойига қўяр ва уларга ҳамиша ёрдам берар эди. Фарзандларининг ўқиши ва шахсияти шаклланишига алоҳида эътибор билан қаарди. «Дунё – интилганники», дер эди ва бепарволик, хотиржамликка йўл қўймас эди. «Бегамлик ва дангасалик (локайдлик) инсон зотига муносиб эмас», деган эътиқод билан яшарди.

Бобур учқур чавандоз, моҳир мерган, чаққон қиличбоз ва толмас овчи, хушчақчак, жасур ва хушфеъл инсон эди.

Бу борада «Тарихи Рашидий» китобининг муаллифи Мирзо Ҳайдар шундай дейди: «Ҳазрати Бобурни ҳисобсиз олижаноб фазилатлар буркаб туаридики, мардлиги ва саховатпешалиги унинг ҳамма хислатларидан устун эди».

Бобур Мирзо ўзининг яратувчанлиги, бунёдкорлиги билан машхур бўлган. Албатта, даврлар ўтиши билан яратилган иншоот-иморатлар, саройлар, меъморчилик обидалари, боғу роғлар ўша даврҳукмдори шухратининг ёдгори бўлиб қолаверади. Қувончли томони шундаки, бу борада Бобур ва бобурийлар шухратининг бунёдкорлик белгилари бутун оламга машхур бўлиб, асрлар давомида тан олиниб келмоқда.

Ана шу буюк, мўътабар сиймо Бобур Мирзо ва бобурийлар қолдирган бой илмий-маданий манбаларни тўплаш ва ўрганиш мақсадида йўлга чиққан Бобурномидаги халкаро илмий экспедициянинг навбатдаги саккизинчи сафари роппа-роса 51 кун давом этди. Шу муддат ичida олинган таассуротлару йигилган маълумот ва шарҳларни бир мақолага сифдириш мушкул, албатта.

Аслида Ҳиндистон сари килинган иккинчи сафар эди бу. Лекин бу бепоён мамлакат ҳудудида Бобур ва унинг авлодлари хаёти ва ҳукмдорлик фаолияти билан боғлиқ тарихий жойлар, мозийгоҳлар, улар ҳақидаги китоблар, қўлёзмалар сақланаётган кутубхоналар шу қадар кўп ва бойки, уларни бир эмас, ўнлаб сафар мобайнида ҳам тўла кўриш, ўрганиш қийин. Қолаверса, бу галги режаларимиз, ниятларимиз Ҳиндистонгина эмас... орзу-умидларимиз катта эди...

Шундай қилиб, биз, экспедициянинг беш нафар аъзоси 2000 йилнинг 11 октябрь куни Бобур Мирзонинг ота юрти Андижоннинг шундок кафтида яшнаб турган Бобур боғидан Қиргизистон-Эргаштот йўналиши орқали Хитой Халқ Республикасига жўнаб кетдик.

Ёш адабиётшунослардан бирининг республика вақтли нашрларидан бирида эълон қилинган мақоласида Заҳириддин Мухаммад Бобурнинг «Асрори мусикиюн» асари қўлёзмаси Қашқарнинг марказий кутубхонасида сақланмоқда, деган маълумот берилган ва табиийки, биз ҳозирча номаълум бўлган мазкур қўлёzmани ўз кўзимиз билан кўриб, иложи бўлса, нусха олишни экспедиция дастурига киритган эдик. Қашқарнинг музейлари, марказий ва бошқа кутубхоналарини хўб изладик, афсуски, бундай асар борлигини улар ҳатто эшитмаган ҳам экан. Фақат китоб дўконларини қидириб, «Таворихи мусикиюн» деган рисолани топишга муяссар бўлдик ва бу китобчани нашрга тайёрловчилардан бири Ҳамид Темур (Урумчи-Пекин)га кўнғироқ қилиб, у кишининг ҳам таассуфини эшитгач, қўлёzmанинг Қашқарда йўқлигига ишонч ҳосил қилдик.

«Таворихи мусикиюн» рисоласида бир қанча буюк алломалар қатори Бобурнинг ҳам мусиқа ҳакидаги фикрлари келтирилган эди. Мазкур қимматли асарни тез орада ўзбек тилига ўғиртириб, чоп этиш ниятидамиз.

Шарқий Туркистонда Маҳмуд Кошғарий, Офоқ Ҳожа, Юсуф Ҳос Ҳожиб каби буюк аждодларимиз ётган муборак қабрларни зиёрат қилиб, улар ҳакидаги маълумотларни тўплаб, йўлга чиқдик.

Қанча-қанча поёнсиз сайхонликлар, тошлоқ чўллар, беш ярим минг метр баландликдаги Қорақурум довонларини, Покистон пасттекистликларию осмонўпар тофларини ортда қолдириб, Ҳиндистон заминига оёқ қўйдик.

Панипат шаҳри ёнидаги жангда ҳалок бўлганлар, жумладан, мағлуб Иброҳим Лўдийнинг қабрига ҳам ўтиб, уларнинг руҳига багишлаб тиловат қилдик.

Маътумки, экспедициянинг Ҳиндистонга қилган биринчи сафари чоғида бобурийлар авлоди – ҳайдар-ободлик Тусийлар хонадонининг аниқланиши муҳим янгилик бўлган эди. Кейинги сафарларимизда яна бир бобурий авлод – Покиза Султонбегим кашф этилган эди. Унинг Дехлидаги хонадонига ташрифимиз жўшқин ва кизиқарли сұхбат-мулоқотимиз бу галги сафаримизнинг сермазмун бобларидан бири бўлди, десак, янгишмаймиз. Покиза Султонбегим уйидаги тарихий суратлар, ҳужжатлар, газета ва журналларда чоп этилган мақолалар, эсдаликлар бу мўътабар аёлнинг Баҳодиршоҳ Зафарга, яъни, бобурийларга бошқалардан ҳам кўра яқинроқлигини тасдиқлар эди.

Лондон шаҳрида яшаётган опаси Тоҳира Султонбегим эса шоири экан. Покиза Султонбегим бизга опасининг урду тилида нашр этилган шеърий китобини тухфа қилди. Покиза Султонбегим бизга Ҳиндистон озодлиги учун курашган Баҳодиршоҳнинг аянчли қисмати, унинг сургунда (Бирмада) умрининг сўнгги нафасигача она шаҳри Дехлига талпиниб яшагани ҳақида гапириб бераркан, бобокалонининг мусофири юртда жон таслим қилгани, ўша давларда унинг жасадини Дехлига келтириб дафн этиш тўгрисидаги васиятини амалга ошириш имкони бўлмагани, лекин, кейинчалик Рангундаги қабри тупроғидан олиб келиниб, Дехлидаги Қутб минор мажмуаси худудига қўйилганини афсус ва алам билан айтиб берди.

Манбаларда учратилмаган бу хабар биз учун янгилик эди. Афсуски, Қутб минорни зиёрат қилиш

асносида ушбу хабарнинг исботини тополмадик. Кутб минор хиёбон-ховлисинг ҳар жой, ҳар жойида қабрлар бор эди, лекин бу ёдгорлик мутасаддилари ва бошқа шахслар Баҳодиршоҳ II қабридан олиб келинган тупроқ ҳақида аниқ бир гап айтиб беришолмади.

Агра. Бу тарихий шаҳарнинг бобурийлар ҳаётида алоҳида ўрин тутиши ҳеч кимга сир эмас. Бугунги кунда Самарқанду Бухоро, Хива каби кўхна ёдгорликларга бой, машҳур зиёратгоҳ Агра шаҳрида Бобур Мирзонинг сўнгги тўрт йиллик умри кечган. Бобур подшоҳлик қароргоҳи учун айнан шу жойни танлаган, боғлар барпо қилган, уни Ҳиндистоннинг обод ва кўркам марказига айлантирган.

Биз Агра зиёратини шаҳарга кираверишдаги Акбар қалъасидан бошладик. Ҳиндистон халқининг севимли, эъзозли подшоҳларидан бири бўлган, Жавоҳарлаъл Неру юксак баҳолаган Акбаршоҳ бу муazzам мамлакатда кўп улуғ, хайрли ишлар қилган, чунончи, шаҳарлар, қалъалар қурдирган, боғлар яратган. Умуман, Ҳиндистонда Акбаршоҳ номи билан боғлиқ шаҳарлар, тарихий ёдгорликлар кўп. Ҳинд ва инглиз шарқшунос ва бобурийшуносларининг китобларида ҳам Акбаршоҳ ҳаёти ва фаолиятига кенг ўрин берилади.

Искандария мавзесида жойлашган Акбар қалъаси нафакат Агра, балки бутун Ҳиндистонда саёҳатчилар билан ҳамиша гавжум бўладиган зиёратгоҳлардан биридир. Қалъа хиёбонлари, ям-яшил майсазор ва пальмалари билан ҳар қандай кишини ўзига ром этади. «Бобурнома»да зикр этилган гўзал жайронлар солланиб, зангори тўтилар шохдан-шохга учиб-кўниб юришибди.

Мақбаралар ичидаги қабрларда Акбаршоҳ, унинг оила аъзолари ва бошқа яқинлари дафн этилган. Улар

пойида Қуръони карим оятларидан ўқиб, ўз инсоний бурчимиизни адо этдик.

Кейин Тож Маҳал зиёратгохига жўнадик. Кўчаларда транспорт қатнови ниҳоятда тифиз, одам кўп, юриш қийин. Булар Тож Маҳални кўришга ошикаётганлар оқими. Тож Маҳал Ҳиндистонни жаҳонга танитган обидалардан бири. Уни кўриш учун дунёning ҳамма томонидан келишади. Кириб-чиқувчиларнинг кети узилмайди, ҳамманинг дилида ҳаяжон, кўзида, юзида ҳайрат ифодаси. Улар «Мұхабbat ва садоқат» ёдгорлиги деб аталмиш бу муazzам обида ижодкорига таҳсиллар ўқииди, оғаринлар айтади. Биз эса ғуурурдан, ифтихордан ҳаяжонланамиз. Чунки Тож Маҳалнинг, бу мўъжизанинг ижодкори, яратувчиси, муаллифи Бобур Мирзонинг чевараси Шоҳ Жаҳондир, бу буюк обида унинг садоқатли аёли Мумтоз Маҳал хотирасига битилган гўзал асардир.

Обиданинг ички деворларидағи оппоқ мармар сатҳига ишланган нақшлар, Қуръони карим оятларининг чиройли битиклари, кабр тошларига чекилган бетакрор гулбезаклар ҳайратга солади кишини...

Ховли-хиёбондаги ҳар бир дарахтнинг рақамланиши – бу обидага, унинг худудидаги ҳар бир нарсага мамлакат ҳукуматининг катта эътиборидан далолатdir. Тож Маҳал мозийгохида ушбу кошонанинг яратилиш тарихига, бобурий ҳукмдорлар, хусусан, Ақбар, Жаҳонгир, Шоҳ Жаҳон ҳаётига оид ашёлар, осори атика буюмлар, фармонлар, мақбарага ишлатилган мармарлардан намуналар сақланмоқда. Деворлардаги суратларда Шоҳ Жаҳон, Мумтоз Маҳал, Ақбар, Нуржаҳон ва бошқа бобурий зотларнинг сиймолари акс этган...

Жамна дарёси бўйида Бобур Мирзо яратган Оромбог дарвозаси ёнидаги бокқа кириш учун чипта сотиладиган

хонани кўриб, ҳайрон қолдик. Ўтган сафар келганимизда боғ дарвозаси очик, унга қараб турадиган боғбон бор эди, холос. Чипта сотувчиларга биз Бобур юртиданмиз, дедигу, барибир, пул тўлаб бокка кирдик. Ичкарида яна бир кутилмаган ҳолатга дуч келдик: боғ йўлларига мармарсимон ясси тошлар ётқизилиб, таъмирланмоқда, аёллар хиёбонларнинг ўскин майсаларини ўришмоқда. Бобур Мирзо қароргоҳи ва яшаш жойи бўлган шийпонли уйларнинг эшиклари ҳам кулфлоғлик, атрофи тозалаб саришталанганди. Ҳатто мутлақо қаровсиз ҳароба – Чобуржидаги Бобур Мирзо дастлаб дағн этилган қабр-мақбара ҳам қўрғонланиб, кириш эшиги қулфланган, демак, бу ер ҳам муҳофазага олинган.

Ўтган галги сафардан кейин Бобур номидаги халқаро жамғарма номидан мазкур жойларни таъмирлаб, ободонлаштириб, зиёратгоҳга айлантириш тўғрисидаги таклифларимиз билан Ҳиндистоннинг Ўзбекистондаги элчихонасига қилган ёзма мурожаатимиз, Дехли ва бошқа жойларда ўтган халқаро йигинлардағи сўзларимиз самарасимикин бу, дея бениҳоя кувондик.

Калькутта шаҳридаги Виктория музейини (бу ерда ҳам бобурийларга оид қурол-яроғлар, қўлёзмалар, китоб, бошқа хужжатлар бор) томоша қилгач, Бангладешга қараб йўл олдик. Сафарга жұнашимиздан аввалроқ бу ерда бўлган сув тошқини ҳақида эшитган эдик. Табиий оғат юз берган ана шу худуддан ўтар эканмиз, йўлнинг икки томонида – сув ичида қолиб кетган уй-жойларни, йўл бўйларига чиқиб, омонат чодир тикиб ўтирган одамларнинг ночор аҳволини кўриб, юракларимиз ачишди – кексалар, болалар юпун, яланг оёқ эди...

Бепоён шолизорлардан ўтиб, Бангладеш пойтахти Дакка шаҳрига кириб бордик. Консулхонамиз жойлашган Гулшан хиёбонини излаб топдик. «Ўзбекистон

ҳаво йўллари» миллий авиакомпанияси Бангладеш агентлигининг бошлиғи Оллоёр, унинг ёрдамчиси Орифжон, яқиндагина иш бошлаган консулимиз Фахриддин бизни мамнун кутиб олишди, зарур ёрдам кўрсатишди, уйларида девзирадан дамланган андижонча палов билан меҳмон қилишди. Энг муҳими, шу олис мамлакатда ҳам Ўзбекистонимиз ҳаво йўлларининг бўлими хизмат кўрсатаётганидан, Дакка кўчаларида инглиз тилидаги «Ўзбекистон ҳаво йўллари» деган кўрсаткич-ёзувларнинг чўғдай кўринишидан қувондик, фахрландик.

Аввал Ҳиндистон таркибида бўлган Бангладеш ҳудудида ҳам бобурийлар номи билан боғлик жойлар кўп: Акбарпур, Шохжаҳонпур деган мавзелар, шаҳарчалар, Дакканинг ўзида эса Лаълбоғ деб аталган қалъа-музей бор. Бу қалъа-музей ҳозиргacha биз Ҳиндистон ва Покистон мамлакатларида кўрган мозийгоҳлардан ҳам бошқачароқ, ўзига хосроқ эди.

Гап шундаки, Аврангзебнинг ўғли Аъзамшоҳ томонидан 1678 йили бошланиб, 1688 йили Бенгалия ҳокими Шойистахон Субадор томонидан куриб битказилган қалъа ҳовлисининг кун чиқиш томонидаги икки қаватли музей фақат бобурийларга бағишиланган эди. Музейнинг бойликлари кўп ва қимматли: кейинги бобурий хукмдорлар даврида ишлатилган пичоклар ва уларнинг ёғоч ғилофи, чопқилар, ҳар турли миликлар, маузер, қилич, темир қалпок, ўқ ўтмас темир нимча (совут)лар, ингичка, қаттиқ симдан майдада занжирсимон қилиб тўқилган аскарий либослар, Захириддин Муҳаммад Бобур, Носириддин Муҳаммад Ҳумоюн, Жалолиддин Муҳаммад Акбар, Жаҳонгир шоҳ, Аврангзеб Оламгир, Баҳодиршөҳ I, Муҳаммад Фарруҳ-Сияр, Аҳмад шоҳ, Азизиддин Муҳаммад

Оламгир, Мұхаммад шоҳ, Жалолиддин Мұхаммад шоҳ Олам, Шаҳобиддин Мұхаммад шоҳ, Муаззам шоҳ Аълам Баҳодир, Мұхаммад Иброҳим шоҳ, Муизиддин Жаҳондор шоҳ (исм-шарифлар ўша музей хужжатларида қандай битилган бўлса, шундай олинди) ва бошқа императорлар даврида зарб этилган танга пул намуналари, Аврангзеб, Аъзам шоҳ суратлари, Бобур Мирзо, Ақбаршоҳ фармонлари... Аврангзебнинг мана шу қалъани қуриш тўғрисида ўғли Аъзамшоҳга берган фармони битилган тош...

Биринчи қаватдаги алоҳида шийпонда эса туфакандоз турибди. Унинг ёнига «Бобурийлар (афсуски, у жойда «мўғуллар» дейилган) ишлатган замбарак», деган ёзув қайд этилган. Бангладешдаги мусулмонлар билан хиндлар ҳамкорликда яратишган биринчи обида мақомини олган мазкур қалъа-хиёбоннинг обрӯ-эътиборини шундан ҳам билса бўладики, унинг сурати мамлакат пулига ҳам туширилган.

Бангладеш энди ривожланаётган, нисбатан ёш мустақил давлат бўлишига қарамасдан, маънавиятга, илм-фанга бўлган интилиши, эътибори юқори даражада экан. Дакка кўчаларидан бирида узок масофага чўзилган китоб расталарига дуч келиб, бир неча китоб ҳарид қилдик.

Бангладеш йўналишидаги яна бир мақсадимиз: Баҳодир Шоҳ II – Зафар сургун килинган Рангун (Бирма)га ўтиб, сўнгги бобурий подшохнинг қабр-мақбараси ҳолидан хабар олиш, бирга кетган яқинлари тақдирини сўраб-сuriштириш, Зафар тахаллуси билан ижод қилган шоҳ шоирнинг бобокалонларидан қолган ва ўзи билан олиб кетган кутубхонасини, китоб, қўлёзмаларини кидиришдан иборат эди. Афсуски, бу ёпик мамлакатнинг талаб-тартиблари ва бошқа

сабабларга кўра, у ёкка ўтиш имкони бўлмади. Лекин бу режа илмий экспедициямизнинг келгуси дастурларидан сўзсиз ўрин олади.

Биз ана шундай ёрқин таассурот ва ғуур билин Бангладешнинг шимоли-шарқ томонидан, Ҳимолай пасттекисликлари бўйлаб Ҳиндистонга қайтдик. Яна бизни чексиз далалар, шоли ўраётган, хирмон қилаётган, янгидан экаётган меҳнаткаш бенгал ҳалқи, дарёлар, кўллар, ям-яшил майсазорлар, килич баргли пальмалар билан безанганди табиат ўзига мафтун этди.

Яна Ҳиндистон худудидамиз. Эндиғи мўлжалимиз Патна шаҳридаги «Худобахш» кутубхонаси эди. Биз бу ноёб китоблар ҳазинаси ҳақида аввалдан қўп яхши гаплар эшлиб юрардиг-у, аммо ета олмаётган эдик. Аллоҳ насиб этиб, бу гал мана шу муқаддас даргоҳ остонасига кадам қўйдик. Кутубхона директори Ҳабиб Раҳмон бизни тавозе билан қарши олди ва кутубхонанинг ташкил топиши, унда сақлананаётган қимматли кўлёзмалар ҳақида гапириб берди, ноёб бисотларни кўрсатди.

1891 йили Мавлавий Худобахшон деган адвокат-хукуқшунос, Калькуттанинг собиқ адлия вазири томонидан ташкил этилган ушбу кутубхонада бугунги кунда араб, форс, урду, пуштун тилларида битилган 20 мингдан ортиқ турли даврларга оид, энг машҳур хаттотлар томонидан кўчирилган кўлёзма асарлар, ҳар хил тилда чоп этилган 200 мингга яқин китоб сақланмоқда экан. Ушбу илм масканни дунёдаги энг йирик кутубхоналардан бири бўлиб, жаҳондаги кўплаб машҳур зиё масканлари билан ҳамкорлик қиласи.

– Бугундан эътиборан Ўзбекистон билан ҳам алоқа ўрнатилди, деб ҳисобласак бўлади, – деди Ҳабиб Раҳмон сұхбат чоғида. – Сизларнинг бу ташрифингиз ва ўзаро

келишувларимиз Ҳиндистон билан Ўзбекистон маданий алоқаларини ривожлантиришга хизмат қилади, деб ўйлайман. Биз сизлар сўраган, бобурийларга дахлдор кўлёзмаларнинг нусхаларини микрофильм ё бошқа шаклда етказишга ҳаракат қиласиз.

Кутубхонада бобурийларга оид китоблар, кўлёзмалар кўп. Жумладан, салкам 500 йил аввал Байрамхон томонидан кўчирилган 2 жилдли «Воқеоти Бобурий», Жавохирнинг ҳижрий 1082 йилда кўчирилган «Тазкират ул-воқеот», «Тарихи хонадони Темурия» асарлари кўлёзмаларининг кутубхона мутасадди ва ходимлари томонидан кўз қорачигидек асралаётганига гувоҳ бўлиш баробарида ўзимиз ҳам бу ноёб дурданалар саҳифаларига кўз ташлашга мұяссар бўлдик.

«Тарихи хонадони Темурия» асарини Амир Темур ва Захириддин Мухаммад Бобур авлодлари акс эттирилган 130 дан зиёд миниатюра суратлари безаб турибди. Ана шу суратлардан йигирмага яқини танлаб олиниб, кутубхона томонидан «Темурнома миниатюраларидан намуналар» сарлавҳаси остида нашр этилган экан. Ҳабиб Раҳмон бизга ўша альбом-китобдан ва кутубхонанинг китоб шаклидаги каталогидан тухфа қилди.

«Бобурнома»га ишланган миниатюралар ичida Бобур Мирзонинг Қашқардаги Абу Бакр қалъасига хужум қилаётган пайти акс этган суратни кўриб, унинг Шарқий Туркистонда бўлгани, таниқли бобуршунос олима Анна Мария Шиммель қайд этган айrim шеърларини Қашқарда ёзганини тасаввур қилиш мумкин.

Албатта, янги олам – Ҳиндистоннинг гўзал табиати манзаралари – тог тизмаларини, ҳайвонот дунёсини, рангин гулларини томоша қилиш, ўрганиш завқли, мароқли эди, лекин биз учун бобурийлар қадами етган жойларни зиёрат қилиш, уларнинг тарихий, бадиий

асарларини, улар ҳақида ёзилган китобларни излаб топиш, ўқиб-ўрганиш янада қизиқ ва муҳимроқ эди. Чунки бундай ноёб, маданий-маърифий бойликларнинг кўп қисми бобурийларнинг ота юртида маълум бўлсада, етиб келмаган. Зоро, экспедициямиз дастурининг асосий бандларини мана шу кутлуғ вазифа ташкил этарди. Шунинг учун ҳам биз энди қанча кенту қишлоқларни ортда қолдириб, Лакҳнау шаҳрига ошикар эдик.

Лакҳнау – Ҳиндистоннинг қадимий шаҳарларидан бири, «Бобурнома»да ҳам бир неча бор зикр этилган. Лакҳнау университети қошидаги Робиндренат Тагор кутубхонаси ҳам бой маънавий хазинага эга. Биз қайси кутубхона ёки китоб дўконига кирмайлик, биринчи ва асосий саволимиз «Бобурийларга – Бобур, Ҳумоюн, Акбар, Жаҳонгир, Шоҳ Жаҳон, Аврангзеб ва бошқаларга оид қандай китоб ё кўлёзмалар бор?» деган савол бўларди.

Урду, араб, ҳинд тилларида 1200 дан ортиқ кўлёзма ва катта китоб жамғармасига эга бўлган ушбу кутубхонада ҳам биз учун қимматли, биз қидириб юрган анча-мунча китоблар бор экан. Инглиз тилидаги «Бобурнома», инглиз шарқшуноси, бобуршунос Уильям Эрскиннинг «Ҳиндистон тарихи», «Темурийлар ва бобурийлар даври», «Бобур ва Ҳумоюн» каби ҳажман йирик китоблари, табиийки, қимматли маълумотларга ҳам бой эди. Булар Эрскиннинг шу мавзудаги асарларининг атиги бир қисми, холос.

«Бобурнома»га ишланган миниатюра суратлардан иборат альбом-китоб ҳам диққатимизни тортди. Ҳинд тарихчиси М.С.Рандҳава томонидан нашр эттирилган мазкур китобдан жуда ноёб суратлар ўрин олган. Масалан, шахзода Бобурнинг отаси Умаршайх Мирзо

вафоти муносабати билан Андижон қалъасидан Ахсига қараб отда йўлга чиқаётгани, Бобур Мирзонинг Андижонда хукмдор сultonларни қабул килаётгани, Бобур Андижондаги чорбоғда, Бобур аскарлари билан Қашқардаги Абу Бакр қалъасига ҳужум килаётган пайти...

Китоб дастлаб Дехли миллий музейи томонидан 1983 йили, демакки, Бобур Мирзо таваллудининг 500 йиллиги муносабати билан нашр этилган экан. Суратларни таникли хинд рассоми Фарруҳ Шейер маҳорат билан ишлаган.

Машхур инглиз шарқшуноси Вильям Рашибрукнинг «Ўн олтинчи аср бунёдкори» китоби ноёб топилма бўлди. Китоб номининг ажойиблигига, Бобур бобомиз шаънига айтилган таъриф-баҳонинг юксаклигига эътибор беринг! Асар дастлаб 1918 йили Лондонда, кейин Бомбей (ҳозирги Мумбай), Калькутта, Мадрас ва бошқа шаҳарларда қайта-қайта чоп этилган. Китобнинг ички муқовасида Бобур Мирзонинг ўрта ёшлардаги отлик сурати акс этган.

Ички сахифаларда «Бобур Андижонда Эсон Давлатбекимнинг чорбоғида» деб номланган ва бошқа ноёб суратлар бор. Кутубхона мутасаддиларининг марҳамати билан Рандҳаванинг миниатюралар альбоми, «Ўн олтинчи аср бунёдкори», Муни Лаълнинг «Бобур» асарларидан нусхалар олишга муваффақ бўлдик.

Ислом университети қошидаги «Надват ул-уламо» деб номланган мадрасанинг шарқшунослик кутубхонасида ҳам ажойиб китобларга дуч келдик ва айримларини қўлга киритишга эришдик. Инглиз шарқшунос олими Стейн Лейн Поулнинг «Император Бобур» асари дастлаб 1899 йили Дублинда (Ирландия) нашр қилинган, 1987 йили Дехлида қайта чоп этилган.

Австриялик шарқшунос Фридрих Аугустуснинг «Император Ақбар» (инглиз тилига Анетта Бевериж таржимаси, 1-жилд, 1890 йил), таниқли хинд адаби Муни Лаъл (Бобур Мирзо, Ҳумоюн, Ақбар, Жаҳонгир тўғрисидаги асарлар муаллифи)нинг «Шоҳ Жаҳон», Маҳдий Ҳусайннинг «Баҳодиршоҳ» китоблари ҳам ана шундай салмоқли асарлар сирасига киради.

Шу ерда, Анна Флора Стилнинг чуқур маъноли ном билан аталган «Тож кийган дарвиш» китоби борлиги экспедиция аъзоларини қувонтириди.

Бобуршоҳ Иброҳим Лўдийни енгиб, Ҳинdistонда буюк салтанатига асос соганидан кейин қўлга кири-тилган беҳисоб ўлжаларни ўғилларига, бекларга, қариндошларига, ёрдамга муҳтож кишиларга, Самарқанд, Андижон, Қашқар, Эрондаги яқинларига бўлиб берган. Маккаи мукаррама ва Мадинаи мунавварадаги яқинлари ҳам у улуғ инсоннинг бундай саховатидан бенасиб қолмаган.

Ана шундай хислатлари туфайли ҳам у атрофидаги руҳонийлар томонидан «қаландар» деб аталади.

А.Ф.Стилнинг ўз асарига «Тож кийган дарвиш» деб ном беришига Бобур Мирзонинг камтарин, таваккалчи инсон бўлгани, мардлик ва саховатпешалик каби олижаноб фазилатлари сабаб бўлгани шубҳасиз, албатта.

Лакхнау шаҳридаги икки қаватли марказий китоб дўконида гўзал муқовали китоблар ниҳоятда дид билан терилган, харидор-китобхонлар билан гавжум эди. Ахолининг ялпи саводхонлиги 60 фоизга ҳам етмайдиган мамлакатда китобга шу кадар қизиқиши, иштиёқ катталиги биз учун кутилмаган ҳодиса эди. Аслида китоблар нархи хийла қиммат. Масалан, ҳажман «Бобурнома» билан баробар «Жаҳонгирнома»нинг Лон-

донда инглиз тилида чоп этилган нусхаси бир ярим минг рупий, «Ҳиндистоннинг бобурийлар давридаги ҳайвонот дунёси» деган суратли китоб бир минг тўққиз юз рупий. Бир АҚШ доллари 45,9 рупий, демак, юқоридаги китоблар нархи 35–40 доллар атрофида бўлади.

Биз дўкондан Лейн Поулнинг «Ҳиндистон тарихи» туркумига кирувчи «Бобур», худди шу туркумдаги Акбар тўғрисидаги китобларни сотиб олдик.

Умуман, Ҳиндистонда бобурийлар ҳақида китоблар жуда кўп. Ҳиндистон, Покистон тарихи билан боғлиқ китобларнинг асосий қисмини бобурийларга бағишиланган боблар ташкил этади. Биз бундан ниҳоятда хурсанд эдик, фақат бир нарса дилимизни ғаш қиласади: ҳамма жойда, ҳамма китобда бобурийлар ҳақида гап кетганда «мўғуллар» (моголов) ибораси ишлатилади. Бу хато атама шу қадар оммалашиб кетганки, ҳатто бобурийлар томонидан бунёд этилган барча тарихий обидалар, боғ-роғларнинг маълумотнома–буклетларида ҳам «мўғул» деган сўз ишлатилади. Назаримизда, бу тарихий хатони ўнглаш, уни қўллайдиганларга халқаро миқёсда асосли тушунтириш бериш мавриди келди. Ўзбекистоннинг мустақиллиги, Бобур Мирзога бўлган тарихий адолатнинг тикланганлиги бу фикрга етарли асос бўлади, деб ўйлаймиз.

Умуман, экспедиция давомида гоҳ суюниб, гоҳ куйиниб-ғашланиб юрдик. Покистоннинг Лоҳурида (бу тарихий шаҳар Бобур ва бошка бобурий ҳукмдорларга узоқ йиллар пойтахт ва қароргоҳ бўлган) Жаҳонгир шоҳ қабр-мақбараси обод, лекин бобурий Зебуннисонинг қабр-мақбараси эса пана-пастқам, кўримсиз жойда, қаровсиз эди. Мақбара деворларидағи мармарлар кўчириб олинган, гарифона ҳолатда. Умуман олганда, бу мақбара чиндан ҳам ўша, Аврангзеб Оламгирнинг қизи,

биз билган машҳури жаҳон шоиранинг мақбарасими ё бошқаникими, деган масала ҳам ойдинлик киритишни тақозо қиласи.

Гап шундаки, Зебуннисо асли Дәхлидаги Зарзари қабристонига дағн этилган, кейинчалик бу ердан темир-йўл ўтиши муносабати билан мақбараси бузилган, деган маълумот бор. Шу қабр-мақbara ўша Зебуннисоники бўлса (мақbara деворига «Зебуннисо қабри» деб ёзилган, холос), уни ким, қачон олиб келиб дағн этган ва нега бу буюк темурий маликанинг мангу оромгохи шундай каровсиз ҳолга тушиб қолган? Бундан ташқари, Аграда, Акбар қалъасидаги қабрлардан бирини ҳам Зебуннисоники дейишади. Хуллас, бу муаммо ўз ечимини кутмоқда.

Ҳасанабдол шаҳридаги бобурийлар номи билан боглиқ боғда бўлганимизда ҳам шундай муаммога дуч келдик. Бизга маълум бўлган манбаларда боғнинг яратилиш тарихи Бобур Мирзога нисбат берилади. Ҳасанабдол тарихидан ҳикоя қилувчи маълумотнома-рисолада эса боғнинг Бобурдан кейин, Жаҳонгир ва бошқа бобурий ҳукмдорлар томонидан бунёд этилгани қайд қилинган. Лекин муҳими, Покистоннинг мана шу чекка шаҳарчасидаги бу сўлим гўшага Бобур Мирзо ва унинг авлодлари қадами етган, уларнинг иродаси билан обод бўлган ва ҳали-ҳануз зиёратгоҳ бўлиб келмоқда.

Машҳад шаҳри (Эрон) марказида жойлашган И мом Ризо ҳарами худудидаги Куръон музейининг кўзга ташланадиган ерида қалин ойна ичидаги мўъжазгина бир китобча турибди. У Бобур Мирзонинг ўзи тузган алифбода, ўз қўли билан кўчирган муқаддас Куръони каримдир...

Биз ана шу ноёб, табаррук қўлёзмадан бир неча саҳифанинг ксеронусхасини олишга мұяссар бўлдик. Шунингдек, Улугбек Мирзонинг укаси Бойсунғур

Мирзонинг ҳуснихати билан битилган Куръони карим суралари ҳам музейни безаб турибди.

Хуллас, биз Шарқнинг қадимий ва йирик мамлакатлари – Ҳиндистонда ҳам, Покистону Бангладешда ҳам, Эронда ҳам, қаерга бормайлик, улуг юртдошимиз Заҳириддин Муҳаммад Бобур ва унинг авлодлари нафасини туйдик, уларнинг номларини эзгу ишлар ижрочилари сифатида зиёлилар тилидан ҳам, оддий кишилар лафзидан ҳам эшидик. Уларнинг мероси бизнинг чинакам фахр ва ифтихоримиз эканини яна бир карра, теранроқ ҳис қилдик. Шу билан бирга, биз, Бобур ва бобурий боболаримиз баҳонасида қай бир олийгоҳ ё қутубхона-зиёхонада, мозийгоҳ ва бошқа тарихий жойда бўлмайлик, Бобур Мирзонинг она юрти бўлган Ўзбекистоннинг эндиликда озод ва мустақил мамлакатлар қаторида ўз ўрни ва қадрига эга бўлиб бораётгани тўғрисида марокли сухбатлар курдик. Зоро, мустақиллигимиз шарофати билан дунёга келган Бобур номидаги халқаро илмий экспедициямиз сафари дастуридаги асосий бандларидан бири ҳам мана шу эди.

Сафаримиз давомида топилган китоб, қўлёзма ва бошқа илмий манбалар биринчи галда олиму уламоларимизнинг янги-янги тадқиқот ва асарларига мавзу бўлади, экспедиция аъзоларининг ён дафтарчаларига битилган хомаки қайдлар, видео тасвирлар турли жанр ва шаклларда халқимизга, Бобур Мирзонинг авлодлари, ворислари, муҳлисларига етказилади, деб ишонамиз.

«Андижоннома» газетаси
2001 йил 10 февраль

САДОҚАТ СИНОВИ

Мустақиллик деган бебаҳо неъматни мен шунинг учун ҳам юксак даражада қадрлайманки, у тупрок ичидаги қолган гавҳарлар – миллий қадриятларимиз, маънавий бойликларимизни ўзимизга кайтарди, ғуруримизни, тилимизни, динимизни, имон-эътиқодимизни тиклади. Шулар қаторида Захириддин Мұхаммад Бобурдек улуғ аждодларимиз меросини ҳар томонлама ўрганиш, ундан баҳраманд бўлиш ва фахрланиш ҳукуқига эга бўлдик.

Бобур Мирзонинг мураккаб қисмати, кенг қамровли илмий-бадиий фаолиятини батафсил тадқиқ қилиш ва халқимизга етказишдек хайрли ишга баҳоли кудрат ҳисса қўшиш мақсадида 1992 йил бошида Андижон шаҳрида Бобур номидаги Халқаро жамғарма туздик. Ўтган йиллар катта изланиш ва синовлар билан ўтди. Жамғарма ўз фаолиятини мухтарам Президентимиз имзо чеккан ҳукумат карорига асосан Бобур таваллудининг 510 йиллигига тайёргарлик қўриш тадбирларида фаол иштирок этишдан бошлади. Дастраслабки ишимиз Москва яқинидаги Митиши шаҳрида қўйдириб келинган ва мустабид тузум раҳнамолари тақиқлагани учун чекка бир бинода ётган шоир ҳайкалини Бобур арки, яъни унинг уй-музейи ҳовлисига ўрнатишдан иборат бўлди. Энг улуғ орзу ва армонларимдан бири ушалган ўша кунги ҳаяжонли дақиқаларни умримнинг сўнгигигача ҳам унутмасам керак.

Шу тариқа Бобур Мирзонинг ўлмас номи ва қадри йўлига қўйилган говлар олиб ташланди, буюк бобокалонимизнинг боши узра соя солган кора булутлар тарқаб, унинг манглайига офтоб – истиклол офтоби тегди. Андижон вилоят ҳокимлиги Бобур номидаги маданият ва истироҳат боғи барпо этиш учун 300 гектардан ортиқ ер ажратди. Бу ер кейинги йилларда Боғишамол деб юритиладиган, Бобур Мирзо жонажон юртидан чиқиб кетаётганда сўнгги излари қолган Андижон адиrlарида жойлашган.

Экспедициямизнинг 1992 йилги май-июль ойларида бўлиб ўтган дастлабки сафари чоғида ён-атрофда ўқлар учиб, бомбалар тортлаб турган хатарли бир вазиятда Бобур Мирзонинг Кобулдаги қабридан олиниб, юртимизга келтирилган бир ҳовуч табаррук тупрок ана шу боғ тўрига Андижон вилоят ва шахар ҳокимликлари раҳбарлари, жамоатчилик, зиёлилар иштироқида рамзий қабрга қўйилди ва кейинги сафарлар давомида Агра шаҳридаги Бобур Мирзо жасади муваққат сакланган Оромбоғдан ҳамда шоир дастлаб дағн қилинган Чобуржидаги қабридан ҳам тупрок олиб келинди ва ана шу рамзий қабр тепасида Бобур Мирзонинг Кобулдаги сағанаси шаклида мақбара бунёд этилди. Бугунги кунда ушбу мақбара билан уйғунликда қадқўтарган Арқдарвозаси, «Бобур ва жаҳонмаданияти» музейи, Бобур Мирзонинг муazzзам ҳайкали, миллий меъморчилигимиз анъаналари асосида қурилган қатор иншоотлар боғ кўркига кўрк кўшиб турибди.

Ўзбекистон Президенти Ислом Каримовнинг 1994 йил 4 октябрда бу даргоҳни зиёрат қилиб, Бобур ва унинг авлодлари ҳақида билдириган фикрлари, бобурийлар меросини эъзозлаш борасидаги хайрли ишлар хусусида

мозийгоҳнинг хотира китобига битган қимматли фикрлари айни вактда Жамғармамиз фаолиятига ҳам берилган юксак баходир.

Бугунги кунда улуғ ватандошимизнинг от миниб турган салобатли сиймоси Андижон шаҳрининг кўркам майдонида халқимизга ғурур ва ифтихор бағишилаб турибди. Шунингдек, жамғарманинг Андижондаги қароргоҳи биноси пештоқига ўрнатилган, «Бобур соати» деб аталадиган маҳобатли курант ҳам шоир хотирасини ёдга солиб туради.

Жамғарма саъй-харакатлари билан хориждаги дўйстларимиз, Бобур ихлосмандлари иштирокида чет эллардан темурийлар-бобурийлар даврига хос кўплаб нодир экспонатлар топилди ва Ўзбекистонга келтирилди. Жумладан, германиялик доктор Ян Хонзель ва Юрген Андреас Эрнест Султон Ҳусайн Бойқаронинг фарзанди Шоҳ Ғарид Мирзо ва Бобур Мирзонинг ўғли Комрон Мирзонинг Гамбургда сақланаётган девонларининг ноёб қўлёзма нусхаларини, шунингдек, жаҳондаги Бобур ва бобурийлар номи билан боғлик 140 мингдан ортиқ манба жамланган китоб шаклидаги маълумотномани, олмоншунос Ҳуррам Раҳимов Арнольд Хоттенгернинг немис тилидаги «Буюк Ақбар» асарини, хиндистонлик олим, маданиятимизнинг катта дўсти Қамар Раис Бобурнинг 1902 йили Калькуттада чоп этилган девони нусхасини, паркентлик китоб савдоси ходими Элзод Султонов «Бобурнома»нинг атокли рус шарқшуноси Н.Ильминский томонидан XIX асрда нашрга тайёрланган Қозон босмасининг ноёб нусхасини музейимизга тақдим этдилар.

Шуни алоҳида таъкидлаш лозимки, Жамғарманинг фаолият камрови тобора кенгайиб бормокда. Ҳозирги вактда Лоҳур (Покистон), Дехли (Хиндистон), Мозо-

ри шариф (Афғонистон), Билефельд (Германия), Киото (Япония), Москва (Россия), Манчестер (Буюк Британия), Ўш (Қирғизистон), Тошкент ва Наманганд шаҳарларида Жамғарма бўлимлари ташкил этилди.

Илмий-бадиий адабиётлар айирбошлиш, биргаликда тадбирлар ўтказиш бўйича бир қанча ишлар амалга оширилди.

Умуман олганда, Жамғарманинг бутун фаолияти давлат арбоби, шоир, тарихчи, табиатшунос Бобур номини абадийлаштириш ва у қолдирган бой меросни ўрганиб, оммалаштиришга йўналтирилган. Бу борада, айниқса, Жамғарма қошидаги халқаро илмий экспедиция фаолиятини таъкидлаб ўтиш жоиз. Экспедиция шу пайтгача Африка қитъасидан Ҳинд уммонигача тўққиз бора илмий сафар уюштириб, 200 минг километрдан зиёд масофани автомобилда босиб ўтди. Ўнлаб хорижий мамлакатларда, жумладан, Қирғизистон, Тожикистон, Туркменистон, Афғонистон, Эрон, Туркия, Иордания, Сурия, Саудия Арабистони, Бирлашган Араб Амирликлари, Покистон, Ҳиндистон, Бангладеш, Миср, Хитой ва бошқа юртларда бўлиб, темурийлар-бобурийлар тарихига оид, Ўзбекистон ўтмиши билан боғлиқ илмий-тарихий маълумотлар, қўлёзмаларнинг нусхаларини, 400 дан ортиқ нодир китобларни тўплади ва Ватанимизга олиб келди. Янада аниқроқ айтадиган бўлсак, Бобур бобомиз билан бир қаторда жаҳон маданияти ривожига улкан ҳисса қўшган Абу Али ибн Сино, Абу Райхон Беруний, Аҳмад Фарғоний, Абу Наср Форобий, Алишер Навоий, Ҳусайн Бойқаро, Камолиддин Беҳзод, Бобораҳим Машраб, Зокиржон Ҳолмуҳаммад ўғли Фурқат ва бошқа буюк аждодларимизнинг ҳам қабр-мақбаралари зиёрат қилинди, уларнинг шу кундаги ҳолати ўрганилиб, видео-

фото тасвирга туширилиб, жамоатчилик эътиборига етказилди, таклиф-тавсиялар тайёрланди.

Илмий изланишлар натижасида буюк олим Аҳмад Фарғоний Қоҳира шаҳридаги қабристонга дафн этилгани аниқланди.

Маълумки, экспедициянинг Ҳиндистонга килган биринчи сафари чоғида бобурийлар авлоди, ҳайдарбодлик Тусийлар хонадонининг аниқланиши бобуршуносликда янги воеа бўлган ва бу юртимизда давлат аҳамияти даражасига кўтарилган эди. Кейинги сафарлар давомида яна бир бобурий авлод, Дехлида яшаётган Покиза Султонбегим ҳам аниқланди. Унинг хонадонига ташрифимиз, жўшқин ва қизикарли сухбатмулоқотимиз саккизинчи сафаримизнинг сермазмун бобларидан бири бўлди, десак, янглишмаймиз. Унинг Лондонда истиқомат килаётган синглиси, шоира Тоҳира Султонбегим билан учрашувимиз чоғида уларнинг бобурийларга чиндан-да яқин авлод эканига ишонч ҳосил килдик.

Дарҳақиқат, экспедициянинг мазкур сафари кўп жиҳатдан самарали ва баракали бўлди. Олис Бангладеш давлатининг пойтахти Дакка шаҳрида Аврангзеб фармони билан барпо этилган Лаълбоғ қалъа мажмуи ҳовлисидаги бобурий ҳукмдорлар ҳаёти ва фаолиятига бағишлиланган маҳсус тарих музейи экспонатларининг бой ва ранг-баранглиги, бобурий боболаримиздан ёдгор осори атикалар кўз корачигидек авайлаб сакланиши билан бизда ёрқин таассурот қолдирди.

Ҳиндистоннинг Патна шаҳридаги машхур «Худобахш» кутубхонасида қўлга киритилган ноёб қўлёзма асарлар, миниатюралар, Эроннинг Машҳад шаҳридаги Имом Ризо ёдгорлик мажмуидаги Куръон музейидан топганимиз – Бобур Мирзонинг ўзи ихтиро қилган

ёзув – «Хатти Бобурий»да кўчирилган муқаддас Қуръон китобидан нусхалар бугунги кунда «Бобур ва жаҳон маданияти» мозийгоҳини безаб турибди. Бу ноёб топилмалар бобуршуносликдаги янги тадқиқотлар, илмий ва бадиий асарларга мавзу бўлса, ажаб эмас.

Халқаро илмий ва маданий алоқаларимизни янада ривожлантириш, бобурийларнинг сўнгги авлоди Баҳодиршоҳ Зафарнинг қабрини зиёрат қилиш, янги илмий-тариҳий маълумотлар, ноёб китобларни Ўзбекистонга олиб келиш мақсадида Бобур экспедицияси аъзолари-нинг Бирма давлатининг Рангун, Буюк Британиянинг Лондон ва Манчестер шаҳарларига хизмат сафарлари уюштирилди. Ушбу сафарлар чоғида қўлга киритилган нодир китоблар, қўлёзма асарлар ҳам «Бобур ва жаҳон маданияти» музейидан жой олди.

Илмий экспедициямизнинг чет элларга қилган са-фарлари маҳсули ўларок йигитромадан ортиқ хужжатли видео ва кинофильмлар яратилди, республика телеви-дениеси орқали намойиш килинди. Экспедиция аъзо-лари томонидан бир қанча илмий тадқиқотлар яратилди, бадиий, оммабоп китоблар ёзилди ва Жамғарма ҳомий-лигига нашр эилди. Булар каторига З.Машрабов ва С.Шокаримовнинг «Асрларни бўйлаган Бобур», Сайфиддин Жалиловнинг «Бобур ва Юлий Цезар», Хайриддин Султоннинг «Бобурийнома», Қамчибек Кенжанинг «Ҳинд сорига» ва «Бобурийлардан бири» асарларини, Пиримкул Қодировнинг «Мардлик», Р.Воҳидовнинг «Биз билган ва билмаган Бобур», А.Иброҳимовнинг «Бобурнома – буюк асар», О.Тожи-боеванинг «Бобур армони» китобларини киритиш мумкин. Жамғармамизнинг Германия бўлими раҳбари, доктор Ян Хонзель томонидан Комрон Мирзо ва Шоҳ Ғариф Мирзонинг Гамбург кутубхоналаридан

келтирилган ва Афғонистон бўлими раҳбари, бобуршунос Шафикахоним Ёрқин нашрга тайёрлаган девонлари ҳам «Шарқ» нашриёт-матбаа компаниясида Жамғарма ҳомийлигида чоп этилди.

Бизнинг энг катта орзу ва режаларимиздан бири – буюк қомусий асар «Бобурнома»нинг тўлдирилган, матбаа сифатига кўра жаҳон андозаси ва талабларига жавоб берадиган замонавий нашрини чоп этишдан иборат эди ва биз бу ниятимизга ҳам етдик – мана шундай гўзал китоб бугун китоб жавонимизни безаб турибди. Ҳозирги кунда экспедиция аъзоси Қамчибек Кенжанинг «Андижондан Бангладешгача» номли иккинчи сафарнома китобини ҳам нашр қилиш мўлжалланмоқда.

Шунингдек, жамғарма ташкилотчилиги ва ҳомийлигида Анна Флора Стилнинг Бобур ва бобурийлар сулоласи тарихига оид «Тож кийган дарвеш», Вильям Рашибрукнинг «Ўн олтинчи аср бунёдкори», Ҳарольд Лэмбнинг «Бобур – йўлбарс», Румер Годеннинг «Гулбадан» каби ноёб асарлари республикамизнинг таникли олим ва ёзувчилари томонидан таржима қилиниб, чоп этилиши режалаштирилган.

Хорижлик бобуршуносларнинг мана шундай асарларида Бобурнинг дунё маданияти тарихида тутган ўрни, олижаноб инсоний фазилатлари ҳакида холис ва ҳакконий баҳолар берилгани айниқса эътиборли. Чиндан ҳам, гарблик олимлардан бирининг таъбири билан айтганда, «Бобурнинг тарихдаги ўрни ўтмишдаги ҳукмдорлар, шоҳ ва шахзодалар ўртасида энг юксак таҳсинга сазовордир».

Яна бир эътиборли жиҳати шундаки, Бобур ҳаёти ва ижоди ҳакида бизнинг кунларимизда ҳам чет элларда янги-янги асарлар нашр этилмоқда. Куни кеча биз

машхур япон олими Эйжи Манонинг Киотода япон ва инглиз тилларида босилган «Бобур ва унинг даври» номли йирик тадқиқотини ҳамда Деҳлида профессор Қамар Раис томонидан урду тилида нашр этилган «Захириддин Муҳаммад Бобур: шахс, шахсият ва шоир» номли китобларни олиб, беҳад мамнун бўлдик.

Кишини қувонтирадиган томони, Бобур номидаги Халқаро жамғарма ва унинг экспедицияси томонидан амалга оширилаётган ишларни давлатимиз, жамоатчилигимиз доимо қўллаб-қувватлаб келмоқда. Экспедиция аъзоларидан Сайфиддин Жалилов, Тўлан Низом, Қамчибек Кенжа, Фарруҳ Расулов, Аҳмаджон Қосимов ва камина ватанимизнинг юксак унвонлари, орден ва медаллари билан тақдирланиши ана шу эътибор ва эътироф тасдигидир.

Албатта, жамғарма ва экспедиция амалга оширган ишлар хақида узоқ гапириш мумкин. Лекин, менинг назаримда, биз қўпроқ олдимизда турган мухим ва долзарб вазифалар ҳақида ўйлашимиз лозим. Режаларимиз катта, ниятларимиз кўп. Шу кунга қадар илмий экспедиция ўз нигоҳини қўпроқ Шарқ мамлакатларига қаратди. Темурийлар ва бобурийларга оид нодир манбаларнинг кўп қисми эса Европа мамлакатлари музей ва кутубхоналарида сақланмоқда. Умуман, юртимиздан турли йўллар билан хорижга олиб чиқиб кетилган ноёб китоблар, қўллэзмалар, илмий ва санъат асарларининг лоақал нусхаларини мамлакатимизга олиб келиш, Бобур ва унинг авлодларининг ҳали маълум бўлмаган меросини топиш, ўрганиш, зарур бўлган тақдирда уларни ўзбек тилида чоп этиб, жамоатчиликка танишириш, Беруний, Форобий, Навоий сингари улуғ боболаримизнинг қабр-мақбараларини тиклаб-таъмирлаб, уларни зиёрат-

гоҳларга айлантириш, олим ва ёзувчиларимизни Бобур ва бобурийлар ҳакида янги илмий-бадиий китоблар ёзишга рағбатлантириш, ёзилган асарларни Жамғарма ҳомийлигига чоп этиб, кенг ўқувчилар оммасига етказиш, буюк Бобур ҳакида чет эллик киноижодкорлар билан ҳамкорликда тўлақонли бадиий фильм яратиш, Осиё, Европа, Америка қитъалари бўйлаб ҳалқаро илмий экспедициямиз йўналишини давом эттириш, Бобур таваллудининг 520 йиллигига бағишилаб ҳалқаро илмий конференция ўтказиш каби вазифалар бизнинг доимий диққатимиз марказида бўлиши даркор.

Жамғарма дастуридаги ана шу эзгу ишларни амалга оширишни биз ҳалқимиз, миллатимиз довруғини дунёга таратган улуғ аллома боболаримиз руҳи олдидаги инсоний бурчимиз деб биламиз. Мухтарам Юргашимиз айтганидек, «Ўтмиши йўқ ҳалқнинг келажаги йўқ». Бизнинг асосий мақсадимиз ҳам ана шу ғурур, ана шу туйғунинг жуда асосли ва ниҳоятда муқаддаслигини Бобур ва бобурийлар мероси мисолида тасдиқлашга хизмат килишдан иборатdir.

«Ўзбекистон овози» газетаси,
2002 йил 21 сентябрь

«ХАТТИ БОБУРИЙ» БОБУР ВАТАНИДА

Заҳириддин Муҳаммад Бобур номидаги ҳалқаро илмий экспедиция навбатдаги хориж сафаридан қайтди. Шу муносабат билан Ўзбекистон Ёзувчилар уюшмаси ва Шарқшунослик институтида сафар якунларига бағишиланган учрашувлар бўлиб ўтди.

Ёзувчилар уюшмаси ҳамда Маънавият ва маърифат маркази томонидан ташкил этилган учрашувни очаётиб, уюшма раиси, Ўзбекистон Қаҳрамони Абдулла Орипов мазкур илмий экспедициянинг хайрли ишлари наинки мамлакатимиз, ҳатто чет элларда ҳам машхурлиги ҳакида сўзлади. Ўтган давр мобайнида Бобур ҳалқаро фонди томонидан рўёбга чиқарилган ишлар ўз давлатчилиги ва миллий қадриятларини тиклаган ўзбек ҳалқининг бой маънавий маданиятига муносиб хисса бўлиб кўшилди. Жамғарма томонидан ташкил этилаётган экспедициялар буюк аждодларимизнинг хориждаги қадамжолари, мақбаралари ва темурийлар даврида яратилган тарихий обидаларни зиёрат қилиш ва ўрганиш жиҳатидангина эмас, балки, мамлакатимизга дахлдор маънавий-маданий меросимиз билан боғлиқ қимматли илмий манбаларнинг мазмун-моҳияти жиҳатидан ҳам катта аҳамиятга эга.

Бобур ҳалқаро фонди раиси, Олий Мажлис депутати Зокиржон Машрабов Яқин Шарқ ва Арабистон яrim ороли мамлакатларида бўлиб ўтган навбатдаги экспедиция давомида амалга оширилган ишлар, учрашувлар

ҳақида сўзлаб, «Хатти Бобурий»да битилган Қуръони карим нусхаси ва бошқа қимматли манбалар юртимизга олиб келингани ҳамда уларнинг илмий-амалий аҳамияти ҳақида фикр юритди. Бир қанча мамлакатлардаги жаҳонга машхур алломаларимиз мақбараларининг аҳволига эътибор каратди.

ЎзФА академиги Азиз Қаюмов ва Ўзбекистон халқ ёзувчиси Пиримқул Қодиров «Хатти Бобурий»да битилган Қуръони карим нусхаси Ўзбекистонга – Бобур Мирзонинг ўз ватанига олиб келинганини маданий ҳаётимиздаги катта воқеа сифатида баҳолаб, Бобур тарафидан яратилган алифбонинг олимлар томонидан ўрганилиши ва теран тадқик этилиши учун эндиликда зарур имконият вужудга келганини таъкидладилар.

Ўзбекистон халқ ёзувчиси Муҳаммад Али, олим ва адид Абдулла Аъзамов, афғонистонлик адабиётшунос Ҳалим Ёркин ва бошқа ижодкорлар навбатдаги илмий сафар чоғида кўлга киритилган Захириддин Муҳаммад Бобур меросига доир манбаларнинг аҳамияти ва уларни ўрганиш билан боғлиқ вазифалар хусусида сўзладилар, экспедиция аъзоларини эришилган хайрли натижалар билан кутладилар.

– Ҳурматли Зокиржсон ака, «Ўзбекистон адабиёти ва санъати» муҳлислари ҳам экспедициянинг ҳар бир сафарини катта қизиқиши билан кузатиб бормоқда. Айтинг-чи, бу галги илмий сафарнинг энг катта ютуғи нимадан иборат бўлди, деб ҳисоблайсиз?

– Бу сафарги илмий экспедициянинг катта ютуғи – «Хатти Бобурий»да битилган Қуръони каримнинг нусхасини ўз Ватанимизга – Бобур Мирзонинг ота юртига олиб келганимизда, деб биламан.

«Ўзбекистон адабиёти ва санъати» муҳлисларига яхши маълумки, «Хатти Бобурий» Захириддин Муҳам-

мад Бобур томонидан 1503-1504 йилларда, яъни Бобур Мирзо йигирма тўрт ёшдалигига яратилган алифбо бўлиб, 29 ҳарфдан иборат. Улуғ шоиришимиз араб алифбосини ислоҳ қилиб, ёзувни соддалаштириш ва осонлаштириш мақсадида уни туркий тил ва талаффуз мезонларига мослаштирган. Бобур ўзининг бир неча газаллари ва китъалари, хатларини шу алифбода битиб, Мовароуннаҳр ва Афғонистонга, ўғиллари Ҳумоюн ва Ҳиндол Мирзолар, шунингдек, Ҳожа Калон ва бошқаларга юборган. Айни пайтда, энг яхши хаттотларга буюриб, Қуръони каримни шу алифбода кўчиртирган ва Маккан мукаррамага юборган.

«Бобур хати» деб аталган ўз алифбо тизимини амалда татбиқ этишга Бобур Мирзо кўп харакат қилган. Бирок, ўша суронли йилларда бунинг иложи бўлмаган. Бу ҳақдаги маълумотлар «Бобурнома», Низомиддин Аҳмад Ҳиротийнинг «Табакоти Акбарий», Абдулқодир Бадовунийнинг «Мунтаҳаб ут-таворих» ва бошка асарлар орқали бизга яхши маълум.

Гарчи, шу чоққача бобуршуносликда «Хатти Бобурий» деб ном олган бу алифбо ҳакида маълумот учраса-да, ҳанузгача унинг намунаси топилмаган эди. Ўн йиллардан бери турли кутубхона ва музейлардан «Хатти Бобурий»ни излаб келаётган эдик. Биз борган мамлакатларнинг кутубхона, музей ва дорил-фунунларидаги учрашувлар, илмий мулокотлар ўз самарасини берди. Узоқ изланишлардан сўнг Машҳаддаги Имом Ризо мажмуаси ҳудудида жойлашган «Қуръон» музейида «Хатти Бобурий»да битилган Қуръони карим нусхаси борлигидан хабар топдик. Шу сабабли экспедициямиз Машҳад сари отланди. 2003 йилнинг 21 декабрида йўлга чиқиб, 2004 йилнинг

20 февралида юртимизга қайтиб келдик. Сафар давомида буюк аждодларимизнинг мақбаралари ва темурйилар даврида яратилган тарихий обидалар зиёрат қилинди, улар ҳақида тегишли маълумотлар тўпланди.

Ҳамадонда Абу Али ибн Сино бобомизнинг, Тус шаҳрида эса Абулқосим Фирдавсий мақбарасини зиёрат килдик. Ибн Сино мажмуаси ҳавас килса арзигулик даражада обод экан. Эрон худудида яшаб ижод қилган Умар Хайём, Фаридуддин Аттор, Хоғиз Шерозий, Саъдий Шерозий, Туркия худудида жойлашган Жалолиддин Румий мақбаралари яхшилаб таъмирланиб, зиёратгоҳга айлантирилганини кўрдик.

Туронзаминда камол топиб, илм-фан соҳасидаги қашфиётлари билан бутун дунёга машҳур бўлган «Муаллим ус-соний» – Абу Наср Форобийнинг қабри Сурия пойтахти Дамашкдаги «Боб ус-сағира» қабристонида жойлашган. Ўрта асрнинг машҳур астрономи, математиги, Мирзо Улуғбекнинг сафдоши ва шогирди Али Қушчи эса Туркиянинг Истанбул шаҳридаги Авлиё Айюб Ансорий қабристонида дафн этилган. Бобурнинг ўғли, шоир Комрон Мирзо Саудия Арабистонининг Маккаи мукаррама шаҳридаги «Жаннат ул-маъво» қабристонида Мұҳаммад пайғамбари мизнинг аёли Ҳадича онамиз қабрининг оёқ томонида дафн этилганлиги аниқланди. Бу манзилни ҳам зиёрат килиб, «Хатти Бобурий»да битилган бошқа манбаларни изладик...

Арабистон ярим оролидаги мамлакатларда илмий изланиш олиб бораётганимизда ҳаж мавсуми бошланиб қолгани муносабати билан, биз – экспедициянинг беш нафар аъзоси ҳам муқаддас ҳаж ибодатларини адо этиш баҳтига мушарраф бўлдик.

— Нечоғли хавф-хатарли бўлмасин, экспедиция
Ироққа ҳам ўтишига муваффақ бўлибди. Ироқ сафари
қандай кечди?

— Бу мамлакатда атиги уч кунгина бўлсак-да, қўп
таассуротлар билан қайтдик. Маълумки, Халифа
Маъмун ўз даврида Хоразмдан Мухаммад ибн Мусо
Хоразмийни машҳур академиясига олиб кетган. Хораз-
мий Бағдодда яшаб, ижод қилиб, астрономия, матема-
тика ва бошқа табиий фанлар соҳасида кўплаб илмий
кашфиётлар килган. Биз бу ерда буюк бобокалонимиз
билан боғлиқ қадамжоларга қизиқдик. «Байт ул-хик-
ма» («Донишмандлар уйи»)да Абдужаббор Нажий
бошчилигидаги илмий ходимлар билан танишдик.
Хоразмий илмий фаолият олиб борган кутубхонада, у
яшаган маҳаллада бўлиб, буюк аждодимиз қолдирган
бой илмий мерос ҳақида фикр алмашдик. «Байт ул-
хикма»да Мухаммад Хоразмийнинг 1200 йиллиги
нишонланишида ҳам Абдужаббор Нажий бош-кош
бўлган экан.

Хоразмий ўзи яшаган Кутрибул маҳалласидаги
қабристонга дағн этилганлиги маълум бўлди. Биз
жаноб Абдужаббор Нажий ёрдамида шаҳарнинг ши-
молий қисмидаги Имом Аъзам мақбара-масжидини
зиёрат қилиб, Кутрибул маҳалласига бордик. Лекин
шаҳардаги ҳарбий ҳолат қабристон томонга ўтиш
имконини бермади.

«Байт ул-хикма»да буюк аждодимиз Мухаммад ибн
Мусо Хоразмий ҳақидаги сұхбатлар чоғида бу ташки-
лот ҳамда Бобур халқаро фонди ва Ўзбекистондаги
Маъмун академияси иштирокида Хоразмий фаолиятини
ҳамкорликда чукурроқ ўрганиш, янгиликлар билан
ўртоқлашиш, ўзаро вакиллар алмashiб туриш, Бағдодда
тинчлик-осойишталик юзага келгач, Хоразмийнинг

дафн этилган жойини аниклаб, кабр устига ёдгорлик ўрнатиб, у жойни ободонлаштириш ҳакида ёзма ра-вишда келишиб олинди.

Бағдоддаги вазият Ирокдан тезроқ чиқиб кетишни тақозо қилгани боис биз якинроқ йўл билан Эрон ҳудудига ўтиб, Шерозга йўл олдик. Шерознинг тоғли баҳаво жойида Ҳофиз боғи барпо этилган экан. Шарқнинг машхур алломалари Ҳофиз Шерозий, Саъдий Шерозийлар яшаб ижод қилган бу мўътабар :кайда миллатимизнинг буюк вакилларидан яна бири, туркий тилда илк бор девон тузган машхур шоир Ҳофиз Хоразмий ҳам яшаб ижод қилгани ва шу жойда вафот этгани манбалардан маълум.

Шероз университети олимлари, ҳофизшунослик маркази ходимлари ва бошқа зиёлилар билан қилган учрашув-мулокотлар, фикр алмашувлар, ашёвий далиллардан маълум бўлдики, ҳозирги Ҳофиз Шерозий ёдгорлик мажмуаси ўрни бундан 50–60 йил аввал қабристон бўлган. Демак, Ҳофиз Хоразмий ҳам ўша жойга дафн этилган, деган фикрга келинди.

Имкониятдан фойдаланиб, кўпгина араб мамлакатларида Низомийнинг туркий девони билан ҳам қизикдик. Ҳозирча уни кўлга киритолганимиз йўқ. Лекин умидимиз бор.

— *Юқорида Абу Наср Форобий бобонизининг қабри Даимашқдаги «Боб ус-сағир» қабристонида эканлигини айтдингиз...*

— Абу Наср Форобийнинг қабри «Боб ус-сағир» қабристонининг бир бурчагида жойлашган бўлиб, йўл йўклиги, кўримсизлиги боис уни топиб бориш мушкул бўлди. Қолаверса, кабр мақбарасиз, қабр тоши (бетондан килинган) эскирган, нураган, ёзилган кичкина лавҳа оддий михга илиб кўйилган. Ҳатто,

қабр ёнидаги баланд деворли эски уйларнинг босиб қолиш хавфи ҳам йўқ эмас. Қабр панжара билан ўралган. Панжаранинг ичини бой оиласлар ўзлари учун хилхонага айлантиришиб, салобатли сагана тошларини кўйиб бориshmокда. Агар эътибор берилмаса, якин 40–50 йил ичида Форобий ҳазратлари қабридан номнишон қолмаслиги мумкин.

Мутасадди ташкилотлар билан ҳамкорликда бутун дунёга машҳур ҳамюртимиз Абу Наср Форобий қабрини тиклаш-ободонлаштириш ишларини олиб бориб, қадамжога ёдгорлик ўрнатиш масаласини кўриб чикиш лозим, деб ўйлаймиз.

— *Туркияда бўлғанларингизда Мирзо Улуғбекнинг шогирди ва издоши Али Кушчи қабрини ҳам зиёрат қилибсизлар, зиёратгоҳнинг аҳволи қандай экан?*

— Бу йил Алоуддин Мухаммад Қушчи бобомиз таваллудига олти юз йил тўлади. Маълумки, Али Қушчи Шоҳруҳ Мирзонинг элчиси сифатида Хитойда бўлган. Мирзо Улуғбек вафотидан сўнг Туркияга бориб, ўзининг илмий-тадқиқотларини давом эттирган. Алломанинг кўпгина кашфиётлари бугунгача ҳам ўз илмий қимматини саклаб келаётир. Али Қушчи вафотидан сўнг Авлиё Айюб Ансорий қабристонига дафн этилган. Шуни айтиш керакки, бу манзилдаги бошқа қабрлар сингари Али Қушчи қабри ҳам Авлиё Айюб Ансорий мақбарасининг «соя»сида колиб кетган. Қабрлар ниҳоятда зич жойлашган. Йўл йўқлиги ва сагана тошига битилган ёзувлар эскириб, ўча бошлагани сабабли уларни топиш қийин. Шунинг учун Дамашқдаги Форобий қабри сингари Истанбулдаги Али Қушчи қабри ҳам ЮНЕСКО томонидан жаҳон мероси дея эътироф этилиши ва обод қилиниши зарур.

Ўйлаймизки, бу борадаги саъй-харакатларимиз ҳам хайрли бўлади.

Бобур халқаро жамғармаси буюк аждодларимиз номини абадийлаштириш, улар қолдирган бой илмий-маданий меросни тўплаб, мангу оромгоҳларини ободонлаштиришдек эзгу ишларни бундан буён ҳам давом эттиради.

(Суҳбатдош – Мурод Абдуллаев)

«Ўзбекистон адабиёти ва санъати» газетаси,
2004 йил 19 марта

ИККИНЧИ УМР

Ўзбекистон Республикаси Президенти Ислом Каримов Иккинчи чакириқ Олий Мажлиснинг XI сессиясида буюк аждодларимиз хотирасига эътиборни янада кучайтириш ҳамда уларнинг Ўзбекистондан ташқарида дафн этилган жойларини ободонлаштириш тўғрисидаги эзгу ташаббус билан чиқкан эди.

Шунга биноан, Бобур номидаги Халқаро илмий экспедиция аъзолари ўтган йили Афғонистонда бўлиб, Алишер Навоий, Бобур Мирзо ва бошқа буюк аждодларимиз қабр-макбараларининг бугунги ҳолати билан танишиб қайтдилар.

Бобур номидаги Халқаро фонд раиси, илмий экспедиция ташкилотчиси Зокиржон Машрабов билан сухбатимиз айни шу мавзуда бўлди.

— *Халқимизда «Султон суягини хўрламас», деган улуғ ҳикмат бор. Мустабид совет тузуми узоқ йиллар аждодларимизга бўлган меҳр-муҳаббатимизни сўндиришига ҳаракат қилиб келди. Лекин мустақилликнинг илк кунлариданоқ Президентимизнинг алоҳида эътибори ва саъй-ҳаракатлари билан шонли тарихимиз, буюк аждодларимиз ҳаёти ва илмий-маънавий меросини ўрганишига астойдил киришилди. Бугунга қадар бу борада салмоқли ишлар бажарилди. Бобур халқаро фонди ҳам бунга катта ҳисса қўшиб келмоқда.*

— Мамлакатимизда халқимиз маънавий-маданий меросини ўрганиш, миллий-диний қадриятларимизни тиклаш ишлари давлат сиёсати даражасига кўтарилиб,

мазкур йўналишдаги вазифаларни бажаришда давлат ва нодавлат ташкилотлари фаол қатнашмоқда. Бизнинг фондимиз ҳам, том маънода мустақиллик яратган кулагай шароит, Юртбошимизнинг буюк тарихимизни холисона ўрганишга, ўтмиш аждодларимизнинг четга «суреб кўйилган» бебаҳо маънавий меросини тўплаш ва оммалаштиришга қаратилган эзгу даъватига жавобан, 1992 йилдан бўён фаолият кўрсатиб келмоқда.

Фонд томонидан ташкил этилган Халқаро илмий экспедиция ўтмиш аждодларимиз изидан йигирмадан ортиқ хорижий мамлакатларда 300 минг километрдан кўпроқ масофани автомобилда босиб ўтиб, жаҳон цивилизациясига муносиб ҳисса кўшган Абу Али ибн Сино, Абу Райхон Беруний, Аҳмад Фарғоний, Абу Наср Форобий, Алишер Навоий, Захириддин Мухаммад Бобур, Бобораҳим Машраб, Зокиржон Фурқат ва бошқа ўнлаб буюк аждодларимиз яшаб, ижод қилган ва вафот этган жойларда бўлди. Улар ҳақида маълумотлар тўплаб, илмий истеъмолга киритди.

Экспедициянинг чет элларга қилган сафарлари маҳсули сифатида йигирмадан ортиқ видео, кино-фильмлар яратилиб, ўнлаб китоблар чоп этилди ва халқимизга тақдим этилди. Юзлаб ноёб китоб ва кўлёзма асарлар Ватанга олиб келинди ва улар Андижон шаҳридаги «Бобур ва жаҳон маданият» музейига кўйилди.

Шу кунларда фондимиз ҳомийлигида Бобур ва бобурийлар сулоласи тарихига оид «Тож кийган дарвиш» (Бобур), «Ўн олтинчи аср бунёдкори» (Бобур), «Бобур – йўлбарс», «Гулбадан» ва бошқа чет элларда яратилган ноёб асарларни ўзбек тилига таржима қилиб, чоп этиш режалаштирилмоқда. Ўтган йили жаҳонга машҳур бобуршунос олимлар Эйжи Мано

ва М.Комаслар томонидан нашр этилган «Бобур ва унинг даври», испан тилидаги «Бобурнома» ҳамда Эрон давлатининг нуфузли музей-кутубхоналарида сақланаётган «Хатти Бобурий», «Куллиёти Бобур»дек ноёб асарлар Ўзбекистонга келтирилди.

Биз келгусида Ҳиндистон, Покистон, Афғонистон ва юртимиз кино ижодкорлари билан ҳамкорликда буюк Бобур ҳақида кенг қамровли бадиий фильм яратиш; буюк аждодларимиз қабр-макбараларини тиклабтаъмирлаб, зиёратгоҳга айлантириш; мамлакатимиздан хорижга олиб чиқиб кетилган китоб ва ноёб қўлёзма асарларнинг ҳеч бўлмагандага нусхаларини юртимизга олиб келишдек хайрли ишларни амалга оширишни мўлжалламоқдамиз. Шу мақсадда Осиё, Европа, Африка қитъалари бўйлаб илмий экспедициялар уюштириш режалаштирилган.

Улуғ аждодимизнинг 525 йиллик таваллуд санасига багишлиб Бобур энциклопедиясини яратишни ҳам фондимизнинг асосий вазифаларидан бири деб ҳисоблаймиз.

2004 йил 18 сентябрь куни Тошкент шаҳрида, «Захириддин Муҳаммад Бобур – Шарқ Уйғонишин даврининг буюк намояндаси» мавзусидаги илмий-маърифий анжуман Бобур номидаги Ҳалқаро фонд томонидан ўтказилиб, унда республикамиздаги таникли олим ва ёзувчилар, тадқиқотчилар билан бирга Афғонистон, Ҳиндистон, Эрон давлатларидан ҳам меҳмонлар иштирок этди.

Бобур ҳалқаро илмий экспедицияси ўтган йили Афғонистон сафари билан боғлиқ режаларини тўла бажарған ҳолда, фондимизнинг Ҳирот бўлимини очиб, унга Муҳаммад Тоҳир Анбарий исмли иқтисодчи,

тариҳнавис олимни раҳбар килиб кўйдик. Шунингдек, у ердан Ҳирот, Ғазна, умуман, Афғонистон тарихи ҳақидаги китобларни ва XIX асрда чоп этилган «Шоҳ Машраб» асарини юртимизга олиб келишга мұяссар бўлдик.

— Сиз Афғонистонга бир неча бор экспедиция уюштиргансиз, охирги сафарнинг олдингиларидан фарқли жиҳатлари ҳақида тұхтамсангиз...

— Аввало, шуни алоҳида таъкидлаш керакки, биз Афғонистонга беш марта экспедиция уюштириб, буюк аждодларимизнинг қабрларини излаб топиш, уларнинг ҳолатини, қолдирган бой илмий-маданий меросини ўрганиш ҳамда уларни тиклаш-таъмирлаш йўлида мұхандислик қидирув ва лойиҳалаш ишларини амалга оширидик. Кўхна Ҳирот шаҳрининг Мусалло майдонидаги Алишер Навоий, Ҳусайн Бойқаро, Камолиддин Беҳзод ва Ғазна шаҳридаги Абу Райҳон Беруний ва бошқа буюк алломаларнинг аянчли ҳолатга тушиб қолган қабр-мақбараларини қайтадан тиклаш борасида фондимиз тасарруфидаги «Мадор» мұхандислик ишлаб чиқариш бирлашмаси мутахассислари мұхандислик-қидирув-loyiҳalash ишларини бажарив, уларни амалга ошириш режаларини белгилаб олдилар.

Охирги сафаримиз ҳар қачонгидан масъулиятли бўлди. Ҳабарингиз бор, Президентимизнинг таклифлари асосида Алишер Навоий қабрини қайтадан тиклаш мақсадида лойиҳа тайёрланган эди. Олий Мажлис Кенгашининг «Буюк аждодларимизнинг Ўзбекистон Республикаси худудидан ташқарида дафн этилган жойларини аниқлаш ва ободонлаштиришга доир чоратадбирлар тўғрисида»ги қарори қабул қилинди. Бу борада Вазирлар Маҳкамасининг маҳсус фармойишига

биноан, буюк шоир ва мутафаккир Алишер Навоийнинг мақбарасини таъмирлаш ва ободонлаштириш имкониятларини жойида ўрганиб, танишиш мақсадида махсус гуруҳ тузилди. Мен ана шу гуруҳ таркибида яна бир бор Афғонистоннинг Ҳирот шаҳрида бўлдим ва ўз таклифларимизни тақдим этдик.

Иккинчидан, олдинги сафарларимиз ўта мураккаб шароитда кечган эди. Ҳокимият тепасига келган баъзи сиёсий гуруҳларнинг маданий меросга, аллома аждодларга, хусусан, уларнинг мақбараларига ва дунёвий олимлар меросига нисбатан тутган мутаассиб сиёсати шароитида илмий экспедиция олдига қўйилган мақсадларни амалга ошириш, маҳаллий олимлар билан ҳамкорлик қилишда катта қийинчиликларга дуч келган эдик.

Бугун Афғонистондаги вазият ўзгармоқда. Мамлакат ижтимоий-сиёсий ҳаётида ижобий силжишлар рўй бермоқда. Афғонистонга амалий ёрдам кўрсатиш учун борган ўзбекистонликларга аҳолининг хурматини кўриб хурсанд бўласан, киши. Афғонлар Ўзбекистон халқи ва унинг раҳбаридан вайрон бўлган кўприклар, йўллар ва тарихий обидаларни тиклашда ёрдам берилаётгани учун дуо қилиб, самимий ташаккурларини изхор этмоқдалар. Ўз мамлакатларининг Ўзбекистон каби ривожланишини, озод ва обод ўлкага айланишини чин кўнгилдан истамоқдалар.

– *Бобур Мирзо қабр-мақбарасини зиёрати қилдиларингизми?*

– Сафаримиз давомида яна бир бор Кобулдаги Боги Бобур билан яқиндан танишдик. Маълумки, Бобур ўзининг Кобулда дафн этилишини васият қилган ва шу сабабли Ҳумоюн отасининг жасадини маълум вактдан кейин Аградан Кобулга кўчириб келтирган.

Мақбара шоҳ Бобур ўзи ёқтирган, темурийларнинг анъанавий чорбоглари шаклида яратилган кўркам боқقا кўйилади. Ўша даврлардан бошлаб «Бобур боғи» деб аталиб келган ушбу оромгоҳ Афғон ва Ҳинд, Хуросон ва Мовароуннаҳр ўлкалари халқларининг севимли зиёратгоҳларидан бири бўлган. Афсуски, кейинги вактлардаги кўп йиллик урушлар бу жойни ҳаробага айлантирган, деворлар бузилган, ҳовузлар кўмилган, мақбара жиддий шикастланган.

Бугун у ерда амалга оширилаётган таъмирлаш ишларини кўриб қувондик. Оғахон фонди немис мутахассислари ва маҳаллий аҳоли билан биргаликда Бобур Мирзо боғида таъмирлаш ишлари олиб бориб, зиёратчилар учун қулай шароитларга эга дам олиш хоналари, турли маросимлар ўтказиладиган заллар қайтадан қад кўтармокда. Шунингдек, Бобур Мирзонинг фарзандлари Жаҳонгиршоҳ ва Шоҳ Жаҳон қурдирган ёзги масжид ва мақбара, Бобуршохнинг қабрига кўйилган сағана тоши атрофларида таъмирлаш ободонлаштириш ишлари олиб борилмоқда.

— Кўнлаб мутафаккирларимизнинг азиз хоки Афғонистон ҳудудида эканлиги маълум. Уларнинг ҳолатини ўрганини ҳам экспедициянинг диққат марказидан турган масалалардан бўлса керак?...

— Максад, Кобулдаги Бобур мақбарамидан ташқари, Ҳирот шаҳридаги Камолиддин Беҳзод ва Султон Ҳусайн Бойқаро қабрлари, Ғазнадаги Абу Райҳон Беруний қабри, Балхнинг Ишкамиш мавзесидаги Бобораҳим Машрабнинг қабри, темурийлардан қолган Ҳирот ва Афғонистоннинг бошқа вилоятларидаги бебаҳо санъат намуналари бўлмиш иншоотларнинг мудҳиш урушдан кейинги ҳолатини ўрганиш эди. Шунга кўра, биз Ғазнада Абу Райҳон Берунийнинг қабрига бордик. Ушбу

муборак жой олдинги сафарлар чоғида «кашф этилган» эди. Бугун қабр ниҳоятда аянчли ахволда. Бобораҳим Машрабнинг Ишкамиш шаҳридаги қабр-мақбараси эса уч-тўрт сўфийга тирикчилик манбанини ўтовчи ўзига хос «балогардон авлиё» жойга айлантирилган. Қабр устига лойсувоқ гувала уй солинган. Сафар чоғида ўзбек мумтоз шоири Мавлоно Лутфий дағн этилган жой ҳам топилди. Маълум бўлишича, Ҳиротдан 25–30 чақирим узокликдаги Даشت Булдай деган мавзеда жойлашган қабристонда ўз вақтида шахзода Қосим ва унинг яқинлари дағн этилган экан. Кўп машакқатлар билан шахзода Қосим қабристонини топиб бордик. Бу жой дашт ўртасида жойлашган ва хийла катта – тахминан уч гектар атрофидаги пахса деворли кўргон бўлиб, Даشت Булдай ўртасида, аҳоли яшайдиган Дехи Канор қишлоғидан уч-тўрт чакиримча шимолда эди.

Кўргон ичида яна бир кўргонча бўлиб, унинг ўртасида сўрисифат баланд супа ва унинг устида катта тош уюми бор – бу шахзода Қосим қабри.

Куни билан олиб борган қидирув ишларимиз натижа бермаганидан сўнг биз тарихнавис, кекса олим мавлоно Анбарий уйига бориб, у зот билан суҳбатлашганимизда мавлоно Лутфийнинг қабрлари шахзода Қосим қабрининг кун чиқиш тарафидаги қабрлардан бири бўлиши мумкин, деган сўзларини эсладик. Қабристонга қарайдиган Шайх Абдулваҳоб ушбу мулоҳазани эшитиб, хужраси ёнидаги бир ихчам кўргончани кўрсатиб, деди:

– Мана бу жойда ҳам бир қабр бор, лекин кимники эканлигини, тўғриси, билмайман.

Кўргончанинг эни икки ярим, бўйи тўрт метрча, баландлиги одам бўйи бўлиб, тепаси очик ва ток

занглари билан қопланган эди. Ҳиротлик ҳамроҳимиз Мавлоно Анбарийнинг ўғли Тоҳиржон билан Абдураҳмон девор оша қўрғонча ичига тушишди-да, белкурак билан тупроқни ковлай бошлади. Анчадан кейин қалин ва узун мармар тош чикди. Биз офтобада сув келтиридик, уни ўша жойда ювдик ва ниҳоят:

– Топилди, топилди! – деди Тоҳиржон худди катта бир хазина топгандай. Тошга уч сўз: «Мавлоно Лутфий Ҳиравий» битилган эди.

Ҳаммамизнинг кувончимиз чексиз эди. Муқаддас Қуръон оятларидан тиловат килиб, Лутфий ҳазратларининг руҳи покига бағишладик.

Ҳиротга кеч қайтдик, тўғри сангтарошлар растасига бордик. Ҳартугул кетиб қолишмаган экан, мармар тошга ёзув буюрдик. Эртасига мармар тахтани олиб, яна Дехи Канорга жўнадик. Қишлоклар оралаб ўтган йўл кеча эрталаб юрган дашт йўлимизга нисбатан чидаса бўлгулик эди.

Шайх Абдулваҳоб бизни мулойим табассум билан кутиб олди, унинг ёрдамида Лутфий дафн этилган кабр қўрғончасининг кун чикиш томони ўртасидан токчасимон килиб ўйдик-да, «Бу оромгоҳ пок Аллоҳ лутфи дарёсининг ғаввоси, урфонга элтувчиғазал иқлимининг сultonи, ҳазрати Лутфий Ҳиравийницидир...» каби жумлалар ўйиб ёзилган мармар тахтани жойлаштириб, атрофини суваб, маҳкамладик.

Шундан кейин шайх Абдулваҳобга аталган назру ниёzlаримизни бериб, Ҳиротга қайтар эканмиз, кайфиятимиз чог, бугунги қилган тадбиrimиздан мамнун эдик. Албатта, биз катта кашиёт қилганимиз йўқ, лекин Лутфийдек атокли бир шоир қабри йўқ бўлиб кетишининг олдини олгандек, ўзимизни ҳис этардик. Чунки Дехи Канор қишлоғининг аҳолиси ва

бошқа афғонистонлик зиёлилар ҳам Лутфийдек улуг ҳамюртларининг қабрини билмас эдилар. Биз шайх Абдулваҳобга ва у ердаги маҳаллий халққа уни танитиб, назаримизда, хайрли иш килдик. Шоядки, шу баҳона улар ҳам бу машхур шоирни қайтадан таниб олсалар.

Бугунги кунда фондимиз мутахассис (геолог-топограф-лойиҳачи)лари Афғонистондаги буюк аждодларимиз қабр-мақбараларини қайта куриш-таъмирлаш лойиҳаларини тугатиб, жамоатчилик ҳукмига ҳавола килмоқчи.

— *Сафарнинг Ҳирот шаҳри билан боғлиқ тафсилотлари ҳақида ҳам маълумот берсангиз.*

— Самарканд Амир Темурнинг пойтахт шаҳри бўлса-да, ўғли Шоҳруҳ Мирзо (ҳукмронлик йиллари 1405 – 1447 йиллар) тахтини Ҳиротга кўчирган эди. Шу сабабли бу шаҳар XV асрга келиб туркий тилли халқлар маданияти ривож топган темурийларининг энг асосий марказий шаҳри бўлиб, Хурросон ва Мовароуннаҳр ўлкаларига пойтахт хизматини ўтади. Амир Темурнинг набираси, Бобурнинг эса бобоси Султон Абусайд Мирзо Хурросон ҳамда Туркистонни биргаликда қўшиб бошқарган сўнгги темурий ҳукмдор бўлган эди.

Бобур Мирзонинг амакиваччаларидан бири Ёдгор Муҳаммад Мирзо бошқарувидан ўттиз йил ўтгач, Бобурнинг яна бир амакиваччаси Султон Ҳусайн Мирзо раҳнамолиги остида Ҳирот маданий жиҳатдан энг юксак чўққига кўтарилди.

У ерда кўплаб шоирлар, олиму фозиллар, санъаткорлар ижод қилишарди. «Мен Ҳиротни кўриш истагида ёнардим, – деб ёзади Бобур. – Султон Ҳусайн Мирзо ҳукмронлиги остида Ҳирот гуллаб-яшнади, ўн маротаба, балки йигирма маротаба кўпроқ чирой очди».

Маълумки, Алишер Навоий ва Султон Ҳусайн Бойқаро яқин дўстона муносабатда бўлишган. Собиқ шўро даврида яратилган Алишер Навоий ҳакидаги спектакль ва кинофильмда давр сиёсатидан келиб чиқиб, бу буюк инсонлар бир-бирига қарама-карши қўйилиб, салбий образ сифатида Ҳусайн Бойқаро танлаб олинган. Аслида, Султон Ҳусайн Бойқаро илм-фан ва маданият ҳомийси, шоир бўлган. Беайб парвардигор деганлариdek, у ҳам камчилик ва хатоларга йўл қўйган бўлиши табиий, лекин, нима бўлганда ҳам, унинг темурнийлар сулоласининг йирик намояндаси бўлгани шубҳасиз.

Бугунги Ҳирот Афғонистондаги бошқа шаҳарларга нисбатан ободончилик ва бунёдкорлик ишлари жадаллик билан олиб борилаётган маконга айланиб бормоқда.

Ҳиротнинг қадимий кисми ҳисобланган Мусалло майдонида темурий султонлар ва Алишер Навоий курдирган инишотлар, мақбаралар жойлашган. XV асрда яшаган машхур тарихчи Ҳондамир «Равзат-ус-сафо» асарининг хотимасида Ҳиротнинг кўча ва боғлари, масжид-мадрасаларининг батафсил баёнини ёзиб колдирган. Мусалло темурнийлар даврида шаҳарнинг энг кўркам боғи бўлганлигини алоҳида таъкидлаган ва уни жаннатга киёслаган. Даврлар ўтиши билан бу ҳудуд кичик бўлак ва майдончаларга бўлиниб кетибди. Аммо шоирлар куйлаган ва Навоийнинг севимли иморатлари ёнидан ўтган машхур Инжил ариғи ҳамон оқиб турибди. Ариқнинг шимол томонида Султон Ҳусайн Бойқаро макбарасининг қолдиклари ва сағана тоши, ҳаробага айланган мадрасанинг тўрт минораси сақланиб қолган. Ариқнинг жанубий қирғогида Алишер Навоий, Гавҳаршодбегим мақбраси, Навоий қурдирган «Ихлосия» хонақоҳи ва «Ха-

лосия» мадрасасининг харбалари сақланиб қолган. Алишер Навоий ҳазратлари Инжил ариғи бўйида ўзи курдирган иншоотлар ҳақида «Вақфия» асарида тўла ахборот бериб ўтган. Бу ҳақда тарихчи Хондамирнинг асарларида ҳам талай маълумот бор.

– Ўқувчиларимиз тўлароқ тасаввурга эга бўлиши учун Навоий мақбарасининг ҳолатини янада батофисл тушуунитириб берсангиз...

– Алишер Навоий Ҳиротнинг Инжил дарёси бўйидаги сокин мавзелардан бирига дафн килинган. Мусалло номи билан машхур бу меъморий мажмууда Шоҳруҳ Мирзо (хоки Самарқандга кўчирилгунга қадар), Гавҳаршодбегим, Бойсунқур Мирзо каби темурийлар хонадони аъзоларининг қабр-мақбаралари бўлган. Навоий ҳазратлари бу зотлардан 30–40 метр шимоли-шарқда, мўъжазгина гумбазли, бадиий безаклардан холи, соддагина мақbara ичида ётибдилар. Қабр тепасига тикланган дастлабки иншоот ҳам, унинг тасвири ҳам, афсуски, изсиз йўқолган. Ҳозирги мақбарани ҳиротлик тадбиркор Ғулом Ҳайдар Мухторзода ўз сармояси ҳисобидан 1947 йили пишиқ ғиштдан курдирган.

Бизнинг вазифамиз, энг аввало, темурий султонлар барпо этган юксак маданият белгиларини излаш, Алишер Навоий мақбарасиниг вайронага айланиш сабабларини, унинг бугунги ҳолатини, таъмирлаш ва ободонлаштириш ишлари билан боғлиқ шароит ва муҳитни ўрганиш эди. Бизга Афғонистон томонидан тарихий обидаларни сақлаш ташкилоти раҳбари Абдулҳай Аббосий ва Ҳирот шахри мутасаддиларидан Музахҳар Воҳидий ҳамроҳлик қилдилар.

Иzlанишлар давомида Алишер Навоий нима учун бу олий табака зодагонлар хилхонасига дафн этилган экан, деган савол пайдо бўлади.

Маълумки, ҳазрат Навоий нафакат улуғ шоир, балки улуғ Амир рутбасига етишган машхур давлат арбоби бўлган Бинобарин, унга муносиб иззатикром кўрсатмок учун қабр ўрнини подшоҳ Ҳусайн Бойқаронинг ўзи белгилаб берган бўлиши мумкин. Қолаверса, оддий халк ҳазрат Навоийни улкан шоир, нуфузли амалдор деб эмас, балки авлиё, илоҳий пир, деб ҳам эъзозлаган. Ҳатто, шу кунларда ҳам ҳазратнинг қабрига кишилар шифо истаб, мушкулларига мадад тилаб зиёратга келишларининг гувоҳи бўлдик.

1501 йили буюк Алишер Навоийнинг маърака-маросимларида шоҳ Султон Ҳусайн Бойқаро ўзи аза тутиб, рахнамолик қиласи. Алишер Навоийнинг қабр-мақбараси ҳам шоҳона қилиб қурилади ва бу қаср тарихий обида – зиёратгоҳ бўлиб кўп асрлар сақланади. Беш йил ўтиб, 1506 йили Султон Ҳусайн Мирзо вафот этади ва дўсти Алишернинг қабридан чамаси 100 метрлар шимол томонга ўзи қурдирган мадраса олдида дағн этилади. XIX асрнинг охирларига келиб, бу икки буюк инсоннинг қабр-мақбаралари бузилиб, вайронага айланади.

Алишер Навоий мақбарасидан 30–40 метр жануби-гарбда Шоҳруҳ Мирзо дағн этилган. Ҳозирда Гавхаршодбегим мақбараси, деб ном олган иншоотга Шоҳруҳ Мирзо, Мирзо Улугбекнинг онаси, укалари Бойсункур Мирзо, Шоҳ Ғарид Мирзолар дағн этилган бўлиб, Мирзо Улугбек отаси Шоҳруҳ Мирзонинг жасадини Самарқандга олиб келиб, қайтадан Гўри Амирга дағн этади. Шоҳруҳ Мирзо илк бор дағн этилган ушбу иншоот ёнидаги мақбаралардан ярим аср олдин қурилишига қарамасдан, ҳозиргача ҳам яхши сақланган.

Хулоса қилиб айтганда, бир хил геосейсмологик шароитда тикланган учта тарихий обидага табиий

муҳитнинг салбий таъсири бир хил бўлганини инобатга олиб, Алишер Навоий ва Султон Ҳусайн Бойкаро қабр-мақбараларининг вайронага айланиб, бузилиб кетиш сабабларини яна ҳам чуқурроқ ўрганиш учун келгусида илмий изланишларни давом эттиргомиз лозим кўринади. Ўтмишнинг гувоҳлик беришича, XIX аср охири – XX асрнинг бошларида Афғонистонда Абдураҳмонхон ва Омонуллохон ҳукмронлик қилган даврда Англиялик босқинчилар иштирокида туркий тилли буюк шахсларнинг мақбаралари қасдан вайронага айлантирилган («Афғонистон тарихи» китоби, афғонистонлик олимларнинг сұхбатлари ёзилган кассеталар).

Хозирги Алишер Навоий мақбараси ташки тарафдан ганчхок, ички тарафдан эса оддий лой қоришмаси билан сувалган бўлиб, томи гумбаз қилиб ёпилган. Тўрт томондаги бурчакларда минорачалар ишланган. Ички саҳни 5x5 метрдан иборат ва марказий қисмидаги Навоий ҳазратларининг кейинги давларда қўйилган сафанаси ва қабр тоши жойлашган. Афсуски, қабрга кўмилган кора мармар лавҳанинг бешдан бир қисмигина сакланиб колган. Мақбаранинг ички саҳни ҳозирги вақтда мармар кошинлар билан қопланган. Томидан чакка ўтади. Ташки томонидаги гишталар, ганчхок қоришмалар тушиб кетган, ички томонидаги равоқларнинг тепа қисмларида, ички гумбазнинг ганч безаклари билан пардозланган қисмларида дарз кетган жойлар бор...

– *Буюк аждодларимизнинг мамлакатимиздан ташқарида дағи этилган жойларини обод қилиши ишлари қай тарзда амалга оширилади?*

– Таъкидлаш лозимки, Афғонистон ва бошқа давлатлар ҳудудида дағи этилган илм-фанимиз,

санъатимиз, маданиятимиз, тарихимиз, адабиётимизга бевосита дахлдор бўлган буюкларимиз факатгина Навоий, Беҳзод, Беруний, Лутфий, Машраб билан чегараланмайди. Қадимда «Хурросон» деб номланган бу худудда биз том маънода фахрланишимизга арзигулик ўнлаб алломаларимизнинг азиз хоклари қолган. Улар хақида изланишлар олиб борилмоқда.

Албатта, уларнинг барчасининг мақбараларини ҳозирги Ўзбекистонда барпо этилаётган ёки қайта таъмирланаётган мақбаралар даражасида тиклаш кийин. Балки бунга эҳтиёж ҳам йўқдир... Аммо уларнинг беиз йўқолиб кетишига йўл қўймаслик ва хеч бўлмаганда, оддийрок лойиҳалар асосида таъмирлаш мумкин ва лозим, деб ўйлайман. Шу маънода, Афғонистон худудидаги темурийлар тарихи ва маданияти билан боғлиқ осори атиқалар, жумладан, ўзбек давлатчилиги, илму фан ривожига улкан хисса қўшган ҳамда адабиётда муҳим ўрин тутган Султон Ҳусайн Бойқаро, Камолиддин Беҳзод, Абу Райҳон Беруний, Боборахим Машраб, Сурия давлатининг Дамашк шаҳрида жойлашган Форобий, Туркия давлатининг Истанбул шаҳрида яшаган Али Қушчи ва бошқа алломаларимизнинг қабр-мақбараларини таъмирлаш чораларини кўриш фондимиз олдида турган муҳим вазифалардандир.

(Сұхбатдош – З.Мунавваров)

«XXI аср» газетаси,
2005 йил 10 февраль

КОМИЛ ИНСОН

Захириддин Муҳаммад Бобур – бутун Осиё тамаддунига улкан таъсир кўрсатган буюк шахслардан бири. У тақдир тақозоси билан олдин Афғонистонни, кейинрок Ҳиндистонни эгаллаб, бу мамлакатлар тарихий таракқиётида туб бурилишлар ясади. Бу ҳақда ҳинд халқининг буюк фарзанди Жавоҳарлаъл Неру шундай дейди: «Бобур келиши билан Ҳиндистон янги сулола ҳукмронлигига кудратли салтанатга айланди. Шу боис, Европанинг хужум қилиш хавфи ёки эҳтимоли йўқ даражага тушиб қолди».

Боланинг ўсиб-улгайиши, тарбиясига ота-онаси ҳам, бувиси ҳам алоҳида эътибор билан қаради. Натижада Бобур пахлавон йигит бўлиб етишди. Тахт вориси сифатида ёшлигиданоқ ҳарбий ишни, араб ва форс тилини мукаммал ўрганди. Эътиқоди мустаҳкамланиб боргач, фикҳ қонунларини, тарих ва Шарқ адабиётини чукур ўзлаштириди.

Бобур ўткинчи хурсандчиликларга унча қизик-майдиган, емак-ичмакда инжиқлик қилмайдиган бўлиб ўсди. Ҳаётда нима яхши-ю, нима ёмонлигига болалигиданоқ разм соладиган бўлди. У дўстлари, тенгдош ўртоқларига, уларнинг насл-насабидан қатъи назар, бир хил муомала қиласарди. Шухратпарастлик, иззатталаблик каби иллатлардан узок бўлди. Ёлғон гапирмайдиган, муғомбирлик қилмайдиган, оққўнгил бўлиб ўсди.

Бобур баҳодирона келбати, руҳан тетиклиги, абжирлиги ва нозик диди билан ўзгалардан ажралиб турарди. Кейинчалик, подшоҳлик йиллари ҳам бойликка ортиқча ружу қўймади, зеб-зийнатдан роҳатланиш ҳиссига берилмади, уларга нописандлик назари билан қарашга одатланди. Бундай феълини унинг бутун умри давомида, давлат фаолиятида ҳам кузатиш мумкин.

Кейинчалик, ўғай укалари Жаҳонгир Мирзо ва Носир Мирзо вояга етганда ҳам ана шу феъли туфайли уларга меҳрибонлик кўрсатди. Ганимлар худбинлик йўлига ундан, ғаламислик қилганларида ҳам укаларига ғаразгўйлик қилмади, кенгфеъллиги боис гина сакламади.

1487 йили, яъни Бобур Мирзо тўрт яшарлигига она томонидан бобоси Юнусхон узок фалаж бўлиб ётгач, вафот этди. Бобоси васиятига биноан бўлса керак, 1488 йили беш яшар Бобурни, давр удумига кўра, амакиси Султон Аҳмад Мирзонинг кизи Ойша Султонбегимга «қулоқ тишлатти» маросими учун Самарқандга олиб бордилар.

Захириддин Муҳаммадни, тўй тантаналари ўтгач, улуғ бобоси Амир Темур салтанатининг пойтахтини айлантириб томоша қилдиргандари шубҳасиз. Соҳибқирон даврида бино этилган гаройиб қасрлар, ҳашаматли оромгоҳлар, феруза гумбазли мақбаралар, кўкка бўй чўзиб ганчлари ярқираб турган миноралар гўзаллигини, масжиду мадрасалар маҳобатидан олган таассуротларини Бобур гўдаклик шуурига сингдиргани аниқ. Кейинчалик Низомиддин Шомий, Шарафиддин Али Яздий «Зафарнома»ларини ўқиб, Соҳибқирон давлатчилик фаолиятининг кўп жиҳатларини ўрганди ва гўдаклик чоғидаги Самарқанд сафаридан олган таассуротлари ёрдамида улуғ бобоси ҳаётига разм солди. Амир Темур максадлари ва бу йўлдаги улкан

ишлари, жангу жадаллари, исломий эътиқоди, олимуму фузалоларга кўрсатган беминнат ғамхўрликлари, туғишигандарига бўлган хурмат-мурувватни ўрганди. Булар Бобур учун бир умрга таълим мактаби эди.

Бобур тарбиясида катта бувиси Эсон Давлатбеким ва ўз онаси Кутлуғ Нигорхонимнинг хизматлари бекиёс, албатта. Ёш подшозода одоб-ахлоқ ва давлат ҳақидаги таълимотларни ўзлаштиришдан ташқари, машҳур «Қобуснома», Шайх Саъдийнинг «Бўйстон» ва «Гулистан» асарларидан ҳам дарс олди.

Отаси Умаршайх Мирзонинг фазилатлари – танилик ва сахийлик, саводхонлик ва мардлик ёш Бобурга ўз таъсирини кўрсатган. Ундағи хушхулқилик ва саховатпешалик, табиатан хушчақчақлик ва бегаразлик, дўстона сухбатларни эъзозлаш каби яхши фазилатлар, шубҳасиз, ота-боболаридан ўтган ва Бобур бу хислатларни ўзининг ўта мураккаб ҳаёти давомида янада бойитди, ўз навбатида, уларни наслларга мерос килиб қолдирди. Инглиз тадқиқотчиси Уильям Эрскин Бобур ҳаётини кўп йиллар давомида ўрганиб ёзадики, инсоният фаолиятининг барча соҳасида «осиёлик шахзодаларнинг ҳеч қайсиси Бобурга тенг келолмайди ва унинг ёнига кўйиш учун лойигини тополмаймиз». Шунинг учун ҳам Жавоҳарлаъл Неру уни «дилбар шахс» деб атайди.

Бобурнинг аёлларга хурмати ва меҳрибонлиги ҳам кишини лол қолдиради. Туғишигандар опаси Ҳонзода-бекимга (ўзидан беш ёш катта эди) кўрсатган иззат-эҳтироми, фавқулодда ғамхўрлиги бунинг яққол исботидир. Ёки момоси Эсон Давлатбекимга бўлган хурмати-чи? Мана, подшоҳ Бобурнинг онага хурмат юзасидан берган баҳоси: «Хотунлар орасида раъй ва

тадбирда менинг улуғ онам Эсон Давлатбекимча кам бўлғай эди, бисёр оқила ва мудаббира эди».

...Бобур Мирзога исёнчилар бош кўтаргани ҳакида Кобулдан чопар нохуш хабар келтиради. Ҳиротдан Ҳиндикуш тоғлари орқали киш мавсумида кесиб ўтиб, тезроқ Кобулга етиб бориш мақсадида кўп қийинчиликларга дуч келади. Довон йўли чиндан ҳам хатарли бўлиб, қалин қор бўрони ичидаги музлаб қолиш эҳтимоли яқин эди. Шунда Бобур ёнидаги ғорга факат кексалиги учун Қосимбекни олиб киришни, ўзи очиқда йигитлар билан тонг отгунча туришини айтади. Ўзларининг ўлим билан юзма-юз турганини, ҳаёт-мамот олдида шоҳу гадо баробарлигини хаёлидан ўтказади.

Шу ўринда Бобур Мирзонинг «Дўстлар билан ўлмок шарафлидур», деган сўзини эслашни истардим. Бобур Ҳалқаро илмий экспедицияси бу йўлларни 2004 йили босиб ўтиб, Бобур Мирзонинг руҳини шод этган бўлса, ажаб эмас...

Бобурнинг инсоний фазилатларини ўрганар эканмиз, унинг ислом дини фидойиси ва посбони бўлиш билан бирга, асло мутаассиб кимса бўлмагани ҳам яққол кўзга ташланади. Амир Темур каби у ҳам, айниқса, Ҳиндистонда эканида уламолар билан диний мавзуларда сұхбат қуришни севарди. Ҳар пайшанба куни фиқҳ масалалари бўйича сұхбат уюштиради. Чаламулла, текинтомоқ шайхларни, ўзига бино қўйган такаббур олимларни асло ёқтирасди.

Ҳиндистонга юриш килган аксарият подшоҳ ва хукмдорлардан фарқли ўлароқ, Бобуршоҳгина бу юртдан мол-давлат олиб кетмади, аксинча, бор бисотини у ерга олиб бориб, ўша жойни ўз Ватанидек обод қилишга интилади.

Энг муҳими, Бобур Мирзо салтанатни идора этишда халқ ҳоҳиши-иродасини инобатга олар, унинг манфаатларини кўзлаб иш тутар эди. Маданият, маънавият, яратувчанлик ишининг доимийлиги Бобур давлатининг устувор йўналишлари эди. Бу соҳаларга, жумладан, илм-фан ривожига у давлат аҳамиятига молик иш сифатида қараган. Саройлар, қасрлар курдирган, боғлар бунёд этган.

Бобур Мирзонинг шахсияти ва олижаноб хислатларидан келиб чиқиб, Америка ва Европада бундан бир неча асрлар олдин яратилган Вильям Рашибрукнинг «Ўн олтинчи аср бунёдкори», Ҳарольд Лэмбнинг «Бобур-йўлбарс», Анна Флора Стилнинг «Тож кийган дарвиш» ва бошқа асарлар бутун дунёда тан олинган.

Ҳа, Бобур эътиқодда мустаҳкам, имони бутун, шу билан бирга, химмати баланд комил инсон эди. У боғоси соҳибқирон Амир Темурга нисбат берса бўладиган улуғ зот, саховатли ва диёнатли подшоҳ эди. Бош фарзанди Ҳумоюн Мирзо бетоб бўлганида табиблар маслаҳатини ўзича талқин этиб, жонини ўғлига бағишлади, унинг дардини ўзига олишни сўраб, Яратганга астойдил илтижо қилди. Охи Аллоҳга етиб фарзанди тузалди, ўзи эса касалланди. Бу ҳақдаги ибратли ҳикоя асрлар оша бизгача етиб келди. Шу вактга қадар ислом Шарқида, подшоҳлар тарихида бундай ҳодиса кузатилган эмас. Бу ҳам Бобурнинг нақадар мустаҳкам эътиқодли, комил инсонлигидан нишонадир.

Ҳеч бир шоҳ, ўзи ҳакида бор ҳақиқатни, хато-камчиликлари, фазилату нуқсонларини ошкора ёзib қолдирмаган. Юртдошимиз, Захириддин Мухаммад Бобургина шундай кила олган олижаноб, комил инсон эди.

«Ўзбекистон адабиёти ва санъати» газетаси,
2007 йил 16 февраль

БОБУРНИНГ ЗАМБАРАКЛАРИ

Захириддин Муҳаммад Бобур Ҳиндистонга юриши пайтида (1525 йил) Биёна қўрғони ва унга ёндош қалъаларни забт қилишда замбараклардан фойданишга қарор килади. Чунки бу қўргонлар мустаҳкам истеҳкомдан қолишмас эди. Замбарак қуювчиларга топширик беради. Уларнинг бошлиғи устод Али Кулига сакқизта замбарак тайёрлашни буюради. Тараддуд ишлари ниҳоясига етгандан сўнг, Устод қуийш жараёнини кузатиш учун Бобурни устахонага таклиф қилади. Подшоҳ жараённи диккат билан кузатади.

Бобур бу ҳақда қуидагиларни ёзади: «Биёна ва яна бир неча менга бўйин эгмаётган қалъаларни ўққа тутиш мақсадида Устод Али Кулига катта замбарак қуийшни буюрдим. У барча тараддуудни кўриб бўлиб, менга хабарчи юборди. Шанба, муҳаррам ойининг 15-кунинда биз Устод Али Кулининг замбарак қуишини кузатиш учун бордик.

Куийш жойида сакқизта қозон ўрнатилган ва асбоб-ускуналар ёйилган эди. Ҳар бир қозон тубидаги тарновлар қолипларга тортилган. Устод Али Кули тарновлар оғзини очди, эриган мис сувдек эриб, қолипларга куйилди. Икки кун ўтди, қолиплар совиди, сўнг улар очилди. Замбаракларнинг тарнов қисми тайёр бўлди. Улар сайқалланди, сўнгра дорихонасини куийшга киришди («Бобурнома». Т.: 1958, 347–319-бетлар»).

Ҳарбий тизимда тўплар (замбараклар) билан куролланган қисмни бизнинг замонда артиллериячилар, дейилади. Улар куруклик, денгиз, ҳаво қўшинларининг бир тури.

Артиллерия қадимда Хитой ва Европада тош иргитадиган ускуна кўринишида бўлган. Амир Темур лашкарида ҳам шундай машиналар бор эди. Кейинги даврлардаги хон ва амирлар қўшинлари таркибида тўп билан куролланган махсус бўлинмалар бўлган. Артиллерия ҳарбий фан XIV асрда бошланган. Бу пайтга келиб, тўплар пароходларга ҳам ўрнатилган. Дастреб тўплар ёғоч тагликка жойланган, карнай шаклида, ўқ ўрнида темир, тош бўлаклари отилган. XV асрда тўплар мис ва бронздан ясалган. Аввал замбараклар қамал ва ҳимоя максадлари учун ишлатилган. Кейинчалик дала жангларида ҳам қўлланилди. XVI асрда тўплар пиёда ва отлик аскарларга ёрдам берадиган мустақил қўшин тури сифатида шаклланди.

Биз Бобур замонига мансуб замбарак намуналарини Тошкент, Бухоро, Қўқон, Санкт-Петербург, Москва, Дакка, Боку тарихий музейларида кўрдик.

Қадимда тўп куйиш учун асосий хомашё сифатида мис, кейинчалик бронза ишлатилган. Бобур Мирзо ва унинг аъёнлари табиий бойликлардан оқилона фойдаланганлар. Бобур Мирзо Тянь-Шань, Помир, Ҳиндикуш, Ҳимолай тоғ тизмаларини синчковлик билан ўрганиб, бу ерларда тилла, мис, темир, қўргошин ва бошқа қимматбаҳо маъданлар борлиги ҳақидаги фикрларни «Бобурнома»да келтиради.

Қадимда бронздан ўроқ, омоч каби иш куроллари ишлаб чиқарилган. Бу давр гувоҳлари сифатида Андижон вилояти (Далварзинтепа)да, Катта Фаргона канали қазилишида топилган бронза куроллари

(ошпичоқ, найза)ни кўрсатиш мумкин. Ҳиндистон тарихида «Панипат жангига» номи билан машхур (1526 йил) бўлган жангда Бобур душманга қарши «тўлғама» ҳарбий усулини қўллашда порох таъсирида отадиган ҳарбий қуроллар (тўфак)ни ишлатади.

Маълумки, милтиқ дастлаб XII асрда араб мамлакатларида пайдо бўлган. Мовароуннаҳрда, асосан, Бобур даврида XIV-XV асрларда тарқалган. У ёғоч дастага маҳкамланган кувурдан иборат бўлиб, пилик билан ўт олдирилган, шунинг учун халқ орасида «Пилта милтиқ» деб аталган. XVI асрда «мушкет» милтиги (Испанияда) дунёга келди, вазни 8 килограмм бўлиб, 200 қадамдаги нишонни урган. Россияда XIX асрда затвор ва магазинли «Берданка» милтиги ихтиро қилинди, 1890 йилда «беш отар»га ўтилди. Рус ихтирочиси С. И. Мосин 1930 йилда унга баъзи ўзгаришлар киритди.

Бобур ҳарбий мақсадлар учун металлни Афғонистон (Айнак, Дарбанд), Ҳиндистон (Майсар), Покистон (Сайднак) конларидан олган, дейиш мумкин. Аллома ўз асарида замбараклар ҳакида қисқа маълумот берган, холос. Лекин, ўкувчида талай саволлар туғилади: замбарак учун қолиплар қаердан олинган, тўпларнинг ҳажми, вазни, умуман, техник таърифи, ўқлари қандай тайёрланган, улар отилганда неча метрга етиб борган? Армия таркибида тўпчилар бўлинмаси, тўплар қаерда ва қандай сақланган, уларни судраб юрадиган мосламалар бўлганми? Замбарак ясаш учун металлни қаердан қазиб олишган ёки ташиб келтиришган, уни эритиш учун қандай ёқилғидан фойдаланилган? Ҳиндистонга юришдан олдинги жангларда хам замбараклар ишлатилганми? Маъданни саралаш, бойитиш ишлари ўtkazilganmi? Бундай саволлар, афсуски, хозирча жавобсиз қолмоқда.

Балки замбараклар ва тўпчилар ҳақидаги маълумот ҳарбий сир ҳисоблангандир? Армиядаги тўпчилар бўлинмаси ҳақида, курол-аслаҳа таъминоти, уларни саклаш ва қўриклиш, захираси, тўпчиларнинг машқлари ҳақида бирор оғиз сўз учрамаслиги шундай деб тахмин қилишга асос беради.

Масаланинг қизиқ жойи шундаки, бу замбараклар ўқ билан қандай таъминланди, уларни ким ясад берди? Уларга минерал хомашёни ким, қаердан келтирди? «Бобурнома»да замбаракнинг техник таърифи берилмаган (узунлиги, вазни, ўқнинг учиш масофаси, уларни силжитиш воситалари, отиш услублари) сир сакланган. Худди шу ҳолат Амир Темур ҳақидаги манбаларда ҳам кузатилади.

Амир Темур тузукларида берилган ҳарбий ишларнинг назарий асослари ва уни амалда қўллаш Бобур Мирзо ҳарбий юришларида асосий омил бўлган.

Маълумки, Бобур Мирзо ўз хаётий тажрибаларидан келиб чиқиб, «Ҳарб иши» асарини яратган. Бобур Ҳалқаро илмий экспедициясининг келгуси вазифаларидан бири, ана шу «Ҳарб иши» асарини ер куррасининг кайси бир бурчагида сакланётганидан қатъи назар, излаб топиб, Ватанга олиб келиб, илмий истеъмолга киритишдан иборатдир.

«Андижоннома» газетаси,
2007 йил 14 февраль

«БОРИ ЭЛГА ЯХШИЛИФ ҚИЛҒИЛ...»

Шу кунларда Ўзбекистон маданий жамоатчилиги – зиёлилар, олиму адиллар, кўп миллионли олий ва ўрта мактаб, академик лицей, колледжларнинг ўқитувчи, талаба-ўқувчилари ўзбек халқининг буюк фарзанди Захириддин Муҳаммад Бобур таваллудининг 525 ийллигини қизғин нишонламоқда.

Дарҳакиқат, юртимиздаги ҳар бир маърифатли инсон улуғ аждодимиз бўлмиш Бобур Мирзога ворислик туйғуси билан ҳар қанча фаҳрланса арзиди.

Олмосдек серкирра истеъодод соҳиби, ҳассос шоир, комусий олим, давлат арбоби, машҳур саркарда сифатида оламга танилган Бобур 1483 йил 14 февраль куни Андижон шаҳрида дунёга келган. Унинг ўзи бу ҳақда «Бобурнома» асарида қуидагича маълумот беради: «Султон Саъидхон – Кошғар хони беш-олти яёвяланг била келди, туқкон иниларимдек кўруб, Ламғон туманларидин Мандировар туманини бердим. Шоҳ Исмоил Шайбонийхонни Марвда олғонда Қундузғаким ўттум, Андижон вилояти менинг сори боқиб, баъзи ... ерларини беркитиб, манга киши йибордилар. Мен Султон Саъидхонға бори навкарларимни топшуриб, кўмак қўшуб, зоду буд Андижон вилоятини бағишлаб, хон қилиб йибордим...» («Бобурнома», Тошкент, «Шарқ» нашриёти, 2002 йил, 151-бет).

Келтирилган иқтибосдаги «зоду буд» сўзлари бугунги ўзбек тилида «туғилиб ўсган» деган маънони билдиради.

Барчамизга маълумки, истиқлолга эришгани.... сўнг давлатимиз раҳбари Ислом Каримов раҳна молигида миллий ўзлигимизни англаш, бебаҳо меросимизни тиклаш жараёнлари қизғин тус олди. Жумладан, ўтмишда яшаб ўтган кўплаб буюк аллома ва мутафаккирларимиз қаторида Бобур Мирзонинг ҳаёт ва ижодий йўлини холис ҳамда ҳакқоний ўрганиш имкони туғилди.

Ўтган давр мобайнида бу борада Бобур номидаги ҳалқаро фонд томонидан ҳам бир қанча ишлар амалга оширилди. Хусусан, Фонд фаолиятида Бобур ва бобурийлар колдирган бекиёс мерос намуналарини, уларнинг қўлёзма ва босма асарларини жаҳон бўйлаб ўрганиш, бобурийлар сулоласи тарихи ва маданиятига бағишли турли мамлакатларда яратилган тадқиқотлар, бадиий асарларни юртимизга олиб келиш ҳамда тегишли мутахассислар ёрдамида илмий истеъмолга киритиш бўйича қилинган ишлар эътиборга лойиқdir.

Хорижий мамлакатларга уюштирилган ўндан ортиқ илмий экспедициялар натижасида Фонд ўз тасарруфидаги «Бобур ва жаҳон маданияти» музейига юзлаб нодир қўлёзма асарларни тўплашга мұяссар бўлди. Улар орасида улуғ бобомиз ихтиро этган «Хатти Бобурий» билан ёзилган мукаддас Куръони карим нусхаси, «Бобурнома»нинг испан тилидаги таржимаси, бу мумтоз асарнинг Ҳайдаробод нусхасининг фотофаксимил нашри алоҳида ўрин эгаллайди.

Юқорида номи зикр этилган охирги китобни бобуршунослик илмida бекиёс хизмат қилган япон олими Эйжи Мано музейимизга лутфан ҳадя қилган эди. «Бобурнома»нинг илмий-танқидий матни ва унинг япон тилига таржимаси, «Бобур ва унинг даври» ҳамда «Бобурнома: кўрсаткичлар ва шарҳлар» китоблари

ана шу заҳматкаш олим ижодининг маҳсули бўлиб, тўрт жилдан иборат бу асарлар музейдаги нодир экспонатлар сафидан муносиб жой олган.

Маълумки, Бобур Мирзонинг муборак номи нафақат юртимиз жамоатчилиги, балки Афғонистон, Покистон, Ҳиндистон ва Бангладешда, шунингдек, дунёнинг кўплаб мамлакатларида унинг ўлмас меросидан воқиф ва баҳраманд бўлган минг-минглаб зиёлилар учун ҳам қадрлидир.

Шу сабабли бу улуғ зотнинг 525 йиллик таваллуд айёми муносабати билан чет элларда ва мамлакатимиз илмий даргоҳларида янги тадқиқотлар яратилмоқда, унинг асарлари, у ҳақдаги китоблар чоп этилмоқда.

Сўнгги йилларда хорижий мамлакатлarda бобуршунослик соҳасида амалга оширилган жиддий ишлар қаторида «Бобурнома»нинг Хитой ва Туркияда нашр этилганини таъкидлаш зарур.

Бобур ижодини ҳалқаро миқёсда ўрганиш ҳақида сўз юритар эканмиз, афғонистонлик олима Шафиқа Ёрқиннинг илмий фаолиятини алоҳида қайд этиш лозим. Филология фанлари доктори, марҳум профессор Абдурашид Абдуғафуров 1994 йилда ўзи томонидан нашрга тайёрланган Бобур девонининг сўзбошисида куйидаги фикрларни билдирган эди:

«1983 йилда афғонистонлик олима Шафиқа хоним Ёрқин Кобул шаҳрида «Девони Захириддин Муҳаммад Бобур» китобини Бобур девонининг барча қўлёзма нусхалари ва нашрларини ўзаро қиёслаб, анъанавий девон шаклида тартибга келтирди, нашрларда йўл қўйилган чалкашлик ва нуксонларга барҳам берди. Ўкувчиларга такдим этилаётган ушбу китоб ҳозирча энг мукаммал бўлган ана шу Кобул нашри асосида тайёрланди» (14-бет).

Ўтган давр мобайнида изланувчан олима Бобур халкаро илмий экспедицияси томонидан Истанбул шаҳридан топиб келтирилган шоир қўлёзмасини чукур таҳлил килиб, «Бобур девонига такмила» китобини яратди ва уни мамлакатимизда нашр эттириб, бу мавзууни атрофлича ўрганишга муносиб ҳисса қўшди.

Яқинда Андижонга, «Бобур ва жаҳон маданияти» музейига Шафиқа хоним Ёрқиннинг янги ҳадялари келди. Маълумки, «Бобурнома»нинг кўплаб воқеалари Кобул ва унга яқин вилоятларда содир бўлган. Шу боис олима «Бобурнома»нинг асосий қисмини «Воқеоти Кобул» («Кобул воқеалари») деган кичик сарлавҳалар остида иккита тўплам ҳолида чоп эттирган. Ҳар бири 400 сахифага якин бу китобларнинг биринчиси форсий тилда, иккинчиси эса ўзбек тилида бўлиб, Кобулда эски ўзбек ёзувида босилиб чиққани эътиборлидир.

Шуни алоҳида таъкидлаш жоизки республикамиз нашриётларида ҳам Бобур ва бобурийлар тарихига бағишлиланган бир қатор китоблар нашр этилмоқда. Масалан, «Шарқ» нашриёт-матбаа компаниясининг бош таҳририяти рус тилида «Избранная лирика Востока» туркумидан Захириддин Мұхаммад Бобурнинг гўзал шеърлар тўпламини куни кеча босмадан чиқарди.

Тўпламдаги филология фанлари доктори Сайдбек Ҳасанов қаламига мансуб сўзбошида Бобурнинг бадиий ва ижтимоий-сиёсий салоҳиятига юксак баҳо берилгани эътиборга моликдир.

Жаҳон маданияти ва цивилизацияси таракқиётига унтутилмас ҳисса қўшган бобурийлар сулоласи ҳақида дунёning қатор мамлакатларида турли вақтларда ўнлаб илмий ва бадиий асарлар яратилган. Фондимиз ана шундай асарларнинг энг сара намуналари билан жамоатчилигимизни таништириш борасида баҳоли

кудрат харакат қилиб келмоқда. Шу мақсадда ўтган йили машҳур «Хумоюннома» асарининг муаллифи, Бобурнинг севимли қизи Гулбаданбегим ҳақида инглиз адабаси Румер Годен ёзган «Гулбадан» асарининг ўзбек тилидаги таржимаси «Шарқ» нашриёти томонидан ўқувчиларга тақдим этилди.

Ўрни келганда шуни ҳам айтиш керакки, «Хумоюннома» асарини таниқли бобуршунос олима Сабоҳат Азимжонова ўз вақтида форс тилидан ўзбек тилига таржима қилган бўлиб, у ҳозирга қадар республикамиз нашриётларида икки марта босилиб чиқкан.

Барчамизга яхши аёнки, вакт ўтиши билан айрим мумтоз бадиий ва илмий асарлар бир тилнинг ўзига такроран ўтирилади. Чунки орадан ўтган давр мобайнида янги-янги илмий маълумотлар топилади, бирон-бир воеа-ҳодисага нисбатан ёндашувлар ўзгариши ҳам мумкин, шунингдек, аввалги таржималарда йўл кўйилган баъзи нуксонларни тузатишга зарурат пайдо бўлади. Шу маънода, Гулбаданбекимнинг «Хумоюннома» асари филология фанлари доктори, профессор Аҳмад Қуронбеков томонидан янгидан таржима қилингани ва ундан айрим парчалар матбуотда эълон қилингани дикқатга сазовор.

Ҳали босмахона бўёғи қуриб улгурмаган яна бир асар – адаб Қамчибек Кенжанинг «Андижондан Бағдодгача» сафарномаси бугунги бобуршуносликда муҳим изланишлардан ҳисобланади.

Муаллиф Бобур ҳалкаро фонди томонидан ташкил этилган кейинги илмий-амалий экспедициялар ишида фаол иштирок этиб, бу сафарлар давомида кўлга киритилган янги илмий маълумотларни ўзига хос бадиий-саргузашт йўсинда ёритиб берган.

Ўтган йили Фондимиз ташаббуси билан ўзбек олимлари ва рассомларининг ижодий изланишлари самараси ўларок «Мовароуннахр, Ҳурросон ва Ҳиндистонда хукмронлик килган темурийлар шажааси» тайёрланди. Унда 30дан ортиқ темурий ҳукмдорларнинг расмлари, ҳаёт ва фаолият саналари замонавий дизайн асосида талқин этилган.

Шу кунларда «Маънавият» нашриётида «Бобурнома»га ишланган миниатюра суратлардан иборат ажойиб бир альбом ҳам нашрга тайёрланаётганини мамнуният билан таъкидлаш лозим.

Шунингдек, ҳозирги пайтда фондимиз «Шарқ» нашриёти билан биргаликда «Бобурнома»нинг рус тилидаги янги нашрини юксак бадиий ва полиграфик даражада чоп этиш бўйича амалий иш олиб бормокда. Бу китобда аввалги нашрларда йўл қўйилган кўп жиддий хато ва камчиликларни бартараф этиш кўзда тутилган.

Мумтоз адабиётимиз муҳлисларига яхши маълумки, «Бобурнома» асл ҳолида, яъни эски ўзбек тилида ўтган асрнинг 40-йилларидан бери 5-6 маротаба кўп минг нусхаларда чоп этилиб, кенг оммалаштирилган. Бирок аксарият китобхонлар, айниқса, ёшлар ушбу матнни ўқиб, тушунишга кийналишар, шу сабабли кўпчилик «Бобурнома»ни ҳозирги ўзбек адабий тилида мутолаа қилишни орзу қиласи эди.

Ана шундай таклиф ва истакларни инобатга олиб, 2000 йилда манбашунос олим Ваҳоб Раҳмонов томонидан «Бобурнома»нинг замонавий тилга ўгирилган катта бир қисми «Республика» газетасида йил давомида босилган эди. 2007 йилдан бошлаб «Холис» газетаси ва «Фермер» журнали ушбу асар табдилини ўз саҳифаларида эълон қилиб келмокда.

Айни пайтда эса, «Ўқитувчи» нашриётида «Бобурнома»нинг ана шу табдили алоҳида китоб ҳолида босмага тайёрланмокда. Бу мумтоз асарни замонавий ўзбек тилига ўгиришда таникли олимларимиз Ваҳоб Раҳмонов ва Каромат Муллахўжаева катта меҳнат қилганини қайд этиш зарур.

Кейинги вакътларда Бобур ижоди билан шуғулла-наётган мутахассислар сафи тобора кенгайиб бора-ётгани қувонарлидир. Ана шундай заҳматкаш инсонлар орасида асл касби инглиз тили ўқитувчиси бўлганFaфуржон Сотимов номини тилга олиш лозим. Унинг саъй-ҳаракатлари билан шу пайтга қадар Бобур ва бобурийлар ҳақида чет элларда чоп этилган бир неча ноёб китоблар ўзбек тилига таржима қилиниб, нашр этилди. Хурматли домла шу йўлдаги изланишларни давом эттириб, «Марказий Осиё, Ҳиндистон тарихида «бобурийлар даври» деб номланган илмий тадқикот яратди ва бу асар ҳозирги кунда «Ўқитувчи» нашриётида босмага тайёрланмокда.

Андижонда фаолият кўрсатаётган «Андижон» нашриёт-матбаа ижодий уйи ходимлари ҳам бу улуғ тўйга муносиб тухфа ҳозирладилар.

Маълумки, ўзбек классик адабиёти асарларини чуқур ўрганишнинг муҳим воситаси – бу маҳсус изоҳли луғатлардир. Шу нуқтаи назардан караганда, ўтган йили «Андижон» нашриётида босилиб чиққан «Бобурнома» учун қисқача изоҳли луғат» китоби жиддий аҳамият касб этади. Ушбу луғатни филология фанлари доктори, марҳум профессор Фатхиддин Исҳоков (Оллоҳ раҳмат қилган бўлсин) тузган. Эндиликда бу луғатдан фойдаланиб, Бобур асарларини бемалол тушуниб ўқиш имконияти пайдо бўлди.

Бобуршунослик соҳасида 2007 йилда рўй берган янгиликлар ҳақида фикр юритар эканмиз, таниқли хиндистонлик олим Қамар Раиснинг Дехлида босилган «Бобур: шахси, шахсияти ва шеърияти» китобининг ўзбек тилига таржима қилиниб нашр этилишини мамнуният билан эслашимиз табиийдир. Шунингдек, андижонлик истеъдодли шоир Қобил Мирзонинг Бобур ғазалларига боғланган мухаммаслар тўплами «Қаро зулфинг» номи билан чоп этилиб, шеърият ихлосмандлари учун ўзига хос тухфа бўлди, дейиш мумкин.

Бобур номидаги ҳалқаро илмий экспедициянинг ўндан ортиқ Шарқ мамлакатлари бўйлаб уюштирилган сафарлари давомида заминимиздан етишиб чиқкан, X-XI асрлардаёқ ўз илмий кашфиётлари билан дунёни ҳайратда қолдирган Абу Али ибн Сино, Абу Наср Форобий, Абу Райхон Беруний, Мусо Хоразмий, Аҳмад Фарғоний, Мавлоно Лутфий, Алишер Навоий, Али Кушчи, Ҳусайн Бойқаро, Камолиддин Беҳзод каби буюк аждодларимизнинг бой илмий-маданий мерослари ўрганилди, уларнинг қабр-мақбаралари зиёрат қилиниб, зарур маълумотлар тўпланди.

Ачинарли ҳолатга тушиб қолган Беруний, Лутфий, Абу Наср Форобий, Али Кушчи ҳазратларининг қабр-мақбараларини обод килиш бўйича таклиф ва тавсиялар тайёрланди.

Алишер Навоийнинг устози мавлоно Умар Лутфийнинг қабри Ҳирот яқинидаги Дехи Канор даштида экани аникланиб, андижонлик ва нуроталик моҳир усталар иштирокида ўша жойда шоир хотирасига ихчам мақбара қуриб битказилди. Афғонистон зиёлилари ва жамоатчилиги бунинг учун ўзбек ҳалқига, давлатимиз раҳбари Ислом Каримовга самимий миннатдорчилик билдирилар.

Бобур фондининг келгусидаги илмий-ижодий режалари ҳакида гапирганда шуни айтиш керакки, атокли бобуршунос олимлар томонидан «Бобур энциклопедияси»ни тайёрлаш ва нашр этиш мўлжалланмоқда.

Маълумки, Бобур Мирзо қаламига мансуб «Мусика сирлари», «Ҳарб иши» асарлари, шунингдек, «Бобурнома»нинг йўқолган баъзи қисмлари ҳозирга кадар топилмаган. Уларни ва шу мавзуга доир бошка ноёб қўллёзма асарларни излаб топиш, ватанимизга олиб келиб, илмий истеъмолга киритишни биз Бобур халқаро экспедициясининг энг муҳим ва долзарб вазифаларидан, деб биламиз.

«Ўзбекистон овози» газетаси,
2008 йил 14 февраль

БЕНАЗИР СИЙМО

Юксак маданиятга эришган ҳар бир халқнинг шундай буюк фарзандлари бўладики, улар нафақат ўз юрти, балки умумжаҳон тафаккур аҳлиниңг хурмат-эътиборида бўлади. Ўзбек халқи тарихида дунё цивилизацияси ривожига улкан ҳисса қўшган ана шундай улуғ алломалар, давлат арбоблари кўплаб топилади. Уларнинг ҳаёти ва ижодини дунё олимлари кенг миқёсда ўрганиб келадилар.

Бу фикримизга, айникса, Захириддин Муҳаммад Бобур маънавий меросининг жаҳон илм-фани, маданияти ва санъатида ўрганилиши, тарғибу ташвиқ этилиши яққол мисол бўла олади.

Бу мумтоз сиймо буюк шоир ва олим, айни вақтда Ҳиндистонда 332 йил ҳукм сурган бобурийлар суло-ласига асос соглан давлат арбоби сифатида хинд халқи ва жамоатчилигининг ҳам дикқат-эътиборини қозонгани барчамизга яхши маълум. Панипат шаҳридаги музей Бобур фаолиятига, хусусан, унинг Дехли сultonи Иброҳим Лўдий устидан эришган тарихий ғалабасига, Бангладеш пойтахти Даккадаги Лаълбоғ қалъаси музейи эса Бобур ва бобурийлар салтанати вакилларига бағишлиланган. Бу тарихий масканлар хинд ва бенгал халқларининг оммавий зиёратгоҳлари ҳисобланади.

Машҳур давлат арбоби Жавоҳарлаъл Неру ўзининг «Ҳиндистоннинг кашф этилиши», «Жаҳон тарихига бир назар» асарларида Захириддин Муҳаммад Бобур

ҳакида шундай деб ёзади: «Бобур – дилбар шахс. Уйғониш даври ҳукмдорининг ҳақиқий намунасиdir. У мард ва тадбиркор одам бўлган.

Бобур ўта маданиятли ва жозибали инсон бўлиб, ўз замонасидағи энг етуқ шахслардан бири эди. У мазҳабпаратлик каби чекланиш ва мутаассиблиқдан йирок эди. Бобур санъатни, айникса, адабиётни севарди».

Атокли давлат ва сиёsat арбобларининг ана шундай холис муносабатлари туфайли ҳинд олимлари Бобур ва бобурийлар ҳакида ўнлаб тарихий, адабий, илмий асарлар ёзганлар ва ёзмоқдалар, кўп қисмли сериаллар яратмоқдалар. «Бобурнома» бу мамлакатда нафакат ҳинд тилида, балки, инглиз тилида ҳам қайта-қайта нашр этилгани бунинг яна бир исботидир.

Шу ўринда Ҳиндистон, Покистон ва Бангладешда Бобур ижоди билан қизиқиб, тадқиқотлар яратган, унинг асарларини ҳинд ва урду тилига таржима килишдек машакқатли ишга ҳаётини бағишилаган баъзи олимларнинг исм-шарифларини ҳурмат билан тилга олиш жоиз, деб ўйлаймиз.

Маълумки, «Бобурнома»нинг форс тилига илк таржимасини Абдураҳим Ҳони Ҳонон амалга оширган. Бу асарни Рушан Оробегим нашрга тайёрлаб, 1972 йили чоп эттирган.

Бобур авлодларидан бўлган Мирзо Насриддин Ҳайдар Кўрагоний «Бобурнома»ни урду тилига таржи-ма қилган ва у китоб ҳолида 1924 йили Дехлида, 1962 йили эса Карабида нашр этилган. Доктор М.Ҳ.Сидди-кий «Бобурнинг Қандаҳорга юриши тарихига доир» асарини яратиб, 1962 йилда Карабида чоп эттиргди.

Яна бир йирик шарқшунос олим – Рашид Ахтар Надвий урду тилига таржима қилган «Бобурнома» 1965, 1991 йилларда икки маротаба нашр этилди.

Професор Саидбек Ҳасановнинг қайд этишича, «Бобурнома» хиндий тилига Йүгжит Навалпурй томонидан таржима килиниб, 1974 йилда Янги Дехлида Ҳиндистон адабиёт академияси томонидан нашр этилган. Бу таржима Ҳиндистонда такрор-такрор босилиб тарқатилмоқда. 2006 йили хинд олими Қамар Раиснинг «Бобур: шахси, шахсияти ва шеърияти» китоби Дехлида босилиб чиқди ва ўтган йили асарнинг ўзбек тилига таржимаси юртимиз китобхонлари қўлига ҳам тегди.

Бобур асарларининг илмий ва оммабоп нашрлари узлуксиз ва тизимли равишда захматкаш олимларимиз – академик Азиз Қаюмов, профессорлар Саидбек Ҳасанов, Абдуғафур Абдурашидов, доцентлар Ҳасанхўжа Муҳаммадхўжаев, Ваҳоб Раҳмонов, Эргаш Очиловлар томонидан амалга ошириб келинмоқда.

Кейинги йилларда бобуршунослик соҳасида юқорида номлари тилга олинган олимларнинг илмий тадқиқотлари, шунингдек, профессор Ҳасан Кудратиллаевнинг «Бобур армони», Ансориддин Иброҳимовнинг «Бобурнома» – буюқасар», «Бобурнома»даги хиндча сўзлар», профессор Раҳим Воҳидовнинг «Биз билган ва билмаган Бобур», Сайфиддин Жалиловнинг «Бобур ва Юлий Цезарь», «Бобур ҳақида ўйлар», профессорFaфуржон Сотимовнинг «Марказий Осиё ва Ҳиндистон тарихида бобурийлар даври», «Бобурийзодалар», профессор Фатҳиддин Исҳоқовнинг «Бобурнома» учун қисқача изоҳли лугат», Иқболий Адизованинг «Сўзумни кўруб англағайсен ўзумни», З.Машрабов ва С.Шокаримовнинг «Асрларни бўйлаган Бобур», Зулхумор Ҳолмонованинг «Бобурнома лексикаси» сингари ўнлаб илмий ва оммабоп рисолалари яратилди. Бу рўйхатни яна давом эттириш мумкин.

Бобур Халкаро фонди Бобур меросини ўрганишга ўн етти йилдан бери ўз ҳиссасини қўшмоқда. Фонд фаолиятининг уч қирраси нисбатан кўзга кўринарлидир:

Биринчиси, Фонд таркибидаги халкаро илмий экспедиция ўзининг чет элга уюштирган ўн иккита сафари давомида дунёning 20 дан ортиқ мамлакатида бўлиб, Бобур ва бобурийларга тегишли тўрт юздан ортиқ осори атикалар, кўлёзма ва тошбосма асарлар, ҳужжатларни излаб топиб, юртимизга келтирди, «Бобур ва жаҳон маданияти» музейига топширди ва бу билан уларнинг аксарият кисмини илмий муомалага киритиш имконини яратди. Жумладан, Эроннинг Салтанат кутубхонасида сақланаётган «Бобур куллиёти», Машҳаддан келтирилган, Бобур яратган «Хатти Бобурий»да кўчирилган Қуръони каримнинг нусхаси, Аннета Сюзанна Акройд (Бевериж хоним) томонидан 1905 йилда Лондонда нашр этилган «Бобурнома»нинг Ҳайдаробод шаҳридаги Саларжанг музейида сақланаётган нусхаси фото-факсимил нашрини, 1856 йили Қозон шаҳрида Николай Ильминский томонидан амалга оширилган «Бобурнома» асли нашрини шулар қаторида қайд этиш мумкин.

«Бобур изидан» экспедициясининг сўнгги сафари Бобур Мирзо қаламига мансуб «Асрори мусикиюн» («Мусика сирлари») ва «Ҳарб иши» асарларини излаб топиш мақсадида Хитой Халқ Республикасига уюштирилди. Экспедиция аъзолари Урумчи, Хўтан, Ёркент, Қашқар ва Оксув шаҳарларида бўлиб, Мирзо Муҳаммад Ҳайдар Кўрагонийнинг «Тарихи Рашидий» асари ва Мўъжизийнинг «Мусика тарихи» китобларини келтиришга муваффак бўлдилар. Мўъжизийнинг асарида «Асрори мусикиюн» ҳақида аник маълумотлар берилган, бу манба ўзбек мумтоз адабиёти тарихини ҳам анча-мунча янгиликлар билан бойитишга хизмат килади.

Иккинчиси, ана шу сафарлар давомида Бобур ва бобурийлар ҳақида йигирмадан ортиқ хужжатли ва видео фильмлар яратилиб, мамлакатимизда намойиш этилди. Экспедиция аъзолари ўз таассуротларини сафарнома китобларида акс эттиридилар. Адибларимиз – Хайриддин Султоновнинг «Бобурийнома», Қамчибек Кенжанинг «Ҳинд сорига», «Буюклар изидан», «Андижондан Даққагача», «Андижондан Бағдодгача» асарлари шулар жумласидандир.

Учинчидан, Бобур Ҳалқаро фондининг моддий ва маънавий ҳомийлигида 2007-2008 йилнинг ўзида мавзуга оид 23 та китоб нашр этилди. Бунга мисол қилиб, «Бобурнома»нинг ҳозирги ўзбек адабий тилидаги нашри (табдилчилар Вахоб Раҳмонов ва Каромат Муллахўжаева), «Бобурнома. Миниатюралар» китоби, Бобурнинг «Гарибинг андижонийдур» шеърлар девони, «Бобурнома»нинг русча таржимаси, Азиз Қаюмов ва Сайдбек Ҳасановнинг «Бобур ижодиёти» тадқикотларини кўрсатиш мумкин.

2008 йилнинг 15-16 август кунлари Андижон шахрида вилоят ҳокимлиги раҳбарлиги ва Бобур Ҳалқаро фонди ҳомийлигида «Бобур ва бобурийларнинг жаҳон маданияти тарихида тутган ўрни» мавзусида илмий конференция бўлиб ўтди. Унда Бобур ва бобурийлар ҳаёти ва ижоди билан шуғулланаётган ўзбекистонлик ва чет эллик олимлар иштирок этдилар. Ушбу конференцияда мисрлик олима Магда Салаҳ Маҳлуф «Бобурнома»ни араб тилига ўзи ўгириб нашр эттирган таржимасини, афғонистонлик олима Шафиқа Ёрқин эса «Бобурнома»нинг («Воқеоти Кобул») форсий таржимаси ва ўзбекча нашрини тақдим қилди.

Айтиш жоизки, Япониядаги Киото университети профессори муҳтарам Эйжи Мано анжуманинг азиз

мехмони бўлди. У деярли ўттиз йиллик умрини Бобурга бағишлаб, дунё бўйлаб «Бобурнома»нинг туркий ва форсий кўлёзмаларини йиғиб, киёслаб, асарнинг араб ёзувидаги илмий-танқидий матнини, «Бобурнома. Шархлар. Кўрсаткичлар» тадқиқотини яратган. Шунингдек, у «Бобурнома»нинг япон тилига таржимаси ҳамда «Бобур ва унинг даври» номли йирик тадқиқот муаллифидир.

Анжуманда туркиялик олим Танжу Ўрал Сейхан ҳам ўзи тузиб нашр эттирган Бобурнинг «Мубаййин» асарининг фото-факсимил нусхаси илова килинган илмий-танқидий матнини тақдим этди.

Конференцияга хитойлик дўстларимиз «Бобурнома»нинг хитой тилидаги таржимаси ва Мухаммад Ҳайдар Мирзонинг «Тарихи Рашидий» китобининг 2007 йилда Мухаммадтурди Мирзоаҳмад томонидан нашрга тайёрлаб босилган (таржимон Мулло Мухаммадниёз ибни Абдулгафур) нусхасини ҳам совга килдилар.

Маълумки, «Тарихи Рашидий» асари «Бобурнома»да тушириб қолдирилган ёки йўқолган деб хисобланадиган 18 йиллик воқеаларнинг Бобур билан боғлиқ қисмини тўлдирадиган тарихий эсдаликлар сифатида алоҳида илмий қимматга эга. Бу асар шу кунларда Фондимиз ҳомийлигига таникли адабиётшунослар Ваҳоб Рахмонов ва Янгиш Эгамовалар таржимасида ўзбек тилига ўгирилмоқда. Насиб этса, яқинда нашр этилади. Шунингдек, афғонистонлик тадқиқотчи Ҳалим Ёрқиннинг «Хатти Бобурий» ҳакидаги маърузаси ҳам анжуман иштирокчиларида катта қизикиш уйготди.

Шотландияда яшаб ижод этаётган шарқшунос олим Ҳасан Бек «Бобур изидан» видеофильмини шоир мухлисларига тақдим қилди. Фильм Бобур портретини кўрсатишдан бошланади. Бобур туғилган макон – Андижон манзаралари, унинг қадамжолари – Ахсиент,

Тошкент, Исфара, Хўжанд, Афғонистон ва Ҳиндистон бўйлаб Бобурга тааллуқли масканлар суратга олинган. Фильм давомида ўзбек қуйлари янграб туради.

Мухтасар килиб айтганда, юкорида зикр этилган маълумотлар Бобур ижоди жаҳон микёсида тобора оммавийлашиб бораётганини кўрсатади.

Захириддин Муҳаммад Бобур асарларининг хозирга қадар ўттиздан ортиқ жаҳон тилларига таржима этилгани, дунё олимлари томонидан улуғ аждодимиз меросини ҳар томонлама тадқиқ этишга бўлган қизиқишининг қучайиб бораётгани ўзбек ҳалқининг, Ўзбекистоннинг ҳалқаро майдондаги обрў-эътиборини юксалтиришга ҳисса қўшиши шубҳасиз.

Фондимиз фаоллари ва жамоаси бундан буён ҳам «Бобурнома»нинг йўқолган саҳифаларини, «Ҳарбиши» ва «Мусика сирлари» асарларини излаш, Бобур ва бобурийларга тааллуқли тарихий хужожат ва илмий тадқиқотларни жаҳон бўйлаб йиғиш, юртимиз ва чет эллик олимларнинг улуғ аждодларимиз ҳаёти ва ижодига оид илмий тадқиқотларини нашр этишга ҳомийлик қилиш, шу мавзуда хорижда яратилган бадиий асарларни ўзбек тилига таржима қилдириш сингари хайрли ишларни давом эттиради. Айни вақтда Бобур боғини янада обод этиш учун ҳаракат қиласи.

Фонднинг кейинги йиллардаги энг муҳим вазифаларидан бири — «Бобур энциклопедияси»ни яратиш билан боғлиқ. 2007 йилда бошланган бу муҳим ва масъулиятли ишга Ўзбекистон ва чет мамлакатларнинг таникли бобуршунослари жалб этилган.

Ўйлаймизки, ушбу ишларимиз Бобур абадиятига биз – Бобур ватандошларининг қўшган ҳиссамиз бўлади.

2008 йил

ЗАБАРДАСТ ШОИР, ЙИРИК ДАВЛАТ АРБОБИ ВА ХУШХУЛҚ ИНСОН

Ҳа, Бобур чиндан ҳам улуғ ва забардаст шоир эди. Унинг жўшкин газаллари, пурмъяно рубоийлари, мушоҳадага бой маснавийлари, туюқ ва қитъалари муаллифни шеърият мулкининг сultonи, буюк бобомиз Алишер Навоий ҳазратларидан кейинги шоҳсупага муносиб дейишимизга асос беради.

Бобурнинг буюк олимлиги ҳам жаҳонда тан олинган ҳақиқатдир. Унинг биргина «Бобурнома»си Марказий Осиё мамлакатлари тарихи ва ҳалқлари этнографияси, ушбу улкан минтақанинг табиати ва ҳайвонот дунёси, қазилма бойликлари ҳақидаги қомусий асар сифатида дунёга машҳур. Бундан ташқари, бизгача етиб келган қатор илмий ва бадиий асарлари ҳам ғоят қимматли хисобланади.

Бобур номидаги Ҳалқаро жамғарма ташкил қилган илмий экспедициялар чоғида бу асарларнинг аслидан кўчириб олинган нусхалари юртимизга олиб келинди.

Айни пайтда Бобурнинг улуғ саркарда ва давлат арбоби сифатидаги фазилатлари ҳам таҳсинга лойик. Ҳиндистонда 332 йил хукм сурган йирик империяга асос солиши шундай деб хулоса чиқаришга имкон беради.

Кейинги пайтларда олиб борилган янги изланишлар натижасида Бобурнинг феъл-авторига оид янги-янги чизгилар кашф қилинмоқда.

Заҳириддин Мухаммад Бобур ота томонидан улуғ Соҳибқирон Амир Темурнинг бешинчи авлоди (Амир

Темурнинг учинчи ўгли Мироншоҳ, унинг ўғли Султон Муҳаммад, унинг ўғли Султон Абу Саид, унинг ўғли Умаршайх ва ундан Захириддин Муҳаммад Бобур).

Султон Абу Саид мирзо ўзининг тўртингчи ўғли Умаршайх Мирзони 1462 йили Фаргона мулкига ҳукмфармо тайинлаб, ўз бекларидан Худойберди Туғчи Темуртош деган ишончли кишисини унга «бек атка» (ёш подшоҳнинг тарбиячиси ва иш юритувчиси) этиб тайинлайди. Ўша даврда Мўғулистон ерлари шимолда Фаргона водийсига чегарадош бўлгани сабаб, мўғуллар бу томонларга тез-тез хужум килиб турарди. Мовароуннаҳр ҳокими Султон Абу Саид минтақада тинчликни таъминлаш учун ўзининг кўмагида Мўғулистон таҳтига ўтирган Юнусхон билан қудачилик алокалари ўрнатади: катта ўғли Султон Аҳмад Мирзони унинг катта кизи Мехр Нигорхонимга, Умаршайх Мирзони эса ўртанча кизи Кутлуг Нигорхонимга уйлантиради. Захириддин Муҳаммад Бобур мана шу никоҳдан хижрий 888 йили мухаррам ойининг олтинчи кунида (милодий 1483 йил 14 февраль) Андижон шаҳрида таваллуд топди.

Шуни ҳам айтиш керакки, Бобур Юнусхоннинг узатган уч қизидан кўрган биринчи ўғил набираси эди. Шу боис қайнона ва қайнота ўғил набира орзусида бутун нигоҳини Андижонга қаратган эдилар. Ҳатто катта қайнона Эсон Давлатбеким 2000 нафар навкари билан Андижонга келиб, Қўштегирмон мавзесида унинг учун маҳсус солинган чорбогда турарэди. Кутлуг Нигорхоним ҳам туғилажак Бобурга бўлган ҳомиладорлик ойларини онаси чорбогида ўтказгани шубҳасиз. Бинобарин, Бобур таваллуди кўп хурсандчиликларга сабаб бўлди. Ўз даврининг мўътабар кишиларидан бири бу хурсандчиликка бағишлаб шеър битгани ва унинг

таваллуд йилини «Шаши мұхаррам» калимасига (абжад ҳисобида 888 йил чиқади) жо этгани ҳам бежиз әмас.

Фарғона таҳтининг меросхўри бўлмиш ўғил фарзанднинг дунёга келишидан Умаршайх Мирзо беҳад мамнун эди. Қутлуғ Нигорхонимнинг онаси Эсон Давлатбеким чорбоғидан неча кунлаб меҳмон узилмайди. Мўғулистанга юборилган маҳсус чопардан бу хушхабарни эшитган Юнусхон ҳам янги набирага аталган суюнчи-ҳадялар билан Андижонга етиб келади.

Бобурнинг холаваччаси Мирзо Ҳайдар ўзининг машхур «Тарихи Рашидий» асарида ёзишича, марҳум Абу Саид Мирзонинг пири, 79 ёшли Хожа Убайдулло Аҳрорга ҳам бу хушхабарни етказганлар ва чақалокка исм қўйиб беришни сўраганлар. Хожа Аҳрор Фарғона таҳтининг бўлгуси ворисига «Захириддин Мухаммад» исмини қўйиб, нома ёзиб юборган (Захириддин – диннинг ҳамкори, унинг ривожига кўмак берувчи маъносида. Айтишларича, чақалокнинг туғилиши Хожа Аҳрор Валий ҳазратларининг тушида ҳам аён бўлган).

Мўғулистандан етиб келган бобоси, гарчи мусулмони комил бўлса-да, китобий исмлар талафузига қийналарди. Қолаверса, уч ойлик чақалоқ жуда серҳаракат бўлгани учун Юнусхон уни «Бабр», яъни «кичкина йўлбарс» деб эркалатгани боис Захириддин Мухаммад исмига Бобур номи қўшилди (Бобур – арабча «Бабр», яъни «йўлбарс» сўзидан. Қаранг: Ал-Мунжид, «Араб тилининг изоҳли лугати». Байрут. 26-нашри. «Бабр», «Бабур» – қорни оқ, усти кора йўл-йўл чипор йўлбарс) ва Захириддин Мухаммадга «Бобур» деб мурожаат этиладиган бўлди.

Бобур Умаршайх Мирzonинг тўнгич ўғли бўлгани учун, табиийки, унинг парваришига ва тарбиясига алохида эътибор берилган. Унинг болалик даври Эсон

Давлатбегим чорбоғида, бувининг кўз ўнгидаги ўтди. Буни Бобурнинг ўзи ҳам таъкидлайди: «Бу воеа (отасининг ўлими) даст берганда, мен Андижонда Чорбоғда эдим. Изтироб билан отилиб, қошимдаги навкар ва савдор била қўргон азимати килдим» («Бобурнома». 17-бет). Маълум бўладики, бўлғуси подшоҳ Бобурнинг болалигидаёқ ўз навкарлари бўлган.

Ҳ.Лэмбнинг ёзиича, Бобур олти ёшга тўлганида уни аёллар қўлидан олиб, эркаклар тарбиясига беришган. У болалик чоғлариданоқ ҳарбий машғулотларда катта маҳорат қўрсатар ва атрофдагиларни ҳайратга соларди. Унинг жисмоний тарбияси билан ҳам алоҳида шуғулланилган, от миниш, қиличбозлик, камон отиш ва бошқа ҳарбий машқлардан сабоқ берилган.

Айни вактда у араб, форс тиллари, тарих ва адабиётдан яхши маълумот олади. Одамларга нисбатан меҳрибон ва ғамхўр, шухратпарамастлик ва иззатталабликдан йироқ бўлиш руҳида тарбияланади. Ростгўй, адолатли, мард ва жасур бўлишга ўргатилади. «Бобурнома»да бунга кўп мисоллар учрайди.

1487 йили – Бобур тўрт ёшга тўлганда, она томонидан бобоси Юнусхон вафот этади. Бобонинг вассияти билан бўлса керак, 1488 йили, яъни беш яшарлигида Бобурни Самарқандга олиб боришган ва амакиси, Самарқанд ҳокими Султон Аҳмад Мирзонинг қизи Ойша Султонбегимга, ўша давр удумига кўра «кулок тишлиатти» килишган (кейинчалик Бобур унга уйланган). Бобур бу ерда улуғ бобоси Соҳибқирон Амир Темурдан қолган маҳобатли бинолару феруза гумбазли қасрларни, товуш акс-садо берадиган хашаматли масжид-мадрасаларни, ажиб гулурайхонларга бурканган боғларни завқ билан томоша қилган ва бу маҳобату гўзалликни гўдак шуурига сингдирган.

Албатта, Бобурнинг тарбиясида момоси Эсон Давлатбегим ва онаси Қутлуғ Нигорхонимнинг хизматлари бекиёс. Замонасининг саводли аёлларидан бўлган бу иккиси машхур «Қобуснома», Саъдийнинг «Гулистон» ва «Бўстон» асарларидан Бобурга чукур сабок берган. «Бобурнома»да бу китоблардан келтирилган парчалар Бобур уларни пухта ўрганганидан, хаётининг серташвиш дамлари – тоғу тошларда сарсон кезганида Саъдийнинг ўгитларидан тошга ўйиб ёздириб қўйиши шундан далолат беради.

Шеъриятга барвақт кўнгил қўйган Бобур, айникса, Навоий ижодига меҳр билан қарайди. Табиий истеъоди ва болаликдан кўп фойдали таълимотларни чукур ўрганиши унинг хуш хулқли ва одобли, фазилатли ва адолатли инсон бўлиб етишуvida ҳал қилувчи омил бўлди. Инглиз тадқиқотчиси В.Эрскин айтганидек, Осиё тарихи сахифаларини варакласак, ҳақиқатан ҳам, биронта ўлкада бирор-бир машхур шахс Бобурдек ҳар томонлама истеъододли бўлиб етишмагани маълум бўлади.

«Бобурнома» синчковлик билан таҳлил қилинса, унинг муаллифи ёшлигиданоқ Қуръони каримни ҳам ёд олгани аён бўлади.

Захириддин Муҳаммаднинг бир онадан туғилган бир опаси ва она бошқа олти опа-укаси бўлган. Бинобарин, Захириддин Муҳаммад Бобур Умаршайх Мирзонинг саккиз фарзандидан (уч ўғил ва беш қиз) тўнгич ўғил бўлиб, Фаргона мулкининг қонуний вориси эди. Отаси ҳалокатга учраганда, афтидан уларнинг барчаси Андижонда бўлган. Отанинг кутилмаганда вафот этиши бутун аркони давлат ва барча қариндошуругларга бесаронжомлик, парокандалик келтирди.

Отасининг ҳалокати ҳақидаги шум хабарни Бобур ўртоқлари билан момосининг чорбоғида ўйнаб юрган вақтида эшигади. Беклар унинг олдига бориб, воқеадан воқиф этишади ва энди у хукмдор эканини маълум қиладилар. Шу кундан бошлаб у подшоҳ эканини хис қиласи ва от суреб шаҳар аркига келади.

«Тенгри таолонинг инояти билан ва ҳазрати Сарвари коинотнинг шафоати билан ва чаҳор ёри босафоларнинг химмати билан сешанба куни рамазон ойининг бешида тарих секкиз юз тўқсон тўққизда Фарғона вилоятида ўн икки ёшта подшоҳ бўлдум», – деб бошлайди ўзининг машхур асарини Бобур. Подшоҳ бўлдию, унинг ороми бузилди – кечагина ўйнаб юрган болакай ҳарбий ва сиёсий ҳаракатлар, кутилмаган воқеалар гирдобига тортилди. Шу билан бирга, ўз атрофидаги айrim яқин кишиларнинг хоинона қилаётган ишларини кўриб-кузатар экан, ҳаётида ғунчадек очилаётган соғ виждонига, шаклланаётган пок инсоний табиатига озор етказган йиллар бошланади.


Фарғона мулкидаги ички низолар, Самарқанд хаёли, амакиваччалари ва тогаларининг унга нисбатан беражмликлари энди йигит бўлиб этишган ёш хукмдорни ота мулкини ташлаб чиқиб кетишга мажбур қилган бўлса, ўртада Шайбонийхон кўшинларининг пайдо бўлиши ва катта бобоси Соҳибқирон Амир Темур салтанатининг ўзаги бўлмиш Мовароуннахрнинг қўлдан кетиши ёш Бобурни она ватанин тарқ этиб бўлса ҳам темурийлар хонадонининг хукмронлигини қайта тиклашдек эзгу мақсад сари отлантиради. У 20 йилдан ортиқ курашиб, ниҳоят ўз орзусига эришади, бироқ салтанат узок Ҳиндистонда тикланади. Бобурийлар салтанати ушбу мамлакатда уч асрлик янги цивилизация даврини бошлаб бергани тарихдан бизга маълум.



Самара. Бу ерда Амир Тсмур ва Тўхтамиш ўртасида
1391 йили кескин жанг бўлиб ўтган.



Ҳирот якинидаги Нангобод (собик Дехи Канор) кишлоғида
Бобур халкаро жамғармаси томонидан Мавлоно Лутфийга
қўйилган қабртош ва мақбара. 2007 йил.



Агра. Тож Маҳал. 2006 йил.



Дехли. Халқаро анжумандада. 2012 йил.



Бобур халқаро жамғармасининг Германия бўлими раҳбари
Ян Хонзель билан ижодий сухбат. 2004 йил.



Самара. Кондурча дарёси соҳили. Россиялик олимлар билан. 2010 йил.



Дехли. Бобур авлоди Покиза Султонбеким хонадонида. 2006 йил.




Хитойлик археологлар билан учрашув. 2011 йил.



Геологик изланишлар давом этади.



Файзли хонадон. 2007 йил.



АҚШ. Гарвард университети профессори
Уилер Текстоннинг иш кабинетида. 2009 йил.



Рим шаҳрида. 2009 йил.



Ўзбекистонлик машҳур адиб ва олимлар даврасида.
2002 йил.



Хорижий бобуршунослар билан учрашув. 2000 йил.

Бобур ҳаммаси бўлиб, тўла бўлмаган 48 йил умр кўрди. Ундан ота-она бағрида беташвиш юрган йилларини чегириб ташласак, қолган умри давомида (36 йил) ором нималигини билмаган, бирор лаҳза фароғат кўрмаган бу инсоннинг ўзидан шу қадар бой илмий ва адабий мерос қолдиргани, улкан салтанат соҳиби бўлиб етишгани жаҳон аҳлини ҳамон ҳайратга солиб келади.

Бобур олим, шоир ва шоҳ бўлиш билан бирга, гўзаллик муҳиби, ахлоқий фазилатларни қадрлайдиган, уларни тарғиб этадиган, эътиқоди мустаҳкам, ўта сахий ва химматли инсон эди.

Бобур шахси билан яқиндан танишиш шундай хулосага олиб келадики, у бошқа ҳукмдорлар ёки Ғарб қироллари каби ғанимларидан ўч оладиган қасоскор шоҳ бўлмаган, бунга кўплаб мисоллар келтириш мумкин. Масалан, Бобур Ҳиндистонда ўз давлатини барпо этгач, бу ғалаба шарафига катта тантанали маросим (1528 йилнинг декабри охирларида) ўтказади ва унга кўплаб мўътабар меҳмонлар таклиф килинади. Ҳатто ота юрти Мовароуннаҳрдаги шайбонийхонлардан ҳам вакиллар чакирилади. Ахир, Шайбонийхон ва унинг одамларидан Бобур беҳад озор чеккан эди-ку?! Йўқ, у ҳар қандай гина-кудуратдан устун туролган етук инсон. Шунинг учун орадаги душманлик муносабатларини унутиб, одамийлик кўрсатади. Яна шуниси дикқатга сазоворки, меҳмонга келган шайбоний авлодларни ўзидан ўнг томонга ўтказади ва катта совгалар билан кузатади.

Яна бир эътиборли мисол. Бобур қариндошларидан Ҳон Мирзо хокимиятни тортиб олиш учун исён кўтарганида, ундан қасос олмайди, ҳатто исёнчиларнинг ғоявий раҳнамоси бўлмиш ўгай момоси Шоҳбегимни ҳам хижолатдан чиқариб, ўзини гўё билмасликка

солади. Ахир, Ғарб қироллари бундай пайтда ғазабга миниб, уларни умрбод қийноқка солган ё ўлимга маҳкум этган, Шарқ подшоҳлари эса кўзларига мил тортирган эмасми?

Ҳиндистон забт этилгач, Бобур хинд таомларини ҳавас қилиб, Иброҳим Лўдий ошпазларидан хизматга олиб қолган эди. Мағлуб Лўдийнинг онаси малика Буа бундан фойдаланиб, Бобурни заҳарламоқ мақсадида бир ошпазни қўлга олади ва овқатга заҳар қўшиб бердиради. Яхшики, Бобур соғ қолади. Аммо суиқасд ташкилотчиси бўлмиш Лўдийнинг онасини жазога тортмай, афв қиласи. Яна шундай бир шоҳни кўрганми бу кўхна дунё?

Ғаламис-сотқинлар вақти келиб жазоланишига ишонган Бобур мана бу форсча байтни келтиради: (таржимаси)

«Ёмонлик қилдингми – ўзни жазога лойик бил,
Жазо – тақдир зарбаси муқаррар, бил».

Бобурнинг Ҳиндистонда асос солган салтанати исломий давлат эди. У ёзадики, Расулуллоҳ тарихидан бўён Ҳиндистонни уч бора мусулмон ҳукмдори эгаллаган: биринчиси Маҳмуд Ғазнавий, иккинчиси Соҳибқирон Амир Темур, учинчиси эса Бобурдир. Аммо унинг мақсади юқоридаги икки саркарда каби яшин тезлигида келиб кетиш эмас эди. Бобур бу сирли ўлкада бутунлай қолиш ва авлод ортириб, хинд ҳалқи билан абадий бирлашиб кетиш, бинобарин, мамлакатни, унинг ҳалқини талаш учун эмас, балки обод қилиш учун, улусга ҳамдард бўлиш, уни янги маданият чўққилари сари етаклаш учун келганини исботлайдиган қатор чора-тадбирлар кўради.

Бобур шундай ёзади: «Тенгри таоло ранж ва мاشаққатимизни зойеъ қилмай... Ҳиндустондек кенг мамлакатни мафтуҳ айлади. Бу давлатни ўзимизнинг зўр ва қувватимиздин кўрмасбиз, балки Тенгрининг маҳзи лутф ва шафқатидиндур ва ... айни карам ва иноятидиндур».

Шохнинг бундай дейиши унинг оқкўнгил, меҳрибон ва иймонли эканини кўрсатадики, биз Бобурнинг бундай сифатларига энди-энди эътибор қаратмоқдамиз. У ҳар бир тадбирида, ҳар кунги давлат фаолиятида факат Яратгандан нажот сўрайди ва унга таваккул қилган ҳолда иш кўради. Бобурнинг бошқа Шарқ ва Ғарбдаги кўпгина музaffer император ва шоҳлардан фарқ киласидиган фазилати ҳам шундадир.

Ҳиндистон ва Покистон бўйлаб қилган сафарларимиз давомида бу ерлардаги тарихий шаҳарларни томоша килар эканмиз, сакланган меъморий обидаларда, боғларда, кутубхона ва музейлардаги осори атикаларда эътиқоди событ Бобур сиймосини кўргандек бўлганмиз. Хоҳ Афғонистонда, хоҳ Покистону Ҳиндистонда, хоҳ Бангладешда бўлсин, биз сухбатлашган олиму турли касб соҳиблари ҳам тасаввуримиздаги бу улуғ сийменинг нақадар мўътабар инсон эканини тасдиклайди.

Бобур Ҳиндистонда давлат фаолиятини бошлар экан, муборак ҳадисларда ҳукмдорларни огоҳликка даъват этувчи куйидаги кўрсатмага риоя қилган: «Халқ... подшоҳларга берилган омонатдир». Шу жиҳатдан шоҳ Бобурнинг шахсий феълию хислатларига назар ташласақ, унинг эътиқоди нихоятда мустаҳкам бўлганлиги ойдинлашади.

Хурматли ўқувчилар эътиборини мана бу мисолларга қаратмоқчимиз: Ҳиндистонни кўлга киритгач, Бобур ўлжа олинган рожа(бой)лар хазинасининг кўп қисмини

ҳадя қилади. Барча баҳодир йигитлару ишбошиларни кўрсатган хизматларига қараб тақдирлайди. Бундан ташқари, муқаддас шаҳарлар – Маккан мұкаррамадаги Байтуллох ва Мадинаи мунааварадаги пайғамбаримиз Масжидига ҳам ҳадялар атаб, маҳсус кишилар орқали юбортиради. Шунингдек, Андижон, Самарқанд шаҳарлари, Ҳурросон ва бошқа юртлардаги улуғ шайхлар, валийларга ҳам алоҳида ҳадялар юборади. Жумладан, отаси ва ўзининг пири – машхур Аҳмад ибн Жалолиддин Косоний – Маҳдуми Аъзамга ҳам (1462–1544) каттагина ҳадя жўнатгани маълум. Ҳадяга қўшиб ушбу мазмундаги форсий ғазални ҳам юборган:

Адашган нафсимиз ҳавоси йўлида умрни зосъ қилдик,
Аҳли дин олдида килмишимиздан шармандамиз.
Биз томонга бир назар солинг, вафодорлик ила
Хожага боғланганмиз, хожага бандамиз.

Ушбу ғазал мазмуни ҳам Бобурнинг эътиқоди нақадар событ ва юксаклигини, пиру устозларга хурмат-эҳтироми нақадар самимий эканини кўрсатади.

В.В.Бартольд келтирган қуйидаги маълумот ҳам Бобур эътиқодининг мустаҳкамлигини исботлайди: рус шарқшуноси 1916 йили Туркистонга килган навбатдаги илмий сафари давомида Самарқандга келиб, археолог дўсти Вяткиннинг уйида тўхтайди ва унинг шахсий кутубхонасидаги «Мифтоҳ ут-толибин» (ilm toliblari учун калит) номли (1543 йилда ёзилган) қўлёзма китоб билан танишади.

Бартольд ушбу китобдан Бобурга даҳлдор қуйидаги маълумотларни келтиради: машҳур Нажмиддин Кубро мактабининг иирик намояндадаридан Ҳожа Муҳаммад Ҳабушоний-Кучоний деган улуғ шайхнинг кўп кароматларини эшитган Бобур унга гойибона қўл

бериб, уни ўз пири деб ҳисобларди. Шайхнинг 1517 йилда Хоразмдан Самарқандга кўчиб келганидан хабар топган Бобур Кобулдан у зотга ҳам мактуб ва ҳадялар юборади. 1527 йили Ҳиндистоннинг жанубий ҳудудлари бирлашган қўшинининг кўмондони Рона Санго билан ҳал қилувчи тўқнашув олдидан Бобур Самарқандга маҳсус одам юбориб, ғойибона пири Ҳожа Муҳаммад Ҳабушонийга хат билан мурожаат қиласи ва бўлғуси жангда ундан дуо сўрайди. Улуғ шайх Бобурнинг содиклик номасини олгач, унга нусрат тилаб дуо қилган ва хотира учун ўз ҳассасини юборган.

Нихоят, ҳал қилувчи жанг олдидан кечқурун Бобур ўша ҳассани жойнамознинг олд томонига қўйиб, таважжух билан ибодат қиласи ва пиридан астойдил мадад сўрайди. Буни қарангки, шу куни Бобур тушида ҳам шайхни кўрган: шайх илгари қўрқинч нималигини билмайдиган Бобур бу сафар ғанимдан бироз бўлсада, ҳайикаётганини таъна қилган ва уни қўркмасликка ундан, ёрдам беражагини билдирган.

Эртасига эрталаб Бобур душманга қарши узил-кесил хужумга ўтади. Жанг тарихидан маълумки, Бобур қўшини Рона Санго устидан ажойиб ғалабага эришади. Кўлга тушган ўлжадан яна ҳадялар тарқатади. Жумладан, Самарқандга – ғойибона пири шайх Муҳаммад Ҳабушоний ҳазратларига ҳам миннатдорлик билан 500 танга юборади ва агар маҳсус одам келса, кўлга киритилган хазинани бутунлай шайх ихтиёрига беражагини билдиради.

Бу ерда яна бир дикқатга сазовор жойи шундаки, Бобур одами Самарқандга етмай туриб, шайх бир хонақоҳ куриш учун 500 танга насияга ер сотиб олган ва ер эгасига «ҳакини Оллоҳ юборади», деган экан. Бобур юборган ҳалиги пул миқдори ҳам айнан шунча эди.

Бобурнинг ҳозиргача эътибор берилмай келган феъл-автори, исломий эътиқоди ҳакида кўплаб мисоллар келтириш мумкин. Агар синчиклаб мутолаа қилинса, бунга «Бобурнома»да ҳам мисоллар учрайди. Чунончи, пайшанба кунлари фикҳ дарслари ташкил қилиниши, Бобурнинг Қуръони каримнинг маълум сурасини «вирд» (кўплиги «аврод») ўкиш учун 41 мартадан такрорлаши, ислом тарихидан маълум бўлган «Қасидаи Бурда»нинг ёзилиши сабабидан хабардор бўлгани учун бетоб ётган кунлари пири Ҳожа Аҳрор Валийнинг «Рисолаи волидия» асарини ихлос билан туркийга табдил қилиб касалликдан тузалиб кетгани, Ҳиндистонда ўтган кўплаб улуғларнинг қабрларини таъмирлатгани ва ҳоказо.

Улардан яна бири – ичкилик ичишни ман этиш тўғрисидаги фармони ҳакида батафсилик тўхталайлик. 1527 йил 25 февраль душанба куни Бобур бомдод намозидан сўнг ўзи ёлгиз сайр қилиш учун очик ҳавога чиқиб, айрим одатлари, баъзи салбий қилмишларини хаёлидан ўтказади ва ўзи ҳакида холисанилло танқидий фикр юрита бошлайди. Ҳаёлан ўз феълини тафтиш қилиш – бу ҳам ўзига хос мардлик ва ирода, қатъият нишоналаридандир. Ана шундай бандалик гуноҳларидан бири – ўзини ичкиликка ружуъ килган деб билади ва Яратганга астойдил тавба килади. Энди ичмасликка ва бошқаларни ҳам бу йўлдан қайтаришга қатъий ваъда беради – қасамёд килади. Бу борада «Бобурнома»да куйидаги мазмундаги икки мисрадан иборат форсий ғазал бор:

Эй нафс! Қачонгача гуноҳ ишлардан завқ оласан?
Тавба ҳам бемаза эмас-ку, тотиб кўргин ундан ҳам.

Сўнгра бундай ёзади:

Хуш килиб ўзни бу кечмакликтин,
Тавба қилдим чогир ичмакликтин.
Олтину нуқра сурохийу аёқ,
Мажлис олоти тамомин ул чок,
Хозир айлаб борини синдурдум,
Тарк этиб майни, кўнгил тиндурдум.

Шу тарзда ичкиликни ман этиш ва ичмаслик ҳақида фармон қабул қиласди. Олтин қадаҳлар, май косаларини тўплаб синдиришга ва парчаларини ғариларга ҳадя тарзида улашишга буйруқ беради. Ғазнадан тута карвонларида янги келтирилган чогирларга туз ташлатиб сирка қилишни, захирадаги чогирларни тўкиб ташлашни амр этади. Мана, Бобурнинг ушбу фармонидан бир парча:

«Инсон табнати ўзининг яратилиши бўйича нафс лаззатларига мояилдир, завқ келтирувчи ёқимили нарсаларни тарк этиши худонинг тавфиқ беринига ва осмоний кўмакка боғлиқ». Сўнгра Қуръони каримнинг «Юсуф» сурасидан «Нафс барча ёмонликларга буюргувчи» деган оятни келтиради. Ва нафс йўлидан қайтиш ҳам «Аллоҳнинг эҳсонидир, кимга хоҳласа (ўшанг), баҳш этади. Аллоҳ катта эҳсон эгасидир» деган яна бир оятни келтиради.

Ўша куниёқ Бобур яқинларидан 300 дан зиёд киши Қуръони каримни қўлига олиб, ичмасликка қасамёд қиласди.

Ҳа, Заҳириддин Мухаммад Бобур ана шундай зукко олим ва шоир, айни вақтда дарвеш табиат шоҳ ва хуш хулқ, бир сўз билан айтганда, улуғ инсон эди.

Ўтган йили радио тўлқинларида бир хушхабар тарқалди. Европа ва Америка олимлари Ер юзида охирги минг йилликда етишиб чиқкан буюк инсонлар

ҳақида янги китоб нашр этди. Ушбу китобга киритилган мингдан ортиқ буюк инсонлар орасидаги дастлабки юзталика Захириддин Мухаммад Бобур Мирзонинг бўлиши унинг дунё халклари томонидан тан олинган йирик олим ва буюк шахс эканидан далолатdir. Унинг «Бобурнома» асари башарият тарихида яратилган ёзма ёдгорликларнинг энг бебаҳосидир», деб ёзган эди Лейн Пойл.

Бобур давридаги буюк хукмдорлар Чарльз V, Франциск I, Генрих VIII унга Осиё даштларининг фарзанди деб қарасалар-да, аслида у ўзининг жамиятда тутган ўрни, яратувчанлиги, мутафаккирлиги, одиллиги ва бошқа олижаноб фазилатлари билан улардан алоҳида ажралиб тураг эди.

Мустакилликнинг ilk меваларидан бири сифатида Андижонда Бобур номидаги Халқаро хайрия жамғармасининг ташкил топгани ҳам халқимизнинг Бобур васиятларига содиклигини намоён этди.

2001 йил

МАШХУРИ ЖАҲОНДИР АЖДОДЛАРИМИЗ

(Америка Қўшма Штатларида бобуршунослик)

Маълумки, Бобур ва бобурийлар яратган илмий, бадиий асарлар неча асрлардан буён турли халклар томонидан мунтазам ўқиб-ўрганиб келинади. Бобурийлар яратган бой мерос жаҳоннинг турли хазиналаридан муносиб жой олганининг ўзи бу меросга бўлган кизиқишнинг кўлами ва даражасидан далолат беради.

Биз, Бобур номидаги илмий экспедиция аъзолари шу йилнинг июнь ойида АҚШнинг ўнлаб музей ва кутубхоналари фаолияти билан яқиндан танишиш, бу ерда сақланаётган бой меросимизга оид манбаларни аниқлашга алоҳида эътибор қаратдик.

Америка Қўшма Штатларининг Цинциннати шахрида бир қанча музей ва йирик кутубхоналар мавжуд. Шулар орасида Санъат музейи алоҳида ажралиб туради. Бу ерда Америка ва Европа тарихига оид ноёб маданий мерос кўз корачифидек авайлаб саклаб келинаётгани айниқса эътиборлидир. Шунингдек, Нью-Йорк шаҳар марказий музейи ва Сенат кутубхонасида хам халқимизнинг бой мероси намуналари жой олгани илм аҳлига маълум.

Цинциннати шахридаги Санъат музейи хазинасидан ўзбек халқининг буюк шоири, йирик давлат арбоби, темурийлар сулоласининг Ҳиндистондаги давомчиси Захириддин Мухаммад Бобур ва унинг авлодларига мансуб шахзодаларнинг 1526 йилдан 1858 йилгacha

бўлган тарихий ва маданий ёдгорликларининг энг ноёб нусхалари жой олгани ҳар бир ўзбекнинг қалбини ифтихорга тўлдириши табиий.

Бизни музейнинг шарқ ҳалқлари маданий обидалари сакланаётган хазинасига музейнинг шу соҳа бўйича масъул ҳодими Глен Маркай бошлаб кирди. Хазина жавонларида бобурийлар хонадони вакилларига тегишли юзлаб ашёлар ўзига хос тарзда жойлаштирилган бўлиб, улар орасида қўлёзмалар, ҳар хил санъат асарлари, суратлар, гиламлар, кийим-кечак ва турли даврларга оид буюмлар алоҳида ажралиб турарди.

Глен Маркайнинг айтишича, бобурий ҳукмдорларга мансуб бўлган бу тарихий обида ва ашёларнинг Санъат музейига келиб тушишининг ўз тарихи бор. Уларнинг бир қисми, сопол буюмлар, мисдан ишланган кўза ва Кашмир рўмоллари (XVIII – XIX асрларга оид) харид қилинган бўлса, бир қисми Жозеф Сван Нив хоним ва Рат Харрисонлар томонидан 1923 йили Дехлида Имр Швейжер исмли тадбиркордан сотиб олинган. Бу нодир тарихий ва маданий ёдгорликлар 1950-1951 йилларда Джон Нажак томонидан музейга ҳадя қилинган.

Бу тухфалар орасида энг диккатга сазовори Манухар Das исмли мусаввир мўйқаламига мансуб бевосита бобурий ҳукмдорларга тегишли бўлган миниатюра асаридир. Мазкур асар 1602 йилда ишланган бўлиб, унда император Акбаршоҳ қадрдан дўсти Мирза Азиз Кўкани ўз қароргоҳида қабул килаётгани акс эттирилган.

Маълумки, Акбаршоҳ Мирза Азиз Кўкани ҳукмдор лавозимига кўтариб, унинг қизини ўз фарзанди Жаҳонгирга никоҳлаб берган эди. Мирза Азиз Кўканинг отаси Аткахон ўз даврида Ҳумоюн Мирзо хизматида бўлган. 1580 йили Акбаршоҳ Мирза Азизни «Хони аъзам»

маргабасига кўтаради. Бу уларнинг нечоғли яқин дўст бўлганидан далолат беради. Суратда Акбаршохнинг орка томонида Жаҳонгир билан бирга унинг ўғли Ҳуррамшоҳ, яъни Шоҳ Жаҳоннинг ҳам сиймоси ўз аксини топган. Қуйироқда таъзим қилиб турган шахс эса Шамсиддин Ҳусайндир.

Шундай қилиб, бу суратда уч авлодга мансуб икки катта оила ҳаётидаги бир тарихий воқеа ўз аксини топган. Ўйлаймизки, бу миниатюра «Акбарнома» асарига ишланган лавҳа бўлган.

Ушбу суратнинг яна бир дикқатга сазовор жойи шундаки, унинг ҳошиясида ниҳоятда нафис хат билан форс тилида битилган матн бор. Матн тўлиқ сакланиб колмаган бўлса-да, унда шундай ҳикматомуз сўзларни ўқиш мумкин:

Ки, умр рафту нагаштам зи баҳт бархурдор,
Ҳазор ҳайфки, навмед гаштам охири кор.

Таржимаси:

Умр ўтди-ю. баҳту иқбол насиб этмади,
Минг ҳайфки, оқибат умидсизликка тушдим.

Шунингдек, мазкур музейга 1962 йили Уильям ва Луиза Тафт Семпл ва бошқалар томонидан қилинган тухфалар ҳам унинг фондини бобурийлар тарихига оид кимматли манбалар билан янада бойитишга хизмат қилган. Шулар орасида, айниқса, «Акбарнома» ҳамда Саъдийнинг «Гулистан» асарига ишланган миниатюралар алоҳида аҳамият касб этади. Бу миниатюралар бобурий ҳукмдорлар буйруғига биноан таҳминан 1595 йили яратилган. Ҳусусан, Акбар даврида тарихий ва адабий қўлёзмаларга расмлар ишлаган машҳур рассом Лаълнинг ижод намуналарини алоҳида

қайд этиб ўтиш жоиздир. Акбар саройида хизмат қилган муаррих Абулфазлнинг таъкидлашича, Лаъл ўша даврда яшаб ижод қилган машхур 15 та рассом орасида энг шуҳратлиси бўлиб, у «Акбарнома» асарига 13 та миниатюра чизган.

Шулардан бири мазкур музейнинг ноёб мулки сифатида сакланиб келаётган Саъдийнинг «Гулистон» асарининг «Шоҳлар ҳаётидан» номли бобидан жой олган ҳикояга чизилган расмдир. Шунингдек, асарнинг «Дарвешлар ахлоқи зикри» бобида келтирилган «Художўй киши ва уни улоктириб ташлаган туя» ҳикоясига ишланган миниатюра ҳам ўзига хос. Унда Бани Ҳилол қабиласига мансуб бир йигит куйлаётган ашулага ҳамма маҳлиё, ҳатто қушлар ҳам лол. Биргина туя минган дарвеш бефарқ, унинг бундай дидсизлигидан дарғазаб бўлган туя дарвешни ўз устидан ерга улоктириб ташлаётгани ғоят гўзал тарзда ўз ифодасини топган.

Ёки рассом Маноҳач томонидан мазкур асарнинг «Қаноат фазилати зикри» бобидан ўрин олган ҳикояга ишланган миниатюрани ҳам ўзига хос композицион шаклда яратилган юксак санъат асари намунаси, десак, янгишмаган бўламиз. Суратда сайёд тўрга тушган бир улкан балиқни тутолмай қочириб юборгани балиқчиларнинг ҳаяжонли образлари орқали ёрқин очиб берилган. Шунингдек, Фарруҳ Чела томонидан чизилган ва асарнинг мазкур бобидан ўрин олган «Ҳалқани нишондан ўтказган бола» ҳикояси манзараси ўта таъсирчан расмлардандир. Бхим Гужаротийнинг «Саъдий ва кошғарлик йигит», Сур Гужаротий чизган «Шоҳнинг Ҳамадон қозисига танбех бергани», рассом Маканд ишлаган «Хулқиз музаллимнинг синфдан бадарға этилиши», Дхарамдаснинг «Саъдий билан

дарвешнинг бойлик ва факирлик ҳақидаги сұхбати» каби «Гулистан» ҳикояларига ишланган миниатюралар чукур мазмуни ва бадий гүзәллиги билан ажралиб туради.

Бу ердаги қўлёзма мерос орасида Ҳиротда Султон Ҳусайн Мирзо ва Бухорода Абдулазизхон кутубхоналарида хизмат килган ва хаттотлик санъатини Зайниддин Маҳмуд ва Султонали Машҳадийдан ўрганиб, «Котиби Султоний» унвонига сазовор бўлган Мир Али Ҳиравий томонидан кўчирилган Камол Ҳўжандийнинг «Девон»и қўлёзма нусхаси алоҳида қўзга ташланиб туради. Қўлёзмада қайд этилган маълумотларга қаранганд, у 1529-1530 йилларда кўчирилган.

Шунингдек, музей экспозициясида намойиш қилиниб келаётган XI-XII асрларда китобат қилинган Қуръони каримнинг куфий хатида битилган нодир нусхаси, XVII асрда бадий безак билан ишланган «Фарҳанги Жаҳонгирий» ва «Ҳамзанома» асарлари қўлёзмаси нусхалари энг ноёб кўргазмалар қаторидан ўрин олган.

Булардан ташқари, мазкур экспозицияда бобурийлар хонадонига мансуб турли тарихий ашё ва буюмлар, ипак ва жундан ишланган санъат асарлари ҳам эътиборни тортади. Шу ўринда, хусусан, тилшунослик фани ривожига салмоқли хисса бўлиб қўшилган «Фарҳанги Жаҳонгирий» асари тарихи ҳақида кисқача маълумот бериб ўтсак.

Маълумки, бу асарни ёзишни ўз вақтида Акбаршоҳ Мир Жамолиддин Ҳусайн Инжугатопширган. У бу ишни 30 йил мобайнида, яъни Жаҳонгиршоҳ ҳукмронлиги даврида тутатган. Асар қўлёзмасининг 1618 йилда кўчирилган яна бир нодир нусхаси ҳозирда Вашингтонда Конгресс кутубхонасида ҳам сақланмоқда.

Музей фондида сақланаётган бобурийлар кутубхонасига оид айрим қўлёзмаларга ишланган миниатюралар орасида Ҳиндистон мамлакатини бирлаштириш ва ягона империя барпо этиш йўлидаги ҳарбий юришлар тарихи акс этган лавҳалар, бошқа бир гурӯҳ қўлёзмаларда бобурийлар сулоласининг сиёсий-ижтимоий, иқтисодий ва маданий ҳаёти билан чамбарчас боғлиқ тарихий воеалар, майший ҳаёт тарзи ўз ифодасини топган лавҳалар алоҳида ўрин тутади. Мазкур қўлёзмаларда Ҳиндистон давлат арбоблари – Ҳумоюн, Ақбаршоҳ, Шоҳ Жаҳон, Доро Шукуҳ, Шоҳ Шужъоъ, Аврангзеб сиймолари ва Ҳиндистондаги сўнгги бобурий ҳукмдорлардан бири Ақбар II нинг ўз аъёнлари ҳузуридаги тасвири акс этган миниатюралар Бобур ва унинг авлодларининг жаҳон тамаддуни ривожига нақадар улкан ҳисса қўшганини ёрқин далилловчи тарихий ҳужжатлардир.

Маълумки, Ақбаршоҳ даврида адабиёт, санъат ва илмнинг бошқа соҳалари, айниқса, миниатюра санъати ривожига алоҳида аҳамият берилган. Шу боис илм-фан, адабиёт ва тарихга оид мўътабар асарларни таржима қилиш, қўлёзма меросни эъзозлаш, уларни жаҳоний аҳамиятга молик асарлар сифатида тарғиб қилиш иши юксак даражада ташкил этилган.

«Ақбарнома» («Тарихи Ақбариј») асари қўлёзмаси. Уч жилдли ушбу тарихий-мемуар асар бобурийлар сулоласининг сардори Захириддин Муҳаммад Бобурнинг шоҳ асари «Бобурнома» ва ундан кейин ёзилган «Ҳумоюннома»нинг тадрижий давомидир. Бу тарихий асар Ақбарнинг топшириғига кўра, унинг вазири ва яқин сафдоши Абулфазл Алломий томонидан 1589–1601 йилларда ёзилган бўлиб, унда Бобур, Ҳумоюн тарихи, бобурийлар салтанати билан бирга,

Акбарнинг дастлабки 17 йиллик (1556 – 1572) даври, Ҳиндистон ва шимолий Афғонистон (1573 – 1601/02), Ақбар салтанатининг тузилиши, давлатни идора килиш усуллари ва конунлари (яъни «Ойини Ақбарий») ҳақида сўз юритилади.

Мана шу асарнинг Цинциннати шаҳридаги Санъат музейи хазинасида сакланаётган мўътабар қўлёзма нусхасидан бобурий шаҳзодалар тарихига оид лавҳалар ўз аксини топган туркум расмлар муносиб жой олган. Ҳусусан, Ҳумоюншоҳнинг Гужарот шаҳрини қамал килиши тасвирланган миниатюра энг эътиборли расмлар қаторидан ўрин олгани ҳам бежиз эмас.

Қўлёзма нусхадаги маълумотлардан аён бўладики, у 1590 йилда китобат қилинган. Матн нафис настаълик хатида учустунда ёзилган бўлиб, сахифалар накшинкор, олтин ва кумуш суви билан безатилган. Сахифанинг остки кисмидаги кайдга кўра, асар Бхура Чахроқ исмли мусаввир қаламига мансуб. Сахифанинг юқори кисмida Ҳумоюннинг Гужарот қальаси учун қилган жангига ҳақида маълумот ҳам келтирилган. Унда айтилишича, Ҳумоюн Мирзо яхши куролланган 30 000 кишидан иборат қўшини билан Султон Баҳодирни мағлуб этади. Бу воқеа 1535 йил апрель ойининг охирларида содир бўлган, лекин Гужарот учун кураш кейинчалик ҳам давом этган.

Бобурийлар давлатида миниатюра санъати ривожига Камолиддин Беҳзоднинг шогирдлари Мирсайийид Али ва Ҳўжа Абдусамад Шерозийлар муносиб ҳисса қўшган. Бу мактаб вакиллари Саъдийнинг «Гулистон», Низомий ва Хисрав Дечлавийнинг «Хамса» асарларига юзлаб миниатюралар ишлагани бизга яхши маълум.

Мазкур музейда сакланаётган туркум тасвирий санъат асарларидан кўриниб турибдики, кейинги

даврларда тарихий шахслар сиймоси акс этган сарой альбомлари, кундалик майший турмушни ёритувчи ҳаётий воқеа ва ҳодисалардан иборат тасвирий мажмуалар тузиш кенг тарқалган.

Музей хазинасидаги ана шу тасвирий асарлар қаторига «Хонандалар», «Мева сотувчи савдогар», «Олти тулпор», «Булбул», «Фил» расмлари ва бобурий шахзодаларнинг туркум портретларини киритиш мумкин.

Музей хазинасида ҳозирча номаълум қўлёзмага рангли қилиб ишланган ва Джон Нажак томонидан тухфа қилинган Акбаршоҳнинг бир саҳифадан иборат портрети Ҳиндистон шоҳлари альбомига ишланганлиги кўриниб турибди. Суратда Акбаршоҳнинг шаҳардан ташқарида, тоғ ёнбағрида, чап қўли билан қиличига суюнган ва ўнг қўлида узук тутиб тик турган ҳолати тасвирланган. Унда шоҳона либосдаги Акбаршоҳ қимматбахо, кўзни қамаштирувчи камар, дур ва узуклари билан салобат тўкиб турибди. Миниатюра муаллифининг номи қайд этилмаган, лекин у 1640–1650 йилларда яратилган, деб тахмин қилиш мумкин.

Шунга ўхшаш саҳифалар орасида номаълум мусаввирлар қаламига мансуб ва XVII–XVIII асрларга оид эскизлар ҳам мавжуд бўлиб, уларда ёш шахзодалар билан бирга санъаткорларнинг расмлари ҳам ўз аксини топган. Шундай эскизлардан бири XVIII асрга оид бўлиб, унда икки сарой хонандасининг ўтирган ҳолатдаги тасвири акс этган. Саҳифанинг юкори қисмida хинд тилида уларнинг хонанда эканлиги қайд қилинган бўлса, куйироқда араб ёзуvida уларнинг исмлари, яъни «Капурхон биродари Лодхон билан бирга», деб ёзиб қўйилган. Бу эскиз, назаримизда, келажакда яратилиши мўлжалланган миниатюралар альбоми учун қоралама вазифасини ўтамоги лозим бўлган.

Музей хазинасида сакланаётган миниатюралар орасида сўнгги бобурий ҳукмдорлардан бири Ақбар II (1806 – 1837) нинг олтин таҳтда ўтирганча хинд ва мусулмон аъёнлари иштирокида Британиянинг Ҳиндистандаги резиденти Чарльз Зеофилас Меткейлфи ни тантанали қабул қилиш маросими тасвиrlанганд асарнинг ҳам юксак савияда ишланган расмлар қаторидан ўрин олганини қайд қилиш жоиз. Асар Ғулом Муртазохон қаламига мансуб, деб ҳисобланади.

Мазкур музей хазинасида Бобур ва бобурийларга оид юзга яқин тарихий ва санъат асарлари сакланиб келмоқда. Биз уларнинг айримларинигина айтиб ўтдик, холос.

Зикр этилганларнинг ўзиёқ бобурийлар қолдирган бой мероснинг ранг-баранглигини кўрсатади. Ана шу ноёб меросимизнинг бир қисми юртимиздан анча олисда, океан ортида сакланиб келинаётгани илм-фан, санъат, маданият, маънавият таракқиётига бемисл ҳисса қўшган бобокалонларимизнинг башарият тарихида ўчмас из қолдирғанлигига ёрқин мисолдир.

Хулоса қилиб айтганда, АҚШдек узок ва буюк бир ўлкада Бобур ва бобурийларга тегишли тарихий ва маданий ёдгорликлар жамлангани албатта биз учун кутилмаган ва ғоят қувончли бир воқеа бўлди. Биз бобурийлар ва бошқа аждодларимизга оид кўплаб маълумотлар, манбалар ер юзининг турли музей ва кутубхоналарида сакланаётганига яна бир бор ишонч ҳосил қилдик. Шундай экан, Бобур Ҳалқаро илмий экспедициясининг келгуси сафарлари йўналишини ер куррасининг иирик шаҳарларида жойлашган музей ва кутубхоналар бўйлаб режалаштириш ҳар томонлама мақсадга мувофиқ ва самарали бўлади, деб ўйлаймиз.

2010 йил

МУҲАММАД ҲАЙДАР МИРЗО – ТАРИХЧИ, ШОИР ВА ШОХ

8 сентябрь куни Андижоннинг Богишиамол даҳасидаги Бобур жамоат фонди биносида «Муҳаммад Ҳайдар Мирзонинг «Тарихи Рашидий» асарининг жаҳон маданиятида тутган ўрни» мавзусида ҳалқаро анжуман очилади. Анжумандаги чет эллик олимлар – Америкадан Гарвард университети профессори Уилер Текстон, Япониядан Киото университетининг профессори Эйжи Мано, Хитойдан Муҳаммадтурдий Мирзоаҳмад, Қозогистондан профессорлар Ислом Жеменей ва Данай Исқакули, Ҳиндистондан профессор Мансура Ҳайдар, Озарбайжондан профессор Рамиз Аскер, Ўзбекистондан академик Азиз Қаюмов, профессорлар Сайдек Ҳасанов, Ҳасан Қудратуллаев, Абдумажид Мадраимов ва бошқалар иштирок этиши кутилмоқда.

Муҳаммад Ҳайдар Мирзони ҳозиргача факат тарихчиларгина билар эди, десак муболаға бўлмас. «Тарихи Рашидий»нинг 1996 йили «Фан» нашриётида босилган Асомиддин Ўринбоев, Лариса Епифанова ва Раъно Жалилова томонидан амалга оширилган рус тилидаги таржимаси илмий жамоатчилик эътиборига тушди. Кўп ўтмай бу таржима Алматида ҳам қайта икки маротаба (1999, 2011) нашр этилди.

Ўзбек мумтоз адабиёти мутахассислари Муҳаммад Ҳайдар Мирzonинг 1999 йилда «Фан» нашриётида босилган «Жаҳоннома» номли достонига негадир муносабат билдирилдилар. Ўзбек тилидаги «Жаҳон-

нома» достони ҳакида ҳатто якин-яқингача «Бу жуғрофий асар», деган ғайрийлмий фикрлар ҳам тақрорланиб турди.

«Жаҳоннома» достонини заҳматкаш олимларимиз Сабоҳат Азимжонова, Асомиддин Ўринбоев ва Омонбек Жалилов нашрга тайёрлаган. Ноширлар достоннинг Берлин нусхасини асос қилиб олиб, Шинжонда нашр этилган нусхадан ҳам айрим ўринларда фойдаланишган.

Муҳаммад Ҳайдар Мирзонинг ўғлига бағишлаб ёзган «Махмуднома» достони ҳали нашр этилган эмас.

Шуни айтиш керакки, ушбу машхур тарихчи айни пайтда соҳибdevон шоир ҳамдир. Хитойнинг Шинжон автоном районида чоп этилган «Баёз»да (1995 й.) унинг шеърларидан намуналар келтирилган. 2009 йилда «Тарихи Рашидий» Бобур жамоат фонди ташаббуси ва ҳомийлигига ўзбек тилига таржима қилинди (таржимонлар Янгиш Эгамова ва Ваҳоб Раҳмонов) ва Фонд раёсатига асарнинг ўзбекча матни тақдим этилди.

Маълумки, муаллиф Кашмирда ўн йилдан ортиқ (1551 йилгача) подшоҳлик қилган. Бинобарин, унинг Кашмирдаги фаолиятини ўрганиб, асар нашрига илова килмоқ лозим эди.

Шу сабабли Бобур номидаги ҳалкаро илмий экспедиция катнашчилари навбатдаги сафари давомида Муҳаммад Ҳайдар Мирзо қадамжолари – Тошкент, Андижон, Ёркент, Қашқар, Ҳўжанд, Ўратепа, Ҳисор, Помир, Бадаҳшон, Файзобод, Қундуз, Кобул, Лоҳур, Агра, Дехли, Тибетда бўлиб, Сринагарда – Ҳайдар Мирзонинг абадий қўним топган сўнгги манзилигача етиб бордилар. «Тарихи Рашидий» муаллифининг ҳаёти ва ижодига оид кўплаб кимматбаҳо манбаларни кўлга киритиб, Андижондаги «Бобур ва жаҳон маданияти» музейига олиб келдилар.

Тарихчи олим Омонбек Жалилов «Ўзбекистон» нашриётида Мухаммад Ҳайдар Аёзийнинг «Тарихи Рашидий» (XIX асрда Мухаммад Шариф бажарган туркий таржимаси)ни нашр эттиргани ҳам бу асарга Ўзбекистонда қизиқиш нечоғли катта эканини кўрсатади.

«Тарихи Рашидий» 1895 йили Е.Д.Росс томонидан инглиз тилига таржима килинган, илмий матнини АҚШдаги Гарвард университети профессори Уилер Текстон тиёrlаган. Ҳозиргача бу асар жаҳоннинг ўнга яқин тилларига ўгирилди. Асар яратилган асл тили – форсийда 2004 йили Техронда нашр этилди.

Мухаммад Ҳайдар Мирзо 1499 йили Тошкентда Мухаммад Ҳусайн Мирзо ва Ҳўб Нигорхоним оиласида дунёга келган. Захириддин Мухаммад Бобур ва Ҳайдар Мирзо холаваччалардир. Ҳар икки улуғ зот – Бобур ва Ҳайдарга Тошкент хони Юнусхон она томонидан бобо, кейинги хон – унинг ўғли Султон Маҳмудхон (1487–1509) тоға бўлади. Бобурнинг онаси Қутлуг Нигорхоним Ҳўб Нигорхонимнинг эгачиси – опасидир. Ҳайдарнинг отаси Мухаммад Ҳусайн Султон Маҳмудхон билан яқин дўст эди, улар 10–12 йил давомида Тошкентда бир хонада туришган. Султон Маҳмудхон уйлангач, Мухаммад Ҳусайнга ўз эгачиси – Ҳўб Нигорхонимни бериб, уни кўрагонлик (хон куёви) мартабаси билан сийлаган ва ўша замонлар Тошкент хонига қарашли бўлган Ўратепага ҳоким қилиб жўнатган. Мухаммад Ҳусайн тўққиз йил Ўратепани идора қилган. Мирзо Ҳайдарнинг онаси 1501 йилда Тошкентда вафот этган.

«Тарихи Рашидий»да муаллиф Бобурнинг Ўратепада улар хонадонида азиз меҳмон бўлганини қайд этади. 1502 йилда Шайбонийхондан енгилган Султон

Маҳмудхон Мўғулистонга қочиб кетади. Ҳимоячисиз қолган Мұхаммад Ҳусайн ҳам аввал Қоратегинга, сўнгра Кобулга – Бобур даргоҳига боришга мажбур бўлади.

1504 йилда Мұхаммад Ҳайдар илк маротаба Ҳиротда мактабга борди. 1506 йилда Мұхаммад Ҳусайн Кобулда эди. Шу йили Бобур Ҳиротга Ҳусайн Бойқаро таъзиясига кетганида, амакивачаси Мирзохон унинг ўгай момоси Шоҳбегим қуткуси билан Кобул таҳтини эгалламоқчи бўлиб, фитна уюштиради. Бу фитнага Бобурнинг поччаси Мұхаммад Ҳусайнни ҳам тортадилар.

Бобур сафардан қайтиб келиб, фитнани бостиради. Мұхаммад Ҳусайн ҳаж баҳонасида Фароҳга жўнайди. Шайбоний уни Ҳиротга чақиртириб, хуфёна қатл этади ва Бухорога – ҳоким Убайдулло Султонга Мұхаммад Ҳайдарни қатл этиш ҳакида чопар жўнатади. Бу вақтда Мұхаммад Ҳайдарнинг опаси Ҳабиба Султон Хониш Убайдулло Султонга теккан ва укаси опасининг ёнида эди. Устози Мұхаммад Садр улуғ пир мавлоно Мұхаммад Қози тавсияси билан Мұхаммад Ҳайдар Мирзони Бадахшонга – Қалъаи Зафарга олиб боради. Бобур бу орада Мирзохонни афв этиб, Бадахшонга ҳоким қилиб тайинлаган эди. Мұхаммад Ҳайдар бир йил давомида бу ерда бўлади. Шайбонийхон хавфи мукаррарлиги туфайли Бобур ўсмир холаваччасини Кобулга чорлайди ва уч йил унинг тарбияси билан шуғулланади.

Бу орада Бобурнинг тоғаси Султон Аҳмадхон вафот этиб, унинг катта ўгли Мансурхон Турфонда, Султон Саидхон ва Халил Султон Мўғулистоннинг Қўчкор мавзесида эдилар. Мансурхон укаларига қарши лашкар тортиб, уларни енгади. Султон Саидхон ва Халил Султон ўз акаларидан қочиб, энг ашаддий ғаними

шайбонийлар хукм суроётган Андижонга келади. Халил Султонни Сирдарёга чўқтирадилар. Султон Саидхон қочиб, Кобулга боради. У Мухаммад Ҳайдар Мирзодан бироз илгарироқ Кобулга келган эди. Бу иккови Кобулда жуда қадрдонлашиб қолади.

Шоҳ Исмоил Сафавий Марв шаҳрида Шайбонийни мағлуб этади, Шайбонийхоннинг ўзи жангда ҳалок бўлади. Бобур Кундуз шаҳрига келганида Андижонда Саид Мухаммад шайбонийларни шаҳардан қувиб, Бобурни подшоҳликка чорлаб, элчи жўнатади. Бобур Султон Саидхонга ўз навкарларини бериб, уни Андижонга хон қилиб юборади. Бобурнинг шайбонийларга қарши жангига Мухаммад Ҳайдар Мирзо ҳам ёнида бўлади. Бобур Самарқандни учинчи маротаба эгаллайди. Бироқ унинг шиа мазҳабидаги шоҳ Исмоил Сафавий билан ҳамкорлиги Самарқанд ҳалкига ёқмайди. Кўп ўтмай Бобур Кўли Малик жангига мағлубиятга учрайди. Султон Саидхон Бобурдан Мирзо Ҳайдарни Андижонга юборишни илтимос қилиб мактуб йўллайди. Бобур бунга рўйхушлик бермай, Мирзо Ҳайдарни Ҳисорга олиб кетади. Яна Султон Саидхондан мактуб – илтимоснома келади.

Гап шундаки, Убайдулло Султон Туркистонга қочганида Ҳабиба Султон Ҳониш қаровсиз қолган ва Самарқандга элчиликка келган Саид Мухаммад уни Андижонга олиб бориб, Султон Саидхонга никоҳлаб берган эди. Демак, бу Мухаммад Ҳайдарнинг ҳам поччаси, ҳам опасининг илтимослари эди. Мухаммад Ҳайдарнинг ўзи ҳам илтимос қилгач, Бобур ноилож уни ўз туғилиб ўсган шахри Андижонга жўнатиб юборади.

Мухаммад Ҳайдар Султон Саидхон тарбиясида камолга етди. Хон ўзининг кенжа синглиси Мухиб Султонни Мирзо Ҳайдарга узатиб, кўрагонлик мартабаси

билин сийлади. У айнан Андижонда давлат арбоби сифатида шаклланди. 24 йил мобайнида Султон Саидхон давлатининг таянчи – вазир ва ҳарбий қўмондон бўлиб, Тибет қалъалари ва Кашмир вилоятини фатҳ этди. У ҳали ҳарбий сафарда эканида Султон Саидхон вафот этиб, таҳт эгаси – Абдурашидхон олчок бек Али Тоғай куткуси билан Саид Муҳаммад ва унинг икки ўғлини катл эттиради. Муҳаммад Ҳайдар бундан хавфсираб, Помир орқали Бадахшонга – Қалъаи Зафарга, сўнг Ҳиндистонга – Лоҳур ва Агра шаҳарларига бориб, Ҳумоюн ва Комрон Мирзолар даргоҳида етти йил хизмат қиласиди.

Ҳумоюн Мирзо Шерхон Сурдан енгилгач, Муҳаммад Ҳайдар Ҳумоюн Мирзодан 450 отлик аскар олиб, Кашмирни иккинчи маротаба фатҳ этади ва бу ўлкани Тибетнинг Ражаори мавзеси ҳисобига кенгайтириб, Кашмирда салкам ўн бир йил подшоҳлик қиласиди.

Муҳаммад Ҳайдар Мирзо 1551 йили маҳаллий исённи бостириш чоғида ўз танқўрикчисининг тасодифан отган ўқидан ҳалок бўлади.

Бобур Мирзо ва темурийлар тарихини ўрганишда Муҳаммад Ҳайдар Мирзо ва унинг илмий мероси ҳар томонлама муҳим аҳамиятга эга эканини инобатга олиб, ушбу мавзуда тегишли илмий изланишлар олиб бориш бизнинг асосий вазифаларимиздан бўлмоғи лозим.

2010 йил

БОБУРНИНГ ТОШБИТИКЛАРИ

Бобур номидаги халқаро жамғарма илмий экспедициясининг навбатдаги сафаридан кўзланган мақсад «Бобурнома» ва «Тарихи Рашидий» асарларида қайд этилган воқеа-ҳодисалар содир бўлган манзиллар бўйлаб юриш, янги ашёвий ва илмий-адабий манбаларни топиш, йиғиш, ушбу икки йирик асар муаллифлари қадамжоларини видео ва фотолавҳаларга олишдан иборат эди.

Ўз вақтида Мовароуннахр шайбонийлар қўлига ўтгач, ноилож қолган Бобур 1503 йили она юртидан кўнгил узиб, отаси Умаршайх Мирзонинг суннат тўйида бобоси Абу Саид Мирзо унга ҳадя қилган Кобулга караб йўл олади ва 1504 йили уни забт этишга муваффак бўлади. Илмий экспедиция аъзоларини шу тафсилотлар қизиктирарди.

Сафаримизнинг дастлабки марраси қўшни Новқат шаҳри бўлди. Чап томонда Ўш. «Бобурнома»да табиати, хуш ҳавоси, гул-чечаклари мақталган шаҳар. Ундаги Барокўҳ тоги ва Бобур курдирган хужра беихтиёр кўз олдимиизга келади.

Ушбу иморат 1960 йилгacha яхши сақланган, бироқ «хурофот маскани» сифатида шўро амалдорлари кўрсатмаси билан бузиб юборилган эди. Не баҳтки, Бобурни чин дилдан севган ўшликлар Бобур хужрасини янада кўркамроқ қилиб қайта бунёд этибдилар...

Буюк бобомиз изидан юриб, Ўш, Аравон, Қизилқия, Учқўрғон, Сўх ва Хушёр, Ворух ва Даҳкат қишлоқларига етиб бордик. Бу қишлоқлар оддий қадамжолар эмас, бу ерларда Бобур ва унинг яқинлари бир йилга яқин яшаган. Бу ерда – Сўхнинг Тул қишлоғидаги тоғда ўша машхур кўзгутош – Санги Ойина бор!

Хушёр қишлоғининг «Бобурнома»даги тасвирини кўз олдимизга келтирамиз: «Исфарадан бир шаръий (2,4 километр) масофада жануб томонида тогликлар орасида бир йирик тош бор. Уни «Санги ойина» дейдилар. Узунлиги тахминан ўн қари (7 метр) келади. Баландлиги баъзи ери одам бўйича, баъзи ери пастлиги киши белигача бўлиб, ойнадек ҳар нима акс этади».

Бу жойлардан ўтиб борар эканмиз, Тул қишлоғи ёнидаги кўхна тогларга кўзимиз тушади. Йўл бошловчиларимиз «Санги ойина» мана шу тоғда эканлиги, Бобур Мирзонинг шу ерда бўлганлигини яхши билишар экан. «Санги ойина» шу тоғ тепасида эди. Уни кўришга мұяссар бўлдик. Бобомиз тоғ ёнбағридаги булоқ атрофида дам олиб, ҳордик чиқарган. Биз ҳам шу булоқдан тўйиб-тўйиб сув ичдик.

Тожикистоннинг Гончи туманида истиқомат қилувчи Абдулла Қаюмов Ўзбекистон радиосида Бобур қадамжолари хақида гапиргандарини эслаб, у кишини ахтариб топдик. Уловда Даҳкат қишлоғининг тепа қисми билан юриб, Бобурчак деган табиати ғоят гўзал жойга бордик. Бу жойни Бобур бурчаги деб аташар экан. Бобур шу жойда яшаган пайтда тепага соқчи-кузатувчи қўйилган, шунинг учун бу жой Қоровултепа ҳам дейилади.

Тоғ ёнбағридаги булоқнинг лабига Бобуршоҳ бир туп зирк дарахти ўтқазган. Уни зирки Бобур дер эканлар. Овчи дарёси бўйлаб юриб, Бобур тоғига дуч

келдик. Дарё кирғоғидаги йўл бўйида, хиёл тепароқда катта супасимон, усти силлик тошга кўзимиз тушди. Шу ерлик кишиларнинг айтишича, Бобуршоҳ мана шу тош устида намоз ўқиган экан. Ҳозирга қадар сақланиб келаётган ушбу тошни аҳоли «Тахти Бобур» деб аташи барчамизни хурсанд қилди.

Дарёning Танги дарвозасидан ўтиб Овчи қишлоғига бордик. Қишлоқ одамлари Мирзо Бобур хақида ҳикоятлар сўзлаб беришди. Айтишларича, Бобуршоҳнинг Ҳисорга ўтиб кетаётганидан хабар топган овчиликлар унга катта иззат-икром кўрсатишади ва Оббурдон довонигача кузатиб қўйишади. Овчи ва Ҳушёр қишлоғидан бир қанча йигитлар Бобур Мирзо хизматига ўтиб, Кобулга бирга кетишади.

Овчи дарёсининг ўнг ирмоғи Оббурдон довони дарасидан, тўғридан оқаётган ирмоқ эса Фалғар довони дарасидан бошланади. Бобур Оббурдон довонига ирмоқ бўйлаб чиқиб кетган.

Об-ҳаво ноқулайлиги боис машинада довондан ўта олмай бошқа йўл билан Ўратепа, Айний орқали сафарни давом эттиришни лозим топдик...

Шайбонийхон Марвда Исломи Сафавийдан енгилганидан сўнг 1510 йилларда Мирзо Бобур Мовароуннаҳрни ўз тасарруфига қайтариш хақида ўйлаб, Султон Сайдхонни Андижонга хон қилиб юборади. Андижон кўргонини янада мустаҳкамлаш мақсадида ўзига яхши таниш ва қулай бўлган тог йўллари, яъни Ҳисор-Масҷо-Ўратепа орқали келиб, 1512 йилда Самарқандни учинчи маротаба олишга мұяссар бўлади. Бобурнинг Афғонистон, Ҳисор, Зарафшон, Туркистон тоғ тизмалари орқали Самарқандга кириб келишини, албатта душманлари кутмаган эди. Аммо сон жиҳатидан устун бўлган шайбонийлар 1513 йилда Бобурни

Самарқанддан Кобулга, Султон Саидхон билан Мирзо Ҳайдарни Андижондан Қошғар томонга чиқиб кетишга мажбур килишади. Демак, Оббурдон қишлоғидаги тошбитиклардан бирининг ёзилиш вақти 1511–1512 йиллар – Бобур Самарқандни учинчи маротаба олган вақтга тўғри келади.

Сафар давомида Хўжанд шаҳрида ҳам тўхтаб ўтдик. Бобур Самарқандга юришида бу шаҳарда қайта-қайта бўлган, ҳатто бир ярим йил яшаган ҳам. У илк маротаба Хўжандда – Ойиша Султонбегимга уйланган. Ҳайдар Мирзо «Тарихи Рашидий»да бу шаҳар ҳакида маълумот берар экан, йўл-йўлакай неча марта бу ерда бўлгани, Шайбонийхоннинг буйруғи билан Тошкент хукмдори Султон Маҳмудхон 1509 йилда беш фарзанди билан ушбу жойда катл этилиб, Шайх Муслиҳиддин қабристонига қўйилгани хусусида ёzáди.

«Бобурнома»да Хўжанд шаҳри, Мутуғул (Мўғул) тоги ва Сирдарё (Хўжанд суйи) ҳакида жуда батафсил, муҳим маълумотлар берилган. Бобур шаҳар қўргони билан дарё оралиғи бир ўқ отими масофада эканини қайд этган. Биз дарё соҳилида туриб, қалъа, дарё ва тогни қузатар эканмиз, Бобурнинг олимона заковатига тан бердик. Ҳозир қалъа дарвозаси қайта таъмирланиб, ўлкашунослик музейига айлантирилган. Биз музей экспонатлари билан танишдик, Хўжанд университети ўзбек филологияси факультети олимларига янги китобларимиздан тортиқ қилдик.

Истаравшан йўлидан ўнгга бурилиб, Куркат қишлоғи шимолига қараб юрсангиз, Бобур қадамжоларидан бири – Ҳаштияқ қишлоғига борасиз. Бу қишлоқ Бекобод шаҳрига туташ. Бобур Шайбонийни таъқиб этиб бораётib, Ҳаштияқда суви музлаб ётган ариқда

чўмилган. Бу ҳакда «Бобурнома»да: «Менда ғуслга эҳтиёж бор эди. Ўн олти маротаба сувга шўнғидим», деб ёзади.

Сафаримизнинг навбатдаги манзили Ўратепа (Истаравшан) ва унинг теварак-атрофидаги қишлоклар бўлди. Бобур ушбу шаҳар ва унинг теварагидаги қишлоқларда ойлаб яшаган. Мухаммад Ҳайдар Мирзо Ўратепада униб-ўсган. Чунки отаси Мухаммад Ҳусайн Мирзо Тошкент хонининг фармони билан Ўратепада тўқиз йил (1492–1501) ҳокимлик қилган. «Тарихи Рашидий»да Мухаммад Ҳайдар уларнинг Бобур Мирзо оиласида азиз меҳмон бўлганини фаҳр билан эслайди. Ўратепада XV–XVI асрларда курилган Кўкгумбаз масжиди ва нақшинкор синчли бинолар сақланган.

Бу манзилдан Шахристон довони томон йўл олдик. Баланд довондан ошиб ўтиб, кечқурун Айний (собиқ Варзиманор – Фалгар)га етиб келиб, меҳмонхонада тунадик. Эрта сахар Анзоб довонига караб юрган эдик, йўлимиз икки томонга айрилди. Зарафшон дарёсига курилган кўприкдан ўтиб, шарқ томонга – дарё бўйлаб кетсангиз, Масчо, Оббурдон қишлоқларига борасиз. Бобур 1501–1502 ва 1511–1512 йилларда бир неча маротаба шу жойларда яшаган ва ўз дастхатини қоятошу қабртошларда қолдирган. «Бобурнома»да бу хусусда батафсил маълумот зикр этилган.

«Масчонинг пастки кенти Оббурдондир. Оббурдондан куйироқда бир чашма бўлиб, бу чашмадан юқориси Масчога қарашли. Куйиси Палгарга тааллуклидир. Ушбу чашма бошида, унинг ёқасидаги тошга бу уч байтни ўйиб ёздиридим:

Шунидамки, Жамшеди фарруҳсиришт,
Ба сарчашмас бар санге навишт:

«Бар ин чашма чун мо басе дам заданд,
Бирафтанд то чашм барҳам заданд.
Гирифтем олам бо мардиву зўр,
Ва лекин набурдем бо худ ба гўр».

Мазмуни:

Эшитганим борки, Жамшиддек номдор
Бошибулоқ тошига ёздириди ёдгор:
«Бу булоқ бошига кўплар етдилар,
Кўз юмиб очгунча йитиб кетдилар.
Мардлигу зўрлик-ла оламни олдик,
Лекин қабристонга куруқ йўл солдик».

Бу тоғли масканда тошга байт ва сўзларни ўйиб битиш одатдир» («Бобурнома», «Ўқитувчи», 2008 йил, 86-б.).

Экспедиция аъзолари ушбу тошни излаб, Озахак ва Шуроҳ булоқларини бориб кўрдик. Шу ерлик кишилар Саъдий Шерозий байтлари битилган ўша машхур «Бобур тоши»ни тожикистонлик олимлар, жумладан, академик Аҳрор Мухторов бир неча бошқа тошлар билан Душанбега олиб кетганини айтишди. Дарҳақиқат, ўша сип-силлик қорамтири тош ёзувлари жуда яхши сақланган ҳолда, Душанбедаги тарих музейида кўргазмага кўйилган. Биз уни бориб кўрдик. Тарихчи Со-бир Зикирзода «Бобур тоши» номи билан машхур ёзувли тошнинг Душанбе шаҳрига келтирилиши хақида «Ҳисор тарихи» китобининг сўнгсўзида яхши маълумот берган экан. Ўша китобни Ҳисор музейи директори Абдуғани aka орқали қўлга киритишга муюссар бўлдик.

Музейдаги тошбитикларга назари тушган машхур тарихчи олим А.А.Семёнов «Бобур тоши жаҳоннинг энг машхур музейлари зийнати бўла олади», деган экан.

Иншооллоҳ, ушбу тошбитикнинг нусхаси яқин вакт ичида Андижондаги қадимий шаҳарсозлик маданияти музейига ҳам қўйилса, ажаб эмас.

Шамтич қишлоғидан Ҳожи Умарқул исмли киши тошбитиклар ҳақида яхши маълумотга эга, деган хабар олдик. У киши бизни «Дуруст» қабристонига бошлади ва Бобур номи билан алокадор тошбитикларни кўрсатди. Дарё кирғоғидаги тошлардаги ёзувларни bemalol ўкиш мумкин. Бу қабристонда биз ўрганганд байтларни музейга кўчириб олиб кетилмагани сабаби бор: улар кўчирилса, матнлар тошлар билан бирга парчаланиб кетади. Экспедиция аъзолари улкан қора тошларга чўккалаб, битикларни хижжалаб ўқий бошладик, ёзувларни фото ва видеолавҳага олдик. Энг катта қоятошдаги матн куйидагича:

«Фи айёми салтанати султон Бобур халлада мулкаҳу. 907».

(*Таржимаси*: «Бобур ҳукмронлиги кунлари. Аллоҳ унинг шоҳлигини абадийлаштирсин»).

Шу матн остига куйидаги байт ўйиб ёзилган:

«Кофиро, мардумшикоро, як замон оҳистатар.
К-оҳуи бечораро ба тири туркон тоб нест.
Катабаи мирам Бобур халладалоҳ мулкаҳу султонаҳу. 907».

(*Мазмуни*: «Эй кофир, эй одам овчиси, бир лаҳза шошма, Шўрлик кийик турклар ўқига дош беролмайди»).

Амирим Бобурнинг катабаси-тошбитиги. Аллоҳ унинг мулки ва салтанатини боқий этсин».

Тошда битилган санага кўра, Бобур 1502 ва 1512 йилларда қочкин эмас, ҳукмдор сифатида бу қишлоқларда меҳмон бўлиб вакт ўтказган. Битикларни тошга муҳрлаганлар кўпинча Бобурнинг ўз мулоғимлари, гоҳо маҳаллий тошийўнарлар бўлишган. Тошга ёзишга ҳавасманд бўлган Бобурнинг ўзи ҳам бўш вактларида ёзган. Ўша юкоридаги ёзув «Амирим Бобурнинг катабаси-тошбитиги» деган қайд бу мулоҳазамизни исботлаб турибди.

Қишлоқ аҳли бу байтларни ёддан билади. Ҳожи Умаркул отанинг ширали овозини тинглаб, ушбу таъсирчан байтнинг рамзий маъноларини мушоҳада этишга ҳаракат килдик.

Оббурдон довонидан яна Айний (Фалгар)га келиб, таниш меҳмонхонада тунадик. Эртаси куни аzonда Анзоб довонига қараб йўл олдик. Тогда йўллар йўналишини дарё ва сойлар белгилайди. Биз Душанбега элтадиган довонга қараб бораяпмиз. Йўлда хитойлик йўлсозлар таъмирлаш ишларини олиб бораётгани сабабли 3–5 километр масофани Зарафшон дарёсининг шўх ирмоғи ичида босиб ўтдик. Тепаликка ўрлаганимиз сари булутларга ёндашардик. Тог чўққилари ёнбағридаги йўлга кеча шивалаб ўтган ёмғир қор бўлиб тушгани, қор кўчкилари 100 метрлар пастда музлаб ётганини кўриб, табиат мўъжизаларидан ҳайратга тушардик.

Душанбега кириб келганимизда кош қорая бошлиган эди. Фурсатни ғанимат билиб, Ҳисорга жўнадик. Бобур Масчодан Ҳисорга келганини шундай ҳикоя килади: «Мухаррам ойида Фарғона вилоятидан Хурсонга бориш ниятида Ҳисор вилояти яйловларидан бўлган Илок яйловига келиб тушдим. Ушбу юртда йигирма уч ёшнинг ибтидосида юзимга устара

теккиздим... Илоқдан уч-тўрт кўчиш билан Хожа Имод деган ерга келиб тўхтадик...»

Султон Маҳмуд Мирзо ва унинг ўғиллари Бойсунғур Мирзо ва Масъуд Мирзолар мулки бўлган Ҳисорни ўша пайтда Ҳисравшоҳ исмли бек бошқаарди. Бобур бетамиз, ахлоқсиз Ҳисравшоҳнинг тубан қилиqlари туфайли Ҳисор ахлида бузукчилик ва ичқиликбозлик кучайганини қайд этади: йигирма минг кишилик лашкари Бобур томонга ўтиб кетгач, у уялмай-нетмай, юкуниб келади. Ҳисравшоҳ билан сұхбатлашиб, Бобур у ҳакида ёзадики: «Номардлик ва ҳаромхўрликдан ташкари, у бефаросат ва bemaza вайсақи ҳам экан».

Сафар йўлимиз Кўлобга бурилди. Бу ерда Мир Саид Али Ҳамадонийнинг қабр-мақбараларини зиёрат қилдик. Бу азиз зотга Бобурнинг меҳри ўзгача эди.

Кўлобдан Хоруғ томон йўлга тушдик. Шовуллаб оқаётган Панж дарёси бўйлаб узоқ юрдик ва ниҳоят Хоруғ шаҳрига кириб бордик. Меҳмонхонада бир оз тин олиб, Хоруг давлат университетига ўтдик. Университетнинг тарих факультетида, сўнгра меҳмонхона номерида Хоруғ давлат университети олимлари профессор Н.Офаридаев ва мозийшунослар М.Алимшоев, Ю.Шодмонбеков, А.Шоҳинбековлар билан қизгин сұхбат уюштирилди.

Бадахшонлик олимлар темурийлар ва бобурийлар тарихидан яхши хабардор экан. Уларнинг қуйидаги фикрлари биз учун янгилик бўлди:

– Бобурийлар Бадахшон ҳукмронлигини кўлга киритгач, бадахшонликлар Буюк Ипак йўлига чиқишига муваффақ бўлдилар. Қўшни давлатлар билан маданий алоқа, савдо-сотиқ ишлари ривожланди. Талабаларимиз орасида Бобурхон, Шоҳруҳ Мирзо, Бобур Саид

каби исмлар борлиги ҳам ҳалқимиз темурийлар ва бобурийларни унутмай келаётгани ва қадрлашининг далилидир. Бадахшон ўлкасидаги Ишкошим ва Султон Ишкошим оралиғидаги чўққининг Ҳумоюн чўққиси («Қуллаи Ҳумоюн») деб аталиши ҳам ушбу фикримизни исботлаб турибди.

Хоруғдан Бадахшоннинг Афғонистон томонига ўтмоқ максадида йўлга чиқдик. Бироқ машинамизнинг олд ғилдираклари яхши тортмади. Довонга чиқолмаслигимизга кўзимиз етиб, яна Хоруғга қайтдик. Ишкошимдан Файзободгача бўлган йўл хориж давлатлари ёрдамида яхши таъмирланганини чегарачилардан эшитиб, Помир тоғлари бўйлаб Ишкошимга қараб кетдик.

...Чегара ҳудудидан Афғонистонга ўтиб, Султон Ишкошимда Қуллаи Ҳумоюн – Ҳумоюн чўққисини томоша қилдик. Сўнг Файзобод томон йўлга тушдик. Узок юрдик. Тоғ йўллари бўйлаб борар эканмиз, Юмғон кишлогида азиз қадамжолардан бирига дуч келдик. Асли қабодиёнлик бўлган, ўз даврининг машҳур шоири, аллома Носир Ҳисрав қадамжоларини зиёрат қилдик. Ҳалқимиз унинг «Сафарнома» китобини тарихчи Ғулом Карим таржимасида ўқишига муяссар бўлганини эсладик.

Эрталаб барвакт йўлга тушиб, икки соатлар чамаси дарё оқими бўйлаб юриб, Файзободга етиб келдик. Бадахшоннинг бу кисми Афғонистоннинг энг чекка ҳудуди бўлгани учун ободончилик нисбатан камроқ.

Шаҳарнинг номи Бобур ва Ҳумоюн замонида Жавзун бўлган. XVI асрда Бадахшоннинг пойтахт шаҳри Қалъаи Зафар эди. Бу ерда Захириддин Мухаммад Бобур ва унинг укаси Носир Мирзо, ўғиллари Ҳумоюн Мирзо, Ҳиндол Мирзо, жияни Султон Аҳмадхоннинг ўғли Султон Сайдхон, холаваччаси Мухаммад Ҳайдар

Мирзо ва бошқалар кўп марта бўлишган, яшашган, хукмфармолик қилишган.

Бадаҳшон халқи тарихидаги муҳим маълумотлардан яна бири шуки, Ҳумоюн Мирзо Бадаҳшонда ҳукмрон бўлган йиллари Фарғона водийси, Андижондан, Марғилон ва Қува атрофларидан кўп ўзбек оиласлари бу ерга кўчиб келишган. Биз аҳоли, хусусан, зиёлилар, Бадаҳшон волийси билан сұхбатлашганимизда шу маълумотларга эга бўлдик. Эртаси куни кўплаб ўзбек зиёлиларининг меҳмонхонага келиши биз учун кутилмаган воқеа бўлди.

Муҳаммад Ҳайдар Мирзо «Тарихи Рашидий»да Бадаҳшоннинг 1510–1530 йиллардаги ҳудудий-сиёсий вазиятини жуда муфассал кўрсатган.

Биз вилоят маърифат ва маданият ишларининг масъул ходими Абдумаъруф Росих ёрдамида вилоят волийси Ғози Маҳмуд Аҳмад қабулида бўлдик. Табиб ва шоир Кескин билан танишдик, унинг хонадонида меҳмон бўлдик. Кескин Тошкентда тиббиёт олийгоҳида таҳсил олган шифокор.

Росих жаноблари бизни вилоят маданият марказига ҳам олиб борди. У ерда марказ раҳбари, шоирлар ва мухбирлар билан самимий мулоқотлар уюштирилди. Улар бобурийларни Бадаҳшон ҳукмдорлари сифатида ҳурмат қилиши, бобурийлар Бадаҳшонга маърифат тарқатгани хусусида мароқ билан сўзладилар. Биз экспедициямизнинг мақсади, мустақиллик туфайли Ўзбекистонда юз берган ўзгаришлар ҳақида гапириб бердик. Буюк аждодларимизнинг Афғонистон ҳудудидаги қабр-мақбараларини тиклаш, ободонлаштириш каби хайрли ишларни амалга ошириш ҳақида фикрлашдик. Ўз навбатида, улардан Бобурнинг биз излаётган «Ҳарб иш» ва «Асрори мусикий» асарлари ҳамда «Бобурнома»

кўлёзмаларини аҳолидан суриштириб топишга кўмаклашишларини илтимос қилдик.

Сафаримиз давомида топилган манбаларнинг энг қимматлиси шу бўлдики, олинган маълумотларга кўра, Муҳаммад Ҳайдар Мирзо 1529-1530 йилларда Бадахшонда бўлган пайтлари «Жаҳоннома» достонини эски ўзбек тилида ёзиб тугатган экан. У Аёз тахаллуси билан ижод қилган. Интернетдан олинган маълумотларга қараганда, «Жаҳоннома»нинг кўлёзма нусхаси Берлин университети кутубхонаси ва Урумчи Жамоа академиясининг кўлёзмалар бўлимида сакланмоқда.

Маълумки, «Бобурнома»да 1510–1519 йилларда содир бўлган воқеаларнинг тафсилоти мавжуд эмас. Шу 9 йил (жами 18 йиллик воқеалар баёни йўқ) мобайнида Бобур Мирзо ўз қаламравидаги худудларни кенгайтириб, маданий алокаларни йўлга кўйган бўлиши керак. У «Бобурнома»да Табриз, Ўш, Косон ва Кобул шаҳарларининг об-ҳавоси мўътадил, ёқимли эканини ёзади...

Шунингдек, «Бобурнома»да Берунийдек буюк олим Афғонистоннинг Ғазна шаҳрида яшаб, Ҳиндистонга саёҳат килиб, «Ҳиндистон» ва бошқа машҳур асарларни ёзгани ҳакида ҳам ҳеч нарса айтилмаган. Бобур Беруний ҳакида ўз муносабатини ҳозирча топилмаган саҳифаларда билдирган бўлса, ажаб эмас.

Бобуршоҳ 1511-1512 йилларда Афғонистондан Ҳисор–Олой тоғ тизмалари орқали Фалғар–Масчо–Оббурдон қишлоқларида тўхтаб, водийга, Зарафшон воҳасига учинчи марта келиб, Самарқандни олиши ҳам «Бобурнома»да ёзилмаган.

Лакхнау шаҳридаги машҳур «Худобахш» кутубхонасида сакланаётган миниатюрада «Бобурнинг

Кошғарни қамал қилиши» номли сурат бор. Бироқ, «Бобурнома»да Табриз об-хавоси таърифланганига қарамай, Бобурнинг на Эронга – Табризга боргани ва на Шаркий Туркистанда Кошғарни қамал қилгани ҳақида маълумот йўқ. Ушбу воқеалар бу комусий асарнинг йўқолган қисмida (18 йиллик воқеалар) бўлса, эҳтимол.

Мирзо Бобур мусиқани яхши тушунгани, «Чоргоҳ» куйини басталагани ва бу куйни ўзи ижро этганини ҳам «Бобурнома»да ёзади. Демак, бугунги тадқиқотчи-бобуршунослар учун «Бобурнома»нинг йўқолган қисмлари, «Мусиқа сирлари» ва «Ҳарб иши» асарларини излаб топиш, илмий истеъмолга киритиш долзарб вазифа бўлиб қолмоқда.

...Тахор вилояти томон йўлга тушдик. Бадахшон волийси бизга қози Салимуллоҳ Холиқийни йўл кўрсатувчи қилиб берди. Қоронғи тушганда вилоятнинг Кишим шаҳрига етиб келдик. Шинамгина ошхонада афғон палови ва товук гўштидан тановул қилиб, биз учун ушбу вазиятда қулайроқ бўлган ҳарбий казармада тунадик.

Эртаси куни Тахор волийси – ҳокими жаноб Абдуллатиф билан учрашдик. У ўзбек киши экан. Боборахим Машрабнинг noctorgina мақбараси шу вилоятга қарашли Ишқамиш шаҳрида. Машраб қабр-мақбарасини ободонлаштириш ҳақида маслаҳатлашиб олдик.

Файзободдан Тахор ва Тахордан Мозори шарифгача бўлган йўл кафтдек текис. Бирин-кетин Қундуз шаҳри, Боғлон, Пули Хумри, Самангон, Айбак, Работак, Тошқўргон ортимизда қолди. Ниҳоят, Мозори шарифга кириб бордик. Шаҳар зиёлилари – асосан ўзбеклар бизни шаҳар дарвозасидаёқ кутиб олишди ва «Самир Волид» меҳмонхонасида учрашув уюштирилар.

Мезбонларга Фондимиз фаолияти ҳақида, сафаримиз мақсади хусусида муфассал маълумот бериб, кейинги йилларда чоп қилинган илмий-адабий нашрлардан юзга яқин китобни Мозори шарифдаги Навоий ва Бобур анжуманига тортиқ этдик. Бу китоблар орасида «Бобурнома»нинг асл туркий тилдаги 2002 йилги нашри, асарнинг 2008 йили ҳозирги ўзбек адабий тилига қилинган табдили, Бобурнииг «Гарибинг андижонийдир» девони, Комрон Мирзо «Девон»ининг ўзбек ва араб ёзувидаги илмий матни, Шафиқа Ёркин тайёрлаган «Бобур девонига такмила» китоби, Румер Годеннинг «Гулбадан» романи, Ғафуржон Сотимовнинг «Марказий Осиё ва Ҳиндистон тарихида бобурийлар даври» монографияси, Қамар Раиснинг «Бобурнинг ҳаёти ва шеърияти» рисолалари бор эди.

Мезбонлар номидан Навоий ва Бобур анжумани раиси Абдулла Рўйин нутқ сўзлаб, Алишер Навоий асарларидан тўрт китобни, Гулханийнинг «Зарбулмасал» асарининг Мозори шариф нашрини, Улугбек анжумани раиси Пухниёр Ҳидоятулло Ҳидоят «Бобурнома»нинг мукаммал Мозори шариф (2008) нусхасини тортиқ қилди.

Китоб дўконларидан Мұхаммад Ҳайдар Мирзонинг «Тарихи Рашидий» асарининг 2004 йилги Техрон нашрини топишимиз экспедиция аъзолари учун қувончли воеа бўлди. Айниқса, Фондимиз буюртмасига биноан бу асарни ўзбек тилига таржима қилган сафардошимиз Ваҳоб Раҳмоннинг хурсандчилиги ичига сиғмасди, чунки ушбу нашрнинг савияси юқори ҳисобланар экан...

Сафар давомидаги йиғилиш ва учрашувларимиз, зиёратгохларни, шунингдек, бобурийларга тааллукли нимани кўрган бўлсак, ҳаммасини видео ва фото лавҳаларга туширишга харакат қилдик. Коргарнинг

«Темуриён» («Темурийлар») китобининг Техрон нашрини файзбодликлар бизга тухфа қилишди. Ушбу йирик китобда темурийлар ва бобурийларнинг ҳаёти ва фаолияти тўкис қамраб олинган.

Биз Ҳирот шаҳрини ҳам зиёрат қилишни кўзлаган эдик. Аммо ички вазият боис бу орзуни бироз кечиктиришга тўғри келди. Ҳайратон орқали Ватанга қайтдик.

Ҳар қалай, йигирма кунлик сафаримиз давомида Бобур ва бобурийлар, Ҳайдар Мирзога тегишли анчамунча ашёвий далиллар ва илмий-адабий маълумотлар тўплашга муваффақ бўлдик. Уларни мавриди билан илмий истеъмолга киритиб, оммалаштириш ниятидамиз. Ушбу сафар якуни бўйича Тошкент, Фарғона ва Андижон шаҳарларида бобуршунос олимлар, ёзувчишоирлар, журналистлар, вилоят фаоллари иштирокида учрашувлар ўтказдик. Навбатдаги вазифалардан бири «Бобур комуси» яратилишини тезлаштириш ва Муҳаммад Ҳайдар Мирзонинг «Тарихи Рашидий» асарини Фондимиз ҳомийлигига ўзбек тилида чоп этишдан иборат.

*«Ўзбекистон адабиёти ва санъати» газетаси,
2010 йил 8 январь*

ҚАДИМИЙ АНДИЖОН

ёхуд Фаргона водийсида шаҳарсозлик маданиятиниң илк босқичлари

Андижон тупроғида неча асрлик маданият ва тараққиёт намуналарини ўз бағрида асраб келаётган Далварзинтепа ва Эйлатон, Мингтепа ва Шўрабашот каби тарихий жойлар, кўхна ёдгорликларнинг борлиги бу заминнинг юртимиздаги қадимий цивилизация бешикларидан бири бўлганини эслатади.

Ислом Каримов

Маълумки, мустакиллик йилларида мамлакатимизда ўтмишимизга муносабат тубдан ўзгарди. Қадимий шаҳарлар, тарихий-маданий ёдгорликларимизнинг пайдо бўлиши ва ривожланиши билан боғлиқ масалаларни ўрганишга эътибор кучайди. Айнан шу даврда Бухоро, Хива, Термиз, Шаҳрисабз, Самарқанд ва Марғилон шаҳарларининг юбилей тантаналари кенг нишонланди. Ҳозирги кунда Андижон, Наманган, Қўқон каби шаҳарларнинг ёшини аниқлаш борасида археологик қазув ишлари олиб борилмоқда. Кейинги пайтларда қадимий Бактрия ва Сўғдиёна ўлкаларида ва кўхна Хоразмда илк шаҳарсозлик маданиятининг пайдо бўлиши масалалари қадимшунос олимлар томонидан чукур ўрганилмоқда. Юртимизда шаҳарсозлик тарихининг уч минг йилдан ошиши Сурхондарё вилоятидаги Жарқутон ёдгорлиги мисолида исботини топди. Шу

муносабат билан кўпчиликда давлатимизнинг яна бир тарихий-маданий ўлкаси Фаргона водийсида илк шаҳарлар қачон ва қай тарзда пайдо бўлган, бу борада қандай илмий изланишлар амалга оширилмоқда, деган саволлар пайдо бўлиши табиий...

Фаргона водийсида қадимий ва навқирон, ёш шаҳарлар кўп. Улар ўзига хос ижтимоий-иктисодий, маданий марказлар сифатида Ўрта Осиё шаҳарсозлик маданиятида ўз ўринларига эга.

Археологик далилларга кўра, шаҳарсозликнинг илк белгилари водийнинг энг қадимги дехқончилик ёдгорликларида намоён бўлади. Ҳозир водийда ана шу ёдгорликларнинг саксондан ортиғи аниқланган. Улар водийнинг асосан шарқий ҳудудларида жойлашган. Қолаверса, айнан ушбу ҳудудда майдони катта, маданий қатламлари қалин археологик обидалар кўплаб қайд этилган. Бунинг асосий сабаби унумдор ер, мўътадил иқлим ва сув манбаларининг етарлилигидир.

Демак, қадимги аждодларимиз учун дехқончилик қилишга энг кулай ҳудуд Қорадарё ва унинг ирмоклари (Куршоб ва Яssi) хавзаси бўлиб, то Сирдарёning бошланиш нуктасигача давом этган.

Бу ҳудудда милоддан аввалги II минг йилликнинг охирги чорагидан то ўрта асрларгача бўлган тарихий даврга тааллукли йирик шаҳарлар қолдиклари аниқланган. Булардан энг қадимгиси Қорадарёning ўнг қирғоғида, Андижон вилоятининг Жалакудук тумани Ойим қишлоғи яқинида жойлашган Далварзин ёдгорлигидир.

Олиб борилган археологик илмий текширишлар шуни кўрсатадики, қатламлар қалинлиги 5 метргача боради, аждодларимиз уни уч қисмдан иборат қилиб бунёд этган. Далварзиндаги энг қадимги қатлам

ва топилмалар милоддан аввалги XII асрга тўғри келса, сўнгилари милоддан аввалги VII аср билан белгиланган.

Бу ерда узоқ йиллар археологик текшириш ўтказган профессор Ю.А.Заднепровский маълумотларига кўра, ёдгорликдаги ўн саккиз гектар майдон одамларнинг асосий яшаш жойи, беш гектари чорва молларини саклайдиган қисм ҳисобланган. Махсус ажратилган икки гектар майдонда эса арк жойлашган. Ҳар бир қисм алоҳида мудофаа деворлари билан химояланган. Далварзин атрофи дастлаб очик бўлган, кейинчалик милоддан аввалги IX–VIII асрларда уч қатор мустаҳкам девор билан ўраб олинган. Бу мудофаа иншоотлари ва арк нафакат водийда, балки бутун Ўрта Осиёда ҳам энг қадимгиларидан ҳисобланади ҳамда ўзининг мукаммаллиги ва мустаҳкамлиги билан ажралиб туради.

Масаланинг қизиқ томони шундаки, Ўрта Осиёда биринчи бор мудофаа иншоотларини тиклашда пахса, ҳом ғишт билан бирга, гуваладан ҳам фойдаланилган. Далварзин деворлари сакланган қисмининг эни тўрт-олти метр, баландлиги икки ярим-уч метр. Шахар дарвозаларидан бири унинг шарқ томонида бўлган, Арк дарвозасининг ўрни ҳозирча аниқланганича йўқ. Далварзин ахолиси дехқончилик, ҳунармандчилик билан шуғулланган. Бу ерда топилган буғдор, арпа, тарик, дуккакли экинларнинг бир неча хили, жез ва тош ўроклар, юзлаб қўл тегирмонлари бунинг далилидир. Ҳунармандчиликнинг эса кулоллик, тўқимачилик, тоштарошлиқ, заргарлик, металл эритиш соҳалари ривожланган.

Археологик қазишмалар натижасида бу ерда ҳунармандчиликнинг милоддан аввалги II минг йиллик

охирларидан алоҳида соҳа сифатида дәхқончиликдан ажралиб чиққанини тасдиқлайдиган кўплаб далилий ашёлар топилган. Айниқса, сопол идишларнинг хушбичимлиги, гулларининг жимжимадорлиги, сифати ҳозир ҳам мутахассисларни ҳайратга солади. Жездан турли хил буюмлар қуийш учун мўлжалланган ва тошдан йўнилган қолиплар металлдан жанговар ва меҳнат куроллари марказлашган ҳолда бозор учун ишлаб чиқарилганини исбот этади.

Демак, Далварзин пухта ўйланган режа билан қурилган йирик ёдгорликдир. Унда шаҳарга хос белгилар кўп. Биринчидан, унинг майдони катта – 25 гектар. Буни ўша даврга мансуб ижтимоий-иктисодий тараққиёт маҳсули, деб ҳисоблаш мумкин. Иккинчидан, ёдгорлик мураккаб тузилган, ўз замонасининг илфор меъморчилик ечимларидан фойдаланилган. Учинчидан, шаҳарсозлик амалиётида муҳим элемент – мукаммал мудофаа тизими бунёд этилган. Шаҳарнинг ҳар бир қисми алоҳида ҳимоя девори билан ўраб олинган. Ҳукмдор қароргоҳи – аркка алоҳида эътибор берилган. Нихоят, Далварзин хунармандчиликнинг кўплаб соҳалари ривож топган марказ ҳам бўлган.

Хуллас, ушбу шаҳар ҳаробаси Фарғона водийсининг 200–300 йил мобайнидаги маданий, хунармандчилик ва маъмурий маркази бўлган, дейиш мумкин. Буларнинг барчаси унинг Ўрта Осиёдаги энг қадимий шаҳарлардан бири эканидан далолат беради. Бинобарин, уни мамлакатимиздаги ёши улуғ шаҳарлардан, қадимги шаҳарсозлик маданияти бешиги, Фарғона водийсининг милоддан аввалги I минг йиллик бошларидағи бошкенти, деб ҳисоблаш мумкин.

Далварзиннинг шаҳар макомида бўлганлиги Ватанимиз ва хорижда танилган археолог тарихчи

олимлар В.Массон, А.Аскаров, А.Сайдуллаевлар томонидан ҳам тан олинган. Далварзин шахрида милоддан аввалги VIII аср охири ва VII аср бошларида, бизга номаълум сабабларга кўра ҳаёт тўхтайди. Юқори маданий қатламларнинг хусусиятларини кузатиш ундан аҳоли уруш-тўполонларсиз, тинч йўл билан бошка жойга кўчганидан далолат бермоқда. Яъни, улар унумдор ерлар илинжида янги маконларга ўрнашган бўлиши керак. Водийда шу даврнинг, яъни милоддан аввалги IX–VIII асрлардаги шаҳармонанд маконларга Чуст (Буонамозор, Наманган вилояти), Ашқолтепа (Андижон вилояти), Дехқонтепа (Ўш вилояти) каби археологик ёдгорликларни киритиш мумкин. Бу ҳудудда шаҳарлашиш жараёни кейинги тарихий даврларда ҳам давом этган.

Далварзиндан бошка яна бир қадимги шаҳар – бу, Андижон вилояти Избоскан туманидаги Эйлатон ёдгорлигидир. Бу ёдгорлик майдони 200 гектар бўлиб, уч қатор мудофаа деворлари билан ўралган. Эйлатон археологик ёдгорлиги нафакат водий, балки бутун Марказий Осиё тарихида ўз ўрнига эга. Чунки, дунё археологиясида биргина маданият Эйлатон номи билан юритилади. Фанда Эйлатон маданияти деганда, водий бир қисмининг милоддан аввалги VI–IV асрлар тарихи ҳамда маданияти тушунилади, бу нарса барча дарслик ва комусий китобларга киритилган.

Афсуски, ўтган асрнинг 40–50-йилларида ёдгорлик бузиб юборилган ва факат мудофаа деворининг айрим бўлаклари бизгача етиб келган, холос. Оқибатда ушбу ёдгорлик археологлар томонидан яхши ўрганилмаган. Қолаверса, Эйлатон даври (бундан 2400–2600 йил олдин) водийда кўпроқ мозор-кўрғонлар орқали яхши ўрганилган. Бу факт айрим тарихчиларнинг водийга

ушбу маданият четдан кириб келган ёки бу ерда шаҳар маданияти бўлмаган ва Фарғонада кўчманчилар маданияти ҳукмрон эди, деган асоссиз даъволари учун хизмат килди. Бундай нотўғри карашларга Андижоннинг Эски шаҳар қисмидаги Сарвонтепа ва унинг атрофидаги археологик топилмалар чек қўйди. Яъни, 2001–2010 йилларда бу ерда олиб борилган археологик илмий қазишмалар Андижон шаҳри остида Эйлатон даврининг қалин қатламлари сақланган катта ёдгорлик борлигини аниқлаб берди.

АНДИЖОН – ДАРЁ СОҲИЛИДАГИ МАНЗИЛ

Юқорида келтирилган далиллардан аён бўладики, Андижон мамлакатимизнинг шаркий нуқтасида, дехқончилик ривожланган ва шаҳарсозлик маданиятининг ўзига хос «Фарғона водийси илк цивилизацияси» маконлари занжирида жойлашган. Чунки ушбу худудда энг қадимги шаҳар харобалари Далварzin, Ашқолтепа, қадимги ва катта шаҳар (Эйлатон–Шаҳри Хайбар), антик даврнинг бир неча ўнлаб шаҳар қолдиклари (қадимги Фарғона – Давань давлати пойтахти Мингтепа – 38 гектар, Шўрабашот – 70 гектар, Кува – 12 гектар, Тўрткўлтепа – Шаҳри Хайбар ва бошқалар) жойлашган. Археолог олимларнинг илмий хулосасига кўра, милоддан аввалги II–I асарлардаги Хитой манбаларида тилга олинган водийдаги етмишдан ортиқ катта-кичик шаҳарларнинг аксарияти ҳам урбанлашган Андижон худудида жойлашган эди.

Андижон тарихини ўрганиш ишлари бошланганига юз йилдан ошди. Турли даврларда А.К.Писарчик, В.И.Козенкова, Б.Абдулғозиева, Ф. Дадабоев, Б. Матбобоев каби олимлар шаҳарда тарихий-этнографик

ва археологик қазишмалар олиб бордилар. Мунтазам археологик тадқиқотлар ўтган асрнинг 80-йилларида ўша пайтдаги Андижон шаҳар ижроия қўмитасининг саъй-харакатлари билан Фанлар академияси Археология институти ходимлари томонидан олиб борилди. Аммо, бошланган эзгу ишлар ниҳоясига етмай қолди. Бу хайрли ишни 2000–2010 йилларда Бобур ҳалқаро фонди ташаббуси ва ҳомийлигига Фанлар Академияси Археология институти жамоаси яна давом эттирмоқда. Таъкидлаш жоизки, бу ҳамкорлик натижалари мувваффакиятли бўлмоқда.

Андижоннинг таркибий-худудий жойлашуви тўғрисида маълумотлар 1893 йилги топографик харитада учрайди. Унда шаҳар даҳалари, масжидлар, қабристон ва кўчалари харитага туширилган. Қадимшунослар Андижон шаҳрининг тарихий қисмига кирувчи Чордона кўчаси, Сарвонтепа (собиқ Сужоат ва Тутзор кўчалари кесишган жой), Яккатепа (Далварзин кўчасидаги 67–69-йилар оралиғи), Кўштепа (Шахрихон кўчасидаги жуфт рақамли уйлар), Арк ичи (Ташкилот кўчасидаги 41 ва 42-йилар оралиғи), Шахристон (Ҳақиқат кўчасидаги 13-уй, «Тасвирий ойина» уюшмасининг ҳовлиси) каби нұкталарда археологик тадқиқотлар олиб борди.

Ушбу илмий қидируг ишларидан күзланган мақсад, Андижоннинг пайдо бўлиши ва шаклланишидан гувохлик берувчи моддий маданият намуналарини топиш ва пировард натижа сифатида шаҳар ёшини аниқлашдан иборат эди. Айтиш керакки, Эски шаҳар худудида қазишма ишларини олиб бориш жуда мураккаб шароитларда амалга оширилди. Тифиз жойлашган шаҳар маҳаллаларидағи хусусий уйлар остидаги маданий қатламни ўрганиш ҳозир ҳам ўта мушкул бўлиб қолмоқда. Шаҳар худудининг ён-атрофга кенгайиш

имкони чегараланган бўлиб, шаҳар бикиқ ҳолатга тушиб қолган. Натижада ўша XVII–XVIII асрлардаёқ мавжуд ёдгорликлар бузиб ташланиб, ўрнига янги бинолар қурилган. Шунинг учун археологик қазув ишлари олиб бориш мумкин бўлган майдон йўқ ҳисоби, текширув ишларини шаҳар кўчалари ёки қабристонларда олиб боришга тўғри келмоқда. Шаҳарнинг тарихий қисмida турли даврларга оид маданий қатламлар – кулолчилик, металсозлик, шишасозлик намуналари кўплаб учрамоқда.

Демак, кейинги йилларда олиб борилган археологик кузатув ва қазишмалардан олинган энг муҳим хulosалардан бири, Андижонда милоддан аввалги VI-IV асрларга оид Эйлатон даврининг топилмалари аникланиши бўлди. Андижоннинг энг қадимги тарихи билан боғлик ёдгорлик, маданий қатламлар шаҳарнинг жануби-ғарбий ёки марказий қисмida – Сарвонтепа ва унинг яқинидаги ҳудуддан аникланди. Бу ёдгорлик ўрта асрлар аркidan 700–800 метрлар жануби-ғарб томонда, ҳозирги Тутзор, Сарвонтепа (олдинги Сужоат) кўчалари кесишган оралиқ ҳудудда жойлашган. Жуда катта майдон аҳолининг хусусий турар-жой бинолари остида қолиб кетган. Бу ерда Тутзор кўчаси сатҳидан қариб 4 метр куйида қалинлиги бир метр атрофидаги ва ёши 2400–2600 йилларга тўғри келадиган археологик мажмуа аникланди. 2007-2008 йилги ва ҳозир олиб борилаётган қазишмалар натижаси хulosаларига кўра, бу мажмуа бир неча гектар майдонга ёйилган.

Мазкур ёдгорлик нафакат Андижон шаҳри, балки Фарғона водийсининг қадим тарихи учун ҳам муҳим янги фикрлар айтиш имконини беради. Чунки ушбу топилма қадимги Эйлатон шаҳрининг бу давр учун ягона эмаслигини ва шу каби ёдгорликлар Андижон-

Кува-Эйлатон чегарасида яна учраши мумкинлигини кўрсатади. Айнан санаб ўтилган ёдгорликларда Эйлатон даври ёки милоддан аввалги VI-IV асрлар археологик мажмуалари қайд этилган. Бунга қўшимча килиб айтиш керакки, факат Андижондаги Сарвонтепа ёдгорлиги илк Эйлатон даври (милоддан аввалги VI-V асрлар) топилмаларини бермоқда. Бундай қатламлар хозирча водийдаги бирорта тарихий шаҳар тагида қайд этилгани йўқ.

Андижон шаҳрида аниқланган бу археологик мажмуанинг ўта муҳим жиҳати бор. Биринчидан, Эски шаҳар қисмида майдони бир неча гектарли аҳоли яаш пунктидан иборат бўлган ҳудуд сўзсиз «Андижоннинг энг қадимги ўзаги», деб ҳисобланади. Иккинчидан, шаҳарнинг тарихий қисмида милоддан аввалги минг йиллик ўрталарига оид маконнинг топилиши Андижонсой курилган вақтга ва қадим шаҳарнинг сув билан таъминланиш муаммосига ойдинлик киритади.

Ушбу масалада тарихчи олим Сайфиддин Жалиловнинг хизматларини алоҳида таъкидлаш керак. У Андижоннинг сув таъминоти масаласини биринчи бўлиб ўрганиб чиқкан. Якин вактларгача Андижонни қадимдан сув билан таъминловчи асосий манба – Оқбўра дарёси («Бобурнома»да Андижон руди), деб ҳисобланар, ўрта асрларга келиб бу дарё суви шаҳарга етмай қолгач, Андижонсой қазилган, деган фикр бор эди. Аммо Андижон шарқидан ўтган Оқбўра бўйларида қадимги археологик ёдгорлик ёки топилма хозиргача аниқлангани йўқ. Бундан ташқари, Андижоннинг қадимий ўрнини Оқбўранинг Қорадарёга қўшилиш жойидаги Оқёр атрофидан кидириш мантиқка зиддир..

Шу тарика Сарвонтепадаги геологик ва археологик жараёнларни ҳисобга олиб, хозирги Андижонсой

милоддан аввалги VI-IV асрларда Қорадарёнинг ирмоғи бўлиб, Сарвонтепанинг жанубий қисмидан ўтган ва у ердаги аҳолини сув билан таъминлаган, деган янги илмий фикрни ўртага ташлаш мумкин. Бу фикр таникли археолог олим А.Заднепровскийнинг Андижонсой ва Шаҳрихонсойнинг қазилиш вакти ҳақидаги хуносасига ҳамоҳангdir ва унга қўшимча далил бўлади.

Маълумки, Ўрта Осиё шароитида дәжкончилик билан машғул бўлган аҳоли сув яқинида ҳаёт кечирган, катта-кичик маконлар бунёд этган. Албатта, Андижон ҳам бундан мустасно эмас. Академик А.Р. Мухаммаджоновнинг фикрига кўра, «Андижон» атамасининг келиб чикиши сув – оби-хаёт билан боғлик. Яъни, Андижон топоними келиб чикиши жиҳатидан туркмўғул атамаси бўлиб, «сой (сув) бўйидаги макон» маъносини беради. Бу атаманинг келиб чикиши ҳам бежиз эмас. Бу қайсиdir маънода Андижоннинг қадимги асоси сой (дарё) яқинида жойлашганига далил бўлиши керак. Нихоят, учинчидан, шаҳарнинг ҳозиргача «энг қадимги юраги» ҳисобланмиш «Арк ичи»дан XI-XII асрлардан олдинги маданий қатламлар топилмагани унинг ўрта асрларда барпо этилганидан далолат беради. Чунки археологик кузатувларга кўра, Ўрта Осиёнинг кўплаб шаҳарларида ўрта асрлар арки ўрнида қадимий маданий қатlam ва меъморчилик қолдиклари қайд этилган.

Андижоннинг ўрта асрлар арки («Арк ичи» маҳалласи) ва шаҳристон XI-XII асрларда биз юкорида таъриф берган Сарвонтепадан 800–900 метрлар шимоли-шарқ томонга кўчиб, янгидан бунёд этилгани ҳақиқатга яқин. Бу жиҳатдан Андижоннинг тарихий такдири Самарқандга ўхшаб кетади. Сабаби, бу шаҳарларда арк ва шаҳристон мўгуллар истилосидан сўнг вайрон

этилгач, янги жойда қад кўтаради. Эҳтимол, араб сайёхлари тилга олган «Андукон – Андигон» айнан шу ўрта асрлар арки ва шахристонидир. Унгача эса қадимий шаҳар ўрни ҳозирги Сарвонтепа ва унинг атрофида жойлашган бўлиши керак. Буни милоддан аввалги VI асрдан милоднинг V–VII асрларигача узлуксиз давом этган деярли бир метрли маданий қатлам далиллайди.

Демак, Сарвонтепанинг шаҳар маҳаллалари остида қолиб кетган қатламлари катта майдонни эгаллагани археологик кузатувларда тасдиқланмоқда. Табиийки, ёдгорлик майдони бундан ҳам катта бўлиши керак. Тифиз жойлашган шаҳар маҳаллаларидағи шахсий уйлар остида қолган бу қатламларни ўрганиш жуда мушкул. Жойлашган ўрни, майдони, маданий қатламлар кўлами жихатидан Андижон шаҳри учун ушбу ёдгорликнинг аҳамияти катта. Афросиёб Самарқанд учун, Қоратепа ва Чингизтепа Термиз учун қанчалик аҳамиятли бўлса, Сарвонтепа ҳам Андижон учун улардан кам бўлмаган аҳамиятга молик ёдгорликдир.

Кейинги даврларда – милоддан аввалги VI–IV асрлардан сўнг урбанизация жараёни Сарвонтепага яқин атрофдаги ҳозирги шаҳар худудининг бир қанча кисмини қамраб олган. Бу давр материаллари Ўграёр (Ганчтепа), Чордона, Яkkатепа, Култепа каби Андижон шаҳри худудидаги ёдгорликларда аникланган.

Маълумки, Хитой ёзма манбалари Фаргона во-дийсида милоддан аввалги асрларда етмишдан ортиқ катта-кичик шаҳарлар бўлган, деб хабар беради. Улардан пойтахт Эрши (Мингтепа, Андижон вилояти), Ючен (Ўзган-Хонобод атрофидаги Шўрабашот), кейинроқ Хуминъ (Кува) ва бошқалар Андижон яқинида жойлашганини тадқиқотчилар эътироф этган. Таникли олима Н.Г.Горбунова фикрича, Давань дав-

лати худудининг асосий қисми, бошқарув ва ишлаб чиқарувчи кучлари Шарқий Фарғонада ўрнашган бўлиши мумкин. Демак, Хитой солномаларида тилга олинган шаҳарлардан бири Андижонлиги эҳтимолдан холи эмас. Андижон шаҳрининг пайдо бўлиши ва ривожланиши маълум бир худудда рўй берган.

Биз ушбу маколада археологик материаллар асосида факат шаҳарнинг илк тарихини таҳлил этиб беришга ҳаракат килдик. Кейинги ёзма манбаларда тилга олинган Андижон ҳакида келгуси илмий изланишларда тўхталишни лозим топдик. Факат таъкидлаш жоизки, ёзма манбаларда шаҳар илк бор X асрда «Андукон» номи билан тилга олинади. Илмий тадқикотларда ўрта асрлар арки (10 гектар), шаҳристон (100 гектар), унинг ўрни ва чегаралари мудофаа деворлари билан қайд этилган.

XIII асрнинг биринчи чорагида Андижон Фарғона вилоятининг пойтахти эди. Бобур Мирзонинг ёзишича, Мовароуннаҳрда Андижон арки ўз катталиги жиҳатидан Самарқанд ва Кешдан кейингиси хисобланарди. Шу даврда Андижоннинг ўз зарбхонаси ҳам фаолият кўрсатган. Бобур даври Андижон шаҳри ўз-ўзидан ва очиқ жойда пайдо бўлмагани археологик жиҳатдан қайд этилган ва бу борада янги-янги материаллар кўлга киритилмоқда. 2008–2010 йилларда Андижонда олиб борилган катта курилишлар пайтида қазилган котлованлар ҳам бу фикрни тасдиқлайди. Ҳусусан, Ўзбекистон ва Бобур шоҳжӯчалари бўйларидаги бинолар остида XIII–XVI асрларга оид моддий маданият колдиклари ва қатламлари топилмоқда.

Демак, Андижон Ўрта Осиёning илк дехқончилик пайдо бўлган ва шаҳарсозлик маданиятининг дастлабки кўринишлари шаклланган ўчокларидан бири, десак, хато бўлмайди. Ўзининг геосиёсий жойлашувига кўра,

кўхна Андижон Бақтрия, Сўғд, Чоч каби тарихий ўлкаларнинг Хитой (Шарқий Туркистон) билан савдо, иқтисодий ва маданий алоқаларида ўзига хос кўприк вазифасини бажарган.

Мана шундай сермазмун тарихга эга Андижоннинг энциклопедиясини яратиш масаласига келсак, ҳамшаҳарларимизнинг «Андижоннома» ва «Холис» газеталарида (№70, №34. август 2010 й.) чоп этилган шу ҳакидаги фикрларига қўшиламиш. Факат ушбу муҳим савобли иш муаллифларининг масъулиятини, комусни яратишнинг босқичларини белгилаб турадиган меъёрий ҳужжатлар билан расмийлаштирилиши лозим.

Самарқанд археология илмий-тадқиқот институти ва Бобур фонди шартнома асосида олиб борган илмий тадқиқотлар туфайли биз Андижон шаҳарсозлик маданияти тарихи даврини аниклаш борасида илмий тадқиқотлар олиб бориб, яхши натижаларга эришдик.

Кўхна Андижонимизнинг шаҳарсозлик ёши милоддан аввалги VI-V асрлардан бошланишини Эйлатон даврининг археологик маданий қатламлари, бу ердан топилаётган ашёвий далиллар исботламоқда. Ушбу ўта кимматли ашёвий ёдгорликлар Бобур боғида маҳсус ташкил қилинган «Андижон шаҳарсозлик маданияти тарихи» музейида намойиш этилмоқда.

Яна бир муҳим манба – бу Андижонни бутун оламга машҳур қилиб келаётган комусий асар «Бобурнома» бўлиб, Андижон комусини яратишда у ҳам, сўзсиз, асосий манбалардан бўлиши лозим. Бобур фонди 2008 йилдан бошлаб мамлакатимиз ва хорижлик бобуршунос олимлар билан ҳамкорликда «Бобур» энциклопедиясини яратишга киришганки, ҳеч шубҳасиз, бу асар ҳам, албатта «Андижон» комусининг бир қисмини ташкил этади.

Шу кунларда Андижоннинг кўхна тарихи билан бевосита боғлик қомусий асар – «Тарихи Рашидий» Фондимиз ҳомийлигида илк бор ўзбек тилига таржима қилиниб, «Шарқ» нашриётида чоп этилди. Якин кунлар ичida китобхонларга етиб боради.

Ўтган ўн йил давомида Андижон ва унинг атрофида олиб борилган илмий археологик тадқиқотлар давомида Юртбошимиз зикр этган Эйлатон даврининг маданий қатлами Андижон шахри заминида ҳам борлиги исботлангани муҳим илмий-тарихий янгилик сифатида барчамизни кувонтиради.

«Андижоннома» газетаси, 2010 йил 18 сентябрь

БОБУР МЕХРИ, КАШМИР СЕХРИ...

Бобур номидаги ҳалқаро илмий экспедициянинг Ҳиндистонга навбатдаги илмий сафаридан мақсад Заҳиридин Муҳаммад Бобур ва бобурийлар ҳамда Муҳаммад Ҳайдар Мирзонинг «Тарихи Рашидий» асарида баён этилган воқеа-ҳодисалар билан боғлиқ манзил-маконлар бўйлаб илмий изланишлар олиб бориш, Бобур ва Ҳайдар Мирзо қадамжоларида бўлиб, уларнинг ҳаёти ва ижодига доир илмий маълумотлар тўплашдан иборат эди.

«Тарихи Рашидий» орадан беш юз йил ўтиб, Бобур номидаги ҳалқаро жамғарма ташаббуси билан ўзбек тилига ўгирилди. Бироқ Муҳаммад Ҳайдар Мирзонинг 1540–1551 йиллардаги фаолияти ҳақида маълумотлар озлиги туфайли, нашр бироз кечиктирилиб, ушбу Ҳиндистон сафари, жумладан, Кашмирга саёҳат кун тартибига кўйилди. Чунки мазкур тарихий асарга унинг муаллифи қисмати ҳам бевосита дахлдордир.

Тошкентдан ҳавога кўтарилиган А-310 самолёти бизни саноқли соатлар ичida Ҳиндистон пойтахти Дехлига етказди. Бобур асли «Дилли» деб аталадиган бу шаҳарда кўп марта бўлган. Муҳаммад Ҳайдар Мирзо ҳам етти йил Лоҳур ва Аграда Ҳумоюн Мирзо ва Комрон Мирзо саройларида яшаб, Кашмирни забт этиш олдидан бу жойларда бўлган.

Бобурнинг валиаҳд фарзанди Ҳумоюн Мирзонинг мақбара-оромгоҳи ҳам Дехлидадир. Ям-яшил хиёбон

бўйлаб юрамиз. Мана, ўша мақбара. Бу улкан иншоот одам бўйидан баланд катта чорқирра майдон узра юксалган. Мақбара гумбазининг йириклиги, гумбаз остидаги хилхоналарнинг кўплиги шакл улуғворлигини мазмун буюклиги билан уйғунлаштиради.

Эски Дехлида Ҳумоюн Мирзо мақбарасидан унча узок бўлмаган жойда, ўтмишда юртимиздан Ҳиндистонга келиб қолган адабиёт, тарих, санъат арбобларининг қабр-мақбаралари ҳам бор. Марказий йўлнинг шундоқкина ёқасида «Боги Бедил» деган ёзувга қўзимиз тушди. Шинам, сокин боғнинг йигирма қадамлар ичкарисида Мирзо Бедил мақбарасига дуч келдик.

«Абулмаоний» (маънолар отаси) нисбали Мирзо Абдулқодир Бедилнинг боғи шоирнинг ўзида майин ва меҳмондўст, бағрикенг, тинч, сокин экан.

Мақбара одмигина – олди очик шинам, баланд бўлмаган бино. Унинг пештоқига зиёратга келувчилар кўнглини очиш учун шоирнинг куйидаги икки мисраси ёзиб кўйилган:

«Жаҳон боғи чаманида атиргуллар ғунчаси кўп,
Бул Бедил ҳам бу дунёда бир ғунчанинг шайдосидир».

Боғ шинам ва саришта. Бундаги ҳар бир дарахтга шакл берилгани, ҳатто дарахтлар остига – сояга ҳам гуллар экилгани, шоир қабри устига анъанавий яшил гулдор шохи қабрпўш ёпилгани – буларнинг ҳаммаси боғ эгаларининг диди, энг муҳими, шоир шахсига ихлосмандлигини билдириб туради.

Мирзо Абдулқодир Бедилнинг руҳи покларига дуои фотиҳа қилдик ва шу ердан Мирзо Асадуллахон Ғолиб зиёратига жўнадик. Асли аждоди Самарқанддан бўлган бу азиз инсон номидаги академияга етиб бордик.

Мақбарада таъмирлаш ишлари бораётгани сабаб юзага келган нокуляйликдан ранжимадик, балки буюк шоир дахосига муносиб таъмир ишлари бўлаётганидан кувониб, бандалик қарзини уздиқ.

Мирзо Фолиб академияси йўлагидаги гул бозори бизга ғалати туюлди. Негадир атиргулларни ипга тизиб, шода-шода килиб сотишар экан. Бунинг сирини биз буюк хамсанавис Амир Хисрав Дехлавийнинг худди Бедилники каби камтаргина мақбараси зиёратига кирганимизда билдик. Икки томони дўконлар билан сиқилган тор йўлакдан юриб, Амир Хисрав мақбараси ҳовлисига кирдик. Ҳовлида давра қуриб ўтирган ҳофиз ва созандалар Амир Хисрав шеърларини куйга солиб, хониш қилмоқдалар. Мақбара ўртасида шоир қабри, оёқ томонида тарихчи олим Мавлоно Ҳондамир қабри... Қабрлар теварагида қорилар муттасил Қуръон тиловат қилмоқда. Зиёратчилар қабрпўш устига ҳалиги бозордагидек ипга тизилган атиргул шодаларини кўймоқдалар.

* * *

Дехлидан Аграга – бобурийлар салтанатининг ilk пойтахтига йўл олдик. Ҳиндистон сафарига борадиган ҳар кандай кишининг улуғ орзуси Аградаги Тож Маҳал мақбарасини кўриш бўлади, албатта. Тож Маҳал жуда кенг тўртбурчак майдон-саҳн узра салобат билан (ердан 61 метр баланд) қад кўтарган. Йигирма минг қурувчи, меъмор, мухандис, тошкесарларнинг йигирма йиллик тинимсиз меҳнат-машақкатлари бунёди бўлган Тож Маҳал йигирма минг йил эмас, абадий яшаб қолсин, деб орзу қиласан киши.

Тош жилоси, тош улуғворлиги, тош санъатининг жозибадорлиги ва шукухи Тож Маҳалда барқ уриб

туради. Дарҳақикат, абадиятга даъвогарликда тошдан умрбоқийроқ нима бор? Бобурийзода Шоҳ Жаҳон ва Мумтоз Маҳаллар сўнмас муҳаббатининг бу бекиёс тимсоли зиёратига жаҳоннинг ҳамма гўшаларидан келадиган сайёхлар кети узилмайди.

Биз Тож Маҳал билан кўнгил узолмасдан хайрлашиб, Шоҳ Жаҳоннинг бобокалони Бобур Мирзо яшаган Оромбог томон юрдик. Темир дарвозадан кириб, bog ҳақидаги маълумотномани ўқидик ва ичкари йўналдик. Бу боғнинг бунёдкори, меъмори Бобурнинг ўзи. У бу бодга умрининг сўнгги тўрт йилини ўтказган. Уни «Боги Зарафшон» (зарсочар боғ) деб атаган. Кечалари боғнинг турли бурчакларидаги хоналарда шам ва машъалалар ёқилгани туфайли манбаларда бу боғ «Боги Нурафшон» деб ҳам юритилған.

Боққа кирганингиз заҳоти аниқ симметрияли тўртбурчак тарҳли сўлим, ям-яшил, кенг, дарахтлари сийрак чаманзор баҳри дилингизни очиб юборади. Боғ санъатининг ютуғи табиийликка эришишда экан: дарахтларда майда жониворлар ўрмалашади, ола-була лайлакни эслатувчи кушларнинг бамайлихотир юриши боққа янада табиийлик ва жозиба бағишлайди.

Тўғрига қараб юрамиз: рўпарамизда йигирма метрлар оралиқ масофа билан ўртаси айвонли икки хонали бинолар қад кўтарган. Бобур подшоҳ шу биноларнинг бирида абадий уйкуга кетган. Боғнинг бошқа томонида Бобур Мирзонинг қизғиши тошлардан бунёд этилган мақбараси ҳозиргача сақланган. (Маълумки, вафотидан сўнг 9 йил ўтиб, хоки Кобулга кўчирилган). Бу табаррук қадамжода шоҳ ва шоир хотирасига дуои фотиха қилдик.

Агра зиёратидан сўнг Дехлига келдик ва бу ердан Кашмир қалби – Сринагарга, Мирзо Ҳайдар оромгохи томон йўл олдик.

Кашмирнинг энг фусункор масканларидан бири – Даллейк кўлидаги «Сафина» кема-мехмонхонасида жойлашдик. Эрталаб «Сафина»дан бизни қайиқда соҳилга чикариб кўйдилар. Махаллий зиёлилар билан сухбатлашиб, Мирзо Ҳайдар ҳакида, буюк алломанинг қайси қабристонга дағн этилгани тўғрисида бирламчи маълумотларга эга бўлдик. Ушбу қабристон Сринагарнинг эски шаҳар қисмида жойлашган бўлиб, майдони 3,5-4 гектарни ташкил қилас экан. Қабристонга Кашмир подшоҳи Зайнулобиддин томонидан Жеҳлам дарёсининг чап соҳилида асос солинган.

Экспедиция аъзолари – ушбу мақола муаллифлари, тасвири Фурқат Саидмаматов ва таржимон Шафоат Сотқинова машинага ўтириб, Муҳаммад Ҳайдар Мирзонинг табарруқ мозорини излаб, Зайнулобиддин қабристонига бордик. Қора темир панжарали икки табакали дарвозадан ўтилгач, ўнг томонда, шоҳ Султон Зайнулобиддин онасининг беш юз йил бурун тошдан бунёд этилган улуғвор бино-мақбараси кўзга ташланади. Ундан чапроқда тўғрига сал юрилса, султон Зайнулобиддин, унинг оила аъзолари, амалдорларга тегишли қабрлар ва катта-кичик саганалар кўринади. Бироз пастроқда, дарё бўйида яна бир қанча қабр ва саганалар ихоталаб ажратилган майдонча дикқатимизни тортди. Сергак қизимиз Шафоатхон ям-яшил лавҳа узра эгилиб, «Мирзо» сўзини ўқиши билан бир кўлинини кўтариб бизни чакирди. Биз ҳам ўша ёқка жадал юрдик. Куръони каримдан тиловат қилиб, Мирзо Ҳайдар олдидаги инсонийлик бурчимизни адо этдик.

Қабр узра улуғвор бир тут дарахти тарвақайлаган шохларини ёзиб турарди. Аввалги, XVI асрда тик кўйилган ёдгорлик тошидаги битик:

«Шаҳидлик юртига ногора чалиб
Йўл олди Кўрагон шоҳ Ҳайдар Мирзо.
Илохий қазоси шундай юз берди.
Ўлимни тарихи: «Илохий қазо»».

Кейинги ёдгорлик тошининг узунлиги 1,5 метр, эни 80 сантиметр келадиган тўртбурчак оқ мармар лавҳасига форсий тилда, араб ёзувида матн битилган.

Бу қабр тоши 1822 йилда инглиз сайёхи, капитан Вильям Моркрафт химмати билан барпо этилган. Мақбара ёзувида Мухаммад Ҳайдар Мирзо ҳаёти ва фаолиятининг ихчам баёни берилган. Бу қабр тоши матнида уч нуксон бор:

1. «Абусаид» сўзини Бобурнинг бобоси Абусаид Мирзо эмас, балки Султон Саидхон деб тушуниш керак. У Ёрканд хони, Саидия давлатининг асосчисидир;
2. Ҳайдар Мирзо Ўратепада эмас, Тошкентда туғилган;
3. Юнусхон унга ота томондан эмас, она томондан бобо ҳисобланади.

Кейинги ётиқ қабртошдаги лавҳа матни қуидагича: «У (Оллоҳ) боқийдир. Мирзо Ҳайдар Кўрагон ибн Мирзо Мухаммад Ҳусайн Кўрагон ибн Юнусхон. Бобур подшохнинг холавачаси, Мухаммадхоннинг ўғли, Ёрканд ва Мўғулистаннинг подшохи Абу Саидхоннинг вазири. Хонлар – Туғлуқ Темурхон авлодидан, Чигатой ибн Чингизхон наслидан. Мирзо таваллудининг кутлугъ ўили ҳижрий 805 йилда Ўратепа шаҳрида бўлган. Кўп замонлар ўтишидан сўнг Абу Саидхон ҳукми билан Ёркандга қайтди, Тибетни эгаллаганидан сўнг, 4000 отлиқ билан шаъбон ойининг 4-кунида Кашмирни фатҳ этди. Кашмир подшохи – Мухаммад шоҳга тахтни қайтариб бериб, Тибетга – Султон Саидхон ҳузурига

қайтиб кетди. Султон Саидхон Мирзони Лҳасага ҳоким этиб тайинлади ва ўзи Ёркандга қайтаётганда ҳалок бўлди. Мирзонинг қарори кескин ўзгариб, Бадахшонга кетди. У ердан Ҳиндистонга – Ҳумоюн подшоҳ хузурига борди. Ҳумоюн подшоҳ енгилиб Эронга кетганда, Мирзо 450 отлик билан Лаҳордан чиқиб, Кашмирга жўнади ва хижрий 947 йил ражаб ойининг 22-сида Кашмирни яна эгаллади. У ерда 10 йил ҳукм сурди.

Илохий қазо туфайли ўз тан қўриқчисининг та-содифий ўки билан шаҳид бўлди. Мирзо Турон, Мў-ғулистон ва Синд (Ҳиндистон) мамлакатларида буюклар хизматларида бўлди, хунар ва илмга бўлган муҳаббати сабаб ёшлиқдан ботир, тадбирли, идрокли бўлиб етишди.

Инглиз кироллик бош сайиси капитан Вильям Моркрафтнинг ҳиммати ва Саид Мухаммад Иззатул-лоҳнинг саъй-харакати билан ушбу тарих ёдгорлиги 1822 йилда қўйилди».

Албатта, европалик инглиз сайёхининг Кашмирга келиши ва Мирзо Ҳайдар дафн этилган қабристонни топиб, унга ёдгорлик қўйиб кетишининг асосий сабаби «Тарихи Рашидий» қомусий асарини ўқиб олган таассуротлари боис бўлса, ажаб эмас. Бинобарин, инглизлар ушбу араб ёзувидаги ноёб асарни форс тилидан ўз она тилига биринчилардан бўлиб, XIX асрнинг бошларида ёқ таржима қилиб улгурган эдилар.

Биз Сринагардан бобурийлар яратган машхур Шалимар боғи зиёратига бордик. Кеч куз, дараҳтлар япроқларини тўккан, факат улкан чинорлардагина сийраккина заранг япроқлар кўзга ташланади.

Бир томондан Ҳимолай тоғи билан чегарадош, пастки тарафи кўл ёқасидаги катта йўлга туташган. Ҳимолай тоғининг сув айиргич кисмидан тушаётган табиий шаршаралар, фавворалар бокка файз бериб турибди.

Бог тузилишидаги симметрия, саҳннинг кенглиги ва орасталик билан кисмларга бўлингани унинг қўркига қўрк ва шинамлик кўшиб, Шалимарда алланечук нафосат шукухи улуғворлиги хукм сурарди. Йўлаклар четидаги парча-парча гулзорларда ҳам боғ санъаткорлиги уйғунлашиб кетган: бир бўлак гулзорга чинор барги шаклида тартиб берилган, бошқа бир бўлаги юрак шаклида, учинчиси хилол ва якка юлдуз қўринишида.

Буюк аллома Мирзо Ҳайдарнинг 10 йиллик фаолияти ва Кашмир тарихини чуқурроқ ўрганиш мақсадида «Археология ва қадимги Кашмир» музейидаги тарихий манбалар, ёдгорликлар, Бобур ва бобурийлар, шунингдек, Мирзо Ҳайдарга доир ашёвий далиллар ва қўргазмалар билан танишдик.

Кашмир университети профессори Муҳаммад Ашраф Воний жаноблари бошчилигидаги ўрта аср тарихи бўйича мутахассислар билан кизиқарли учрашув бўлиб ўтди. Ўзаро фикр алмашувлар чоғи олингган ёзма манбалар, Кашмир, Алигарх университетларида, Дехлида чоп этилган китоблар асосида Мирзо Ҳайдарнинг Кашмирда подшоҳ бўлган вақти хусусида нисбатан зарур маълумотларга эга бўлдик. Хукуқшунос олим Назир Аҳмад билан у кишининг хонадонида бир пиёла чой устида сұхбатлашиб, Кашмир тарихи ва Мирзо Ҳайдар ҳакида қимматли маълумотлар олдик: Назир Аҳмад сұхбат чоғида бизга «Тарихи Ҳасан» китобини тухфа қилди. Пир Ғулом Ҳасан Құххихонийнинг жуғрофияга оид ушбу қомус асарида Муҳаммад Ҳайдар Мирзо ва бобурийлар ҳакида қимматли маълумотлар берилган экан.

«Тарихи Рашидий» асаридан маълумки, Муҳаммад Ҳайдар Мирзо 1532 йили Кашмирни эгаллайди ва кутилмаганда Кашмирнинг собиқ хукмдори Муҳаммад Шоҳ, Малик Абдол Мокри ва бошқаларни музокарага

чакириб, шохнинг бир қизини шахзода Искандарга олиб беради-да, сулҳ тузиб, Тибетга Султон Саъидхон ёнига қайтиб кетади.

«Тарихи Рашидий»да қайд этилганидек, Кашмир маликларининг бошбошдоқлиги кейинги йилларда ҳам аввалгидек давом этиб, улар юрт ҳукмдори Муҳаммад Шоҳни писанд қилишмайди. Ҳатто 1540 йилда Абдол Мокри, Занги Чаклар номидан элчи бориб, Муҳаммад Ҳайдар Мирзони Кашмир ҳукмдорлигини олиб, уни бошқаришга таклиф қиласди.

Кашмирдаги ҳарбий-сиёсий вазиятни яхши билган Ҳайдар Мирзо бу маслаҳатни Ҳумоюн Мирзо муҳокамасига қўяди ва ундан 450 отлик аскар олиб, Кашмирга юради. Навشاҳрда Муҳаммад Шоҳга муҳолиф бўлган Кашмир маликлари ўз ҳарбий кучлари билан унга қўшиладилар.

Муҳаммад Ҳайдар Мирзо бу дафъа Кашмирни деярли жанг-жадалсиз эгаллайди. Унга қарши бўлган маликлар афғон Шерхон Сурдан мадад олиб, жангга отланади.

Мирзо маҳаллий маликлар ва ўз лашкари билан 5000 кишилик ёв устидан ғалаба қозонади ва Кашмирда ўн йилдан ортиқ муддат ҳукмронлик қиласди. Муҳаммад Шоҳнинг вафотидан кейин унинг валиаҳди Нозук Шоҳ таҳтга чиқкан эди. Олти ойдан сўнг Муҳаммад Ҳайдар Мирзо Кашмирга киргач, у ихтиёрий равишда ҳукмронликни Мирзога топширди. Шунинг учун хутбада Нозук Шоҳ мадҳ этилар ва пулда ҳам унинг исми зарб қилинар эди. Ўша даврдаги баъзи бир Кашмир тангаларида Ҳумоюн Мирзо исми ҳам учрайди.

1445–1448 йилларда Муҳаммад Ҳайдар Мирзо Тибетга юриш қилиб, жуда кўп қалъаларни бўйсундирди. Ражаори ҳисобига ҳам Кашмир худуди кенгайтирилди. Мирзо Ҳайдарнинг яқин кишилари бўлган Қора Баҳодир, Муҳаммад Назир, Носир Али ва Мулло

Қосимлар Тибет ва Кашмир вилоятларида хотиржам хукмронлик қила бошлайдилар. Бироқ, 1550 йилга келиб Мир Шамсиддин Ироқий бошчилигига мусулмонлар бир-бирига душман бўлиб, иккига бўлиниб, Эйди Райна бошчилигига Мирзо Ҳайдарга қарши чиқадилар. Бҳира ҳокими Қора Баҳодирни ва Ражаори ҳокими Мухаммад Назирни асир олади. Мухаммад Ҳайдар Мирзо эса исёнчиларга қарши тунги юришларнинг бирида ўз танқўриқчиси Шоҳназар отган тасодифий ўқдан яраланиб, вафот этади. Нозук Шоҳ воситачилигига Мухаммад Ҳайдарнинг хотини ва синглиси маликлар билан музокарага киришиб, сулх тузилади.

Мухаммад Ҳайдар Мирзонинг хизматларига тарихан баҳо бермоқчи бўлсак, *биринчидан*, унинг ўн йиллик хукмронлигига Кашмир тикланиб, яшнай бошлайди; *иккинчидан*, у билан бирга келган сиёсий, илмий ва диний арбоблар Кашмирга ўша давр цивилизациясини келтирдилар, дейиш мумкин. Бу даврда Кашмир Буюк Ипак йўлига уланди. Бунинг сабаби, янги хукмдор ташаббуси билан шойи ишлаб чиқариш йўлга қўйилди. Илм-фан, адабиёт, мусиқа санъати ривож топди.

Учинчидан, Кашмир иморатсозлигининг янги усули ва боғ-роғ яратиш санъати урф бўла бошлади. Боги Сафо, Боги Баҳородан сўнг бобурнийлар бу ерда Шалимар боғи, Боги Нишот каби ўнлаб боғлар барпо этдилар.

Тарихда шахс ролининг ҳал қилувчи аҳамиятини Мухаммад Ҳайдар Мирзонинг ўн йиллик хукмронлиги мисолида кўрамиз, десак, муболаға бўлмайди. Олимлар билан сұхбат асносида Алигарх университети профессори Мансура Ҳайдарнинг «Мухаммад Ҳайдар Дуғлат форс манбаларида» номли (Дехли, 2002 й.) китоб ёзгани хақида хабар топдик ва бу китобни Дехлида

кўлга киритдик. Китобда тарихий асарлардан Мирзо Ҳайдар ҳақида маълумот берувчи ўринлар танлаб олиниб, ўзига хос тарихий мажмуа тузилган экан.

Кашмирликлар қадимдан асосан тошдан иморат қилишган. Ўрта асрларга келиб эса бу анъанадан воз кечишган. Чунки, кучли зилзила пайтида тошдан тикланган иморатлар минглаб қурбонларга сабаб бўлган ва шундан сўнг уйлар ёғочдан тиклана бошлаган. Муҳаммад Ҳайдар Мирзо уларнинг аксар иморатлари ёғочдан ва кўп қаватли эканини «Тарихи Рашидий»да қайд этган. Бироқ бу иморатлар оловга чидамсизлиги туфайли яна ишончни окламаган. Муҳаммад Ҳайдар Ўрта Осиёда урф бўлган иморат услубини таклиф қилган. Улар тош, тупроқ ва ёғочдан фойдаланиб, фалокатга чидамлироқ синчли уйлар қура бошлаган. Бу ҳол кейинчалик бутун Кашмирда расм бўлган.

Мусиқа, қўшиқчилик санъати, илм-фан тараққиётiga ҳам Ҳайдар Мирзо катта хисса қўшган. У Кашмирда йирик режали боғ-роғларга асос солган ҳукмдор сифатида машхур бўлган. Ундан сўнг бобурийлар салтанати таркибиға киритилган Кашмирда улкан, гўзал боғлар барпо этишнинг жадал суръати кузатилади. «Тарихи Ҳасан»да бобурий шоҳлар даврида Кашмир далалари, кўл соҳиллари, Бҳат дарёсининг икки киргоги бўйлаб ўнлаб йирик боғлар бунёд этила бошлагани зикр этилади. Кашмир жаннатдан бир намунадир, деган ибора ана шу даврга тўғри келади.

Энди Муҳаммад Ҳайдар Мирзо шахсиятига доир айрим маълумотларни келтириб ўтсак.

Саидия давлатининг асосчиси, Андижон, сўнгра Ёрканд хони бўлган Султон Саидхоннинг 24 йиллик вазири (1512–1533), Тибет ва Кашмирни ишғол қилган ҳарбий қўмондон бўлмиш бу бетакрор шахс форс тилида битилган «Тарихи Рашидий» номли машхур

қомусий асар муаллифи, айни пайтда соҳибдевон шоир, ўзбек тилида ёзилган «Жаҳоннома» ва «Махмуднома» достонларининг ижодкоридир.

У Тошкентда 1499 йил Хуб Нигор хоним ва Муҳаммад Ҳусайн оиласида тугилган, Захириддин Муҳаммад Бобурнинг холаваччаси. Уч йил давомида Бобур Мирзо тарбиясида бўлган. Отаси ўша замонларда Тошкент ҳокимлигига тобеъ бўлган Ўратепада 9 йил (1493–1502) беклик қилган.

Гарчи у Кашмир мухити тарихий-адабий анъаналирига амал қилиб, «Тарихи Рашидий» асарини форс тилида ёзган бўлса-да, саройда ва оиласада ўзбек тилида сўзлашган ва ёзган. Бунинг исботи унинг ўзбек тилидаги «Жаҳоннома» ва «Махмуднома» достонларидир.

Бобуршунос япон олим Эйжи Мано ўзининг «Бобур ва унинг даври» номли йирик тарихий асарида «Бобурнома» ва «Тарихи Рашидий» асосида Марказий Осиёнинг XVI аср тарихини яратди. Ушбу илмий кашфиёт «Тарихи Рашидий» асарининг «Бобурнома» дек машҳур ва ўта мухимлигига далил бўлиб турибди.


Атоқли инглиз олимаси Аннет Сюзен Бевериж «Бобурнома» бутун тарихда яратилган ёзма ёдгорликларнинг энг бебаҳосидир» ва «Муҳаммад Ҳайдар Мирзо мемуарнависликда Бобурга рақобатчидир», деб ёзганида ҳақ эди.

Машҳур саркарда, етук олим ва шоир Мирзо Муҳаммад Ҳайдарнинг инглиз, немис, француз, хитой, уйғур, рус, қозоқ ва бошқа тилларга таржима қилинган «Тарихи Рашидий» қомусий асарини, иншооллоҳ, бу йил ўзбек китобхонлари ҳам ўз она тилларида ўқишга мұяссар бўладилар.

«Ўзбекистон адабиёти ва санъати» газетаси,
2010 йил 19 февраль



Дакка. Бобур замбараги. 2006 йил.



Астрахань. Олтин Үрданинг қадимий шаҳарларидан бири.
2012 йил.



Таниқли бобуршунос Степан Дейл билан
Индиана университетида учрашув. 2009 йил.



Машҳад шаҳридаги Имом Ризо мажмуаси раҳбарлари
билин «Хатти Бобурий»да ёзилган Қуръон нусхасини
олиш юзасидан музокара. 2005 йил.



Бобур халқаро жамғармасининг Германиядаги бўлими
раҳбари Ян Хонзель ва Россиядаги бўлими раҳбари
Борис Морозов билан. 2005 йил.



Германиядаги Дрезден музейида. 2004 йил.



Париж сафарида. 2003 йил.



Москвадаги Митищи шаҳрида бронзадан қуйилган
Бобур ҳайкали тайёр бўлди. 1984 йил.



Техрон музейида «Куллиёти Бобур»дан нусха олиш юзасидан музокара. 2004 йил.



Таникли бобуршунос Эйжи Манонинг ilk маротаба Андижон шаҳридаги Бобур уй-музейига ташрифи. 2002 йил.




Андижон шаҳар ижроия қўмитаси. Иш жараёни. 1983 йил.



Зокиржон Машрабов дадаси ва оила аъзолари билан.
1959 йил.



Зокиржон Машрабов рафиқаси Мўътабархон ва тўнгич қизи Дилоромхон билан. Аспирантурада ўқиш йиллари.



Америкадан келтирилған Бобур ҳақидаги китоблар тақдимоти. 2009 йил.

БҮЮК САРКАРДА

Захириддин Муҳаммад Бобур бутун Осиё тамаддунига улкан таъсир кўрсатган шахслардан бири, айни пайтда эътиқоди мустаҳкам инсон эди. Бобур мана шундай юксак фазилатли саркарда ва подшоҳ бўлгани учун ҳам Ҳиндистондек буюк мамлакат тарихида ўчмас из қолдирди.

Давлатдорлик тажрибасининг мажмуи бўлмиш Сохибқироннинг машхур «Темур тузуклари» асари Бобурнинг ижтимоий-сиёсий ва ҳарбий фаолиятида энг муҳим йўл-йўриқ, қўлланма эди. Улуг бобосининг тузуклари шаҳзодаларни жангу жадалга ўргатишида, илм-фанга ихлосманд қилиб тарбиялашда ҳаётий дастуриламал ҳисобланган. Мовароуннаҳр ва Афғонистонда бўлиб ўтган жангларда қўлланган «тўлғама» жанг услуби ва Бобуршоҳ ўзи орттирган жанговар тажрибаларини Ҳиндистон учун бўлган ҳаёт-мамот жангларида мохирона қўллаши уни атоқли саркарда бўлиб тарбия топганидан нишона эди.

Бобуршоҳ ушбу тактик амалиётни ўзлаштириб, Ҳиндистон учун бўлган жангларда муваффақият билан қўллади. Таникли инглиз олими Уильям Рашибрук Бобуршоҳ замондошлари томонидан ёзилган «Тарихи Рашидий», «Ҳабиб ус-сияр», кейинчалик яратилган «Хумоюннома», «Шайбонийнома», «Табакоти Ақбарий» ва бошка тарихий асарлардан фойдаланиб яратилган «Ўн олтинчи аср бунёдкори» номли машхур китоби.

б�다 қайд этишича, 1511 йили шоҳ Исмоил билан турк сultonи Салим қайсар ўртасида Галдирдондабўлибўтган жангда Бобуршоҳ иштирок этади. Ушбу жангда ўқотар тўп ва милтиқлар қўллаган турклар ғалаба қозонади. Манбаларда ёзилишича, 1514–1520 йиллар оралиғида Бобуршоҳ Устод Али исмли замбарак тайёрлаш бўйича мутахассисни ва бироз кейинроқ ўзиотар милтиқ тайёрлаш бўйича мутахассис Мустафони турк элидан чақиритириб келтириши Ҳиндистон учун бўладиган жангларга пухта тайёргарлик кўриш имкониятини яратди. Захириддин Муҳаммад Бобур ўз юритидаги табиий қазилма бойликлардан оқилона фойдаланиб, ушбу мутахассислар иштирокида ўқ-дори, замбарак яратиб, ўз қўшинининг жанговарлик маҳоратини оширди.

Соҳибқирон Амир Темур армияси жанг чоғида ғаним кучларининг қанотларидан айланиб ўтиб, ён ва орқа томонидан зарба берган. Ушбу тўлгама жанг услубида душман кучлари қанотларида жиддий зарбага учраб, енгилган. Шайбонийхон 1500 йили Самарқандда бўлган жангда шу услубни қўллагани сабабли Бобурни мағлуб этишга муваффақ бўлган.

Маълумки, Панипат жангни ҳарбий жиҳатдан ҳал қилувчи воқеа бўлган эди. Ҳиндистонда Иброҳим Лўдийдан кейинги Бобур ракибларидан энг кучлиси ражпутлар сардори рожа Рона Санго эди. У қурдатли мустакил ҳинд хукмдорларидан бўлиб, қариб 100 минг кишилик қўшинга эга эди. Унинг ҳарбий режасидан хабар топган Бобуршоҳ бу кучли ғанимга қарши жиддий тайёргарлик кўра бошлайди. У ғаним қўшинлари босиб ўтиши эҳтимоли бўлган Биҳар, Гувалиёр, Дибалпур каби шаҳар ҳокимлари билан дўстона дипломатик алоқалар боғлаб, уларни ўз томонига ағдариб олишга муваффақ бўлади.

Ражпутларнинг бирлашган кучлари ҳужумига қарши жиддий тайёргарлик бошланади. Етарли миқдорда замбарак ва милтиқлар захирасини яратишга киришилади. Ушбу жангга тайёргарлик кунлари Бобур ўз исломий эътиқодининг мустаҳкамлигини тасдиқловчи яна бир тадбир кўради: у ўзининг шароб ичишни ман этишга қаратилган тарихий фармонини қабул қиласди. Алоҳида чуқур қаздириб, Ғазнадан унинг учун олиб келинган шаробларни тўқдиради. Май ичадиган олтин қадаҳларни синдиритириб, парчаларини камбағалларга улашади ва ўзининг шароб ичишдан бутунлай воз кечиб, тавба қилганини ошкор этади. Унинг ушбу қарорига қўшилган 300га яқин нуфузли беклар ҳам май ичмасликка қасамёд қилишади. Бобуршоҳнинг бу ҳаракатлари қўшин қалбини янги бир хиссиёт билан тўлдиради.

Бобуршоҳ мусулмон бўлмаганлардан олинадиган «тамға» солиғини ҳам расмий тарзда бекор қиласди ва бу билан аскарлар руҳиятига ижобий таъсир кўрсатади. Бобуршоҳ қўшинига тўғридан-тўғри мурожаат этиб, уларни жангга руҳлантиради.

Бобур ражпутлар томонидан бўладиган жиддий хавфнинг олдини олиб, ўз ташаббуси билан армиянинг ҳимоя чизигига ҳам янгилик киритади. Тупроқ тўлдирилган жуда кўп қопни араваларга тахлаб, катта масофада камон ва милтиқ отувчилар учун ўзига хос ҳимоя «қалқони» ҳосил қиласди. Ғилдиракли «камал иншоотлари» ясатиб, улар ҳам тўплар билан бир каторда олдинги кисмларга ўрнатилади. Қудратли душман армияси билан юзлашадиган пайтда Устод Али ва Мустафонинг қўл остидаги тўпчилар ва милтиқчиларнинг кескин ҳаракати билангина қудратли рақиб қўшинига бас келиш мумкин эди. Бўлажак

жангга бағишиланган маҳсус кенгашда ана шу масалалар муҳокама қилиниб, барча зарур чоралар белгилаб олинади.

Нонуштадан сўнг Бобуршоҳ беклар билан яна бир бор маслаҳатлашиб, қатъий ҳужумга ўтишга буйрук беради. Ўзи эса отда икки томонга чўзилиб кетган армиянинг гоҳ ўнг, гоҳ сўл қанотида, гоҳ марказда пайдо бўлар, айрим беклару, баходир йигитларга кўрсатмалар бериб, аскарларни руҳлантирасди.

Бобур армияси лагерь қуриб ва атрофига хандак қазиб, ўрайди. Бобуршоҳнинг разведкага юборилган отлик йигитлари тунда кутилмагандан душман устига бостириб бориб, унинг олд лагерига ҳужум қиласди ва галаба қозонади. Бу тактика ҳал этувчи жанг олдидан аскарларнинг руҳини кўтариб, бўлғуси ғалабага ишончни янада мустаҳкамлайди.

Нихоят, ражпутлар армияси яқинлашиб келгач, Бобур ҳужумга ўтишга буйрук беради ва ҳал қилувчи жанг бошланади. Ҳамма ёкни карнай, довул (катта ноғоралар) овози, шовқин-сурон тутиб кетади. Ҳар икки томон қўшинининг марказий қисми ўзаро қарама-карши келади, аммо асосий тўқнашув ўнг ва сўл томонларда бошланади. «Шундай зўр уруши бўлдики, ер юзига зилзила ва юксак осмонга гулгула тушиби», деб таърифлайди Бобур. Бу жангда Рона Санго армиясининг сўл қаноти Бобур армиясининг ўнг қанотига қарши жангга киришади. Буни кузатиб турган Бобуршоҳ тажрибали саркарда Чин Темур Султонни дархол ўнг қанотга ёрдамга боришга буйрук беради. Шу ондаёқ Чин Темур Султон лашкарлари бостириб келаётган душман қўшини билан тўқнашади ва мардларча курашади.

Ражпутлар ўз қўшинини ҳар томондан хужумга чорлайди. Улар Мустафонинг милтиқчилари фаол ҳаракат килаётган марказдан қочиб, Бобур қўшинининг чап томонига хужум қиласди. Рустам Туркман ва Мўмин Атка бошчилигидаги тўлғамачилар душман қўшинининг орқа томонига ўтиши оқибатида уни куршаб олишга имкон яратилади. Душман тўлғама усулида жанг қилиш моҳиятини тушуниб етгач, бобурийларнинг чап қанотини сиқиб кела бошлайди. Уларга қарши Хожа Ҳусайн бошчилигидаги ички кисм ёрдамга юборилади. Бутун жабҳа бўйлаб бобурийларнинг тўп-милтиқлари зарба берса-да, душман қўшинининг охири кўринмасди. Шундай ҳолатда Бобуршоҳ ички қўшиндаги сарбозларни иккига бўлиб, уларни тўпчиларнинг ҳар икки тарафига жойлаштиради ва ўнг қанотда жанг қилаётган Мустафо бошчилигидаги милтиқчилар Устод Алининг тўпчиларига мададга етиб келади.

Ушбу ҳарбий тадбир ражпутларнинг марказий қисмига қақшатқич зарба бериб, ўточар қуроллар душман қўшинини ер тишлатади. Бобуршоҳ ташаббусни ўз қўлига олиб, марказий кучларни олға бошлайди. Унинг ушбу ҳаракатидан илҳомланган сўл ва ўнг қанотдаги жангчилар шиддат билан олға интиладилар. Аммо ражпутларнинг ҳарбий тактикаси яхши бўлмасада, уларнинг сон жиҳатдан устунлиги сезилиб турарди.

Вазият танг ҳолатга келади. Бирок Мустафо милтиқчиларининг зарбасига бардош бера олмаган душман аскарлари орқага чекинишга мажбур бўлиб, қоча бошлайди. Бобуршоҳнинг ҳар икки қанот сардорлари келиб, ғалаба улар томонда эканидан хабар берадилар. Ражпутлар армияси тумтарақай қоча бошлайди ва шу билан Канва ёнидаги жанг ғалаба билан ўз якунига етади.

Мохир саркарда Бобуршоҳнинг кудратли артиллери яси ва жанговар армияси зарбасига ҳар қандай қўшин ҳам бардош бера олмаслиги намоён бўлади. Канва якинида бўлиб ўтган бу жанг Ҳиндистон сиёсий тарихида жуда муҳим аҳамиятга молик воқеалардан бири бўлди. Ушбу жангдан сўнг Бобуршоҳга бас келадиган рақиб қолмади.

Бобурнинг юраги баъзан Ватани – Андижонни кўмсаб турса ҳам, вақти соати келиб бокий дунёга кетгунича ҳаётининг қолган қисмини Ҳиндистонда бунёдкорлик, давлат ва маъмурий ишларни одилона ҳал қилиш билан ўтказди. Бобурийлар бутун дунёга машҳур бўлган тарихий обидаларни бунёд этдиларки, улар ҳозирда ҳам дунёни лол қолдириб келмоқда.

*«Ўзбекистон адабиёти ва санъати» газетаси,
2011 йил 11 февраль*

ТУРОН СУЛТОНИ ТЕМУРБЕК

Мустақиллигимиз шарофати билан яқинда соҳиб-қирон Амир Темурнинг «Темур тузуклари» асари мукаммал ҳолда, юксак сифат билан қайта нашр этилди. Маданий ҳаётимизда муҳим воқеа бўлган мазкур китоб Президент Ислом Каримовнинг сўзбошиси билан очилади. Бу тарихимизга бўлган катта эътиборнинг ёрқин намунасиdir.

Бобур номидаги халқаро илмий экспедициянинг мустақиллигимизнинг 20 йиллигига бағишинланган навбатдаги сафари ана шундай қутлуғ кунларда амалга оширилгани ўзига хос рамзий маънога эга. Бугунги кунда Ўзбекистон дунёга кенг назар ташламоқда, дунёни ўрганмоқда, айни пайтда ўзини оламга танитмоқда, жаҳон хамжамиятининг тенг хукуқли аъзоси эканини намойиш этмоқда. Улуғ боболаримиз изидан юриб, тарихимизни бойитадиган янги маълумотлар топиш, муҳим кўллёзма ва ноёб китобларни йиғиб, истеъмолга киритиш Бобур жамоат фондининг асосий мақсадларига киради. Экспедициянинг навбатдаги «Соҳибқирон Амир Темур қадамжолари бўйлаб» сафари ҳам ана шу режалар ижросига бағишинланди.

Маълумки, экспедиция аввалги сафарларида Соҳибқироннинг Туркманистон, Афғонистон, Эрон, Туркия, Хиндистон, Покистон, Сурия, Иордания мамлакатлари ва Кавказ ўлкаларидаги қадамжоларини ўрганганд, кўпгина муҳим манбаларни қўлга киритган эди. Бу

галги мақсадимиз Даشتى Қипчоқ – ҳозирги Қозогистон Республикаси, Россия Федерацияси худудларида бўлиб, илмий изланишларни амалга оширишдан иборат эди.

Тарихда Амир Темур бобомизнинг юкорида зикр этилган худудларга бир неча бор юриш қилгани маълум. Шарафиддин Али Яздийнинг «Зафарнома»сида унинг милодий 1366 йилда Сайрам (қадимги номи Исфижоб) билан Чаманкент (ҳозирги номи Чимкент)га боргани эслатилади.

Турон юрти муҳофазаси ҳамда ҳалқаро мавқенини кўлдан бермаслик мақсадида буюк Соҳибқирон Мӯғулистон (Чигатой улуси парчалангандан сўнг Шаркий Туркистон, Еттисув, Тангритоғ этаклари, Балхаш кўли, Иртиш ва Эдил дарёлари атрофидаги ерларни ўз ичига олган, Туғлук Темурхон томонидан тузилган давлат) га, Олтин Ўрдага қарши от сурган. 1405 иили Хитойга юриш уюштириб, қадимий Ўтрор шахрида бетоб бўлиб оламдан ўтган.

Биз Форобда бўлиб, «Муаллим ус-соний» Абу Наср Форобий руҳларига Қуръон тиловат қилдик. Сўнг Соҳибқироннинг сўнгги маскани бўлган Ўтрор қалъасига ўтдик. Бу шаҳар милоддан аввалги биринчи асрда бунёд этилган, ўша пайтларда 150 гектар майдонни эгаллаган бўлиб, Чингизхон босқинида вайрон этилган. Оқ Ўрда хонлари томонидан яна тикланган, Амир Темур ва темурийлар даврида мустаҳкам ҳарбий истеҳкомга айланган, масжид, мадраса, хонақоҳ, ҳаммом, кўркам иморатлар, равон кўчалар солинган. XVI асрга келиб, ўзаро ички низолар оқибатида хувиллаб колган Ўтрор шахрида бугун олиб борилаётган археологик қазилма ишлари билан танишдик. Археолог олимларнинг айтишларича, бу ерда осмон остидаги очик музей ташкил қилиш кўзда тутилган. Ўтрорга ўхшаш

тариҳий шаҳар ҳаробалари бизнинг мамлакатимиздаги Термиз, Самарқанд, Хива ва водий шаҳарларида ҳам мавжуд бўлиб, у жойлардан ўзбек халқининг кўхна тариҳи хусусида қимматли маълумотлар топилмоқда. Жумладан, Андижон вилоятининг Марҳамат туманида жойлашган қадимги Мингтепада ҳам ана шундай изланишлар олиб борилмоқда.

Хожа Аҳмад Яссавийнинг пири ва бобоси Арслонбоб мақбарасини зиёрат қилдик. Мақбара жойлашган мавзе «Темур овули» деб аталаркан. Бу барчамизнинг дикқатимизни тортди.

Туркистон шаҳрида «Туркистоннинг шайхул-машойихи» (Алишер Навоий таъбири) Хожа Аҳмад Яссавий қабрларини зиёрат қилдик. Милодий 1397 йилда Амир Темур Яssi (Туркистон)га ташриф буюриб, кўпдан ўйлаб юрган ниятини амалга оширади — мавжуд бўлган кичик сағана устида бугунги кунда савлат тўкиб турган маҳобатли мақбара мажмуи барпо этиш ҳақида фармон беради, бино битгандан кейин унга вакф ерларини ажратишни тайинлайди. Бу ҳақда Соҳибқирон чиқарган «Иноятнома – Вакфнома» ўн тўққизинчи асрда ҳам амалда эди.

Яссавий мақбараси ўзининг кўлами жихатидан ўша замонда бунёд этилган Самарқанддаги Бибихоним жомеъ масжиди, Кешдаги Оксарой ва Дор ус-сиёдатга тенглашарди. Яссавий мақбараси ёнидаги Мирзо Улуғбекнинг қизи, Абулхайрхоннинг рафиқаси Робия Султонбегим мақбарасини ҳам зиёрат қилдик.

Маълумки, Амир Темур милодий 1391 йилда Олтин Ўрда хони Тўхтамишхонга қарши юриш қиласиган, улкан лашкар даставвал Саброн шаҳрида тўхтайди, ундан Сариқ Ўзан мавзеига – хозирги Қозогистоннинг Тўрғай вилоятидаги Сариккўпа кўлига

куйилувчи сойдан ўтиб, Кичик тоғни ортда қолдириб, Жезқазғондан юз километрча шимолроқда жойлашган Улугтоғга етади. Бу ерда тарихимиз учун жуда муҳим бўлган ажойиб ҳодиса юз беради: Амир Темур фармони билан Соҳибқирон тузган қуидаги матн эски ўзбек тилида тошга ўйиб ёзиб қўйилади. Мана, ўша сўзлар:

«Тарих етти юз тўқсон учда, қўй тили, кўкламнинг ора ойида Туроннинг султони Темурбек икки юз минг қўшин билан ислом учун Тўхтамиши... хонлигига юрди. Бу ерга етиб, белги бўлсин деб ушибу битигтошни ёздириди. Тангри нусрат бергай, иншоолло. Тангри фуқарога раҳи қилгай, (фуқаро) бизни дуо бирла ёд қилгай...»

Биз бу ҳужжатдан Темурбекнинг расмий унвони «Турон султони» эканини, унинг давлати расман «Турон» деб аталишини билиб оламиз. Мазкур нодир ёдгорлик ҳозир Санкт-Петербургдаги Эрмитаж музейида сақланмокда.

Турон қўшини Улугтоғдан кейин Йиланчик дарёсидан ўтиб, тўрт ой даштда йўл босиб, Қустанай вилояти жануби-ғарбидан оқадиган Тобол дарёсига чиқади.

Ушбу жойлар орқали сафар йўналишини давом эттирас эканмиз, Қозогистон худудидан Россияга ўтиш пайтида Троицк шаҳри яқинидаги чегара-божхона масканларида бирмунча расмиятчиликни енгиб ўтиш учун яrim кун вактимиз кетди. Беш юз километр йўл босиб, Челябинск шаҳрига етиб бордик. Эртасига Варна томон йўл олар эканмиз, Амир Темур қадами етган Тобол дарёси бўйида тўхтадик. Дарёдан Ғарб томонга мардонавор кечиб ўтаётган Турон қўшини аскарларини хаёлимиздан бир-бир ўтказдик.

Экспедициямизнинг режасига халқ орасида ва тарихий манбаларда «Амир Темур минораси» (Башня

Тимура) деб аталадиган шаркона тарихий ёдгорлик билан яқиндан танишиш ҳам киритилган эди. Бу табаррук зиёратгох Челябинск вилоятининг Варна туманида жойлашган бўлиб, вилоят марказидан уч юз километрлар жанубда экан.

Машинамиз туманга кираверишда «Варна» деб ёзилган катта дарвоза олдида тўхтади. Атроф ям-яшил, хушманзара жойлар. Дарвоза пештоқида шаркона бир осори атика сурати нақш қилинганди. Бу биз излаб келган «Амир Темур минораси» бўлиб, бу ёдгорлик Варна туманинг рамзи сифатида қабул қилинганди экан.

Туман марказидан беш чақиримча жануби-шарқда кенг дала ястаниб ётарди. Узоқдан даланинг ўртасида миноранинг кораси кўринди. Унинг олдига етиб борганимизда, кўз олдимиизда бизнинг тушунчамиздаги мақбараларга ўхшаш, чоркирра шаклда қурилган, баландлиги 17 метрлар келадиган бино кад кўтарди. Бинога минорасимон кубба ўрнатилган. Кузатишларимизга караганда, мақбара ичи $6,7 \times 7,5$, сиртки томони $12,5 \times 10$ метрни ташкил этади. Манбаларда бу ерда Амир Темурнинг кизи (ё набираси) дағн этилгани зикр қилинади. Биз мақбарани зиёрат қилиб, Варна шахридаги туман тарихи музейига кириб, ўлка ва минора тарихи билан танишдик. Музей экскурсоводининг ҳикоя қилишича, бино XIV асрнинг охирларида Амир Темур томонидан (балки унинг буйруғи билан) қурилган. 1889 йилда Санкт-Петербург университетининг профессори Э.Ю.Петри бошчилигидаги экспедиция ушбу мақбарада илмий-археологик тадқикот олиб боради. Афсуски, таъмирлаш жараёнида номаълум сабабларга кўра бинонинг ич кисми текислаб юборилган экан. Қабртошларда маълумот берувчи ёзувлар бўлиши табиий эди.

Ўша пайтда ўтказилган тадқиқотлар натижасида сағана остидаги уч метрлик чуқурликдан монголоид ирқига мансуб аёл ва эркак бош чаноқлари топилгани қайд этилади.

Ёдгорликнинг айнан XIV асрда, Турон шаҳарларида урф бўлган қадимий кизғиши пишиқ гиштдан қурилгани, бундай услугуб ва тарҳ билан обидалар тиклаш таж-рибаси, анъанаси ўша даврларда қўшни худудларда яшаган ҳалқлар ва уларнинг ҳукмдорларида бўлмагани эътиборга олинса, мазкур «Амир Темур минораси»нинг Соҳибқирон меъморлари ва усталари ижодига мансублигига шубҳа қолмайди. Шунингдек, 1396 йили таникли шоир Сайфи Саройи томонидан «Суҳайл ва Гулдурсун» достонининг ёзилиши ҳам ривоятдаги севишганлар воқеасининг ҳаққонийлигини, ёдгорликнинг Амир Темурга дахлдорлигини тасдиқлайди. Муаллиф бежиз қайд этмаган:

Хатм эттим буни тарихга ёдгор,
Бу ёдгоримда ёлғон йўқу чин бор.

Варнада бўлганимизда бизни Жанубий Урал темир йўл бошқармасига қарашли «Тамерлан» темир йўл бекати борлиги ҳам ҳайратга солди. Бунда ҳам Амир Темур минорасининг таъсири бўлгани аниқ.

Варнадан чиқаверишда «Ўзбек таомлари» деб ёзилган лавҳа эътиборимизни тортди. У ерда миллий таомларимиздан тамадди қилиб олдик. Бу ҳам бизни, албатта, бефарқ қолдирмади. «Амир Темур минораси», «Амир Темур» бекати, «Ўзбек ошхонаси» ва Соҳибқирон номи билан боғлиқ бошка жойлар... Бундай аталишларда бир-бирига боғлиқлик, мантиқийлик бор, албатта.

Маълумки, Амир Темур ва Олтин Ўрда хони ўртасидаги жанглардан бири ҳозирги Самара вилояти худудида бўлиб ўтган. Тўхтамишнинг Соҳибқирон ҳузурига бир неча бор юкуниб келгани ва ҳар гал Амир Темур унга меҳрибонлик кўрсатгани маълум. Тўхтамиш ўзини ўнглаб, қадди-бастини тиклаб олгач, Турон мулкининг шаҳру кентларига ҳужум қилиб, ёндириб қоча бошлиди. Амир Темурнинг элчилар орқали огоҳлантиришларига парво қилмайди. Охири тоқати ток бўлган Соҳибқирон Тўхтамишга қарши қўшин тортишга мажбур бўлади.

Шарафиддин Али Яздий ва Низомиддин Шомийнинг ёзишича, Турон қўшини дашту биёбонларда олти ой йўл босиб, 1391 йил июнь ойида, ниҳоят, Кундузча (Кондурча) мавзеига етиб боради. У ерда 1391 йил 18 июнь куни нафакат Турон ва Русь, балки жаҳон тақдиди учун муҳим аҳамият касб этган жанг содир бўлади.

Бошқирдлар ва Қозон татарларининг Амир Темур ва Тўхтамиш жанги тўғрисидаги тарихий тасаввурлари, қарашларини ўрганиб аниклик киритиш мақсадида автоуловимизни бир вакълар Олтин Ўрда таъсирида бўлган ҳозирги Бошкirdистон ва Татаристон томон бурдик ва у жойларда керакли маълумотлар тўпладик.

9 июнь куни Қозон университетида профессор-ўқитувчилар X.Миннегулов (академик), А.Юсупова, М.Бакиров, Т.Гилязов, А.Фаниева ва бошқалар иштирокида ўтган мулоқотимиз мавзуси ҳам Амир Темур ва Тўхтамиш муносабатлари хусусида борди. Истиқлол йилларида нашр этилган «Темур тузукла-ри», Шарафиддин Али Яздийнинг «Зафарнома», Бобур Мирzonинг «Бобурнома», Мухаммад Ҳайдар Мирzonинг «Тарихи Рашидий», Бобур девони син-

гари китоблар юзасидан сухбатлашдик, уларга ушбу асарлардан намуналар ҳадя қилдик. Сўнг Қозон шаҳрининг диққатга сазовор жойларини – Қозон Кремли, Жомеъ масжиди, Волга соҳилларини зиёрат қилдик-да, асосий жанг бўлиб ўтган Самара ва Ульяновск вилоятлари худудига қараб йўл олдик.

Вилоят маркази Самара шаҳрига тўқсон километр қолганда, йўл кўрсаткичидаги «Кошки» деган номга кўзимиз тушди. У айнан биз қидириб келаётган кишилар яшайдиган ва тарихий жанг содир бўлган жой яқинидаги қишлоқ эди. Машинани тўхтатиб, кўрсаткичга бир-пас қараб турдик-да, автоуловимизни ўша ёққа буришга қарор қилдик. Бу кишлоқда истиқомат қиладиган ёш тарихчи олим, машҳур «Бир муҳораба сири» мақоласининг муаллифи Михаил Арнольдовни топдик.

Маълумки, Москвада чоп этиладиган «Наука и жизнь» журнали 2004 йили юкори синф ўкувчиларининг энг яхши илмий-оммабоп мақолалари танловини ўтказган эди. Тўққизинчи синф ўкувчиси Михаил Арнольдовнинг Амир Темур ва Тўхтамишнинг Кондурча дарёси бўйида бўлиб ўтган тарихий жангига бағишланган «Бир муҳораба сири» («Наука и жизнь» журнали, 2004 йил, 4-сон) мақоласи танловда ғолиб деб топилди. У нафакат россиялик муштариylарда кизикиш уйғотди, айни пайтда ўзбек тилига ҳам таржима қилиниб, республиканинг марказий газеталари ва «Тафаккур» журналида чоп этилди. Ўзбекистон ҳукумати Михаил Арнольдовни Амир Темур ватанига таклиф килди.

«Мен ва отамга уйимиздаёқ таниширишган, соат-минутларигача аниқ белгилаб чиқилган ташриф дастурида, – деб ёзади кейинчалик М.Арнольдов ўзининг «Наука и жизнь» журнали 2005 йил, 4-сонида босилган

«Кишки таътил Ўзбекистонда» номли мақоласида, – Тошкентда – Халқ таълими вазирлигида, Ўзбекистон Миллий университетида, пойтахтдаги бир қанча лицей ва коллежларда, Самарқандда – Фанлар академияси-нинг Археология институтида ва Самарқанд давлат университетида, шунингдек, Амир Темур ватани – Шахрисабзда учрашувлар бўлиши кўзда тутилган эди. Музейларга ташриф ҳамда Темур ва темурийлар даври архитектураси ёдгорликларини зиёрат қилишга анча вакт ажратилганди».

Ёш тарихчи Ўзбекистондан олган қизғин ва ўчмас таассуротлари ҳакида бизга хаяжон билан сўзлаб берди. У ўзининг юқорида тилга олинган «Бир мухораба сири» мақоласида тарихий ҳақиқатларга яна бир бор чукурроқ назар ташлашни таклиф этади ва Россияни мўғуллар зулмидан озод этган Куликово майдонидаги жанг эмас, балки Кондурча дарёси бўйидаги Амир Темур Олтин Ўрдани тор-мор этган жангдир, деган фикрни олға суради.

Бу мулоҳазалар тарихга янгича қарашиб мевалари дир. «Наука и жизнь» журнали танлов ҳайъатининг мақола муаллифини ғолиб деб топиши ҳам М.Арнольдов қараашларининг ҳақиқатга яқин эканини тасдиқлайди. Чиндан ҳам, Россиянинг Олтин Ўрда зулмидан озод бўлишида Амир Темурнинг хизматлари бениҳоя катта.

Кошки қишлоғи Қозон – Самара магистраль йўлидан 30 километр сўлда жойлашган. Арнольдовлар Кошки тумани марказидаги 20-уйнинг 9-хонадонида истиқомат килишар экан. Экспедициямизнинг иши ўнгидан келиб, Михаил ўз юмушлари билан уйига келган эди. Бу биз учун айни муддао бўлди. Биз 9-10 июнь кунлари тарихий жанг содир бўлган жойларда Михаил ва унинг отаси, тарихчи Николай Арнольдов

билан бирга бўлиб, керакли тушунча ва маълумотлар олдик. Тонгда Арнольдовлар билан Кондурча (Кундузча) дарёси бўйига бориб, дарё бўйларини кездик. Мана, ўша унча катта бўлмаган, Михаил Арнольдов ўз мақоласида ёзганидек, Россияда ҳамма ҳам билавермайдиган Кондурча дарёси. Лекин унинг қисматига тарихларни ўзгартиришга кодир буюк жанг вое бўлиши битилган эди. Ота-бала Арнольдовлар бизни Қоровултепага бошладилар.

– Бизнинг фикримизча, муҳораба учун энг қулай жой Кондурча дарёси атрофида, Новая жизнь посёлкаси билан Надеждино қишлоғи ўртасида бўлган. Мана, ўша Шарқ манбаларида Кундузча номи билан машхур бизнинг Кондурча дарёмиз! – деди Николай Арнольдов. – Амир Темурнинг қароргоҳи худди мана шутепалиқда жойлашган. Бу ердан узок масофалар яқол кўриниб туради.

Сўзга Михаил аралашди:

– Ҳа, Шарқнинг буюк ҳукмдори Амир Темур 1391 йилнинг 18 июнида жанг олдидан айнан шу ерда, Қоровултепада турган. Шу ердан кенг миқёсли жангни бошқарган. Атрофдаги *Сантемир*, *Қондабулоқ*, *Қўши* каби дарё ва жой номлари айнан ўша машхур жанг ва музофар саркарда билан боғлик деб ҳисоблаймиз.

Николай Анатольевич шу ерда ажойиб бир таклифни ўртага ташлади:

– Агар мана шу тарихий масканда Амир Темурнинг Тўхтамишхон устидан ғалабасига бағишланган ёдгорлик ўрнатилса, мақсадга мувофиқ бўларди.

Ушбу фикрни биз экспедиция аъзолари ҳам маъқуллаб, кўллаб-кувватладик.

Биз Кондурча дарёси ва унинг атрофи, Қоровултепа манзили, тарихий жанг кечган бепоён худудлар билан

обдон танишгач, Михаил ва Николай Арнольдовлар билан хайрлашиб, вилоят маркази Самара шаҳрига кечки пайт етиб келдик.

Биз учун кутилмаган, ғоят қизиқарли воқеалардан бири Сохибқирон Амир Темур билан Тўхтамиш ўртасида бўлиб ўтган жанг манзарасини акс эттирадиган анъанавий этнографик фестиваль ҳакидаги маълумотлар бўлди. Бу фестивални Самара вилоят тарих ва ўлкашунослик музейи, вилоятдаги маданий-маърифий ташкилотлар ҳамкорликда ўtkазиб келишмокда экан. Мазкур оммавий тадбир ҳам рус халқининг улуғ бобомизнинг донишманд ва зукколиги, шижаатига бўлган хурмат ва эътибор намунасидир.

Экспедициямизнинг галдаги вазифаси шу музей ходимлари билан, у ердаги тарихий ашёлар билан танишиш, фестиваль ўтказиш жараёнларини чукурроқ ўрганиш бўлгани учун бу ерга ташриф буюрдик. В.Алабин номидаги мазкур музей директори Людмила Кузнецова ва унинг ўринбосарлари, бўлим мудирлари иштирокида қизиқарли сухбат бўлиб ўtdи. Людмила Валентиновна Самарада Амир Темур ва Тўхтамишон муҳорабаси ва унинг аҳамиятига маҳаллий аҳоли катта эътибор билан қарашини баён қилиб берди. Унинг айтишига кўра, вилоят илмий жамоатчилиги Кондурча бўйидаги муҳорабани улуғ жанг деб баҳолайди, ҳатто бир неча туманлар, у айнан бизнинг ҳудудимизда бўлиб ўтган деб баҳслашади, барча кекса-ёш бу воқеанинг Самара тупрогида юз бергани билан фахрланади.

– Амир Темур жаҳон тарихидаги буюк сиймолардан биридир, – деди музей директори Л.В.Кузнецова. – Кондурча дарёси бўйидаги жангнинг аҳамияти катта. Унинг биз учун тарихий хизмати бекиёс. Шу воқеага

багишилаб ёдгорлик ўрнатилса, халқ хотирасида яна ҳам мустаҳкамланиб қоларди.

Биз Самара ва Ульяновск вилоятлари зиёли ва олимларининг фикрлари бир жойдан чиқаётганини, Кошки қишлоғида бўлганимизда тарихчи Н.А. Арнольдов ҳам шундай таклифни ўртага ташлаганини айтдик. Музей ходимларига миннатдорчилик билдиридик, китоблар ва эсадалик совғалари айирбошладик, сўнг улар билан дўстона хайрлашдик-да, сафаримизни давом эттириб, Уральск, Гурьев (Атиров), Қўнғирот шаҳарлари орқали Ватанимизга қайтдик.

Сафаримиз чоғида ўн минг километрдан зиёд масофани босиб ўтдик. Қозогистонда ҳам, Россияда ҳам бобомиз номлари билан боғлик жойларни учратдик. Масалан, Ўрдабос тумани маркази «Темур» шаҳарчаси, «Темур овули», «Тамерлан» номли станция бекати (Жанубий Урал темир йўли), жуда кўп дўконлар, ошхоналар (Уфа, Атиров ва бошқаларни)ни кўрдик.

Буларнинг бари халқ хотирасига ўрнашган. Хотира эса мангудир.

«Ўзбекистон овози» газетаси,
2011 йил 9 июль

СОҲИБҚИРОН ИЗЛАРИНИ ИЗЛАБ...

Ўтган йили Бобур халкаро фонди томонидан Қозогистон Республикаси ва Россия Федерациясига уюштирилган «Соҳибқирон Амир Темур кадамжолари бўйлаб» экспедицияси сафари чоғида янги илмий натижаларга эришилди. Бу ҳақда «Ўзбекистон овози», «Ўзбекистон адабиёти ва санъати», «Миллий тикланиш» газеталарида мақолалар эълон килинди, «Буюк Соҳибқирон изидан» номли фильм ойнаи жаҳонда намойиш этилди.

Уларда экспедициямиз давомида аниқланган илмий маълумотлар, жумладан, Қозогистон ҳудудида жойлашган Улуғтоғга Амир Темур фармони билан эски ўзбек тилида битилган тарихий ёдгорлик хусусида, шунингдек, Амир Темур минораси ва бошқа кўпгина маълумотлар ҳақида батафсил тўхталиб ўтган эдик.

Бобур халкаро фонди ушбу йўналишдаги илмий изланишларни давом эттириш мақсадида шу Йилнинг 26 июнь – 2 юль кунлари мазкур ҳудудлар бўйлаб навбатдаги илмий сафарни амалга оширди.

Тарихдан маълумки, буюк саркарда бобомиз бошлигидаги Турон қўшини Самарқанддан Даҳти Қипчоқ чўллари орқали 1391 йили 6 ой йўл босиб Россиянинг Кондурча дарёси соҳилига етиб боради ва ўша йили июнь ойида Тўхтамишхонга қарши муҳим жанг бўлиб ўтади.

Шу ўринда айтиш керакки, ўтган вақт мобайнида экспедиция аъзолари қозоғистонлик ва россиялик ўлкашунослар, тарихчи ва археологлар, журналистлардан кўплаб хатлар, маҳаллий матбуот орқали айrim кизиқарли маълумотлар олди. Бу борада, айниқса, Соҳибқирон Амир Темур ва унинг Олтин Ўрда билан муносабатлари ҳақидаги маълумотлар диккатни тортади. «Самарские известия», «Волжская коммуна» ва «Аргументы и факты. Самара» газеталаридағи мақолалар, телевидение орқали берилган лавҳалар ана шулар қаторига киради. Айниқса, Самара вилояти Красный Яр районидаги Тарих музейи директори Ю.Бриков, ўлкашунослар А.Опарин ва А.Малигиннинг Амир Темур ва Тўхтамишон ўртасида бўлиб ўтган жанг майдони деб аникланган худуд, ноёб мудофаа иншоотлари билан ўралган вақтингчалик ҳарбий қароргоҳ колдиқлари ва темирдан ясалган жанговар куроллар ва бошқа топилмалар (пайкон, пичоқ, сопол идиш ва бошқа ҳар хил буюмлар) ҳақидаги хабарлари эътиборимизни тортди.

Россиялик мутахассислар, хусусан, Самара давлат педагогика институти профессори Э.Дубман бу топилмалар ва Соҳибқирон ҳарбий қароргоҳида қайд этилган мудофаа иншооти ўрта асрлар Русияси учун характерли эмаслигини таъкидлаган. Шунинг учун ҳам самаралик ўлкашунос олимлар Бобур ҳалқаро илмий экспедициясига мурожаат этиб, Амир Темур ҳарбий қароргоҳидаги топилмалар билан танишиш ва улар ҳақидаги фикр-мулоҳазалар билан ўртоқлашишни сўрадилар. Сафардан кўзда тутилган асосий мақсадлардан бири ҳам айнан Амир Темур қадами етган жойлардан топилган моддий маданият ашёлари билан танишиш ва уларни солиштириб, ўрганишдан иборат эди.

Экспедициямиз Россия Федерациясининг Самара ва Ульяновск вилоятлари ҳамда Татаристон Республикасининг қадимий Булгар шаҳрида бўлиб, мухим янги илмий маълумотларни қўлга киритишга муваффак бўлди.

СОҲИБҚИРОН АМИР ТЕМУР ВА ОЛТИН ЎРДА

Манбаларнинг гувоҳлик беришича, 1236 йили Дашибти Қипчоқ Ботухон томонидан бутунлай бўйсундирилгач, Олтин Ўрда кучли давлат бўлиб шаклланди. Айниқса, Ботухон (1236–1255), Беркахон (1255–1266) ва Ўзбекхон (1312–1342) даврида янада ривожланди. Олтин Ўрданинг Кафа, Керчъ, Судоқ, Булгар, Биляр каби шаҳарларида товар ишлаб чиқариш ва савдо-сотик анча тараққий этган. Волга дарёсининг қуий оқимида жойлашган Сарой Боту (ҳозирги Астрахань яқинида) ва Сарой Берка (ҳозирги Волгоград яқинида) каби пойтахт шаҳарлар ўз даврида машҳур бўлган.

Ушбу шаҳарларнинг деярли барчасида археологик текширув ишлари олиб борилган ва уларнинг кўпчилигига мўғуллар давридан анча илгари асос солингани аниқланган. Бу ерлардан топилган осори атика намуналари, хусусан, меъморчилик, кулолчилик, темирчилик, заргарлик ёдгорликларида Ўрта Осиё, Эрон, Кавказ ҳудудлари таъсирида туғилган қоришма маданиятни сезиш қийин эмас. Бу хусусиятларни биз сафар чоғида археологик қазишмалар олиб борилаётган ёдгорликларда яққол кўрдик. Масалан, Татаристон Республикаси ҳудудида Волга дарёси соҳилидаги Булгар (Болгар) қадим шаҳар кўриқхонаси харобалари 400 гектарча ҳудудни эгаллайди. Деярли тўла ковлаб очилган масжид, хилхона, ҳаммом, сарой қолдиқлари

музей-қўриқхонага айлантирилган. Масжид яқинидаги археологик қазишма материаллари орасида сўзсиз Ўрта Осиёning XIII-XIV асрларга таалкукли кулолчилик буюмлари якқол кўзга ташланади. Татаристон археологлари аниклаган материаллар ичida темурийлар даврига оид сирланган сопол парчалари ҳам бор. Улар узок Мовароуннахрдан савдо карвонлари орқали келтирилган ёки Ўрта Осиё технологияси асосида маҳаллий кулоллар томонидан тайёрланган бўлиши мумкин. Чунки, Олтин Ўрда марказлари Сарой Боту ва Сарой Берканинг шаҳар сифатида бунёд этилишида ўрта осиёлик, хусусан, хоразмлик қурувчи-усталар фаол қатнашгани тарихий манбаларда тилга олинган.

Амир Темур ҳокимият тепасига келгач, мўғул хонлари билан муносабатларни яхшилашга ҳаракат килган. У ўз олдига тарқоқ Мовароуннахрни бирлаштириб, яхлит ва кучли марказлашган давлат ташкил этишдек буюк мақсадни кўйган эди. Шунинг учун Амир Темур ўз мамлакатининг тинч ва барқарор ривожланиши борасида доимо бош қотириб келган. Бу масалада уни кўпроқ Мовароуннахрнинг шарқий ва шимолий-шарқий чегараларидаги ҳолат безовта килар эди. Айниқса, Қашқарнинг мўғул хонлари ва Жўчи улуси Амир Темурга кўп ташвиш келтириши мумкин эди.

Олтин Ўрдадаги воқеалар ривожи, Жўчи улусини қайта тиклашда Оқ Ўрда ҳокими Ўрисхоннинг харатларидан Соҳибқирон яхши хабардор эди. Шу боис Амир Темур ўз давлатининг хавфсизлигини таъминлаш учун қалтис сиёсий можароларга аралашишга мажбур бўлади. Жумладан, Оқ Ўрда хони Ўрисхон томонидан Тўхтамишхоннинг отаси Тўй Хўжа катл этилади. Тўхтамишхон жонини саклаш учун 1376 йили Самарқандга Соҳибқирондан ёрдам сўраб

келган. Натижада Ўрисхон ва Амир Темур ўртасидаги муносабатлар бироз ёмонлашади. Аммо жангларнинг бирида Ўрисхон нобуд бўлиб, Сохибқирон унинг ўрнига Тўхтамишхонни тахтга кўтаради. Бир оз вақт ўтиб эса, Тўхтамишхон Олтин Ўрда тахтига ўтиради (1378–1398). Аммо кўрган бу яхшиликларига «жавобан» у Амир Темур давлати манфаатларига зид ишларга қўл уради. Тахтда мустаҳкам ўрнашиб олгач, Турон мамлакати музофотларига талончилик юришлари қила бошлайди. 1385 йилнинг бошларида Эроннинг шимолий-ғарбий қисми вайрон этилди. Бу хуруж Сохибқироннинг харбий-стратегик режасига ўзгартишлар киритди. Чунки, Эроннинг Тўхтамишхон кўлига ўтиши Турон мулки учун жуда хавфли эди. Аммо 1388 йили Амир Темурнинг Эронда эканлигидан фойдаланган Тўхтамишхон Бухорога хужум қиласи ва унинг атрофидаги бир неча қишлокларга ўт қўяди. Бундай ғаламисликлардан сабр-косаси тўлган Амир Темур анчадан буён ўйлаб юрган режаси – Тўхтамишхон ва унинг давлатини тор-мор этишга киришади.

ДАШТИ ҚИПЧОҚҚА ЮРИШ

Мазкур улкан ҳудуд XI–XV асрлардаги манбаларда «Дашти Қипчоқ» – Қипчоқ дашти, баъзида Қипчоқлар юти номи билан аталган. Таниқли шарқшунос олим Ашраф Аҳмедовнинг Шарафуддин Али Яздийнинг «Зафарнома» асаридаги фикрларга асосланиб айтган хуносасига кўра, Дашти Қипчоққа – Волга (Идил) дарёсининг ўнг соҳилидаги ерлар (Россия Федерациясининг ҳозирги Волгоград, Саратов, Самара, Ульяновск вилоятлари, Татаристоннинг ўнг соҳил ерлари ҳамда Пенза вилояти, Мордовия ва Чувашистан) кирган.

Маълумки, Амир Темур Тўхтамишхон билан уч марта – 1389, 1391, 1395 йилларда тўқнаш келган. Бунинг сиёсий ва иктиносидий сабаблари бор. XIV асрнинг 80-йилларида Тўхтамишхон қўшини анча кучли бўлиб, Мовароуннаҳр учун катта хавф туғдирап эди. Куликово жангидан сўнг ҳам Олтин Ўрда ўз қудратини тиклаб олади. Устига устак, Тўхтамишхон Русия ерларини бўлиб ташлаш учун Литва князи билан музокаралар олиб боради. Бу хавфга қарши чика оладиган ва уни даф этиши мумкин бўлган ягона шахс – бу Амир Темур эди. Бу вактга келиб, Амир Темур Мовароуннаҳр, Хуросон ва Хоразмни бирлаштириб, йирик марказлашган Турон давлатини барпо этган эди. Қолаверса, Соҳибқирон ҳарбий қўшинлари яхши ташкил этилгани, интизоми ва юксак жанговар салоҳиятга эгалиги билан XIV аср охири – XV аср бошларида жаҳондаги энг кучли армиялардан бири эди.

1388 йили Тўхтамишхон катта куч йиғиб, Турон давлатининг чекка худудлари бўлмиш Арис дарёсининг Сирдарёга қўйилиш жойидаги ерларга ҳужум бошлайди. Бундан хабар топган Соҳибқирон ўғиллари Умаршайх ва Шоҳруҳ Мирзога аскар тўплаш ҳақида буйруқ бериб, ўзи ҳам улар билан келишилган жойда учрашиш учун Кеш томондан бир неча ўн минг қўшин билан ҳаракатланади. Бирлашган кучлар Тўхтамишхоннинг олдинги қисмларига қакшатқич зарба беради, душман аскарлари тумтарақай қочиб кетади. Соҳибқирон Самарқандга қайтиб, керакли тайёргарликдан сўнг 1389 йил баҳорида Оқ Ўрдага юриш бошлайди. Аммо Тўхтамишхон даштнинг ичкари қисмига қочиб кетади ва шу тарика бу уруш кечикирилади. Эртами-кечми, бу тўқнашув мукаррар эканлигини ҳар икки томон жуда яхши тушунар эди...

Ушбу ҳарбий ҳаракат тарихий манбаларда Амир Темурнинг Даشتி Қипчокка юриши (9.XII. 1390 – 28. XI. 1391) деб тилга олиниади. Бу ҳарбий тўқнашув Тўхтамишхон ва Амир Темур ўртасида ҳал қилувчи жанг бўлиши керак эди. Шунинг учун ҳар икки томон жуда катта тайёргарлик кўра бошлайди. 1390 йил баҳор ойида Амир Темур чакирган курултойда Олтин Ўрдага юриш бошлашга карор қилиниади.

Таъкидлаш керакки, Амир Темурнинг Тўхтамишхонга нисбатан қийин ахволда жанг олиб боришига тўғри келади, негаки, асосий лагерлардан узоқлашган сари озиқ-овқат захиралари камайиб борар эди. Буни сезган душман томон рақиб армиясининг тинкасини куритиш учун иложи борича асосий жангни орқага сурган. Бироқ Темур ўйлаган тактик йўл бирдан-бир тўғри йўл бўлиб чиқди. Бунга кўра, жанг майдонини Турон султонининг ўзи танлади, Тўхтамишхонни ўзига чорлади ҳамда асосий эътиборни химояга қаратди.

Волгабўйилик олимларнинг фикрича, самарқандлик лашкарбоши буюк жанг олдидан қуйидагиларни режалаштирган: 1. Қўшин қанотларини дарё қиргоклари беркитиб туриши керак, тики дарёни кечиб ўтиб, орка томондан зарба бериш мумкин бўлмасин. 2. Бурчак ҳосил қилувчи дарёлар ўзани катта ва текис майдонга эга бўлиши, майдоннинг айрим қисмларида паст ўнқирчўнқирликлар бўлиши керак. Тики бу нарса Олтин Ўрда сипоҳиларининг тез ҳаракат қилишига халақит берсин.

Шундай қилиб, жанг майдони сифатида Контурча ва Сок дарёларининг қуйилиш ҳавзаси Амир Темур ўйлаган тамойилларга деярли тўғри келар эди.

КОНДУРЧА ЖАНГИ ВА УНИНГ ҲАРБИЙ-СИЁСИЙ АҲАМИЯТИ

Авваламбор, таъкидлаш жоизки, мазкур жанг ўз кўлами жиҳатидан ҳали кўплаб ҳарбий дарсликларга стратегия ва тактика масалаларининг баёнида дастуриламал бўлиб киритилиши лозим. Амир Темурнинг енгилмас саркарда сифатида қўллаган ҳаракатлари нафақат ўтмиш, балки ҳозирги замон тадқиқотчилари ва мутахассисларини ҳам ҳайратда колдириб келади. Манбаларда жанг 1391 йил 18 июнь куни бошланган ва уч кун давом этган, дейилади. Амир Темур 200 минг ва Тўхтамишхон бундан бироз қўпроқ, яъни ҳар икки томондан жами 400 мингдан зиёд аскар қатнашган. Отлар сони 1 миллионга борган, чунки ўша давр тамоийлларига кўра ҳар бир жангчига камида иккитадан бештагача от бириктирилар эди. Шу жиҳатдан олганда бу қадар катта микдорда ҳарбий куч ва қурол-аслаҳа қатнашган жанг бўлган майдон жойлашган ери аниқлаш муҳим илмий аҳамиятга эга, албатта. Бу борада ҳозирги вақтда Волгабўйи музофотида турли баҳс-мунозаралар давом этиб келмоқда.

Маълумки, қадимги ва ўрта асрлардаги барча йирик жангларда улар олиб бориладиган майдонларга (Панипат, Кулково, Бородино, Грюнвальд ва б.) алоҳида эътибор қаратилган. Сохибқироннинг машхур асари «Темур тузуклари»да келтирилишича «...*амир ул-умаро уруши майдонини танлашида тўрт нарсанни назарда тутсин. Биринчиси – у ернинг сувга узоқ-яқинлиги. Иккинчиси – аскар сақлайдиган ернинг хавф-сизлиги. Учинчиси – ганим лашкари турган ердан тепароқقا жойлашиши ва офтобга рўбарў бўлмаслиги,*

токи қүёши шуъласи синоҳилар кўзини қамаштирмасин. Тұртнинчиси – уруши майдони олди очиқ, кенг жоӣ бўлиши лозим».

Амир Темур ва Тўхтамишхон ўртасида бўлиб ўтган жанг майдони ўрни ҳақида ҳам россиялик тадқиқотчилар ўртасида хозирга қадар яқдил бир фикр йўқ. Ушбу жанг Волга дарёсининг ирмоқларидан бири Кондурча дарёси бўйида, аникроғи, Кондурча ва Сок (бу термин «совуқ», «соовуқ» сўзидан олинган дейишади) дарёлари ҳавзасида бўлиб ўтгани манбаларда қайд этилган. Кондурча дарёсининг умумий узунлиги 342 километр. Лекин жанг унинг қайси қисмида юкори, ўрта ёки қўйи оқимида рўй берганлиги ҳақида мунозаралар давом этмоқда.

Агарда Амир Темурнинг «Темур тузуклари» асари талабларидан келиб чиқсан, мазкур дарёларнинг юкори оқимлари изланаётган ҳудудга мос келмайди. Яъни, бу жойлар ботқоқлик, пастқам ва ўрмонзорлардан иборат. Дарёning қолган қайси қисмида асосий жанг майдони бўлгани ҳақида фанда эътироф этилган уч фикр ва хулоса мавжуд. *Биринчи фикрга* кўра, жанг хозирги Красный Яр тумани ҳудудида Кондурча ва Сок дарёлари туташадиган жойда рўй берган. *Иккинчи фикр* тарафдорларига кўра, жанг майдони биринчи нуктадан 90–100 километр шимолроқда, хозирги Сергиевский тумани ҳудудига тўғри келади. Учинчи *таҳминга* кўра, бу жой биринчи нуктадан 80–90 километр шимолий-шарқдаги Кошки тумани ҳудудига тўғри келади. Таъкидлаш жоизки, Кошки туманилик ёш тарихчи олим Михаил Арнольдов ҳам ушбу фикрга қўшилади (бу истеъоддли тадқиқотчи ҳақида олдинги мақоламиизда атрофлича маълумот бериб ўтган эдик).

Биз – Бобур халқаро илмий экспедицияси аъзолари сафар чоғида маҳаллий ўлкашунос олимлар билан ҳар учала худудни ҳам географик ва археологик назардан батофсил кўздан кечирдик. Айтиш мумкинки, юкорида келтирилган ҳар учала ғоя мантиқли бўлса-да, ҳар ким ўз фикрини асослашга ҳаракат қиласди.

Икки улкан армияни бир ерга жойлаштириб жанг қилиш мумкин бўлган ҳудуд бизнинг фикримизча, *Кондурча ва Сок дарёлари қўшилиши жойидан узоқ бўлмаган бепоён майдондир*. Майдон тузилиши ҳарбий ҳаракатлар учун қулайлиги билан катта таассурот қолдиради. Ушбу майдон Амир Темур тузукларида ишлаб чиқилган талабларнинг деярли барчасига жавоб беради, деган фикрдамиз. Буни мазкур ҳудудда археологик ашёвий далиллар топила бошлагани ҳам тасдиклайди. Булар жанг майдони ўрни, Амир Темур ҳарбий кароргоҳи (лагерь) қолдиклари ва бу ердан топилган темирдан ясалган қурол-яроғ намуналари ва бошқа буюмлардир.

Маълумки, вактинчалик лагерлар ҳарбий юришларда тактик усуллардан фойдаланишда муҳим стратегик пункт ҳисобланади. Амир Темур ўз юришлари пайтида шундай истеҳкомлардан бир нечтасини қургани ва фойдалангани манбаларда зикр этилади. Масалан, Эльбрус тоғи яқинида Самир дарёси бўйидаги ва 1391 йил 4 июнда Ик дарёсидан кечиб ўтиб курилган лагерларни бунга мисол қилиб келтириш мумкин. Демак, Кондурча жанги учун маҳсус ҳарбий истеҳком – лагерь бунёд этилгани тарихий хақиқат.

Бу ҳарбий истеҳком ўрнини самаралик ўлкашунослар Ю.Бриков ва А.Опарин бошқа олимлар иштирокида аниқлашга жиддий ҳаракат қилганлар. Бу истеҳком коинотдан олинган суратларда ҳам кўринганига ўзи-

миз гувоҳ бўлдик. Уларнинг фикрича, истеҳкомнинг жануб ва жанубий-гарб томонларини икки дарё – Кондурча ва Сок дарёлари табиий равишда ҳимоя этади. Шимолий-ғарб ва шимолий-шарқ томонлари олд томонида ҳандак қазилган ва кўтарма ёки тупрок девор кўринишдаги сунъий ғов билан мудофаа этилган. Ҳандак эни ҳозирда 4 метрга, кўтарма эни эса 8 метрларга боради, ҳар икки ҳолда ҳам уларнинг чукурлигини аниқлаш қийин.

Мудофаа иншооти Сок дарёсининг қуриган ўзанидан бошланиб, Малая Каменка қишлоғигача (9600 метр) давом этган ва шу ердан бурчак остида қайрилиб, Кондурча дарёси қирғоғи билан туташган (3900 метр). Ҳар 535 метрда (ёки 750 қадамда) маҳсус кириш дарвозалари ясалган кўринади, уларнинг сони 19 та бўлган. Шу тарика 40–45 квадрат километрик ҳудудда юкоридан караганда тўртбурчак кўринишидаги ҳарбий қароргоҳ – лагерь қурилган.

Амир Темурнинг Дашти Қипчоқка юришини Низомиддин Шомийнинг «Зафарнома» ва Шарофиддин Али Яздийнинг уни тўлдирувчи шу номли асари бўйича таҳлил этган тарихчи олимлар Б.Д. Греков ва Ю.А. Якубовскийлар «рўбарў келаётган душман яқин жойидан олд қисмида ҳандаклар қазилган қароргоҳлар бунёд этилгани ва ҳандаклар олдига тўқилган қалқон (чопар) ва мудофаа куроллари (турлар) кўйилганини ҳамда қароргоҳларда олов ёкиш ва ҳатто қаттиқ гапириш ҳам такиқланганини» эслатиб ўтадилар.

Лагерь маҳобатини кўз олдимизга келтириш учун биз «Жип» автомашинасида ва пиёда юриб, уч кун давомида ушбу ҳудудни батафсил ўргандик. Лагерь ичida кейинги 50–60 йилда бунёд этилган Кочкори (Кўчкорчи), Трухмянка, Угловое қишлоқлари атроф

далалари билан жойлашган. Соҳибқирон кўшинининг асосий жанговар қисмлари: сўл қаноти ҳозирги Кочкори кишлогидан ғарброқда, ўнг қаноти ҳозирги 204-баландлик нуктаси атрофида ва ниҳоят, Амир Темур ўзи турган марказ қўшинлари Орошенки пунктинг шимолий-ғарбида жойлашган бўлиши керак.

Таниқли олимларимизнинг фикрича, Соҳибқироннинг ҳарбий юриши вактида олдинда *хабарчилар*, улар ортидан ясовул бўлинмаси, кейинроқда *манглай* – *авангард* қисми ҳаракатланган. Манглай билан асосий қисм оралиғида қўмондоннинг ҳаракатдаги қароргоҳи ва унинг якинида захира (резерв) қисмлар жойлашган. Ҳар бир қанот олдида қўшимча қўрикчи манглай – авангард, ён томонда биттадан қўшимча аскарий қўшилмалар – қанбуллар бўлган. Шу тариқа қўшин етти қисм – қўллардан иборат эди. Қўллар ҳозирги корпусга тенглашади.

Кондурча жангиде Амир Темур қўшинларни жойлаштиришдаги мазкур янги тартибни ҳарбий тактика тарихида биринчи бор қўллайди. Ёзма манбалар гувоҳлик беришича, моҳир саркарда бешта қўл (корпус)ни жанг майдонига ташлаган бўлса, иккитаси захирада сакланган. Шунга кўра, ўнг қанот орка томонидаги манбаларда тилга олинган Черная дарёси ҳозирги Сок дарёси бўлиши мумкин ва бу номнинг келиб чикиши маҳаллий топонимик холатга тўғри келади. Кондурча, Кандабулок, Сок, Кочкори – булар келиб чикишига кўра туркий сўзлардир. Яъни, Черная речка – Қора ва Қорасу ўзагининг Соок-Суу қисми сакланган бўлиши мумкин.

Бу мудофаа маскани археологик жиҳатдан энди маҳсус ўрганила бошланди. Кейинги йилларда жанггоҳдан ва лагерь ички томонидан темир буюмлар топилмоқда. Ҳозиргача самаралик ўлкашунослар

Ю.Бриков, А.Опарин ва бошқа олимлар коллекциясида 30 га яқин топилма қайд этилган. Улар орасида айрим тангалар Кондурча жангигача бўлган даврга тааллукли бўлиши мумкин. Темир пайкон, пичоқ ва бошқа темир буюмлар XIV-XV асрлар билан саналаниши мумкин. Сопол буюмлар кам учрайди, бу оддий ҳолат. Чунки, узок юришларда асосан ёғоч идишлар олиб юрилган. Ҳар икки улкан армиядаги аскарлар совутлари, курол-яроғлари, от-увовлари, ҳалок бўлганларнинг жасадлари қаерда – бу ҳақда келгусида олиб борилиши режалаштирилаётган археологик тадқиқотлар натижасига кўра фикр билдириш мумкин бўлади. Тупроқ ва маданий қатламлар таркиби (ёши)ни ўрганиш мақсадида жорий йилнинг сентябрь-октябрь ойларида тупроқшунослар иш бошлиши кутилмоқда. Галдаги вазифа археологик, топографик ва бошқа кузатув изланишларини ҳам тезроқ бошлишдан иборат.

Самара вилояти ўлкашунос археолог олимлари билан келишилган режага асосан, экспедициямиз аъзолари ҳам 2012 йилнинг октябрь-ноябрь ойларида Амир Темур ҳарбий истеҳкомида олиб борилаётган археологик илмий-тадқиқотларда иштирок этиб, ўз қўллари билан иккита шурф кавлаб, у ердан чиқкан топилмаларни биргаликда ўрганиш мўлжалланмоқда.

Жумладан, Самара вилояти ўлкашунослик музейи директори, археолог олим Л.Кузнецова ва археология бўлими бошлиғи, тарих фанлари номзоди Д.Сташенков билан Амир Темур билан боғлиқ ёдгорликларда ҳамкорликда илмий қазишмалар ўtkазишга келишиб олдик.

Кондурча жанги Евроосиё халқлари тарихида бурилиш нуқтаси бўлди. Самарқанддан Волга соҳиларида Жигулевск тоб этакларигача қилинган ҳарбий

сафар тарихда ўз кўлами билан ягона юриш бўлиб қолди. Ушбу жанг Олтин Ўрдани заифлаштириди ва охир-оқибатда у таназзулга юз тутди. Таниқли тарихчи олимлар Бўрибой Аҳмедов, Ҳамид Зиёев, Николай Арнольдов ва бошқалар Тўхтамишхоннинг тор-мор этилиши ва Сарой Берканинг вайрон қилиниши Олтин Ўрдага берилган даҳшатли зарба бўлганлигини таъкидлайдилар. Русияга беҳад азоб-уқубат ва талафот етказган мўғуллар зулмининг томири шу тариқа қирқилади. 1395 йилдан бошлаб Олтин Ўрда таназзулга юз тутди. Соҳибқирон нафакат Русия, балки Европа халқлари учун ҳам озодлик олиб келишдек буюк ишни амалга оширди.

Юқорида келтирилган фактларга, Кондурча жангининг оламшумул аҳамияти ва унда Соҳибқироннинг тарихий ролига маҳаллий зиёлилар ва аҳоли катта кизикиш билдирамоқда. Масалан, ўтмиш тарихни ўрганиш борасида Самара вилоятида ҳарбий-тарихий клублар ва қидирув экспедициялари фаолият кўрсатмоқда, фольклор ва этнографик изланишлар олиб борилмоқда. Жумладан, Кондурча дарёси бўйидаги жангга бағишланган ҳарбий-тарихий фестиваль уч маротаба ўtkazилган. Биз билан бўлган учрашувда Красный Яр тумани маъмурияти раҳбарлари келгуси йилдан мазкур фестивални тиклаш учун харакат қилишаётганини таъкидлади.

Самаралик рассом А.Малигин буюк Амир Темур сиймосида Кондурча – Сок дарёлари соҳилида жойлашган ҳарбий истеҳкомнинг ҳозирги кўринишини яратгани ҳам у ердаги зиёлиларнинг ушбу масалага ижобий ёндашаётганини кўрсатмоқда.

Эътиборлиси шундаки, 2012 йил март ойида маҳаллий ўлкашунослар томонидан Кондурча жанг

майдонида маҳобатли эсдалик лавҳаси ўрнатилган. Лавҳага: «*Бу ерда, Сок ва Кондурча дарёлари оралигида 1391 йили Олтин Ўрда хони Тўхтамиҳонга қарши юриши чогида Амир Темурнинг ҳарбий қароргоҳи жойлашган. Ёдгорлик Кондурча жсангининг 620 йиллиги муносабати билан ўрнатилди*», деган сўзлар битилган.

Илмий экспедициямизнинг сафари давомида биз Санкт-Петербург шаҳридаги Эрмитаж музейига бо-риб, у ерда сақланбаётган, Улуғтоғнинг Олтин Чўкки деб аталган кисмига Амир Темур томонидан бундан 620 йил аввал ўйиб ёздирилган, матни аввалги мақоламиизда келтирилган тошбитикни фото ва видеотасвирга олишга муваффак бўлдик.

Хулоса қилиб айтадиган бўлсак, Соҳибқирон бобомизнинг тарихий қадамжоларини, унинг ҳарбий юришлари ва бунёдкорлик фаолиятини чуқур ўрганиш борасида олдимизда катта вазифалар турибди.

Бу вазифаларни амалга ошириш учун жиддий ишлар бошланган. Амир Темурнинг Русияни мӯғул зулмидан озод килишдаги буюк хизматлари ўз ҳаққоний баҳосини олиши учун етарли асослар мавжуд. Биз эса улуғ аждодимизнинг ворислари сифатида тарихимизнинг ҳар бир сахифасини ҳаққонийлик билан халқимизга, биринчи навбатда ёшларимиз онгига етказмогимиз даркор. Шўролар даврида бир томонлама олиб борилган сиёsat таъсири остида тарихимизга четдан ёки айрим ҳолларда ўзимиздан, баъзида пинҳона ва гоҳида очикдан-очик «тош отишлар»дан ҳимоя этишимиз зарур. Зеро, Юртбошимизнинг «Ўзликни англаш тарихни билишдан бошланади», деган сўзлари барчамиз учун дастуриламал бўлиб хизмат қилиши лозим.

«Ўзбекистон овози» газетаси,
2012 йил 8 сентябрь

АМИР ТЕМУР ЙОРГАН ЙЎЛЛАРДА

Бобур халқаро жамоат фонди қошидаги илмий экспедиция ўз анъанасига кўра, улуг аждодларимиз хаёти ва фаолиятини ўрганиш мақсадида юртимиз ва хорижий мамлакатлар бўйлаб кенг кўламли изланишларини давом эттироқда. Жумладан, 2011 ва 2012 йил ёз ойларида экспедиция навбатдаги сафарга чиқиб, буюк Соҳибқирон Амир Темурнинг Олтин Ўрдага юришлари билан боғлик керакли маълумотларни тўплади.

Бу ҳақда «Ўзбекистон овози» (2011 йил 9 июль, 2012 йил 8 сентябрь,) «Холис» (2012 йил 19 ва 26 сентябрь) ва бошқа газеталарда ҳисобот мақолалар эълон килинди. Уларда Олтин Ўрда хони Тўхтамишхон билан Соҳибқирон ўртасида бўлиб ўтган жанг ўрни тўғрисида айрим фикрлар ўртага ташланган, археология фани билан боғлик ҳолда, баъзи мулоҳазалар баён этилган эди. Мазкур чиқишларга илмий жамоатчилик томонидан илик муносабатлар билдирилди.

Шуларни инобатга олиб, экспедиция аъзолари 2012 йил сентябрь ойида Қозогистон, Россия, Озарбайжон, Арманистон, Грузия, Эрон ва Туркманистон давлатлари бўйлаб навбатдаги сафарни амалга оширди. Сафар мобайнида ушбу мамлакатлар худудидаги 70 дан ортиқ ахоли пунктлари тарихи, бугунги куни, меъморий ва археологик ёдгорликлар, музейлар билан яқиндан танишилди, муқаддас қадамжолар зиёрат қилинди.

Маҳаллий халқ вакиллари – зиёлилар, ҳунармандлар, олиму уламолар билан учрашдик. Мулокотларнинг асосий мақсади Соҳибкирон юрган йўллар, улуг аждодларимиздан қолган моддий-маънавий мерос борасида янги далил ва маълумотлар тўплашдан иборат эди.

ЯНА КОНДУРЧА ЖАНГГОҲИ ҲАҚИДА

Шуни таъкидлаш жоизки, Соҳибкирон Амир Темур 1391 йили Тўхтамишхонга қарши юриши олдидан ўғиллари – Умаршайх Мирзо ва Шоҳруҳ Мирзога Даҳти Қипчок томон йўлга чиқиши буюради. Уч томондан – Самарқанддан, Андижон ва Ҳиротдан келиб қўшилган жанговар аскарлар Олтин Ўрдага караб юрадилар.

Буюк Амир Темур ва Тўхтамишхон ўртасида энг кескин тўқнашув бўлиб ўтган майдон хусусидаги маълумотлар борган сари қўпаймоқда ва фаразлар янги далиллар билан мустаҳкамланмоқда. Кондурча (Қундузча) жанггоҳидан топилган моддий маданият излари янада якъол қўзга ташланмоқда.

Гап шундаки, Кондурча дарёси ҳавзасидан XIII-XIV асрларга оид ашёлар аввалги йилларда ҳам топилган. Аммо кейинги пайтларда маҳаллий ўлкашунослар (А.Опарин, Ю.Бриков, А.Малигин ва бошқалар) Самара вилояти ўлкашунослик музейи олимлари ва Бобур ҳалкаро жамоат фонди билан ҳамкорликда Самара вилояти ҳудудида илмий изланишлар олиб бормоқдалар. Уларнинг тадкиқотлари натижасида аниқланган осори атикалар сони ҳозирги вақтда 30 дан ортиб кетган.

Мухими, зикр этилган жойдан, яъни Кондурча ва Сок дарёлари қўшилган учбурчак кўринишидаги кенг

соҳил-майдондан Соҳибқирон ҳарбий қароргоҳининг мудофаа иншоотлари топилган. Лашкаргоҳ шимоли-шарқ ва шимоли-ғарб томонларни ўраб турувчи ҳандақ ва кўттарма ёки тупрок девор кўринишидаги сунъий ғовдан иборат бўлган. Мазкур қароргоҳдаги ҳандақ ва кўттарма, девор куриш усули ва типи Олтин Ўрданинг ўша давр мудофаа иншоотларидан тубдан фарқ қиласди. Масалан, Волга бўйидаги Булғор ва Биляр каби археологик ёдгорликлардаги ҳимоя иншоотлари ўз ички тузилиши жиҳатидан Кондурчадагига ўхшамайди. Волгабўйи шаҳарлари мудофаа иншоотларida «қозик девор» ёки ёғочлардан (бревно/хода) синч қилиниб, ичи тупроқ билан тўлдирилган. Бу холат Амир Темур қароргоҳлари учун хос эмас.

Ана шундай ўзига хос қурилиш жараёнларини ўрганиш учун биз самаралик ўлкашунослар билан мазкур худудда, яъни, Малая Каменка, Трухмянка, Кочкори қишлоқлари чегарасида археологик кузатув ишларини олиб бордик. Бундан ташқари, П.В.Алабин номидаги Самара ўлкашунослик музейи археологлари билан ҳамкорликда жанггоҳда яна учта назорат кудук (шурф) кавланиб, у ерда маданий қатлам қолдиклари, ҳатто бир кудукда бронза даврига оид қатламлар борлиги аникланди. Шурфлардаги маданий қатламлар қалинлиги 1,5-2 метрга боради. Улар ранги-тусидан бир-биридан ажралувчи, юмшоқ агро ётқизиклардир. Аммо юқоридан ҳисоблагандა 4-қатламда ёғочнинг майда куйик қолдиқлари чиқкан. Ушбу шурфдан тупрок қатламлари намуналари лаборатория тахлили учун мутахассислар томонидан Канадага олиб кетилган. Текширув натижалари тез орада тайёр бўлиши кутилмоқда. Мазкур лаборатория 15–25 йил аниқлиқ билан қатламлар даврини белгилаш салоҳиятига эга

илмий марказлардан хисобланади. Унинг хулосалари Кондурча жанги тафсилотларига янада ойдинлик киритса, ажаб эмас...

ОЛТИН ЎРДАНИНГ САВДО-ИҚТИСОДИЙ МАРКАЗЛАРИ

Соҳибқирон, айрим гарб олимларининг фикрига карши ўлароқ, жануби-шарқий Европани босиб олиш ниятида бўлмаган, балки у Олтин Ўрдани эгаллаб, ўзига қарашли бирор ҳукмдорни тахтга ўтқазмокчи бўлган. Асосий мақсад – Қора ва Каспий денгизи йўналишидаги халқаро карvon йўлини Турон заминига йўналтиришдек улкан стратегик режа эди. Олтин Ўрда ҳудудидан қадим замонлардан XVI аср бошлари гача Ғарбни Шарқ билан боғлаган савдо йўли ўтган эди. У манбаларда баъзан «Мўйна йўли» деб ҳам юритилади. Амир Темур даврида ушбу йўлнинг икки тармоғи фаолият кўрсатган. Бири Русь жанубидан Қора ва Қулзум (Каспий) денгизлари бўйлаб, иккинчиси Каспийдан жануброқдаги Шом, Кичик Осиё – Кавказорти, Эрон ва Самарқанд орқали ўтар эди. Кейинги йўлни эгаллаш ва иқтисодий жиҳатдан кучли Табризни қўлга киритиш Олтин Ўрда хонларининг ҳам орзуси эди. Бу йўлдан газмол, мовут, қурол-яроғ, заргарлик буюмлари, кимматбаҳо тошлар, чарм, мўйна, асал, асалари муми, туз, зираворлар, дон, ёғоч, балиқ, икра, зайдун мойи каби товарлар олиб ўтилган. Ушбу карvon йўли Хоразм ерларидан ҳам ўтган бўлиб, Олтин Ўрда хонларига катта даромад келтирган.

Яна бир карvon йўли Тан (Ростов-Дон) шаҳридан бошланиб, Сарой Боту, Дашиби Қипчоқдан Олтойгача, сўнгра Қоракурум орқали Пекингача давом этган.

Демак, бир сўз билан айтганда, мазкур бепоён худудда ўша даврнинг улкан геополитик манфаатлари мужассам бўлган...

Куйида экспедиция аъзолари бевосита бориб танишган, Олтин Ўрда давлатида мавжуд бўлган айrim шаҳарлар ҳақида сўз юритамиз.

Ҳожи Тархон (Астрахань) Олтин Ўрда хонларининг кузги қароргохи ҳисобланган. XIII асрда Итил дарёсининг чап соҳилидаги Аштархон қишлоғи ўрнида курилган бу шаҳар ҳақида Ибн Баттута, Шарафиддин Али Яздий, Мирхонд асарларида маълумотлар учрайди. Ҳожи Тархоннинг тез ривожланиб кетишига сабаб, биринчидан, унинг қулай жуғрофий жойлашуви бўлган. У шимол ўлкалари, Кавказорти, Ўрта Осиё, Хитой, Кримдан келадиган халқаро магистраль йўллар ўтган чорраҳада жойлашган эди. Иккинчидан, Олтин Ўрда хонлари мавсумий қароргоҳининг Ҳожи Тархон атрофида бўлиши ҳам унга кўпгина афзалликлар тугдирарди. Учинчидан, мазкур шаҳар Олтин Ўрда хони фойдасига олинадиган кўплаб соликлардан озод этилган эди. 1459 йилдан шаҳар Аштархон хонлигининг марказига айланади. 1589 йили Астрахань Кремли курилган.

Сарой (Сарой Боту) ёки Сарой ал-Махрус (Дворец Богохранимый – Аллоҳ панохидаги сарой) қолдиклари ҳозирги Астрахань шаҳридан 80 километр шимолдаги Харобали районининг Селитренное қишлоғи яқинида, Волга ирмоғи Ахтуба (Октябр) дарёсининг чап қирғоғида жойлашган. Бу археологик ёдгорлик худудида кўп йиллардан бери қазишма ишлари олиб борилмокда. Шаҳар даҳаларга бўлиниб бошқарилган. Кулоллар, шишасозлар, металсозлар ва заргарлар даҳалари

ўрганилган. Ёзма манбаларнинг гувоҳлик беришича, «Сарой бозорлар, ҳаммомлар, диний муассасаларни ўз ичига олган, Мовароуннахр меъморчилик услубида қурилган машхур шаҳарлардан бири бўлган».

Янги Сарой (Сарой Берка) ёки ал-Жадид саройига Олтин Ўрда ҳукмдори Берка томонидан 1260 йили асос солинган. Ўзбекхон даврида хонлик маркази Сарой Ботудан Сарой Беркага кўчирилган. XIV асрнинг биринчи ярми бу шаҳарнинг гуллаган даври ҳисобланади. Сарой Берканинг ҳаробалари ҳозирги Волгоград вилоятининг Ленин районига қарашли Царев қишлоғи яқинидадир. Ўрта асрларда шаҳарни ўз кўзи билан кўрган Ибн Баттута шундай ёзди: «...кенг кўчалари, гавжум бозорлари бўлган гўзал бир шаҳар. Унда 13 та жомеъ масжиди ва яна бир неча масжидлар мавжуд. Бу ерда турли ҳалклар – мўғуллар, руслар, византияликлар, қипчоқлар, черкаслар яшайди. Давлатнинг расмий тили чигатой-турк тили бўлган. Султоннинг саройи Олтинтош деб аталади».

Археологик қазишмаларга кўра, шаҳар асосий кўчалар билан даҳаларга бўлинган. Унинг марказий ва шимоли-ғарбий кисмларида кулоллар, жез қуювчилар, суяктарошлар, темирчилар, савдогарлар яшаган. Уларнинг бошпаналари пойдевори ғиштдан кўтарилилган ярим ертўла ёки ёғочдан тикланган уйлардан иборат бўлган. Сарой Беркада Темир Хўжа, Ўрду Малик, Келдибек, Хайр Пўлат номларида тангалар зарб қилинган ва муомалага чиқарилган.

Экспедиция аъзолари буюк Соҳибқирон изидан бориб, яна бир кўхна шаҳар ҳаробаси – ўрта аср манбаларида Белжамин (Бельджамен) номи билан юритилган Водян археологик ёдгорлиги билан танишишга муссар бўлди.

Белжамин шаҳри Амир Темурнинг Тўхтамишга қарши юришлари муносабати билан ҳам ёзма манбаларда тилга олинган, яъни Терек дарёси соҳилидаги 1395 йилги зафарли жангдан сўнг Соҳибқирон бу ерда тўхтаган. У Белжаминдан чиқиб, Дон дарёсининг куи оқими бўйлаб юрган. Ушбу археологик ёдгорлик хозирги Волгоград вилоятининг Дубовка шаҳри яқинида, Волга дарёси куи оқимининг ўнг қирғоғида жойлашган. Анча вактдан бери олиб борилаётган археологик изланишлардан аён бўлишича, мазкур шаҳар ҳам ҳудди Сарой Боту ва Сарой Беркага ўхшаб бунёд этилган: шаҳар – кўчалар билан бўлинган уй-жой даҳаларидан иборат бўлган. Ҳудудда уй-жойлардан ташқари турли маҳобатли иморатлар ҳам қурилган. Ана шулардан бири Белжамин жомеъ масжиидидир (ўлчами 26x35 м). Масжиднинг яхши сақланган минора асоси ва меҳроби кавлаб очилган.

Яна бир археологик иншоот – мураккаб иситиш тизимиға эга бўлган жамоат ҳаммомидир. У тўққизта хонадан ташкил топган ва улар ер ости сопол қувурлари орқали сув билан таъминланган.

Археологларнинг фикрича, тилга олинган Олтин Ўрда шаҳарлари лойиҳасида ўртаосиёлик меъмор ва курувчиларнинг иштироки, услубини кузатиш мумкин. Масалан, йўлларга сопол ёки ғишт парчалари тўшашда, йўл четида ёки ўртасидан сув ариклари ковлашда Мовароуннаҳр қурилиш анъаналарининг таъсирини сезиш қийин эмас. Биз сафар чоғида танишган Олтин Ўрда шаҳарларининг деярли барчаси бир вактнинг ўзида текислик жойда тикланган, улар остида олдинги қурилиш қатламлари йўқ. Улар учун яна бир умумийлик шуки, мазкур шаҳарларнинг барпо этилишида Хуросон ва Хоразм меъморчилик усулларидан ҳам унумли фойдаланилган.

ТЕРЕК ДАРЁСИ СОХИЛИДА

Амир Темур Кондурча жангидан роппа-роса уч йил ўтиб, Олтин Ўрда масаласини узил-кесил ҳал этиш учун Тўхтамишга қарши янги юриш бошлади. 1394-1395 йилги қишлоғни Кулзум (Каспий) денгизи бўйидаги Маҳмудобод деган жойда ўтказди. 1395 йил 28 февралда Соҳибқирон Каспий денгизи қирғоғи бўйлаб Дарбанд томон юра бошлайди. Ибн Арабшоҳнинг ёзишича, Дарбанд ҳокими Ширвоншоҳ Иброҳим Дарбандий Амир Темурга содиклигини намоъиш этиб, унга пешвоз чиқади. Ҳатто Амир Темур исмини хутбага кўшиб ўқитади ва унинг номи битилган тилла ҳамда кумуш тангалар зарб эттиради. Бундан мамнун бўлган Соҳибқирон Иброҳим Дарбандийга кимхоб либос ёпиб, тахтини қайтариб беради ва Дарбанд дарасини қўриқлашни ҳам унга топширади.

Соҳибқирон жанг олдидан Тўхтамишхон ҳузурига Шамсиддин Олмаликийни тинчлик таклифи билан юборади, бироқ Олтин Ўрда хони Амир Темурга рад жавобини бергач, юриш давом эттирилган. Қўшинлар Дарбанд орқали Эльбрус тоги этакларига етиб боради.

Манбаларда ёзилишича, лашкар шу ерда Тўхтамишхон тарафдорлари бўлмиш «кайтага» деган этник гуруҳ билан тўқнаш келади. Уларнинг бир қисми мўғул тилида, бир қисми турк тилида сўзлашган. Бу гурухнинг этник жиҳатдан кимлар экани номаълум бўлиб қолмоқда. Бир тахмин шундан иборатки, бу этник гуруҳ туркий тилнинг кипчоқ қавмига мансуб қумиклар бўлиши мумкин. Қумиклар тил жиҳатидан чиғатой (эски ўзбек) тилига жуда яқин туради. Тарихчиларнинг фикрича, бу этник гуруҳ эрамиз бошларида Дарбанд атрофларига келиб ўрнашган қадимий маҳаллий элатлардан бири эди.

Амир Темур лашкари Терек дарёсидан ўтиб, Жулат деган жойда тўхтайди. Озиқ-овқат, ем-хашак олинади ва қўшин кўрикдан ўтказилади. Соҳибқирон истеҳкомларни мустаҳкамлайди, кароргоҳ олдига бир эмас, иккитадан чукур қаздирадики, бу тадбирлар қўшинни жангга пухта тайёрлаш учун амалга оширилган эди. Бу ҳақда Шарофиддин Али Яздий шундай ёзади: «*Амир Темур мустаҳкамланган қароргоҳ учун жой танлаши ва шу ерда катта қўшинни экойлаштиришини ўз тавасиларига буюорди. Қароргоҳнинг атрофида ҳандақлар қазилиб, қозиқлар қоқилди, бу ҳандақлар кетидан иккинчи – ташқи ҳандақлар қазилди*».

«Терек жанги» номи билан машҳур бўлган бу тўқнашув Шимолий Кавказдаги Терек ва Кума дарёлари оралиғидаги Нўғай даштида 1395 йил 15–17 апрель кунлари бўлиб ўтади. Бу Амир Темурнинг Олтин Ўрда хони Тўхтамиш билан учинчи, ғоят кескин жанги эди. Унда икки томондан тахминан 450–500 минг киши қатнашган. Амир Темур яна Кондурча жангидаги тактикасини ишга солади. Тўхтамишхон ҳам айнан Соҳибқироннинг усулини кўллади. Лекин Амир Темур 7 та кўл (лашкар қисмлари)дан иборат ягона жанговар кучни марказлашган ҳолда бошқариб, оғир ва ҳал қилувчи галабани кўлга киритади.

Тарихчилар хабарича, Соҳибқирон қўшини Тўхтамишхоннинг қароргоҳида ташлаб кетилган жуда катта бойлик ва хазинага ҳам эга бўлади. Олтин Ўрда хони бутун мулки, хонумонидан, салтанатидан айрилади. У энди ҳеч қачон хонлик тахтига қайта ўтира олмайдиган ҳолатга келтирилган эди. Амир Темур Тўхтамишхонни қувиб, Русиянинг Рязань вилоятигача бориб, Елец шаҳрини ишғол этган.

Энг асосийси, Амир Темурнинг 1391–1395 йиллардаги жанглари Евроосиёни, хусусан, Византияни мўғуллар босқинидан – мукаррар ҳалокатдан қутқаради. Бинобарин, XIV аср охири ва XV аср бошларида Испания қироли элчиси, Франция ва Англия қироллари вакиллари Соҳибқирон давлатининг пойтахти Самарқандга келиб, дипломатик фаолликни кучайтириши бежиз эмас эди.

КАВКАЗ БЎЙЛАБ

Қозоғистон ва Россия орқали Кавказ республикаларига йўналтирилган сафаримиз, юқорида айтганимиздек, Соҳибқирон босиб ўтган йўллар бўйлаб амалга оширилди. Маълумки, Амир Темурнинг бу худудларда бўлиши билан боғлиқ тарихий хотиралар, айrim ёдгорликлар ва жой номлари ҳозиргача сақланиб қолган. Сафар мобайнида ана шундай жойлар ва иншоотлар тарихини ўрганишга ҳам ҳаракат қилинди. Жумладан, Догистонда «Темир-Ханшура» деган жой бор, асл маъноси «Темирхон шахри» демакдир. Мазкур калья-истехком Амир Темур номи билан узвий боғлиқ. Сабаби Кавказ юриши пайтида, яъни, 1394–1395 йиллари Соҳибқирон шу ерда тўхтаб, ўз ҳарбий қароргоҳини тиклаган. Кейинчалик калья-шахарга айланган Темир-Ханшура Догистон халқлари тарихида алоҳида аҳамият касб этган. У 1860 йили Догистон вилоятининг маркази, сўнгра – 1921 йили Догистон муҳтор республикаси пойтахти бўлган, 1924 йили номи Буйнакск деб ўзгартирилган.

Олтин Ўрданинг Шимолий Кавказдаги бир неча шахри ҳаробалари ҳозиргача сақланиб қолган. Булар Маджар, Куйи Жулат, Юкори Жулат ёки Татартюп каби

шахарлар бўлиб, мазкур кентлар Олтин Ўрда савдо-иктисодий жараёнларида фаол роль ўйнаган.

Соҳибқирон Амир Темурнинг Кавказдаги севимли масканларидан бири – бу табиати ғоят гўзал Тоғли Қорабоғдир. Амир Темур табиатнинг бу сўлим гўшасида тўрт бора қишилаган ва ўрдагоҳ бунёд эттирган. Кичик Осиё ҳукмдорларининг элчилари мадад сўраб, мазкур ўрдагоҳга ташриф буюрган. Ҳатто Византия ҳокими-нинг ноиби, Франция қироли, Султония шаҳрининг католик миссионерлари нажот сўраб Соҳибқиронга мурожаат этган ва Турон султони уларга мурувват кўрсатган.

Тарихий манбалардан бизга маълумки, Тоғли Қорабоғ ўлкасида Бобур Мирзонинг катта бобоси, Турон ва Хурсон ҳукмдори Абусаид Мирзо ҳам бир неча маротаба бўлиб, Ирок, Эрон, Кавказорти мамлакатларида тартиб ўрнатган.

Абусаид Мирзо айни шу ўлкада душманлар томонидан ўлдирилган. Таассуфки, Амир Темур бобомизнинг хорижий давлат арбоблари ва элчиларини қабул қилган саройи жойлашган ўрда энди йўқ, вакт ўз ишини қилган – ўрда билан боғлиқ бирор ёдгорлик қолмаган. Бунда, шубҳасиз, сиёсий аҳволнинг бекарорлиги ҳам ўз таъсирини ўтказган кўринади.

Экспедициямиз сафарининг режасида, одатдагидек, ушбу жойлардаги буюк алломаларнинг қабрлари ва қадамжоларини зиёрат қилиш ва ўрганиш ҳам кўзда тутилган эди. Ана шу мақсаддан келиб чиқсан ҳолда, Кавказ ўлкаларида ўзининг бетакрор, умрбокий асарлари туфайли асрлар оша яшаб келаётган улуғ шоирларнинг номи, хотираси билан боғлиқ жойлар дикқат-эътиборимизда бўлди. Жумладан, Боку ва

Ганжа шаҳарларидағи Низомий Ганжавий, Бокудаги Мұхаммад Фузулий ёдгорликлари шаклий маҳобати, меъморий жиҳатдан ўзига хослиги ва мазмундорлиги билан ҳаммамизда ёрқин таассурот қолдирди. Ҳазрат Алишер Навоийга қардош озарбайжон ҳалқининг катта эҳтироми тимсоли сифатида мамлакат пойтахтидаги Озодлик кўчаси билан туташ хиёбонда қад кўтарган муҳташам ҳайкални кўриб, қалбимизда ғурур ва ифтихор туйғулари жўш урди.

Махаллий зиёлилар ушбу ҳайкалнинг очилиш маросимида Ўзбекистон раҳбари Ислом Каримов ва Озарбайжон раҳбари Илҳом Алиев иштирок этганини хурмат билан сўзлаб беришди.

Махачқальда эса бизга машҳур шоир ва жамоат арбоби Расул Ҳамзатовнинг ижодий мероси авайлаб сақланаётган хонадонда бўлиш насиб этди. Шоирнинг оила аъзолари билан қизиқарли сухбат ўтказиб, китоблар ва совғалар айирбошланди.

МАШҲУР МЕЪМОРИЙ ОБИДАЛАР

Навбатдаги зиёрат жойларимиз Арманистон орқали Эрон мамлакатининг Табриз, Техрон, Нишопур ва Машҳад каби тарихий шаҳарлари бўлди.

Эрон Ислом Республикаси пойтахти Техрон замонавий йирик шаҳар бўлиб, XII асрда Рай шахри яқинида барпо қилинган. XIV асрдан бошлаб йирик савдо-иқтисодий марказга айланган. Табриз эса Эроннинг шимоли-шарқидаги Шаркий Озарбайжон оstonи (вилояти)нинг маъмурий марказидир. Табризга III-IV асрларда сосонийлар томонидан асос солинган. Алишоҳ жомеъ масжиди (1310–1320), Кўк масжид (1465) каби тарихий-меъморий ёдгорликлари бор.

Эроннинг шимоли-шарқидаги яна бир тарихий шаҳар Нишопур (Найсабур) III аср ўрталарида сосонийлар шоҳи Шопур томонидан бунёд этилган. Ҳозирда Ҳурросон вилояти маркази. Умар Ҳайём, Фаридуддин Аттор каби алломаларнинг киндик қони тўкилган бу табаррук шаҳарда ҳар икки буюк инсоннинг маҳобатли мақбараси сакланган.

Машҳад шаҳри («шаҳид дағн этилган жой» деган маънони билдиради) Темурийлар ва Сафавийлар даврида юксак даражада ривожланган. Бу ерда дунёга машҳур кўплаб меъморий ёдгорликлар мавжуд: Имом Ризо мақбараси (IX аср), Гавҳаршодбегим масжиди (1405–1418), шаҳар яқинидаги Фирдавсий мақбараси шулар жумласидандир. Булар орасида Амир Темурнинг ўғли, Ҳирот ҳукмдори Шоҳруҳ Мирзонинг аёли Гавҳаршодбегимга аatab қурилган масжид алоҳида диккат-эътиборга лойик. Мазкур бино темурийлар даврига хос улкан бунёдкорлик санъатидан шаҳодат берувчи ажойиб меъморчилик обидасидир. Масжиднинг шимол томонида Имом Ризо мақбараси, шарқида мадраса, гарбида карвонсарой қад кўтарган.

Имом Ризо мажмуасида маҳсус бунёд этилган Куръони карим музейида Бобур Мирзо ихтиро этган алифбода унинг ўзи томонидан кўчирилган Куръони карим нусхаси ва Шоҳруҳ Мирzonинг ўғли, машҳур хаттот Бойсункур Мирзо томонидан кўчирилган Куръони карим сақланади. Бугунги кунда Андижондаги «Бобур ва жаҳон маданияти» музейида ҳам Бобур Мирзо ихтиро қилган алифбода кўчирилган Куръони карим ва Ҳалифа Усмон даврида китобот килинган нодир Куръони карим нусхалари сақланмоқда. Улар мозийгоҳнинг зийнати бўлиб, зиёратчилар эътиборини қозонмоқда.

Эслатиб ўтиш жоизки, Гавхаршодбегимга бағишиланган иккинчи меъморий мажмуа Афғонистонда йигирма йил давомида (1418–1438) бунёд этилган. Ушбу мажмуа Ҳиротдаги Мусалло майдонида жойлашган бўлиб, масжид, мадраса ва темурийлар авлодлари мақбарасидан иборатдир. У ерда Гавхаршодбегим ва унинг ўғли Бойсункур Мирзо дафн этилган. Даҳма ёнига кейинрок Ҳусайн Бойқаро маҳобатли мадраса ва хонакоҳ курдирган. Гавхаршодбегимга аталган ҳар икки мажмуа машҳур меъмор Қавомиддин Шерозий раҳбарлигига қуриб битказилган. Машҳур Мусалло майдони ва унинг атрофида Абдураҳмон Жомий, Алишер Навоий, Камолиддин Беҳзод, Султон Ҳусайн Бойқароларнинг ҳам қабр-мақбаралари жойлашган.

Эрон ҳудудидаги яна бир зиёратгоҳ туркман халқининг буюк фарзанди Маҳтумкули (Фироғий)нинг Гургон вилояти марказидан 120 километр наридаги Актўқай қишлоғида жойлашган қабр-мақбарасидир. Дунёқараши, ижодининг халконалиги билан барча туркий эл-элатлар орасида катта шуҳрат қозонган шоир асарларини ўзбек китобхонлари ҳам севиб ўқийдилар. Шу маънода, биз Фироғий қабр-мақбарасини топиб, унинг ҳолати билан танишишни, шоири ҳакқига дуои фотиҳа қилишни ўзимизнинг бурҷимиз деб хисобладик.

Актўқай чекка овул бўлишига қарамай, Маҳтумкулига муҳташам ёдгорлик ўрнатилган, мақбара остига шоир ва унинг отаси Давлатмамад Озодийга мармардан сафана тоши қўйилган.

Маълумки, Марказий Осиё тарихида кўхна Хоразм қадимий тамаддун марказларидан бири сифатида алоҳида ўрин тутади. У Амир Темур тахтга чиққан даврда Олтин Ўрда таркибида эди. Хоразм ҳудуди

1388 йили узил-кесил Соҳибқирон тасарруфига ўтади. Шу тариқа Амир Темур Мовароуннахр, Хурросон ва Хоразмни бирлаштириб, ягона марказлашган кучли давлатни вужудга келтирдики, бу жараён мазкур худудлардаги ҳалқлар ҳаётида ижобий аҳамият касб этди.

Хоразмнинг X–XIV асрлардаги пойтахти Кўхна Урганч (Гурганд) савдо-иктисодий ва маданий марказлардан бири ҳисобланган. 1333 йили машҳур араб сайёхи Ибн Баттута Гургандча бўлган. XII–XIV асрларда бунёд этилган ёдгорликлар ўз гўзаллиги ва меъморий ечими билан ҳозир ҳам кишини ҳайратга солади. Биз бу тарихий масканда бўлиб, Нажмиддин Кубро мақбараси, Кутлуг Темур жомеъ масжиди минораси, Тўрабек хоним мақбарасини зиёрат қилдик.

Ибн Баттутанинг ёзишича, Тўрабек хоним Олтин Ўрда хони Мухаммад Ўзбекхоннинг қизи, Урганч ҳокими Кутлуг Темурнинг хотини, Кутлуг Темур эса Ўзбекхоннинг холаваччаси эди. Нажмиддин Кубро мақбараси эса кубровийлик тариқатининг асосчиси бўлган улуғ ватандошимиз хотирасига бағишлаб қурилган. Нажмиддин Кубро 1221 йили мўғул босқинчиларига қарши жангда қаҳрамонларча ҳалок бўлганини барчамиз яхши биламиз.

Экспедициямизнинг навбатдаги илмий сафари натижасида қўлга киритилган тарихий маълумотлар бир ҳақиқатни такрор тасдиклаб беради. Яъни, Соҳибқирон Амир Темурнинг 1391–1395 йиллардаги Волга бўйига юришлари Русия худудини мўғул хукмронлигидан ҳалос этишда ҳал қилувчи роль ўйнади. Шунингдек, ушбу жанглар Эрон, Кавказорти, Ўрта Осиё мамлакатларида мўғул истилосининг бутунлай тутатилишида асосий омил бўлди.

БУЮК БУНЁДКОР

Айни вақтда Сохибқирон Амир Темур Турон давлати сарҳадларини мустаҳкамлаш ва юрт ободончилиги йўлида улкан бунёдкорлик ишларини амалга ошириди. Шунинг учун ҳам Темур ва темурийлар даври дунё олимлари томонидан ўзига хос Ренессанс — Уйғониш даври деб аталади. «Қай бир жойдан бир ғишт олсам, ўрнига ўн ғишт қўйдирдим, бир дараҳт кесдирсам, ўрнига ўнта кўчат эктиридим», деб таъкидлайди Сохибқирон бобомиз.

Амир Темур Мовароуннахр ва Туркистон шаҳарлари қатори Султония, Қорабоғ, Бағдод, Дарбанд, Бойлакон каби бир қатор шаҳру кентларни ва бошқа жойларни ҳам обод этгани тарихий манбалардан яхши маълум. Муарриҳларнинг эътироф этишича, Темур ва темурийлар ҳукмронлиги даврида кўплаб мадрасалар, хонақоҳлар, ҳаммомлар, жомеъ масжидлари, боғу бўйstonлар, карвон йўлларида работлар, қалъа ва кўприклар бунёд этилган.

Экспедициямизнинг кариб бир ой давом этган сафари давомида турли мамлакат ва миллат вакиллари билан бўлган учрашув ва мулоқотларимизнинг асосий мавзуини кўхна тарихга эга Ўзбекистонимиз мустақиллик йилларида Президент Ислом Каримов раҳбарлигида олиб борилаётган кенг кўламли сиёсий, ижтимоий, иқтисодий ва маънавий соҳалардаги янгилинишлар туфайли таниб бўлмас даражада ўзгариб, юксалиб бораётгани ҳақидаги сухбатлар ташкил этгани бизга айниқса катта ғурур бағишлайди.

«Ўзбекистон овози» газетаси,
2013 йил 9 февраль

АНДИЖОНДАН БЕНГАЛИЯГАЧА

«Бобурнома» ва бобуршунослик хақида

Нафакат ўзбек адабиёти, балки умумтуркий адабиётда «Бобурнома»чалик маълум ва машхур ёзма обида кам топилади. Бу том маънода қомусий мазмун-мундарижага эга бўлган асар. У ўзида уч мамлакат: ҳозирги Ўзбекистон, Афғонистон ва Ҳиндистонни бирлаштиради. Унда мазкур худудларнинг табиати, иқлими, ҳайвонот ва наботот олами, шунингдек, турли-туман ҳалклар, қабилалар, турли табака кишилари – ҳарбийлар ва деҳқонлар, табиблар ва ҳунармандлар, ҳокимлар ва уламолар, фуқаро ва зодагонларнинг ҳаёти, уларнинг моддий ва маънавий турмуш шароити, урф-одатларию маросимлари ўзининг ҳақконий ифодасини топган. Муҳими, китоб ўз даврининг қиёфасини энг кичик тафсилотларигача аниқ ва қизикарли бир йўсинда баён қиласди. Унда мавҳум ёки пуч тахмину фаразлар учрамайди. Муаллиф ҳақиқатни ифодалашда на ўзини, на яқин хеш-акраболарини, на ўзгаларни, на дўйсту муҳолифларини аямайди. Барчага бирдай ростгўй ёндашади. Унга барча баробар. Бундан ташқари, «Вақоеъ» муаллифи қомусий билим эгаси бўлиши баробарида, зукко ва инсонпарвар адиб, улуғ саркарда ва улкан салтанат соҳиби, подшо ва факир, фотих ва дарвешликка толиб бўлган нозиктаъб шахс эди.

Илмий ва бадиий бунёдкорликда ниҳоятда кам учрайдиган ҳодиса – аниқлик билан тасвирийлик, тафаккур билан қалб омухталашган. Бу китобда ғалати

бир ҳолни, яъни юкорида зикр этилганидек, машрик кишисига хос зарофат билан мағриб аҳли тафаккурига хос аниклик кўшилиб кетганини кузатиш мумкин. Шунинг учун ҳам «Бобурнома»ни умуминсоний маданий обида дейиш жоиз. Негаки, Бобур сингари инсонлар факат муайян бир иқлим ё худуд намояндаси эмас, балки умумбашарий сиймолар сафига муносиб.

«Бобурнома» чинакам ҳайратангиз бир асар. Бундай ишни ўзини бус-бутун илмга, ижодга бағишилаган кишигина ярата олади ва ўзининг шу каби биргина асари билан жаҳон фани ва маданияти тарихида номини абадий қолдириши мумкин. Зеро, Андижондан Бенгалиягача бўлган неча минг чакирим тупрок йўлни, тогу тош, сахрою чўлларни гоҳ отлиқ, гоҳ пиёда босиб ўтган, кўлида қиличу шамшир билан «урхо-ур, сурҳо-сур» курашган фотих, ғолиб ва мағлуб саркарда ёзган бу хотираларни. Ёзганда ҳам, факат «Вокеанома» эмас, ҳар бир сатри дарду алам билан суғорилган пурмаъно ва гўзал шеърлар, диний ва дунёвий рисолалар, ажойибу гаройиб таржималар ҳам яратган улкан бир мутафаккир қоғозга туширган. Ўзига Тангри ато этган бор-йўғи 47 йилу 10 ойлик умрида шундай маҳобатли бир мерос колдирган.

«Бобурнома» – Мовароуннахрдан Германиягача, Ҳиндистондан Франциягача, Буюк Британиядан Покистонгача ўнлаб мамлакатларга ташриф буюрган ва ҳамиша ҳар жойда илиқ кутиб олинган беш асрлик ноёб адабий-тарихий обида. Мовароуннахр, Ҳурросон замини ва муаззам Ҳинд тупроғида танилган, бу юрту элатларни забт этган қудратли темурийзода, подшоҳ Заҳириддин Муҳаммад Бобур кейинчалик Бобурийлар деб аталмиш бутун бир улуғвор салтанатни ўз ижоди, шеърияти ва тарихий обидалари, маърифати, алалхусус,

«Бобурнома»си билан мустаҳкамлади. Қилич кучи билан маҳв этолмаган қалбларни, элу элатларни ўз сеҳрли каломи, инсоний самимияти ила забт эта олди. Тилларда бунчалик достон бўлган, хукмдор бўлса-да, барчанинг қалбидан меҳр қозонган бошқа бир фотих, жаҳонгир кўрганми бу кўхна дунё!

Ҳа, Бобур подшоҳнинг қадами етмаган жойларга, иқлим ва мамлакатларга маърифатпарвар шоир ва инсон ҳазрат Бобурнинг овози, асарлари етиб борди. «Бобурнома» Ғарбий Европадаги асосий тиллар – голланд, инглиз, француз, немис тилларига, шунингдек, кунчиқарда япончага, ўртада турку русчага бир неча мартараб ўғирилгани, қайта-қайта чоп этилганини кўз олдимиизга келтирсак, ғоят қамровдор бир манзара ҳосил бўлади. Фақат таржимагина эмас. Мазкур воқеаноманинг бир қанча қўлёзмалари, айниқса, Ҳайдаробод ва Қозон нусхалари устида олиб борилган илмий тадқиқотлар, минглаб мақола, луғат ва рисолалар ҳисобга олинса, асарнинг ўзидан юзлаб баробар зиёд илмий маҳсулот дунё юзини кўрган.

Эҳтимол, айрим хорижий ўлкаларда яқин-яқинларгача дунёда ўзбек деган улуг бир миллат, Ўзбекистон аталмиш қадимий ва мафтункор бир диёр борлигини билишмагандир. Аммо шавкатли Амир Темур билан унинг бешинчи зурриёди бўлмиш буюк маърифатпарвар Захириддин Мухаммад Бобурни, уларнинг оламшумул тарихий ишларини билмаган инсонни маърифатли дунёдан топиш амримаҳол.

«Бобурнома» («Воқеоти Бобурий», «Вакоевъ» деб ҳам юритилади) тўрт марта форсийда, тўрт мартадан инглиз, немис, француз, турк ва рус тилларида, бир марта голланд, итальян, хинд, урду, араб, япон, хитой,

поляқ, уйғур ва озарбайжон тилларида чоп этилганинг ўзиёқ унинг нечоғли машҳурлигидан далолат бериб турибди.

Шунингдек, Бобурнинг ҳаёти, шахси, ҳарбий ва давлатчилик ҳаракатлари, шажараси – аждод ва авлодлари, бобурийлар салтанати тарихи XVIII аср ўрталаридан бери Европа шарқшуносларининг дикқатини жалб этиб келади. Бобур Мирзо ҳакида турли тилларда рисола ва монографиялар, илмий маколалар, адабий асарлар ёзилган, луғатлар тартиб берилган, ҳарбий юришлари ҳакида хариталар тузилган.

Унинг бой ва серкирра меросини йиғиш, асарлари матнини аниқлаш бўйича қилинган ишлар ҳам таҳсинга сазовор. «Бобурнома»ни Витсен, Д.Дербело, Жон Лейден, Вильям Эрскин, Р.М.Калдекот, С.Лейн Поул, Э.Холден, М. Элфинстон, Жан Луи Бакье-Грамонт, Г.Эллиот, В.Х.Мореланд, А.Паве де Куртейл, Ф.Г.Талбот, А.Денисон Росс, Аннетта Бевериж, Ҳенри Бевериж, Ҳ.Лэмб, А.Шиммелль, М.В.Кўпрулузода каби дунё тан олган йирик шарқшунослар ҳамда Н.И.Ильминский, Н.Н.Пантусов, В.В.Вяткин, Н.И.Веселовский, В.В.Бартольд, А.Н.Самойлович, М.Салье, А.А.Семёнов, А.Ю.Якубовский, И.В.Стеблева, Ахмад Али Кўҳзод, Абдулҳай Ҳабибий, Гулчин Маоний, Шафиқаҳоним Ёркин, Зокир Ҳусайн, Нурул Ҳасан, Муни Лаъл, С.А.Шарма, Р.П.Трипатхи, П.Саран, Канунга, Мухиббул Ҳасан сингари машҳур рус, ҳинд, афғон олимлари тадқик этган.

Бобуршунослик илмида ўзбек мутахассислари катта ишларни амалга оширган. Чунончи, Абдурауф Фитрат, Ҳ.Ёқубов, Я.Фуломов, В.Зоҳидов, И.Султон, А.Қаюмов, А.Ҳайитметов, Ф.Сулаймонова, П.Ҳасанов, Н.Маллаев, С.Ҳасанов, Ҳ.Назарова, П.Қодиров, С.Жамолов, С.Жа-

лилов, Б.Валихўжаев, Р.Набиев, А.Абдуғафуров, Б.Насимов, Н.Комилов, Ҳ.Қудратуллаев, Ж.Шарипов, М.Холбеков, А.Абдуазизов, Б.Маматов, С.Раҳимов, Ф.Хўжаев, Л.Хўжаева, Ҳ.Султонов, Ф.Салимова, С.Шукруллаева ва яна бошқа кўплаб олим ва адилар Бобур асарларини тарихий, адабий, жўғрофий, таржимавий ва лугавий манба сифатида тадқиқ этганлар. Сабоҳат Азимжонова бобурийлар давлатининг ташкил топиши ҳақидаги илмий ишлари билан танилган. Профессор Файбулла ас-Салом, Неъматилла Отажонов каби олимлар «Бобурнома»нинг хорижий таржималари тарихини чуқур ўрганиб, алоҳида монография яратган.

Хулоса қилиб айтганда, бобомиз Бобурнинг ҳаёти, давлатчилик фаолияти, адабий ижоди орадан 500 йилдан ортиқ вакт ўтган бўлса-да, жаҳон жамоатчилигининг эътиборини ўзига тортиб келмоқда. Бундай буюк шарафга муносиб шахсларни башарият кам кўрган.

2013 йил

ЗАҲМАТКАШ ОЛИМ

Адабиёт ва тарих фанлари силсиласида, мана, бир ярим асрдан ошдики, «бобуршунослик» соҳаси ўсиб чиқди. Гарчи, Бобур ўзимизнинг ватандошимиз бўлса ҳам, кишига таъсир қиласидаги жойи шуки, фаннинг бу соҳасига чет элда асос солинди, десак, янглишмаган бўламиз. Шўролар даврида гарчанд «Бобурнома» рус ва ўзбек тилларида нашр қилинган бўлса-да, уларда бу шоҳ асар муаллифининг адабий-бадиий меросига кўпроқ ургу берилди. Унинг шахси, давлатчилик фаолияти масаласида «босқинчи» («завоеватель»), «қонхўр Темур авлоди» деган ҳақоратомуз тамга босилди.

Шундай мураккаб бир шароитда ҳам айrim олимларимиз бобуршунослик билан шуғулланишга, Бобур шахси ва фаолиятига имкон қадар холис баҳо беришга уринишга ўзида журъат топа олди. Чунончи, атоқли олима Сабоҳат Азимжонова Ўзбекистонда биринчилардан бўлиб тарих фанида Бобурнинг Андижон – Фарғонадаги фаолияти хусусида бальзи тадқикотлар килди (1950 йиллар), кейинрок (1970 йиллар) унинг Ҳиндистондаги фаолияти билан жиддий шуғулланди. Таниқли адабимиз Пиримкул Қодиров даврнинг таҳдиду зуғумларига қарамасдан, машхур «Юлдузли тунлар» ва «Авлодлар давони» тарихий романларини яратди.

Ўзбекистонимиз мустакилликка эришиб, ўз тақдирини ўз қўлига олгач, ижтимоий-маънавий ҳаёти-мизнинг кўп соҳалари қатори бобуршуносликка ҳам кенг йўл очилди. Натижада қиска фурсатда бир қатор тарихчи ҳамда адабиётшунос олимлар етишиб чиқдики, улар Заҳириддин Муҳаммад Бобурнинг кўп қиррали ҳаёти, у яшаган тарихий давр, унинг давлатчилик фаолияти, илмий-адабий мероси билан жиддий шуғулланди ва шунинг самараси ўларок кўплаб салмоқли илмий ишлар дунё юзини кўрди.

Ана шундай бобуршунослардан бири Андижонда туғилиб вояга етган тарихчи олим Сайфиддин Жалиловдир. У кишининг Бобур хақидаги биринчи илмий-оммабоп мақоласи улуғ аждодимиз таваллудининг 475 йиллиги олдидан атоқли олим Иброҳим Мўминов ташаббуси билан 1958 йили апрель ойида ўтказилган илмий анжуманга бағишлиб «Андижанская правда» газетасида босилган. Газетанинг салкам бир сахифасини эгаллаган ушбу маколада Бобурнинг ҳаёт йўли, ўша даврдаги тарихий шароит ва Ҳиндистонда бобурнийлар сулоласи ўрнатилгач, бу ерда янги тамаддун (цивилизация)га асос солинганига биринчи марта эътибор қаратилган.

Тарихимиз қора рангга бўялган, маданий мерос ва қадриятларимиз ҳакида ижобий фикр билдириш мутлақо тақиқланган бир шароитда, «босқинчи» деб юритилган Бобурнинг Ҳиндистонда янги тамаддун бошлаб бергани ҳакида ёзиш ва катта илмий анжуманда гапириш албатта осон эмас эди. Ваҳоланки, Сайфиддин Жалилов ўша йиллари Андижон давлат педагогика институтида номи ҳали фанда маълум бўлмаган ёшгина ўқитувчи эди.

Шундан буён қанча сувлар оқиб ўтди – собиқ сиёсий тузум ўрнида мустақил Ўзбекистон даври бошланди ва ҳаётимизнинг барча жабхаларида, жумладан, маънавий ҳаётимизда ҳам туб ўзгаришлар рўй бериб, бобуршунослик ҳам фаннинг бутунлай янгича маъно касб этган нуфузли соҳасига айланди.

Бу давр ичидаги Сайфиддин домла Бобур таваллуд топган Андижонда вояга етган тарихчи-бобуршунос олим сифатида танилди.

Сайфиддин аканинг қаламига мансуб чоп этилган алоҳида китоблардан ташқари Бобур ва у яшаган давр тарихига бағишиланган 150 га яқин илмий ва илмий-оммабоп мақолалар домланинг салоҳиятидан сўзлаб турибди.

Айниқса, мустақиллик йилларида нашр этилган «Бобур ва Андижон» (1993 йил), «Бобурнинг Фарғона давлати» (1995 йил), «Бобур ва Юлий Цезарь» (2001 йил) номли китоблари бобуршуносликка доир илмий ишлар каторидан мустаҳкам ўрин олди.

1992 йили Андижонда Бобур номидаги Ҳалқаро жамғарма ташкил этилгач, Сайфиддин Жалилов унинг раёсат аъзоси этиб сайланди ва ўз асарлари, илмий-оммабоп мақолалари билан мамлакатимиз илм ахлининг эътиборига тушди.

Олимнинг «Бобур ва Юлий Цезарь» (киёсий ҳаётнома) номли 20 босма табоқдан иборат асари бобуршуносликда, айтиш мумкинки, алоҳида бир янгилик бўлди. Тарихдан маълумки, қадимги юонон адиби Плутарх (46–120 йиллар) тарихни ўрганишнинг киёсий ҳаётнома услубига асос солган эди. У қадимги Юнонистон ва Римда ўтган машҳур кишилардан 46 тасини танлаб олиб, улар ҳаётини киёсий ўрганган. Плутарх ўз асарида қадимги давлат арбобларининг

ҳаёти, сиёсий фаолияти ва инсоний фазилатлари, шу билан бирга, шахсий иллатларини ҳам ҳаққоний ва холисона тасвирлайди. Қадимги Юнонистон ва Рим давлатларининг тарихи, адабиёти, фалсафаси, сиёсий аҳволи, маданияти билан шугулланадиган олимлар неча асрлардан буён Плутархнинг мана шу нодир асарига албатта мурожаат қиласидилар.

Сайфиддин Жалилов ҳам «Бобур ва Юлий Цезарь» асарини ёзиш учун Плутархнинг ўша машхур «Қиёсий ҳаётнома»сидан илҳомланган. Шуни алоҳида таъкидлаш лозимки, юртимизда Сайфиддин Жалиловгача ҳеч ким бундай жанрда асар яратган эмас. Шунинг учун ҳам олимнинг ушбу китоби мутахassisслар томонидан яхши баҳоланди. Матбуотда китоб ҳақида эълон қилинган тақризларда айрим Ғарб олимлари Бобур фаолиятига баҳо бериб, «Агар яшаган даврлар оралиғидаги катта тафовут ҳисобга олинмаса, у ўрта асрнинг Юлий Цезаридир» дегани таъкидланади (Қаранг: «Икки саркарда». «Ўзбекистон адабиёти ва санъати», 2002 йил 15 ноябрь). Шунингдек, мазкур асар қиёсий ҳаётнома яратишда янги услубдир, деб эътироф этилди. (Қаранг: «Тадқикотнинг янги услуби», «Ўзбекистон овози», 2003 йил 7 январь. А.Қаюмов, «Тарихни ўрганишда янги услуб», «Жаҳон адабиёти», 2005 йил. 6. 165–168- бетлар).

Бобуршунос олимнинг ушбу йирик асари 2004 йили Бобур номли Халқаро мукофотга сазовор бўлгани бежиз эмас.

Сайфиддин Жалилов Бобур халқаро экспедицияси ишларида ҳам фаол қатнашиб, Бобур қадамжолари – Афғонистон, Эрон, Покистон ва Ҳиндистон мамлакатларида бўлиб қайтди, Саудия Арабистонида бир неча марта илмий сафарда бўлди. Мана шу илмий

изланишлар натижасида кўлга киритилган турли манбалар ва шахсий таассуротлар самараси ўлароқ қатор илмий ва илмий-оммабоп мақолалар эълон қилди. Хорижга қилган сафарлари ҳақида эса «Саёҳатнома» номли маҳсус китоб ёзди (Т.: «Янги аср авлоди», 2002 йил).

«Одамнинг кимлигини билмоқчи бўлсанг, у билан сафарга чиқ», деган гап ҳалқимизда шунчаки пайдо бўлган эмас. Ҳакиқатан ҳам, сафарда кишининг бор фазилатию нуқсони намоён бўлади. Бизнинг Сайфиддин ака эса, ана шу сафарлар давомида факат фазилатлари билангина барчамизга ибрат бўлган, бунга сафарлар чоғида ўзим гувоҳ бўлганман. Сафарда самимий сухбатдош, ишончли ҳамроҳ, ҳазилмутойибани севадиган хушчакчак инсон сифатида танилди. Айни пайтда меҳрибон, ўта оддий, камтарин инсон, ҳар қандай вазиятда ҳам оғир-босиқлиги, хушфеълиги билан ҳаммамизни мафтун этди.

Ёдимда, Ҳиротда эканимизда машхур Мусалло майдони четидаги кадимий қабристонда Ҳусайн Бойқаро қабрини изладик. Машъум уруш туфайли бу жой ҳам озор топган. Ўша кунги ҳамроҳимиз афғон олими ёрдамида излаганимизни топдик. Не кўз билан кўрайликки, Ҳусайн Бойқаро номи битилган қимматли қора мармар тош тўрт парчага бўлиниб ётибди. Сайфиддин акамиз буни кўриб, росмана ҳўнграб йиғлаб юборди. Бу ҳолат ўзи ёзган мақоласида ҳам акс этган (Қаранг: «Ҳирот: Алишер Навоий қошида». «Мулоқот», 1994 йил, № 1).

Яқинда Сайфиддин домла Жалилов илмий асарлари библиографиясининг қўллэзмаси билан танишиб чиқдим. Унда тарихимизнинг турли мавзуларига багишланган 20 дан ортиқ китоб, 300 дан зиёд илмий, илмий-оммабоп мақолалар рўйхати келтирилган. Домла ўнлаб ҳалқаро ва республика илмий анжуманларида қатнашган, маъruzалар қилган. 2001 йили бобуршунос

сифатида Америка Кўшма Штатларига таклиф қилиниши унинг илмий салоҳияти чет элларда ҳам машхур эканидан далолат беради.

Мен Сайфиддин акани Тошкентда ўқиган йилларидан буён танийман. Иш фаолиятимиз турлича бўлгани сабаб узок вақт учрашмадик. Каминанинг иш фаолияти Андижонга кўчганидан кейин (ўтган асрнинг 60-йиллари ўрталаридан) домла билан яқиндан мулоқотимиз бошланди. Каминанинг Андижон шаҳар ижроия кўмитаси раиси сифатида ҳамюртимиз, буюк инсон Бобур Мирзо таваллудининг 500 йиллиги муносабати билан бошлаган хайрли ишларимизда домла Андижон педагогика институти доценти, қадимшунос, бобуршунос олим сифатида фаол катнашди.

Домланинг илмий ишлари рўйхати билан танишар эканман, шунга амин бўлдимки, илмий, адабий хаёт қайнаб турадиган марказдан узоқда, вилоятда туриб шунча илмий иш қилиш ҳар кимнинг ҳам қўлидан келавермайди. Чин фидойи инсон, ўз юртини, тарихини севган, уни қадрлаган олимгина бунга қодир бўлади. Ҳа, Сайфиддин домла ана шундай сермаҳсул ижодкор, ёшларга ҳам ибрат бўла оладиган ғайратли олим.

У кишининг илмий педагогик фаолияти ҳукуматимиз томонидан муносиб тақдирланди. «Шуҳрат» медали ва «Мехнат шуҳрати» ордени билан мукофотланди.

Домла Сайфиддин Жалилов бу йил 80 ёшга тўлмоқда. Ана шу умрнинг 60 йили жўшқин иш фаолиятига тўғри келди. Домла бугунги кунда ҳам Андижон давлат университетининг фахрий профессори, Жамғарма раёсатининг фаол аъзоси сифатида мудом ижодий меҳнат билан банд.

Биз домлага узок умр, оилавий баҳт, илмий-ижодий фаолиятда эса янги муваффакиятлар тилаб қоламиз.

2008 йил

БОБУР – САЙЁХ ВА ТАБИАТШУНОС ОЛИМ

Заҳириддин Муҳаммад Бобур – ўзбек мумтоз адабиётининг йирик намояндаси, ажойиб шоир, тарихнавис ва табиатшунос олимдир. Унинг қомусий асари – “Бобурнома” яратилгандан буён жаҳон зиёлиларининг дикқатини қарийб 500 йилдан бери ўзига жалб этиб келмоқда.

“Бобурнома”да мавжуд, лекин шу қунгача олимлар назаридан четда қолиб келаётган соҳа – Бобурнинг табиатшуносликка оид қарашлари тўғрисида алоҳида фикр билдириш жоиз.

“Бобурнома” муаллифи табиатшунос олим ва сайёҳ сифатида юз берган ҳодиса-жараёнларни шунчалар синчковлик билан кузатган ва ёритганки, уларнинг кўпчилиги бугунги кун илм-фан хулосаларига вобастадир. Бобур давлат арбоби бўла туриб, табиатшуносликнинг геология соҳасига тегишли ажойиб маълумотлар қолдиргани илм аҳлини то ҳануз таажжубга солиб келади. Олим ҳар бир соҳани аниқ билишга интилган ва ўзи яшаган, ҳукмронлик қилган Андижон, Кобул, Агра, шунингдек, бошқа бир қатор шаҳарларнинг табиати, аҳолисининг таркиби, жуғрофий тузилиши, маъмурий бўлиниши, тоғлари, сувлари, водий ва ўсимлик дунёси ҳақида кутилмаган маълумотлар бериши ҳам таҳсинга сазовор. Булардан ташқари, қазилма бойликлари, зилзилашунослик–сейсмология фанига доир турли ҳодисалар ҳақидаги ўз

фикр-мулоҳазаларини ҳам билдирганки, алломанинг бу фикрлари ҳамон ўз илмий қимматини йўқотган эмас.

Бобурнинг Фарғона водийси, Афғонистон, Ҳиндистоннинг геологияси, сейсмологияси ва фойдали қазилма бойликлари ҳақида ёзиб қолдирган маълумот ва материалларини тўплаш, илмий тартиб бериш, тадқик килиб тегишли хулосалар чиқариш учун бир неча йўналишдаги илмий экспедициялар фаолият кўрсатиши лозим, деб ўйлаймиз.

Бобур Фарғона водийси атрофидаги тоғларда, айникса, Еттикентда сочма ҳолда феруза ҳамда темир конлари бўлиши мумкинлиги тўғрисида ёзади. Ҳозирги геологлар водийнинг шимоли-ғарбида ҳакикатан ҳам темир конлари борлигини аниқлашган. Буларга Чокадамбулоқ, Ғова конларини мисол тариқасида кўрсатиш мақсадга мувофиқдир.

Ўзбекистонда ферузанинг ўттизга яқин маъдан конлари мавжуд. Уларнинг кўпчилиги Қурама тоғ тизмасининг жанубий ёнбағрида ва марказий Қизилқумда жойлашган. “Бобурнома”да Ўш шаҳри атрофидаги Бароқўх (Сулаймон) тогида қизил ва оқ рангда жило берадиган ажойиб тош борлиги, ундан ўша замонда ҳам пичоққа даста, камарга тўқа ва бошқа буюмлар ясалганлиги тўғрисида маълумотлар учрайди. Ҳозирги текширишлар шуни кўрсатадики, бу тошдаги жило берувчи кальций деярли юмшоқ, оқ рангли минераллардан ташкил топган. Қизғиши томирлар эса темир оксидлари таъсиридан рангланади. Бизнинг замонамизда бу тошдан қимматли қурилиш материаллари сифатида фойдаланилмоқда.

Бобур Хўжанднинг шимолида Муту-Гил (ҳозирги Оқур) тоғида феруза ва бошқа маъдан конлари мавжуд деб таъкидлайди. Дарҳақиқат, ўша жойларда

ферузадан бошка яна қўрғошин, рух, кумуш, олтин, вольфрам каби маъданлар борлиги аникланган.

Улуғ ватандошимиз Афғонистоннинг ер усти тузилиши ва ер ости бойликлари ҳакида ҳам қимматли маълумотлар беради. Чунончи, Бобур “Бобурнома” (1960 йилги нашри)нинг 193-бетида: “Кобул вилоятида 14 та туман бор. Ғурбанд туманидаги тоғларда кумуш кони ва ложувард кони бўлур”, деб ёзади. Ҳозирги кунда Афғонистонда соф кумуш конлари эмас, балки олтин конлари борлиги аникланган (Бадахшон ва Ғазна вилоятларида). Аммо табиатда кумуш асосан олтин ва қўрғошин-рух маъдани таркибида ҳамроҳ элемент сифатида учрайди. “Ложувард” деб аталувчи кўк рангли қимматбахо тош Бадахшон (Помир) тоғларида учрайди (масалан, Сирисанг кони). Ўзбек лексикасида қадимдан сақланиб келаётган “Лаъли Бадахшон” ибораси ҳам шу жойга дахлдордир. Бу жойда ложувард билан бир каторда кам микдорда ёкут (лаъл) ҳам учрайди. Нуристанда эса зумрад кони очилган. У камёб элемент – берилий хомашёси сифатида хизмат қиласи. Бу борада “Бобурнома”нинг 360-бетида қуйидаги тафсилот бор: “Латофатеким, Ҳиндистонда бор – улуғ вилоятдир. Ва олтин ва ярмоғи (кумуш) калин бўладур”. Дарҳақиқат, бу мамлакат олтин конларига эга. Шулардан энг муҳимлари – Қолар ва Хаттия конларидир (Майсур штати). Қоларда олтин маъдани 3100 метр чукурликдаги шахтадан олинади. Нодир ва қимматбахо тошлар, шу каторда олмос конлари ҳам мавжуд.

Ҳиндистондаги катор фойдали казилмалардан, хусусан, темир, кўмир, боксит муҳим ўрин тутади. Муаллиф асарида минерал хомашё хусусида айтилган фикрлари 338–342-бетлардан ўрин олган бўлиб,

“Аграда хиндулар ўз ризолари билан қалин жавоҳир ва жаров Ҳумоюнга пешкаш қилур. Бу жумладан бир ашхар олмос эдиким, бир муқаййим, шунинг қийматини тамом оламнинг икки ярим кунлик харжи дебтур, ғолибо саккиз мисқолдур”. Дарҳақиқат, бутун оламга машҳур бўлган “Кўхинур” деб аталмиш 787 карат оғирлиқдаги олмос Годовари ва Киринина дарёлари ҳавзаларидан топилган бўлиб, бобурийларга совға қилинган, ва у асрлар давомида қўлдан-қўлга ўтиб, ниҳоят, 1849 йили Ост-Индия компанияси ихтиёрида қолган, 1850 йили эса Англия қироличаси Викторияга совға қилинган. Ушбу олмос ҳозирда Англияда сакланади.

Бобур табиат мўъжизаларини ўрганар экан, тоғларнинг ташқи кўриниши бир-биридан фарқланишини кузатади. “Кобул вилоятининг шарқ тарафидаги тоғлар икки турлукдир. Андароб, Хоса ва Бадохшанот тоғлари арчалик, қалин чашмалик ва юмшоқ тоғлардир. Нижрав ва Памғонот-Батур, Савод тоғларида ўти қалин, лекин тоғи баланд бўлмаса ҳам, йирик тошлиқ, от билан юриб бўлмас” (198-бет).


Биз Бобур қадамжойлари бўйлаб сафарда бўлган вактимизда, юқорида таҳлил этилган геологик жараёнларни кўришга ва кузатишга мусассар бўлдик. Геология фани, кайси бир тог сарчашма бўлса, бу ерда тектоник жараёнлар кўпроқ ривож топади, деб ўргатади.

Маълумки, серчашма жойлар сердараҳт бўлади. Тоғларнинг дарз кетиши оқибатида тошлар майдала-нади, нураш юз бериб тоғ емирилади (Андароб, Хоса, Бадаҳшанот тоғлари).

Тоғлар ўз ранги билан бир-биридан ажralиб туриши ҳам Бобур дикқатини жалб қиласди: “Урванинг (Мўлтон вилояти) уч тарафи тог вокиъ бўлубтур.



Андижон. Бобур боғи. 2010 йил.



Бобур тошбитиги.



Машхур Бобур тошбитиги: «Эшитганим борки...».
2009 йил.



Бобур номли халқаро экспедиция Хоруғ шаҳрида. 2009 йил.



Захириддин Мухаммад Бобурнинг 525 йиллик тантаналари.
2008 йил.



Кашмир Сринагар. Зайнулобиддин мозороти.
Мұхаммад Ҳайдар мирзо қабри олдида. 2009 йил.



Кашмир университетида профессор Ашраф Воний
ва бошқа олимлар билан учрашув. 2009 йил.




Челябинск вилояти Варна шаҳри.
Амир Темур минораси. 2010 йил.




Челябинск вилояти Варна шаҳри дарвазаси.
Дарвоза пештоқида шу шаҳар рамзи –
Амир Темур минораси. 2010 йил.



Бобур номли Халкаро жамоат фонди буюртмаси ва
ҳомийлигига нашр этилган асарлардан намуналар.



Бобур номли
жамғарма
бу юртмаси билан
таржима ва
нашр қилинган
Хондамирнинг
нодир тарихий
асари. 2013 йил.



Бобур фонди ҳомийлигига нашр этилган
Андижон тарихига доир тадқикот. 2011 йил.

За хабарниги и
и маалымати

БОБУР ЭНЦИКЛОПЕДИЯСИ



Фонд ташаббуси ва ҳомийлигига тайёрланган
«Бобур энциклопедияси». 2013 йил.

Тошнинг ранги Биёна тошларидек қизил эмастур, бир нима берангроктур”. Сафар чогида биз Мўлтон вилоятида бўлиб, бу ердаги тоғларнинг табиий ранги турланиб туришига тўғри баҳо берилганига имонимиз комил бўлди.

Буюк сиймо ижодига ҳарактерли нарса яна шундан иборатки, у ҳарбий юришларда ўзи билан бирга замбараксозларни ҳам олиб юрган. Улар зарур бўлган чогда замбараклар қўйиб тайёр қилганлар. Лекин “Бобурнома”да қуролни қўйиш учун керакли хомашёнинг қаердан келтирилганлиги ҳакида хабар йўқ. Шубҳасиз, маҳаллий хомашёдан фойдаланилгани аниқ. Чунки “оғир юқ”ни – хомашёни сафарда олиб юриш амримаҳол.

Бобур ўз салтанатига қарашли ерларнинг жуғрофиясини яхши ўрганган сайёх, табиатшунос олим сифатида “Бобурнома”да мингга яқин жуғрофий атамалар – мамлакатлар, шаҳарлар, кишлоқлар, қалъалар, тоғлар, довонлар, дарё-сойлар номларини келтиради. Шунингдек, ўзи кўрган зилзилалар ҳакида ёзар экан, зилзила оқибатини ҳам таърифлайди (216-бет). У ўзи кўрган Қандаҳор, Чандавал (жанубий Афғонистон) зилзилаларининг гувоҳи сифатида уларнинг оқибатларини ўрганишга киришади ва худди мутахассис каби баён этади: “Зилзила марказида бир парча ер узилиб бир ўқ отими масофага учиб бориб тушган ва узилган жойдан булоқ пайдо бўлиб, бир газ кенгликда ер ёрилган. Бир ёнбагирдан тошлар отилиб иккинчи ёнбагирга тушган. Кўп уйлар йиқилиб, ўлганлар бисёр бўлди”, деб таърифлайди Бобур. Бу табиий оғатнинг кўпгина хусусиятларини ҳар томонлама ёритиб, сейсмология фанининг макросейсмика соҳаси талабларига мос ахборотлар қолдиради. Ушбу маълумотларга кара-

ганда, Бобур таърифлаган зилзила, Шарқий Оврупада кабул қилинган 12 балли зилзила жадвалига кўра, 9-10 баллга етган, деб тахмин қилиш мумкин.

Бобур номи Мовароуннаҳр, Афғонистон ва Ҳиндистон жуғрофиясини, табиий бойликларини, бу ердаги геология-сейсмологияга оид табиий жараёнларни ўзбек тилида илк бор ёзган улуғ табиатшунос олим сифатида ҳам тарихда муҳрланиб қолиши, шубҳасиз.

2013 йил

ЖАҲОНГАШТА

Мен сизга ҳикоя қилмоқчи бўлган қаҳрамоним яқинда 80 ёшга тўлди. Лекин у ўзини 22 ёшда ҳис килади. Кўриниши, қадди-басти нуронийларга хос бўлгани билан ғайрати, шижаоти йигитларнидан кам эмас. Ахир, ҳаётининг охирги 20 йилини (деярли ҳар йили!) факат сафарларда ўтказди. Сафар бўлганда ҳам ниҳоятда қийин, машаккатли, мураккаб йўлларни кезади. У бўлган мамлакатларни санасангиз, саноқдан адашиб кетасиз. У босиб ўтган дашту саҳроларни, қорли довонларни, қирғинбарот уруш хукмрон бўлиб, ўқлар ёғилиб турган, тўплар гумбурлаётган манзилларни кўз олдингизга келтирсангиз, юрагингизни ваҳм босади, этингиз жимирилашади. У инсоннинг ўз олдига кўйган мақсадининг улуғлигига, ҳар қандай шароитда ҳам ўз аҳдидан қайтмаслигига, бир сўз билан айтадиган бўлсак, довюраклигига тан берасиз, ичдан офарин айтасиз.

Ёшлигига ким дунёни кезишга ошуфта бўлмаган? Масалан, мен ўзим, агар имкони бўлса, дунёнинг чеккаси қадар пиёда боришга тайёр бўлган кезларимни эслайман. Лекин умр ўтган сайин одам ҳаловатга, оромга эҳтиёжманд, “огир карвон” бўлиб боради. Айниқса, олтмишдан ўтганингдан кейин ҳар қандай саёҳат ҳам қонда иштиёқ ёқмай қўяди. Мен сизга таништирмоқчи бўлган инсоннинг узлуксиз сафар-саёҳатлари эса унинг ана шу мўътабар ёшга етганидан кейин бошланди.

Келинг, мен сизга у кезган мамлакатларнинг айримларини санаб берай: Эрон, Туркия, Саудия Арабистони, Сурия, Бирлашган Араб Амирликлари, Иордания, Покистон, Афғонистон, Малайзия, Сингапур, Хитой, Ҳиндистон ва яна бошқа бир қанча мамлакатлар.

Дарвоке, сафар деганда биз кўпроқ поездда йўл босиши ёки учоқда учишни ва етиб борган манзилимизда ораста меҳмонхоналарда ҳордик чиқариши тасаввур киласиз. Бироқ бизнинг қаҳрамонимизчи? У ҳар йили чиқиладиган бу узундан-узок сафарларга поездда ҳам эмас, учоқда ҳам эмас, оддий машинада, яъни енгил автомобильда отланади. У мамлакатлар чегараларидан ўтишда сафардошлари билан баъзан кунлаб сарғайиб ўтирди, кези келганда такир даштларда, кимсасиз саҳроларда шундоққина йўл бўйида тунаб, “коп-тўшак”ларда мизгиди. Машина панд берган ҳоллар ҳам кўп бўлган. Лекин у ҳеч қачон ахдидан қайтмади, энг қийин шароитда ҳам, бирор марта бўлсин, йўлға отланганидан пушмон чекмади, афсус-надомат қилмади. Янаги йил яна янги шижоат ва ғайрат билан йўлга тараффуд кўрди.

У ким? Ортиқча сирга ўрамай, айтинг, дерсиз. Оддий, одми инсонни сирга ўраб бўлармиди – у бизнинг замондошимиз. Ҳаммамиз уни кўп бора телеэкранларда кўрганмиз, сафар ҳисоботларини матбуот саҳифаларида ўқиганмиз. Исм-шарифи – Зокиржон Машрабов!

Ҳа, эсингизга тушди: у ўша – Мирзо Бобур хокини юртимизга келтириб, Андижоннинг жаннатмонанд гўшасида унга рамзий қабр бунёд этган Зокиржон Машрабов. Яна уни буюк алломамиз Абу Райхон Берунийнинг Ғазнадаги экин майдонларига қўшилиб

йўқ бўлиб кетиш арафасида турган қабри қошида забун ўйларга чўмганини ёки Дехи Канордаги кўхна қабристонни оралаб, белгисиз ётган мавлоно Лутфий қабрини аниклаганини, кейин унга юртимиздан усталирни, керакли материалларни етказиб бориб, кўркам ва маҳобатли ёдгорлик мақбараси ўрнатганлигини телезкранда кўргансиз.

Сафарлари давомида Зокиржон Машрабов Бобур ҳаёти ва ижодига дахлдор кўплаб кўлёзмалар, нодир китоблар, осори атикаларни қўлга киритди, Ҳиндистонда Бобур зурёдларини излаб топди. Темурийлар салтанатининг дунё маданиятига таъсирини ўрганди ва уни янги лавҳалар билан бойитди. Бир сўз билан айтганда, у Бобур ижодининг чинакам ошуфтасига айланди. Бу борада унинг ўзи, Бобур менинг ҳаётимда тобора чуқурроқ маъно касб этиб борди, дейди. Ҳозирги кунда у “Бобур халқаро жамоат фонди” раиси, Бобур халқаро илмий экспедициясининг раҳбаридир.

Шуниси кизиқки, Зокиржон Машрабов тарихчи ҳам, адабиётчи ҳам эмас. Унинг асл касби – геологлик, тогу тошлар илми бўйича мутахассис. Унинг Бобур ижодига қандай меҳри тушиб колганлигининг алоҳида тарихи бор. Шунга шаъма қилган ҳолда, мен ундан сўрайман:

– Сиз Бобурни ўзингизга качон кашф этган эдингиз?

– Менинг асл касбим – геологлик... – дея бошлайди сўзини у. Бу унинг ўша пайтлардаги, “намунча бобуршуносликка даъво қиласи бу?!” дейдиганларга айтадиган гапининг индаллоси эди. Лекин тан олиш керакки, у Бобур номини тилдан қўймай юрган пайтлар оғир пайтлар эди. Менинг эсимда, бир мажлисда ўша давр мафкурасининг жарчиси бўлган “опа” тилидан шу гапларни эшитганман:

– Биласизларми, нималар содир бўлаётибди бизда? Водийдаги бир колхозга Куйбишев номини ўзгартиришиб, Бобур номини қўйишибди-я! Куйбишев ким-у, Бобур ким?! Куйбишев – улуғ инкилобчи, Бобур ким – у золим шоҳ, босқинчи!..

Ана шундай даврда Бобур ҳакида роман эълон қилган муҳтарам адабимиз Пиримкул Қодировга отилган маломат тошларини гапирмай қўя қолай.

– Албатта, мен Бобур номини илгарилари ҳам эшитгандим, унинг кимлигини идрок қиласардим, – дея гапида давом этади Зокиржон ака. – Фазалларини билардим, “Бобурнома”ни ҳам ўқиганман. Лекин унинг тили менга оғирлик килгани туфайли тўла-тўқис тушунмаганман. Бир воқеа сабаб бўлди-ю, мен Бобурга бутунлай боғландим, қолган умримни шу буюк бобомиз ҳаёти ва ижодини ўрганишга, унинг номини абадийлаштиришга сарфлайман, деб ўзимга сўз бердим. Андижон шаҳар ижроия қўмитаси раислиги лавозимига тайинланган пайтларим эди. Ҳиндистонга сафар йўлланмаси бўлиб қолди. Оилам билан бирга сафарга отландик. Буни қарангки, ўша пайтларда Пиримкул Қодировнинг “Юлдузли тунлар”и “Шарқ юлдузи” журналида босилган эди. Мен журналнинг асар босилган сонлари сахифаларини битта китоб ҳолига келтирдим-да, ўзим билан олволдим. Анча қисмини ўқиган эдим. Сафар давомида ўқишини давом эттирдим. Биласизми, каерда тугатдим уни? Тожмаҳалда. Яrim тун эди. Мармар супада ўтириб якунладим. Айниқса, асар охиридаги Бобурнинг тахтни ўғли Ҳумоюнга топшириш лавҳаси қўнглимни эзиз юборди. Йиғлаб ўқидим. Шоҳ отанинг ўғилга, қўзим тириклигида тахтни сизга топширишга қарор килдим, дейиши. Солих фарзанд – Ҳумоюннинг эса,

сизнинг азиз умрингизнинг бир лаҳзаси менга бу тожу таҳтдан минг бора қимматлидир, дейишлари...

Мен Бобурнинг кимлигини ўшанда англадим. Дунёнинг ярмини фатҳ этиб, шундок олис ўлкаларда шундок буюк ишларни амалга оширган зот ўзимизнинг заминимиздан, қолаверса, Андижондан чиқмаганми!.. Кўнглим фахр-ифтихор туйғуларига тўлиб-тошди. Ана шу сонияларда ўзимга ўзим боя айтганим – мажбуриятни юкладим.

Бобурнинг 500 йиллик юбилей санасини нишонлаш хақида қарор чиққанди. Ҳиндистондан қайтгач, Зоқиржон Машрабов шаҳар ижроия қўмитаси раиси сифатида бу санага бағишилаб Андижоннинг сўлим боғида “Ғазал ва мақом кечаси”ни ташкил қиласди. Анжуманга Тошкентдан ўзбек шеъриятининг ёрқин юлдузи Абдулла Ориповни, илк асарлари билан адабий жамоатчилик назарига тушган Хайдиддин Султоновни таклиф этади. Водийнинг оташнафас хонандалари кечага файз бағишилайди. Бу нафис мажлисни гоя муаллифининг ўзи бошқаради. Ушбу тадбирни ўтказиш, шубҳасиз, ўша пайтда катта жасорат эди. Чунки мазкур сана муносабати билан республика ҳукумати қарор чиқарган, лекин бу қарор “хўжа кўрсин”га бўлиб, унда қайд этилган ишларнинг бирортаси амалга оширилиши хақида гап ҳам кўзгалмаган эди. Айни шундай вазиятда Зоқиржон Машрабов Андижонда Бобурга ҳайкал қўйиш борасида бош котира бошлайди.

– Мени бир куни обкомнинг биринчи котиби чақириб шаҳар бош майдонидаги “доҳий” Ленин ҳайкали ўрнига янгиси ўрнатилажагини айтди ва уни Москва яқинидаги Митиши шаҳрида жойлашган ҳайкалтарошлик комбинатида қуидириб келишни менинг зиммамга юклади, – дея ҳикоя қиласди Зоқиржон

ака. – Бунга 40 тоннага яқин мис кетар экан. Шундан 2 тоннасини Бобур ҳайкалига ишлатишни зимдан мўлжаллаб қўйдим. Менинг илтимосимга кўра андижонлик ҳайкалтарош Абдурашид Сулаймонов ҳайкалнинг гипс нусхасини тайёрлаб ҳам қўйганди. Ҳайкални қўйдираётганлигимни ундан бўлак хеч ким билмасди.

“Дохий” ҳайкали тайёр бўлгач, келтирилиб тантана билан бош майдонга ўрнатилди. Лекин, минг афсуски, юкори доираларда Бобурга муносабат кескин ўзгариб, унинг ҳайкали шаҳардаги бир омборхонанинг чанг босган бурчагидан жой олди. Юртда Истиқлол тонги отгуни қадар шу бурчакда ётди.

Юбилей айёми яқинлашмоқда эди. “Тепа”дан шошилинч кўрсатма келади. Бу кўрсатма “юбилей тантана қилинмасин, барибир Бобур – босқинчи, уни кўтар-кўтар қилиб бўлмайди” деган мазмунда эди. Шунга кўра, юбилей 1983 йили 20 апрель куни вилоят театри биносида ярим соатгина илмий анжуман тарзида “нишонланади”.

Кўп ўтмай, Бобур номини агадийлаштиришда ташаббус кўрсатганлиги учун Зокиржон Машрабов ишдан олинади. Бу воқеани у кишининг ўзи шундок хотирлайди:

– Бир куни идорада ўтирсам, тезда биринчи қаватга тушасиз экан, деб қолиши. Тушсам, фойеда Тошкентдан келган котиба опа кўргазма тахталарини томоша қилаётган киши бўлиб турибди. Мен билан совуқкина кўришди-ю, биринчи саволи шу бўлди:

– Нима учун Андижон шахрида болалар ўлими кўрсаткичи катта? Горисполком қаёққа кааяпти?

Мен ўзимни йўқотиб қўймасликка ҳаракат қилиб, унга жавоб килдим:

– Бу борада аҳволимиз ҳақиқатан ҳам қониқарли эмас, лекин ишдаги кўрсаткичларимиз яхши.

– Бу – халқнинг хизмати.

– Тўғри, камчиликлар бизники, ютуклар – халқнинг хизмати.

Котиба менга дилида “қайраб” турган саволини берди:

– Сизга ким ҳуқуқ берди босқинчининг ҳайкалини кўйдириб келишга?

– Ҳеч ким... – дедим мен.

– Айтинг, сизга ким ҳуқуқ берди деяпман?

– Ҳеч ким... – дедим яна. Кейин унинг кўзига боқиб жавоб қилдим. – Мен ўзим... адабиётга, Бобурга хурматим туфайли...

– Сиз билан обком бюросида гаплашамиз, – деди “опа” – марказқўм котиби ва шартта бурилиб чиқиб кетди.

Бу “сиёsat” ўз-ўзидан пайдо бўлиб, туйкусдан юзага чиқмаганди. Бу зуғум шўро мафкураси ўзагидан униб чиққан куртаклар эди. Зеро, ушбу салтанат даврида ўзга миллатлар рухини синдириш, тарихини камситиш, уларни кўкартирмаслик борасида нима ишлар қилинмади, кандай чоралар кўрилмади? Бу маҳдудликнинг биргина кирраси шунда кўринадики, хукмрон сиёsat айни чоғда ўзига мансуб шахсларни ҳамма ерда “кўтар-кўтар” қилди, Бобур сингари сиймолар ўрнига уларнинг ҳайкалларини келтириб ўрнатди. Бутун халқни уларни тавоғ этишга мажбур қилди. Бу сиёsatни факат ўз худудида эмас, ҳатто ташқи дунёда ҳам юргизишга уринди.

Мустақилликка эришганимиздан кейин кўп ўтмасдан Тошкентдаги, бошқа вилоятларнинг марказларидаги, жумладан, Андижон шаҳридаги “доҳий”нинг ҳайкаллари олиб ташланди.

Дунёнинг ишлари қизиқ. Тарих ҳеч қачон бирон-бир шахс измида ёки сохта, инсонийликка зид мафкура ўзанида қолиб кетмайди. Унинг холис ва адолатли тадрижига на бир қолип, на бир тўсиқ монелик қила олади.

Авлиё киши бир манзилдан ўтиб бораётса, бир тўп одам пастдан тупроқ олиб тепаликка ирғитишаётган экан. Авлиё киши, нима қилаётибсизлар, деса, улар, бу бир инсоннинг хоки, унинг мартабасини юксак қилмоқчимиз, дейишипти. Агар худо унинг мартабасини юксак қилмаган бўлса, бехуда уринманглар, сизлар юксалтиrolмайсизлар, дебди у.

Авлиё зот яна бир манзилдан ўтиб бораётса, одамлар тупроқни лой қилиб тепкилашаётган экан. Нима қилаётибсизлар, дея сўрабди у одамлардан. Бу бир одамнинг хоки, уни тепкилаётибмиз, дейишибди улар. Агар худо унинг мартабасини улуғ қилиб яратган бўлса, тепкилаб овора бўлманглар, уни хор қилолмайсизлар, деган экан авлиё одам.

Қиссадан ҳисса шулки, кимлардир Бобур Мирзонинг мўътабар сиймосини ҳар қанча таҳқирлашга уринмасин, башариятнинг улуғ алломалари, буюк шахслар, олиму фузалолар унинг шаънини доим юксакда тутдилар, унга ҳар доим ҳайрату эҳтиромда бўлдилар. Келинг, уларнинг Захириддин Муҳаммад Бобур ҳақида айтган сўзларига қулоқ тутайлик.

“Бобур дилбар шахс, Уйғонини даврининг ҳукмдори, мард ва тадбиркор одам бўлган, усанъатни, адабиётни севарди, ҳаётдан ҳузур қилишини яхши кўради”.

Жавоҳарлаъл НЕРУ.

“...Хиндиистоннинг энг буюк императори, чеҳраси қуёшу ой каби нурли, султонлар султони, беназир Бобур иби Умаршаийх Мирзо иби Абусаид Мирзо иби Мироншоҳ иби Темурга зудлик билан шуни етказурманки, токи ул олий ҳазрат Европа босқинчиларининг тағионтарожига чек қўйисин”.

ВОЛЬТЕР, буюк француз файласуфи.

“...Хиндиистон ва унинг 8 минг йиллик тарихи балписли бир товус бўлса, бобурийлар сулоласининг ўша кўп минг йиллик тарихдаги 332 йиллик даври ана шу товуснинг гултожишидир”.

Вольдемар ХАНСЕН, инглиз олим.

“Бобур ҳарактерининг энг мислсиз белгиси унинг боиқа ҳукмдорларникуга мос келмаслигидир. Осиё тоқжорларидағи маҳобатли, сунъий ҳарактер ўринига бизнинг кўз олдимизда Бобур табииӣ, ҳаётий ҳарактери билан жонланади. Бобур таҳтда ўтирганига қарамай, оддин турмушининг энг яхши түйғуларини ва шитиёқини ўзида сақлаб қолган. Биз Осиёдаги ҳукмдорлар ичидан Бобур сингари гениал ва талантли шахсни камдан-кам учратамиз. Осиёдаги подшолар ичидан Бобурга тенг келадиган биронта ҳам подиоҳ тополмаймиз”.

Вильям ЭРСКИН, “Бобурнома” таржимони.

“Бобурнинг шахс сифатидаги ҳарактери таҳсинга сазовордир. У жуда бақувват киши бўлиб, қатъа дөвборлари устида иккى кишини қўлтиқлаб олиб, тўсиқлардан бемалол ўта олар эди. Ҳиндиистонда дуч келган ҳар қандай дарёдан сузиб ўта оларди...

Бобур садоқатли ўғил эди. Мехрибон ота, содик дўст, вафодор эр ва яхши қариндош эди... У саҳиӣ, олијсаноб, мард ва жуда маданиятли киши эди... ”

Л. П. ШАРМА, ҳинд олими.

“Бобур именни комил мусулмон бўлиб, Оллоҳни бир дами хотиридан фаромуши қитмаган, лекин мутаассиб бўлиши дарајасидан ўзини тия олган. Сўзамол нотиқ, истеъдоғли саркарда, ор-номуси кучли инсон бўлган”.

Г. Н. ПАНТ, Янги Дечлидаги миллий музей ходими.

Жаҳоннинг буюк алломалари, олим ва давлат арбобларининг Бобур шахси ва унинг инсоният тарихида тутган ўрни борасида холислик билан берган баҳолари, уларнинг дил эътирофларини яна қўплаб келтириш мумкин.

Лекин бугунги куннинг буюк бобурпари Зоқиржон Машрабов билан кечган мулоқотимизда буларнинг бари зикр этилар экан, сухбатдошим Бобур шахсининг бошқа бир кирраси ҳакида ҳам гап очди.

– Шоҳ Бобурнинг ўн икки минг аскар билан Иброҳим Лўдийнинг 200 минг кишилик лашкари устидан ғалаба қозониши ёки азиз фарзанди Ҳумоюнга ўз жонини садқа қилишини эслайлик, – деди у. – Буларнинг барчасида, менимча, қандайдир илоҳийлик бор. Шундоқ экан, бу мумтоз шахсни илми ғайб ҳикматларисиз тавсифлаш мумкинми?..

Дарҳақиқат, Бобур ҳаётида бундай воқеалар кўп бўлган. У салтанат жиловини илк бор қўлга олган кезларни бир хотирлайлик. Фарғона вилояти икки тарафлама ҳавф остида қолиб, Самарқанддан Султон

Аҳмад Мирзо Андижонга, Тошкентдан Султон Маҳмудхон Ахсикентга яқинлашиб кела бошлаган эди. Бобур Мирзо ва унга содик бекларнинг аҳволи ғоят мушкул эди. Не баҳтки, Оллоҳ уларнинг ишини ўнглайди – ҳар икки тарафдаги душман ҳам не бир сабаблар ила ортига қайтади. “Тенгри таолоким, ўз қудрати комиласи билан ҳар ишимни ҳар маҳалда андоқким бояду шояд беминнат маҳлук рост келтурубдир, мунда ҳам неча ишни боис қилдиким, алар бу келмақдан ўсондилар, балки бу таважжухдин bemурод ёндилар”, деб ёзади Бобур бу воқеани хотирлаб.

Ёзувчи Хайриддин Султон “Бобурийнома” китобида қайд этганидек, бу воқеа бундай содир бўлади, яъни душманларнинг не бир сабаблар ила Андижондан чекиниши ҳозирги Қува туманинг Толмозор қишлоғидан оқиб ўтадиган Қорасув устидаги кўприкда юз беради. Мўр-малаҳдай бостириб келаётган лашкар кўприк устида тирбанд бўлиб қолади. Ур-йикит тўполнда кўприк қулаб тушади ва Султон Аҳмаднинг кўплаб одамлари ҳалок бўлади. Ғаним қўрқиб ортига чекинади. Бу ходисани, эҳтимол, тасодифга ҳам йўйиш мумкин, аммо бу тилсим замирида гойибона бир маъно борлиги шубҳасиздир.

Бобур Мирзо Оллоҳ карамига сазовор хосиятли шахс эди. Муттасил қирпичок бўлиб турган бошқа темурийзодалардан фарқли ўлароқ, Бобур Мирзонинг сиёсати кунба-кун тараккӣ топа бориши, ўзгалар қон ва жон эвазига мушарраф бўла олмаган ғалабаларга нисбатан тез ва осон сазовор бўлиши чиндан ҳам унинг камоли илоҳий қудратга боғлик бўлганлигидан далолат бермайдими?

Эътиборингизни яна бир ходисага қаратамиз. Ҳижрий тўкқиз юз саккизинчи йил, каҳратон қиш,

совук, зимистон кунларнинг бирида Бобур Мирзо бир тилсимлик туш кўрди. Бу даврда Бобур Мирзонинг ишлари тарақкийдан таназзулга юз тутган эди. Са-марқанддан қувилиб, Андижондан айрилиб саргардон юрган пайтларида унинг аҳволи бисёр паришон эди. Ўз ҳолатини ўзи таърифлаб айтганидек, вилоят йўқ, вилоят умидворлиги йўқ, навкар пароканда... Ана шундай маъюс, қутсиз, таҳликали кунларнинг бирида у Карнон деган бир масканда ёғий кўлида куршовда қолади. Уни не вақтга қадар изма-из таъкиб этиб келган ғаним навкарлари макр-хийла ила қўлга туширмокқа тиришадилар. Бобур Мирзо ёлғиз ўзи, куролсиз, яроғсиз – имконсизлик комида қолиб, энг сўнгги чорага аҳд қиласди: “Муни дегач, манга гариб ҳолате бўлди. Оламда жон ваҳмидин ёмонроқ нима бўлмас эмиш. Мен дедимким, ростлигини айт. Агар иш ўзгачароқ бўлғусидир, худ вузу килай. Юсуф онтлар ичти, vale онинг онтига ким инонадур. Ўзимда бетоқатлиғе фаҳм қилдим. Кўптим, боғ гўшасига бордим. Ўзим била андиша қилдим. Дедимким, киши агар юз, агар минг яшаса, охир ўлмак керак...”

“Ўзимни ўлимга қарор бердим, – дея қайғули қиссасини давом эттиради Бобур Мирзо. – Ўшал бодга бир сув оқиб қеладур эди, вузу қилдим. Икки ракъят номоз ўқидим, бошимни муножотқа қўйиб, тилак тилайдур эдимким, кўзим уйқуға борибтур. Кўрадурменким, Ҳожа Яъкуб Ҳожа Яҳёнинг ўгли – ҳазрати Убайдуллонинг набиралари рўбарўйимга аблак от миниб, кўп жамоати аблак суворий билан қелдилар. Дедиларким, гам емангиз, Ҳожа Аҳрор мени сизга йибордилар. Дедиларким, биз аларга истионат тегуриб, подшоҳлик маснадига ўлтиргузуббиз. Ҳар ерда мушкул иш тушса, бизни назарга келтуриб ёд этади,

биз онда ҳозир бўлурбиз. Ҳоло ушбу соат фатҳ ва нусрат сизнинг соридур. Бош кўтаринг, уйғонинг”.

“Ўшал ҳолда хушҳол бўлиб уйғондимким, – дея ҳикоя қиласи Бобур Мирзо, – Юсуф Доруға ва ҳамроҳлари бир-бирларига маслаҳат қиладурларким, баҳона килиб ҳаял қиласидур, тутуб боғланмоқ керак.

Бу сўзни эшитиб мен дедимким, сизлар бу йўсунда сўзлашурсиз, қайсингиз менинг қошимга кела олурсиз?.. Ушбу сўзнинг устида эдимким, боғнинг деворидин ташқари қалин отлик овози келди. Юсуф доруға дедиким, биз агар сизни олиб Танбал қошига борсак эди, бизнинг ишимиз илгари борур эди. Ҳоло яна кўб қиши йиборибтур. Ул яқин қилдиким, бу овоз Танбалнинг кишиларининг отини овози бўлғай. Бу сўзни эшитгач, менга изтироб кўпроғ бўлиб, қилур ишимни билмадим...”

Бу сўзларни ўқиган ҳар кимсанинг юраги таҳликали, ҳаяжонли туйғулардан энтикмай иложи йўқ. Бу сониялар авж нуктага кўтарилиганда, интизорлик ила кўз тутганимиз мўъжиза содир бўлади: “Ўшал ҳолда бу отликлар боғнинг эшигини топарға фурсат қилмай, деворнинг эски бўлғон еридан рахна килиб кирдилар. Кўрсамким, Қутлук Мухаммад барлос ва Бобои Паргарийким, менинг жон тортқон навкарларим, ўн-ўн беш, йигирма қиши бўлгой, етиб келдилар. Булар ёвуқ келиб, оттин ўзларини ташлаб, йироғдин юкиниб, таъзим қилиб менинг оёғимга йикилдилар. Ўшал ҳолда манга андоғ ҳол бўлдиким, гўё манга янги бошдан худой жон берди. Мен дедимким, ул Юсуф доруғани, бу турғон мазкур мардакларни тутуб боғланг. Ўша мардаклар коча бериб эдиким, бу ерда бировини тутуб боғлаб келтурдилар...”

Энди тилсум ичидаги тилсимга эътибор килинг:

“Мен дедимким, сизлар қайдин келасиз?

Кутлуғ Мұхаммад барлос дедиким, Аҳсидин қочиб чиқғонда сиздин айрила тушганда Андижон келдим-ким, хонлар ҳам Андижон келибтурлар. Мен туш күрдүм-ким, Хожа Убайдулла дедиларким(!), Бобур подшоҳ Карнон деган кенттатур, бориб ани олиб келингким, подшоҳлик маснади анга тааллук бўлубтур. Мен бу тушни кўриб, хушхол бўлуб, улуғхон, кичик хонга арз қилдум, хонларга дедимким, менинг беш-олти ини-ўғлум бор, яна бир неча йигит қўшунгиз. Карнон тарафидин бориб хабар олайин. Хонлар дедиларким, бизнинг ҳам хотиримизга етадурким, ўшал йўлға борғон бўлғай. Ўн киши тайин қилдилар... Бобои Парғарий дедиким, мен ҳам бориб истармен, ул ҳам икки йигит иниси билан иттифоқ қилиб отландук. Бу кун уч кундурким, йўл келамиз. Алҳамдулоҳ, сизни топдук...”

Ростлиги туфайли тоабад боқийликка сазовор Бобур қалами битган ушбу сўзларга ишонмаслик мумкинми? Келинг, инсон рухиятида содир бўлгувчи бундай ҳодисотлар сирини шархлаб, тилсимини ечиб беришга бехуда уринмай, бу борадаги тадқиқотни келажак илму фани олдига вазифа қилиб қўяйлик-да, сухбатимизни давом эттирайлик.

– Ана шундай ноёб хислат ва илоҳий иқтидор сохиби бўлган буюқ бобомизнинг табаррук қадамжолари ни тавоф қилмаслик, унинг босиб ўтган изларини кўзга тўтиё қилмаслик мумкинми!.. – деди Зокиржон aka дафъатан жўшиб. Шу асно мен ундан биринчи илмий сафар қандай ташкил этилганлиги борасида гапириб беришини сўрадим.

– Юрагимга, фикру зикримга Бобур сиймоси ўрнаша бошлагани сари бир пайтлар факат орзу бўлиб

туюлган ғоям аниқ режа бўлиб шаклланди. Ва у 1992 йили дастлаб “Бобур изидан” номли халқаро экспедиция сифатида расман ташкил этилди. Лекин уни юргизиш учун маблағ ҳам керак эди. Шундан келиб чиқиб, “Бобур номли халқаро жамоат фонди”ни туздик. Бу, албатта, жуда кўп “югур-югур”лар, заҳматлар эвазига амалга ошди. Пойтахтга кўп марталаб қатнашга тўғри келди. Баъзан, бор-э, деворгим келарди. Лекин таслим бўладиган анойилардан эмасдим. Маҳкамалар эшиклари олдида, қабулхоналарда соатлаб кутишимга, баъзан кунлаб сарғайиб ўтаришимга тўғри келди. Турли идораларнинг катта-кичик ходимлари, бўлим бошликлари ишни негадир сансалорликка, пайсалга солишарди. Назаримда, улар нималарнидир нимагадир қизғанишар, лекин нимани нима учун қизғанишаётганини ўzlари ҳам билишмасди. Тўғрироги, улар ижтимоий ҳаётимизда ҳали янгилик бўлган бундай тузилмаларнинг тартиб-коидаларини яхши билмаганликлари учун ва буни сездирмаслик учун шундай қилишганини баъзан пайкардим.

– Шундай қилиб...

– Шундай қилиб, 1992 йилнинг 19 майида 12 кишидан иборат илмий экспедиция гурухи машинада йўлга чиқишига шай бўлдик. Маҳалла чойхонасида ош дамланди. Оқсоқоллардан дуои фотиҳалар олдик. Кейин бизни вилоят аҳли вакиллари, дўстларимиз, яқинларимиз Бобур сўнгги марта Андижондан чиқиб кетган Хакан дарвозаси олдида кузатиб қолдилар.

Манзил олис, ниятлар катта эди! Лекин баридан ҳам масъулият юки оғирроқ эди. Ахир, биз қандай улкан режалар билан сафарга жўнаётганимизни эл-юрт билди, кузатиш маросими халққа овоза бўлди...

Лекин кўпчиликнинг ичидаги, катта маблағ сарфлаб кетишияпти, қани, нима каромат кўрсатиб келишаркин, деганлар ҳам йўқ эмасди. Биз эса, Оллоҳдан мадад тилаб, йўлимизда давом этавердик, тўхтамадик.

— Сизга кўп бор сафарларингизда ҳамроҳлик қилган таниқли адаб Қамчибек Кенжанинг хотираларидан ўқиб билдимки, экспедиция фақат машинада йўл босган. Айрим ҳолларда, машина билан кириш тақиқланган мамлакатлар чегарасида сизга йўлни учокда давом эттиришни маслаҳат беришган. Сиз бунга рози бўлмагансиз...

— Биз мустақиллигини эндиғина қўлга киритган мамлакат эдик. Дунё ҳали Ўзбекистонни танимасди. Биз машинамизга “Бобур”, “Ўзбекистон” номларини катта ҳарфлар билан ёзиб қўйгандик. Йўлларда тўхтаганимизда одамлар машинамиздаги ёзувни хижжалаб ўқишиб, бизни ўраб олишарди. “Ўз-ба-гис-тан”, бу қандай мамлакат, дея сўрашарди. “Ўзбекистон бу – озодликка эришган мамлакат, Мирзо Бобур ватани!” – дея таништирадик биз.

Кўпинча ана шундай вазиятларда ўзаро мулокотлар бошланиб кетарди. Экспедиция муддаоси ҳам шу – Захириддин Муҳаммад Бобур юрган йўллардан юриб, у ҳақда маълумотлар йиғиш, одамлар билан сұхбатлашиш эди-да! Илгари бундай мулокотларни тасаввур ҳам қилиб бўлмасди. Чунки бизга ҳукмрон бўлган давлат бошқа мамлакатларга авваллари сира эзгу ният билан кирмаганди. Кирса ҳам, фақат танкларда, зирҳли машиналарда кирган. Хорижликларнинг бизга ажабланиб, ҳайратланиб боқишлиарининг бир жиҳати ҳам шундан эди.

Бояги гапингиздан Ҳиндистон чегарасидаги бир воқеа эсимга тушди. Машинамизни ўтказишмади. Бу

мамлакатга биронта чет эл машинаси киритилмас экан. Мен таржимон билан чегарадан ўтиб, Дехлига бордик ва у ердаги тегишли идоралардан рухсат олиб қайтишга муваффак бўлдик. Бизни Бобур руҳи қўллади.

– Узоқ давом этадиган сафарнинг ўзига яраша гашти ҳам, завки ҳам бор. Сафардошлар орасида маълум бир муҳит қарор топади ва шу муҳитга хос самимият, ҳазил-хузиллар пайдо бўлади. Ҳатто бундай сафарда шеърлар ҳам туғилиши мумкин экан:

Машинамиз – «Тойота»,

Раҳбаримиз – «Бой ота»,

Чойни қуяр – «Чой ота» ва ҳ. к.

Бунда «Бой ота» – сиз, албатта. «Чой ота» – чойни кўпроқ яхши кўрадиган сафардошларингиздан бири... Қандай топилма сатрлар! Юракларнинг чигилини ёзади! Лекин, кошкийди, экспедиция сафарлари доим шундай хуш-хандон кечган бўлса...

– Сафарларимизни доим машақкату ҳамиша таҳликалар остида кечганига сизга иккита мисолни айтсан, кифоя бўлар...

Биринчи экспедициямиз давомида кўп заҳматлар билан Кобулга кириб бордик. Йўлнинг икки чеккасида мажақланган танклар, тўплар, машина қолдиқлари. Бир кўналға қидириб, катта меҳмонхона қархисидан чиқдик. Унда ҳарбийлар жойлашган экан. Уларнинг қайси гурухга мансублигини аниқлаш мақсадида бир оз сухбат қурдик. Мақсадимизни изҳор қилиб, Бобур Мирзонинг қабрларига бориш учун маҳаллий ҳокимиятни қаердан топишимизни сўрадик. Аскарлар гапимизни эшитиб кулишди. Улардан ёшроғи иягини автомат билан қашиб, сўз қотди: «Мана – ҳокимият!» Бироқ улар орасидаги бир аскар

бизга илтифотли муносабатда бўлди. Спортчи экан, Ўзбекистонда ҳам бўлган экан. «Ҳозир «Боғи Бобур» бошқа бир ҳарбий гуруҳ қўлида. Кўмондон ҳам шу ерда ўлтиради. Майли, бир таваккал қилиб кўрайлик-чи. Лекин ҳаммани эмас, икки-уч кишини таксида олиб бориб келишим мумкин», деди. Ва биз кўп ўтмай, шаҳар чеккасида жойлашган Боғи Бобурга етиб бордик. Дарвоза олдига рўпара бўлишимиз билан қуролли соқчилар бизни тўхтатишди. Йўлбошловчимиз бизнинг мақсадимизни, айни пайтда ҳаждан келаётганлигимизни унга тушунтириди. «Ҳожи», «ҳаж» сўзларини эшитиб, соқчилар бизга сергак тортиб қарадилар. Сўнг улардан бирни боғ ўртасидаги каттакон кўшкка – кароргоҳга караб маслаҳатлашгани кетди. Ижозат бўлди, улардан иккитаси бизни ичкари бошлиди. Бисмиллоҳ айтиб, юрагимиз ҳаяжондан энтикиб, зиналарга қадам қўйдик. Зиёрат чоги шундокқина боғ ортида, яққол қўриниб турган тоғ этакларида пайдар-пай отишма товушлари эшитилиб турди.

Зиёратдан қайтгач, ҳарбийлардан меҳмонхонада бир кеча тунашга изн сўрадик. «Жойларимизни қизғанмаймиз, – деди уларнинг каттароғи, – аммо бир кори ҳол бўлиб қолса, масъулиятни бўйнимизга ололмаймиз».

Хоналарга жойлашиб, мизғиб-мизғимасимиздан, қасира-қусур, гумбира-гумбир бошланиб кетди, итлар тинимсиз хуриб, осмон зенит тўпларидан ларзага келди, машиналар шовқини, ҳарбийларнинг бақирчакири, дод-фарёдлар борлиқни тутди. Отишма нак меҳмонхона атрофида бўлаётгандек, дераза ойналари зириллади... Умримиздаги энг узун тунлардан бири ўша тун бўлди десам, сира лоф эмас.

Иккинчи эсдан чиқмайдиган воқеа Мари – Чоржүй йўлида, саксовулзор, юлғунзорлар оралаб кетаётганимизда содир бўлди. Навбатдаги экспедиция сафаридан қайтаётган эдик. Чўлга кириш олдидан икки йигит бизга йўл кўрсатиб қўйишганди. Орадан кўп ўтмай орқамиздан бир «Жигули» етиб келиб, ундалар билан бизга «тўхтанглар» деган ишорани қила бошлиши. Биз ёрдам сўраяпти деб ўйлаб, машинани тўхтатдик. Шерикларимиздан бири машинадан тушиб, улар томон юра бошларкан, туйкусдан машина ойнасидан чиқиб турган милтиқка кўзи тушиб қолиб, ортига қараб югурга бошлади. Яхшиямки, кўнгли бир нимани сезган ҳайдовчимиз моторни ўчирмай турганди. Шеригимиз ҳаллослаб машинага етиб келиши билан, ҳайдовчи газни босди, олға интилар эканмиз, орқамиздан милтиқ овози варанглаб эшитилди. Оллоҳнинг сақлаганини қарангки, хеч ким шикастланмади. Кейин кўрсак, сочма ўқ машина ўриндиклари ва шифтларини тешиб ўтган экан...

Мен экспедиция иштирокчилари бўлган адиллар Хайриддин Султон ва Қамчибек Кенжанинг «Сафарнома»лари билан танишганимда йўлнинг турфа азоблари, кутилмаган вазиятлар ва яна бошқа бисёр даҳмазаларига кўп бор дуч келдим. Уларни ўқир экансиз, экспедиция раҳбари иродасига, матонатига, сабр-бардошига яна бир карра таҳсин айтасиз.

Жумладан, Хайриддин Султон «Бобурийнома»-сида шундай лавҳани баён қиласиди: «Эрон худудига ўтгандаги қийналганларимиз холва экан, Бандари Аббос портида кўрганларимиз ниҳоятда ошиб тушди.

Ҳаммамиз терга ботган, кир-чир лиbosларда ётибмиз. Уст-бошларимиз – машинада, машина эса – камоқда.

Бечора «Бой ота»!

Ҳар бири чойшабдай-чойшабдай(!) келадиган (сўзимнинг ҳеч муболагаси йўқ – сафардошларим тасдиқлашлари мумкин, чунки бутун сафаримиз тафсилотларини унутиб юборишимиз эҳтимол, аммо Бандари Аббосни ўла-ўлгунча унутмаймиз!) олтига қозони кўтарганча шаҳарнинг у бошидан-бу бошига бўзчининг мокисидай зир югурадилар. Турли-туман идоралардаги юзлаб амалдорларга имзо чектириш, муҳр бостириш учун соатлаб эланиб ўлтирадилар. Бизлар эса... бандаргоҳ ташқарисидаги куйиб-ёниб ётган бостирмача тагида, қайноқ темир ўриндикларда жизганак бўлиб, бир муждага зор ахволда кунни кеч қиласиз...»

Қамчибек Кенж «Буюклар изидан» китобида шундай ёzádi: «Афғонистоннинг Бомиён ҳудудан ўтиб бораардик. Йўллар тор – бир ён тоғ, бир ён – сой. Баъзан йўл бир-бирига ниҳоятда яқин икки баланд тоғ орасидан ўтарди – табиат атайлаб йўл учун жой қолдиргандай эди.

– Бу сувнинг иши, аслида иккала тоғ битта бўлган, – дейди Зокиржон aka геолог – тоғшунос олим сифатида.

Йўлнинг турган-битган ваҳимаси шу ёқда экан. Қоялар остидан ўтамиз. Машина ичидаги ўтириб, беихтиёр энгашиб оламиз. Бу довонлар олдида Покистондаги Қорақурум ҳам, бошқалари ҳам чикора! Баъзи ерларда машиналарнинг бир-бирига йўл беришига ҳам имкон чатоқ. Бечора ҳайдовчилар машинасини тоққа қапиштириб туришади – омонат осилиб турган харсанглар остида... Сойдаги дўнгалак-дўнгалак бўлиб ётган йирик-йирик тошлар ана шу харсанглардан синиб тушганга ўхшайди. Хатарли тирсак-бури-

лишлар ҳам кўп. Бир темир кўприк бузук экан, «ЖИП»имиз сойдан сузиб ўтди...

Яна тог оралаб бораётиб, иккинчи носоз кўприкка дуч келдик. Уни созламоқда эдилар. Ярим соатча туриб қолдик.

Шу манзилда камина шефдан бир танбех олишга «мушарраф» бўлди. Кўча билан ўнгдаги сой оралиғига (ўн беш қадамча) маккажӯхори, мош экилган эди. Сой бўйидаги толзор ва унинг остидаги ям-яшил майсазор, у қадар тўғри ўсмаган Калифорния навини эслатувчи – барги йирикроқ ва ранги оқишроқ тераклар сояси жуда жозибали, айниқса, иссиқда димиқиб, қаёққа бош уришни билмай турган одамни беихтиёр ўзига тортар эди. Бир-иккитамиз машина ёнида у ёқдан-бу ёққа юриб ўзимизни чалғитмоқда эдик, мен раҳбардан беижозат (у машина ичидা, вакт кетаётганидан хуноби ошиб ўтирган эди) макказор оралаб сой бўйига ўтибман.

– Мина бўлса-чи, Қамчибек Кенж? – дедилар сўзларини никтаб.

– Мина бўлса, макка экишмасди, – дедим ўзимни оқлаб.

– Ўғри ёки қарокчилар тутиб кетишса-чи? Мен ҳаммангизнинг уйингиздагиларга жавоб бераман...

Йўлда давом этдик, кейин ҳам тикилишиб ўтишлар кўп бўлди”.

Шуни алоҳида таъкидлаш керакки, на йўллар машақкати, на довонлар таҳликаси Зокиржон Машрабов юрагидаги шаҳдни қайтаролди. У йиллар давомида жаҳонгашталик ҳадисини ўзлаштириб борди. У ушбу орттирган тажрибаларини Мирзо Бобурга ошуфталигидан туғилган орзуларини рўёбга чиқаришда ҳар гал зукколик билан қўллади. Агар Хал-

қаро илмий экспедициянинг бу буюк мақсад йўлида эришган ютукларини сарҳисоб қиласиган бўлсак, кўп ибратли манзарани кўрамиз. Мазкур Экспедиция ташкил этилган кунидан бошлаб ҳозиргача 20 марта бошлинига сафарлар уюштириб, дунёниг 40 дан ортиқ давлатларида бўлди. У давлатларнинг йирик шаҳарларидағи университетлар, музейлар, кутубхоналар, илм-фан марказлари ва шахсий коллекцияларда ижодий мулоқотлар уюштириб, Темур ва темурийлар, Бобур ва бобурийлар асарлари ва улар ҳакидаги ўнлаб тиллардаги китоблар ҳамда қўлёзма асарларни Ўзбекистонга олиб келди ва улар истеъмолга кири-тилмоқда.

Хатти Бобурий билан битилган Куръони каримнинг Машҳад шаҳрининг Имом Ризо мажмуасида сақланётган қўлёзма нусхаси ҳамда Бобур куллиётининг Техрон шаҳрининг Гулистон музейида сақланётган қўлёзма нусхасининг келтирилиши Экспедициянинг энг ноёб ютукларидандир.

Қўлингиздаги китобда бу мавзуда батафсил маълумот берилгани туфайли мен бу ҳакда ортиқча тўхталиб ўтирмокчи эмасман.

Энг муҳими, ушбу чет эллардан келтирилган асарлар Ўзбекистонда бобуршуносликнинг янада ривожланишига асос бўлиб, улар илмий истеъмолга мунтазам жалб этилмоқда, олимлар улар устида ишлаб янги-янги тадқиқотлар яратмоқда.

Бобур фондининг қулочи, қамрови “халқаро” деган сифатга мос равишда тобора кенгайиб бормоқда. Захириддин Муҳаммад Бобурни яхши биладиган, унинг ижодига ихлоси баланд зиёлилар кўмагида Ҳайдаробод (Ҳиндистон), Лоҳур (Покистон), Абу Даби (Бирлашган Араб Амирликлари), Бильдфельд

(Олмония), Москва (Россия), Ўш (Қирғизистон) сингари дунёнинг кўплаб шаҳарларида унинг бўлимлари ташкил этилди ва у жойларда изчил амалий ишлар олиб борилмоқда.

Жумладан, Олмониянинг “Хонзел” фирмаси раҳбари, Шарқ маданиятининг самимий мухлиси Ян Хонзель Зокиржон Машрабовнинг илтимосига кўра, Европа мамлакатларининг музейлари ва кутубхоналарида сақланаётган темурий-бобурийлар тарихига оид қўлёзмалар ва бошка адабиётларни ўрганиш, имкон кадар улардан нусха олиб, Андижондаги “Бобур ва жаҳон маданияти” мозийгоҳига тақдим этиш мақсадида эътиборга лойик ишларни амалга оширди: 1999 йили Ян Хонзель ҳамда ношир, журналист доктор Юрген Андреас рафиқалари билан Андижонга ташриф буюрдилар. Улар ўзлари билан Султон Ҳусайн Бойқаронинг ўғли Шоҳ Фарид Мирзо ва Бобур Мирзонинг ўғли Комрон Мирзоларнинг Гамбург шаҳрида сақланаётган девонлари тўла матнининг нусхаларини, шунингдек, Ян Хонзелнинг рафиқаси Сюзаннахоним заҳматлари, саъй-ҳаракатлари билан йиғилган яна бир ғоят қимматли хужжатлар тўплами – ҳазрати Бобур шахсияти, хукмдорлик ва илмий фаолияти ҳамда ижодига оид 140 мингдан ортиқ манба жамланган маълумотномани жамғарма раиси Зокиржон Машрабовга топширдилар.

Агар юкорида баён этилган амалий ва илмий ишларнинг қиммати ва салмоғига назар солсак, Ўзбекистон Қаҳрамони, профессор Озод Шарафиддинов қиёслаганидек, экспедиция сафарларини Кусто экспедициясига қиёслаш мумкин ва у айтганидек, бу хайрли сафарлар Ўзбекистон тарихидагина эмас, жаҳон тарихида ҳам катта маданий ходисадир.

Айни чоғда илмий сафарлардан кўзда тутилган энг муҳим мақсадлардан бири темурийлар сулоласи давомчилари бўлган бобурийлар зурёдларини излаб топмоқлик эди. Мен сухбат ройишини шу томонга бурдим.

– Биз иккинчи сафаримизда ниҳоят Ҳиндистонга кириб боришга муваффак бўлдик, – Зокиржон ака жиндак хотиралар гирдобига чўмиб, гапида давом этди. – 1993 йил эди чамамда, Ҳайдарободдаги Салор Жанг музейини зиёрат қилиб, меҳмонхонага қайтганимизда у ердаги ходимлар бизни Дехлидан йўқлашаётганлигини айтиб қолиши. Ким бўлди экан? Консулинизмикин ё? Таржимонимиз телефон дастагини олиб, хинд тилида гаплашаркан, юз-кўзларига ҳайрат ва кувонч балкиди ва менга караб: “Зокиржон ака, биз Бобур авлодларимиз, сизлар билан кўришмоқчимиз, деяпти, нима жавоб қиласай?” – деб сўради.

– Келишсин, айтинг, ё манзилини айтишсин, борамиз, – дедим мен шоша-пиша.

Уларнинг ўзлари олдимизга келадиган бўлиши. Биз бебаҳо бойлик топиб олган одамдек ўзимизда йўқ эдик. Ҳа, агар улар ҳақиқий бобурийлар бўлишса, биз учун чиндан ҳам баҳоси йўқ, беназир бойлик эмасми? Ахир, сафардан кўзда тутилган асосий мақсадларимиздан бири ҳам Мирзо Бобур авлодларини излаш эди-ку. Шу пайтгача бу буюк сулоланинг ҳозирда барҳаёт вакиллари ҳақида тайинли бир гап, маълумот йўқ эди-да.

Келишилган вақтдан сал кечроқ ўрта ёшлиардаги икки киши кириб келди. Бири қотма ва новчароқ, иккинчиси тўладан келган, сал оксар эди. Улар бизни дарров танишди. Келувчилар ака-ука бўлиб, Зиёвуддин ва Масихуддин Тусийлар экан.

Зиёвуддин анча сўзамол киши экан. Унинг эҳтирос билан ҳакоя килишича, Бобурий подшоларнинг сўнггиси Баҳодиршоҳ II – Зафар ҳалқни инглизларга қарши курашга даъват этади, лекин кўпчилик бу ҳаракатларга қўшилмайди ва шунинг учун ҳам инглизлар ғолиб келиб, Деҳлини эгаллашгач, 1857 йили 20 сентябрь куни Баҳодиршоҳни қамоққа олишади. Буюк Британия ҳарбий суди ҳукми билан у Рангунга (Бирма) умрбод сургун килиб юборилади. Инглиз босқинчилари исёнчи-курашчилар раҳнамоси бўлган шоҳнинг сарой аҳлию авлод-аждодларини қириб ташлашга киришади. Баҳодиршоҳни – бобурийларнинг сўнгги ҳукмдорини Рангунда 1862 йили 7 ноябрь, жума куни намози аср пайтида 72 ёшида қатл этишади. Шоҳнинг тўнғич хотини Ишрат Маҳалдан туғилган катта ўғли Мирзо Қуёшни (кейинчалик унинг номи Қурайш бўлиб ўзгариб кетган) қариндошлари яшириб қолишган. Тусийлар ана шу Мирзо Қуёшга бориб тақалишар экан. Яъни Мирзо Қуёшдан Мирзо Абдулло, ундан Мирзо Ғафур, Мирзо Ғафурдан эса Мирзо Юсуф деган ўғил, Ҳусни Жаҳонаробегим ва Лайло Уммахони исмли қизлар дунёга келишган. Мирзо Юсуф 18 ёшида вафот этиб кетган, Зиёвуддин Тусий Лайло Уммахонининг тўнғич фарзанди экан.

– Инглизлар бобомиз Баҳодиршоҳга жуда катта лавозим ва маош ваъда қилишган, лекин у ҳалқнинг озодлигини мустамлакачилар қўлига, ихтиёрига топширишдан қатъий бош тортган, – дея ҳикоясида давом этди Зиёвуддин Тусий. – Шундан кейин инглизлар бобурийларни катли ом қилишга буйруқ беришган. Баҳодиршоҳ саройидаги ҳамма бойликлар таланганди!..

Биз Озодлик кунлари, яъни 1947 йилгача Бобурий – Баҳодиршоҳ авлодларидан эканлигимизни

яшириб келдик, акс ҳолда бизни ҳам омон қўйиш масди. 1962 йили Баҳодиршоҳ II вафотининг 100 йиллигига бағишлиланган маросимлардагина мен ҳам ўзимдан дарак бердим.

Дунё воқеаларидан анча боҳабар Зиёвуддин Тусий Ўзбекистондаги янгиликлар билан астойдил қизикиб тураркан, бобо юртининг мустакилликка эришганидан боши осмонга етиб суюнган экан. У Бобур таваллуди 510 йиллигига қизғин тайёргарлик кетаётганини эшишиб, кувонганидан шу юбилей тантаналарида иштирок этиш истагини билдириб, республикамиз Президенти Ислом Каримовга мактуб ёзиб, унинг жавобини консулдан суриштираётганда консул биз ҳақимизда унга гапирибди.

Бугунги кунгача хорижда яшаётган бобурийлар сулоласига мансуб экани аниқланган инсонлар сони 80 дан ортди. Бобурийлар улуғ сулола эди. Албатта, улар такдир тақозоси билан дунёning турли бурчакларига тарқалиб кетишган. Вақти-соати келиб уларнинг бошқа вакиллари ҳам аниқланса, ажаб эмас.

– Мирзо Бобур ҳеч тушингизга кирганми? – деб сўрадим мен Зокиржон акадан юрагимдаги ички туйғуларга чўмиб.

– Ҳа, Мирзо Бобур ҳазратлари бир марта тушимга кирган, – деди у бир зум тек қолгач. Кейин овози билинар-билинмас титраб давом этди. – Мирзо Бобур Андижонни сўнгги марта тарк этганида Ҳакандан чиқиб кетган. У ўша тепаликда эмиш... Намозгар пайти... Намоз ўқиётган эмиш... Ортида Андижон чироклари милт-милт кўриниб турармиш. У шу сонияларда Андижонга алвидо айтиётган бўлса-да, бир куни, албатта, қайтиб келаман, деяётгандек эмиш...

Зокиржон ака гапиаркан, юраги алланечук хисларга тўлиб-тошди. Унинг бу ҳолатида бир пайтлар бу кўрган тушидан ниҳоятда таъсирланганини, ундан ҳали ҳам мутаассир эканлигини сездим.

Менинг кўз ўнгимда ўтмиш жонланиб, кўнглимда ғалати туйғулар ғалаён қилди. Агар Бобур Мирзо ноаҳил хону бекларнинг адоксиз низолари, вафо-сизликларию хиёнати туфайли бу тупроқдан бош олиб кетмаганида тарихимиз ҳукми ўзгачароқ бўлармиди? Узок юртларда қад ростлаган обидалар ватанимизда – Андижондами, Самарқанд ёки Тошкентдами бунёд этилармиди? Ёки Аградаги тенгсиз Тожмаҳал мақбараси Марғилондами, Шаҳрисабздами қад ростлаб, жаҳон ахлиниңг аклу ҳушини ром этган бўлармиди?..

– Сиздан дафъатан Мирзо Бобур шахсини белгиловчи энг муҳим хислатларини санаб беринг дейишса, унинг қайси хислатларини айтган бўлардингиз?

– Унинг ростгўй инсон эканлигини айтган бўлардим, аввало. Эътибор қилинг, “Бобурнома”да у ҳамма нарса ҳакида ростгўйлик билан ёзади. Ўзига яқинларнинггина эмас, ўзининг камчиликларини ҳам фош этишдан чўчимайди. Буни ким ёзяпти? Оддий инсон эмас, шоҳ-а!

Иккинчидан, у танти инсон бўлган. Тириклигига даёқ таҳтини ўғлига топширган. Тарихда бундай ҳодисага жуда камдан-кам дуч келамиз.

Учинчидан, у донишманд ота, меҳрибон падар. Унинг фарзандларига қилган васиятини эсланг. Ўлим тўшагида ётган Бобур Мирзонинг Ҳумоюнга айтган сўзларини тарихчи Абулфазл шундай баён килади: “Оқилона маслаҳатлар ва юракни ўртаб юборадиган насиҳатлар айтилди. Шундан сўнг у киши мана бундай

дедилар: “Сўнгти нафасим чиқмай туриб айтадиган гапим шулким, борди-ю, оға-иниларинг жазога лойик бўлса ҳам, уларга минбаъд жазо бера кўрмагил”. Худди шу кўрсатмага амал килиб, “жаннат ошён ҳазрат” оға-иниларидан шунча жабру жафолар кўрсалар ҳам, уларга қарши жазо чорасини кўрмадилар”.

Бобур Мирзонинг яна бир хислати – унинг камтарин сиймолиги, ҳамиша Оллоҳни ёдида тутгувчи инсонлигидадир. Зеро, у кўлга киритган зафару ғалабаларини, жумладан, Ҳиндистонни фатҳ этганлигини изоҳларкан, буни биз ўзимизнинг кучу қудратимиздан деб билмаймиз, Тангрининг караму иноятидан деб биламиз, дейди. Бу билан у ҳалққа, шоҳ бўлсан-да, мен ҳам Оллоҳга бир бандаман, мени улуғламанг, ҳамиша Оллоҳни улуғланг, демокчи бўлади.

Бобур Мирзонинг меҳрибон падарлиги ҳақида гап кетганда мен Зокиржон аканинг қизи Дијоромхоннинг унинг ҳақида айтганларини ёдга олдим.

– Эсимни танигандан бери биламанки, дадам турли лавозимларда ишлаб, эл-юрт хизматини қилиб келади, – дейди у тўлиб-тошиб. – Дадам ишни жуда яхши кўради, умрининг асосий қисми идорада, кўчада, сафарларда ўтади. Лекин у қаерда бўлмасин оиласини, бизни бир дақиқа ҳам эсдан чиқармайди. Айниқса, бувижонимга ҳурмати бўлакча. Тошкентга хизмат сафарига борадими, экспедициянинг узок сафарларига кетадими, жўнаш олдидан, албаттага, бизга: – Онамга яхши қаранглар. Сизлар болам бўлсангиз, онам – энг кичик болам, агар дадамни ранжитмайлик, рози қилайлик десаларинг, бувиларингни хафа килманглар. Аргарчи нотўғри гапирсаем, хўп, деб билганингча иш тутинглар, аммо зинҳор дилини оғритманглар, – деб

қайта-қайта тайинлардилар. Менинг биттагина ўғлим бор, қани энди уям дадамга ўхшаса, деб орзу қиласман...

Зокиржон Машрабов жуда вакти зик, банд одам. Мен у билан дастлаб қўнгироқлашганимдаёк буни сезганман. Чунки қўришувимиз унинг турли тадбирларга боғланганлиги ва, айниқса, яқинда Тошкентда ўтказилиши мўлжалланган “Захириддин Муҳаммад Бобурнинг жаҳон маданияти тарихида тутган ўрни“ мавзусидаги халқаро илмий анжуманга тайёргарлик ишлари боис бир муддат ортга сурилди. Айни пайтда ушбу анжуманга тайёргарлик ишлари қизғин давом этмоқда эди. Мен шундай тифиз пайтда унинг вактини ўғирлаётганлигим ноўринлигини билганимдан сухбатимиз поёнига етаётганлигини сездириб, дедим:

– Энди оддий савол – иш кунингизни қандай бошлайсиз?

– Мен жуда барвакт тураман. Ибодатимни адо этиб бўлгач, мутолаа қилишга ўтираман. Мен оми одамман... Адабиётчилар, тарихчилар билан сухбатимиз маънили кечиши учун ҳар куни у-бу нарсани ўқиб қўймасам бўлмайди...

Менинг кўнглимни мутойиба туйфуси қитиқлади: “Сиз оми одам эмассиз. Бугун зиёлиларнинг аксарияти мутолаа қилмай қўйган. Ана ўшалар оми”.

– Мирзо Бобурнинг кайси ғазалини яхши кўрасиз?

– “Ғарибингга тараҳҳум айлагилким, андижоний-дир” ғазалини. Ушбу ғазалга басталанган қўшиқни қайта-қайта эшитиб тўймайман.

– Зокиржон ака, мана яқинда Истиқлолимизнинг 22 йиллигини тантана қиласмиш, агар Ватанимиз мустақилликка эришмаганида сиз бу орзуларингизни рўёбга чиқаролган бўлармидингиз?

— Мутлақо. Бундай орзуларнинг ўзи тасаввурга сиғмаган бўларди. Агар юртимиз узра Истиқлол тонги отмаганида халқимиз Президентимиз раҳнамолигида ўз озодлигини қўлга киритмаганида, биз, тошкент-ликларнинг тили билан айтганда, Тўйтепадан нарига ўтолмаган бўлардик. Шунинг учун мен умримнинг асосий палласи Истиқлолимиздан кейин бошланди, деб ҳисоблайман. Ахир, менинг барча эзгу ниятларим, мақсадларим Истиқлол шарофати билан рӯёбга чиқдида! Бобур Мирзони ҳам бизга Истиқлол қайтариб бермадими?! Шунинг учун мен баъзан ўзимни Истиқлолга tengdoш ҳис этаман. Ёшим бу йил – йигирма иккида... – деди у самимий жилмайиб.

Суҳбатимиз давом этарди, илло Зокиржон aka кўнглимдаги тараддудни ва андишани пайқаб, қўйиб юборгиси келмасди. У сиртидан камгап, ўз ўй-режалари билан бандга ўхшаб кўринса-да, агар қулфи дили очилиб кетса, ҳар қандай одамни мафтун килиб қўяркан.

Суҳбатимиз ёзувчиларимиз хақида, уларнинг ҳозирги кундаги ижоди, чиқараётган китоблари борасида кетганида Зокиржон aka: “Менинг битта армоним бор”, деди. “У қандай армон?” – сўрадим мен. “Қанийди, бирон-бир ёзувчимиз Бобурнинг ёшлиги хақида роман ёзиб берса! – деди у тўлқинланиб. – Қандай зўр иш бўларди! Тарбиявий аҳамиятини айтмайсизми бунинг!..”

Дарҳақиқат, адабиётнинг, кейинги давларда телевидениенинг ёш авлод тарбиясига кучли таъсир кўрсатганлиги ва кўрсатаётганлигини сира-сира инкор қилиб бўлмайди. Айниқса, бугунги кундаги телесериаллар... Ҳар куни фарзандларимизни экранга ипсиз боғлаб олаётган Корея фильмларини инкор

этиб бўладими? Ҳатто айтиш мумкинки, ёшларимиз ўзимизнинг тарихий қаҳрамонларимиздан кўра ўша фильмлар қаҳрамонларини кўпроқ биладиган даражага етди. Хавотирли жиҳати шундаки, улар ўзимизнинг қаҳрамонларга эмас, уларнинг қаҳрамонларига кўпроқ тақлид қилмоқдалар.

Мен ривожланаётган мамлакатлар миллий мағкураси ҳақидаги бир мақола билан танишганимда уларда, айникса, телесериалларга катта аҳамият берилиши, унинг мавзулари, йўналишлари ҳукумат сиёсати даражасида эканлиги дикқатимни тортган эди. Бундай фильмлар ички ва ташки сиёсатга ҳамоҳанг тарзда яратилажагини уққан эдим. Кейинги пайтда биздаги айрим киноасарларимизда ҳам мана шундай умумбашарий кўламга интилиш сезилмоқда, албатта. Лекин бу хали етарли эмас. Биз фарзандларимизни хориж фильмлари “жодуси”дан халос этиб, ўзимизнинг тарихимиздан ҳикоя қилувчи сериалларга боғламоқлигимиз керак. Зоро, ўзимизнинг тарихимизнинг бошқа ҳалқлар тарихидан сира кам жойи йўқ, бой бўлса бойки, сира қашшоқ эмас. Жумладан, Мирзо Бобур ҳаётининг ўзи оламшумул фильмга ажойиб мавзу бўлолмайдими?!.

Мен салобатли хона деразасидан ташқарига карадим. Бобур фондининг идораси Андижоннинг энг кўркам гўшаси бўлмиш Бобур номидаги истироҳат боғининг тўрида жойлашганди. Боғда баландликдан ўтувчи осма сим йўл ҳаракатда эди. Бу сўлим гўшанинг турли бурчаклари – истироҳат масканларидан куй-кўшиклар тарааларди.

Шундан сўнг биз қўшни хонага чиқиб, Бобур экспедициясининг ҳалқаро сафарлари ҳақидаги фильмларни томоша килдик.

Мен фильмларни кўриб ўтириб, айниқса, Ҳиндистон лавҳаларидан беихтиёр таъсирландим. Чунки Ҳиндистон мен учун ғоят кимматли ва бенихоя азиз диёрдир. Ахир, мен унда қайта туғилганман!.. Махзун хотиралар эсимга тушиб кетди. Юрагимдаги оғир хасталик туфайли Ҳиндистонга йўл олганим... Ёмғир куйиб турган ярим тунда учоқдан тушиб: “Ассалом, нажот соҳили!..” дея шивирлаганим... Дунёнинг машҳур жарроҳларидан бири Нареш Треханнинг юрагим суратини компьютерда ўзимга кўрсатиб, бу ахволда қандай етиб келдинг, дея ҳайратлангани... Дардим бартараф қилиниб, кўзимни очганимда буюк жарроҳ тепамда икки бош бармоғини кўрсатиб, энди отдай бўлиб кетасан, дегани... Согайгач, шаҳарга чика бошлаб, Миллий театримиздаги бир анжуманга борганимда устоз адаб Пиримкул Қодиров (жойлари жаннатда бўлсин) мени узокдан кўриб, олдимга келганлиги ва, Мирпўлат, эшиздим, Ҳиндистонга бориб келибсиз, сизни Бобур Мирзо руҳи кўллаган, деганлари...

Ўз-ўзимдан мутаассир бўлиб ўтирганимда Зокиржон аканинг кириб келганини пайқамабман. Ички туйғуларимни унга сездирмадим.

Ёрдамчи йигит навбатдаги дискни қўйди. У Зокиржон аканинг ўзи ҳақидаги ҳужжатли фильм экан. Бир пайт у кенг адирда най чалаётган ҳолатда кўринди.

– Қойил, най чалишни ҳам биласизми? – дедим мен. У киши жилмайиб: – Танбур ҳам чертаман, – деди. – Най чалсам, қўнглим губорлари тарқайди. Танбур чертганимда қалбимдаги эзгу туйғуларимни бошқалар билан баҳам кўргандек бўламан...

Мен сафаримнинг иккинчи куни ҳикоямиз қаҳрамони ташаббуси билан ташкил этилган “Бобур ва

жаҳон маданияти”, “Андижон шаҳарсозлик маданияти” музейларини зиёрат этиб, Мирзо Бобур хокидафн этилган рамзий қабр ёнида тиловат қилдим. Бобур номидаги ажойиб боғ ҳавосидан тўйиб-тўйиб нафас олдим. Кўнглимга қандайдир улуғворлик инганди. Бунинг боисини шарҳлаб беролмайман. Балки, бу ҳаётимиизда Зокиржон Машрабовдай шахслар борлигини англағанимдандир. Балки шундай инсонларнинг заминимиизда кўп бўлишини орзулаганимдандир? Ҳар қалай, одам астойдил интилса, машакқатлардан кўрқмаса, ўз олдига қўйган мақсадига эришиши мумкин экан-ку! Нега бизлар фидойиларча ёниб эмас, афсуски, тутаб яшаймиз?!

Ўзбекистон халқ шоири Тўлан Низом хикоямиз қаҳрамони ҳақида гапириб, унинг машинада босиб ўтган йўллари ўлчаб чиқилса, шак-шубҳасиз, у Гиннеснинг “Рекордлар китоби”дан жой оларди, деганди. Мен Зокиржон Машрабов сингари инсонларнинг умри мазмуни ва салоҳияти сирини уларнинг эзгуликка ошнолигида, ҳаётга муҳаббати ва бағрикенглигига деб биламан.

Шу сония кўнглимда бундан 2–3 йил илгари Андижонга бағишлаб ёзган шеъримнинг ушбу сатрлари қайта такрорланди:

Дарёлардан сўрадим мен: – Сиздай кабир,
Жўмард қалблар қай маъвода, қай маконда?
Улар айтди: – Сен қалбларга бокқин, ахир,
Дарёдилли одамлар бор Андижонда!

Пойтахтга қайтарканман, йўл давомида сухбатдан олган таассуротларим хаёлимда мавжланди. Бояги ҳужжатли фильмда кўриб-эшитганим – муҳтарам Президентимиз Ислом Каримовнинг Республика Олий

Мажлисининг 2003 йил май ойидаги XI сессиясида Бобур фонди ва унинг илмий экспедициясига берган баҳоси қулоғим остида жаранглаб турарди: “Зокиржон aka, Сизнинг фаолиятингиз, фидойи ишларингиз, Бобур бобомизнинг меросини бугунги ёшларимизга, замонамиз кишиларига етказиш, умуман бунинг боқий таъсирини бугунги ҳаётда ташвиқот-тарғибот килишдаги хизматингиз барчамизга маълум. Халқимиз ҳам жуда яхши билади. Мен шу фурсатдан фойдаланиб, сизга катта раҳмат айтмоқчиман...”

Ўйлайманки, бу сўзларга бутун юртимиз аҳли кўшилади.

Мирпўлат МИРЗО,
Ўзбекистон Республикасида хизмат
кўрсатган маданият ходими

ЁЗИШМАЛАРДАН НАМУНАЛАР

ХИНДИСТОНДАН МАКТУБ

Бобур номидаги Ҳалқаро экспедиция аъзолари Ҳиндистонда бўлганида буюк Бобурнинг авлодларидан бири Лайло Уммахоний ва унинг фарзандлари, жумладан, Зиёвуддин Тусий билан танишиб, мустаҳкам алоқа ўрнатганлиги эндиликда кўпчиликка маълум. Яқинда Зиёвиддин Тусий жанобларидан экспедиция раҳбари Зокиржон Машрабов номига мактуб келди.

Куйида шу мактубни айрим қисқартиришлар билан эътиборингизга ҳавола этаётмиз.

Ассалому алайкум, азиз Зокиржон Машрабов!

Ишончим комилки, экспедициянгиз ходимлари соғ-омон Ўзбекистонга етиб олдилар. Сиз менинг бобокалоним Бобуршоҳ 1494 йилнинг 6 июнида тож кийиб тахтга чиққанлигини албатта яхши биласиз. Шундай экан, биз ҳаммамиз бу санани Буюк темурийлар салтанати қайта тикланган куннинг 500 йиллиги сифатида байрам қиласиз.

Эсимда бор, 1992 йил ноябрь ойининг охирги ҳафтасида Ислом Каримов Жаноби олийлари Ҳиндистонга сафар килган эдилар. Биз бу улуғ зотни самимий кутлаган эдик. Мен бугун у Жаноби олийларига ҳам хат ёзаяпман.

Марҳамат қилиб, экспедиция аъзоларига менинг саломимни ва онам Лайло Уммахонийнинг дуо ва

тилакларини етказиб қўйинг. Менга бизнинг хона-
денимизда 1993 йил 25 август куни олинган суратлардан
юборишингизни сўрайман.

Кўришгунча хайр!

Сизга самимий ҳурмат билан,

Зиёвуддин Тусий,
Ҳиндистон, Ҳайдаробод шаҳри
«Андижоннома» газетаси,
1993 йил 18 декабрь

МИСРДАН МАКТУБ

Ўтмииш меросимиз ва ўлмас қадриятларимизни ўрганиши, тарғибу ташвиқ қилиши борасида ибратли шилларни амалга ошираётган Бобур номидаги халқаро илмий экспедиция 1997 йилнинг охирида хорижий мамлакатларга қилган навбатдаги сафари давомида бир қатор мумтоз ажододларимиз қатори улуг аллома Аҳмад Фарғонийнинг ҳаёти ва фаолиятига оид муҳим маълумотлар тұнлади. Миср Араб Республикасининг пойтахти Қоҳира шаҳридан юборилган мазкур мактубда, жумладан, шундай дейилади:

«ЮНЕСКО Бош конференцияси 29-сессиясининг карори ва Ўзбекистон Республикаси Президенти Ислом Каримов жаноби олийларининг Аҳмад ибн Касир ал-Фарғонийнинг 1200 йиллик юбилейини нишонлаш түғрисида 1997 йил 27 ноябрда чиқарган Фармонига мувофиқ доктор Зокиржон Машрабов бошчилигига мусулмон мамлакатлари бўйлаб илмий сафарга чиқсан Заҳириддин Муҳаммад Бобур номидаги экспедиция 1997 йил 3 декабрь куни Қоҳирага етиб келди. Экспедиция шу ерда буюк аллома Аҳмад Фарғоний ҳаётига оид илмий ва тарихий фактларни, унинг жаҳон цивилизациясига қўшган улкан хизматини ўрганиш билан шуғулланди.

Қомусий ақл эгаси, фалакшунос олим, кўплаб ўлмас асарлар муаллифи Аҳмад Фарғонийнинг кексалик чоғида, яъни 861 или аббосий халифа Абул Фазл Жаъфар ал-Мутаваккил (847–861)нинг буйруғига биноан Нил дарёсидаги сув сатҳини ўлчайдиган иншоот барпо этиш учун Мисрнинг Фустат шаҳрига келганлиги илмий асосда тасдикланган. Илмий-техник ва меъморий жиҳатдан фоят улуғвор бу қурилма Нил

дарёсининг Сайёлат ур-Род деган ирмоғига ўрнатилган бўлиб, Ал-Манял туманининг Ар-Род мавзесида ҳозирга қадар асл ҳолатда сақланиб келади. Ўзбекистон Республикасининг Қохирадаги элчихонаси ёрдамида Бобур номидаги экспедиция маҳаллий университетлар, илмий ташкилотлар, кутубхоналар ҳамда Миср Араб Республикасининг Тарихий ёдгорликларни қўриқлаш олий кенгаши билан илмий мулоқот олиб борди. Экспедиция Мисрда бўлган бир ҳафта муддат мобайнида Нил дарёсига ўрнатилган мазкур сув ўлчаш иншоотини бориб кўрди, шунингдек, Миср заминида вафот этган Аҳмад Фарғоний мақбарасини излаш билан машғул бўлди.

Экспедиция ишига таникли мисрлик олимлар – Қохира университети қошидаги Шарқ тадқикотлари марказининг директори доктор Мухаммад Халифа Ҳасан ва шарқий тиллар профессори, библиограф, мусулмон қўллэзмалари бўйича мутахассис, доктор Насруллоҳ Мубашшир ат-Тарозий ҳам қўшилдилар. Миср Араб Республикаси Тарихий ёдгорликларни қўриқлаш олий кенгашининг археологик тадқикотлар маркази Бош директори доктор Кавсар Абул Футух ҳам экспедицияга яқиндан ёрдам берди. Синчиклаб изланиш ва ўрганишлардан сўнг буюк аломанинг Фустат шаҳрида вафот этганлиги, Муқаттам тоғининг шарқий қисмидан икки километр масофада жойлашган Имом аш-Шофеъ қабристонига дағн этилгани аникланди. Вақт ўтиши билан унинг қабри йўқолиб кетган.

Экспедиция аллома дағн этилган жой ва Нил дарёсидаги Аҳмад Фарғоний бунёд қилган сув ўлчаш иншооти пойидан бир ҳовуч тупрок олди. Бу муқаддас тупрок илм-фан, маърифат ва жаҳон цивилизацияси ривожига бебаҳо хисса қўшган буюк аллома шарафига

ўзбек халқи Фарғона водийсининг Қува шахрида барпо этаётган ёдгорлик мажмуидаги рамзий қабрга дафн этилади.

Аҳмад Фарғонийнинг ҳаёти ва ижоди келгуси авлодлар учун ёркин хотира ҳамда ўзбек ва миср халқи ўртасидаги тарихий кардошлик ва дўстлик алоқаларининг рамзи бўлиб хизмат қиласди.

**Доктор Муҳаммад Ҳасан Халифа,
доктор Насруллоҳ Мубашшир ат-Тарозий,
доктор Шамсиддин Бобохонов,
доктор Раҳимжон Қодиров.**

Коҳира,
хижрий 1418 йил шаъбон ойининг бешинчи куни,
милодий 1997 йил 5 декабрь».

*«Халқ сўзи» газетаси,
1998 йил 27 январь*

ЯПОНИЯДАН МАКТУБЛАР

Хурматли жаноб З.Машрабов!

Умид қиласанки, ишларингиз жойида.

Киото университетидаги менинг собиқ талабам, профессор Т.Хорикавадан Аннет Беверижнинг 1905 йили нашр қилинган «Бобурнома» (факсимилеси)ни Сизга юбориш учун олиб келиб беришни сўраган эдим. Умид қиласанки, ушбу китобни Сизнинг фондингиз учун тақдим эта оламан.

Ушбу китоб бир неча йиллардан буён «Бобурнома» устида олиб борилаётган илмий тадқиқотлар учун асосий манба вазифасини ўтаб келмоқда. Бу китоб 1971 йилда қайта нашр қилинган, аммо унинг муқоваси асл нусханинг муқовасидан фарқ қиласди. Ҳозирги вақтда асл нусха жуда ҳам ноёб бўлиб қолган. Ишонаманки, Сизнинг фондингиз бу китобнинг сақланиши учун энг яхши ва жудаям мос жой.

Мустаҳкам соғлиқ ва ишларингизда зафарлар тилайман.

Самимият билан,

Киото университетининг таътилдаги профессори

Эйжи Мано
2003 йил 7 август

* * *

Азизим жаноб Машрабов!

Умид қиласанки, соғлигингиз жойида.

«Бобурнома»даги «зоду буд Андижон вилояти» масаласида мен қуидаги маълумотларни Сизга қў-

шимча қилмоқчиман. «Бобурнома»нинг бу қисмини олимлар қандай таржима қилганликларини текшириб, таҳлилни сизнинг эътиборингизга ҳавола қилмоқчиман.

1) Аннетт Бевериж бу гап («зоду буд Андижон вилоятини бағишлаб»)нинг бўлагини ўзининг инглиз тилига қилинган барча таржималарида тушириб қолдирган, таржима қилмаган («Бобурнома», инглиз тилида, 1922 йил; қайта нашри 1969 й., Лондон, З18-бет). У киши нима сабабдан бу гапни таржима қилмаганига ҳайронман.

2) Уильям М.Тэкстон «(I) granted him the living from the province of Andizhan», яъни «(мен) унга Андижон вилоятидан яшашга жой инъом этдим» тарзида ўгирган («Бобурнома», Нью Йорк, 2002 йил, 241-бет). Мен бу таржимани умуман маъқулламайман. Бу таржима хато таржимадир.

3) М.Салье ўзининг рус тилига («Бабурнамэ», Тошкент, 1958 йил, 233-бет) амалга оширилган таржимасида бу сўзни «моё родовое владение – Андижан», яъни «менинг наслий мулким» тарзида ўгирган.

4) Ж.Л.Бакю Грамонт бу сўзни ўзининг французча таржимасида («Ле ливре де Бабур», 1980 йил, Париж, 237-бет) «mon pays natal d Andijan» тарзида ўгирган. Бу ибора қуидагича таржима қилиниши мумкин: «Андижон менинг она Ватаним ёки мен туғилган жой».

5) Рашид Раҳмати Арат бу гапни ўзининг турк тилига қилинган таржимасида («Вакоэъ», Анқара, 1987 йил, 221-бет) «asil vatanim olan Endican vilayetini ona bagishlayak» тарзида келтирган. «Asil vatanim» сўзи «Менинг асл Ватаним – туғилган жойим» маъносини англатади.

Ўтган галги хатимда ёзганимдек, мен ўзимнинг японча таржимамда бу сўзни «кококу» деб, яъни «она ватаним», «юртим» маъносида ўгирдим.

Менинг таржимам 4- ва 5- пункктларга яқин туради.
Хулоса қилиб шуни айтмоқчиманки, Бобурни
Андижон вилоятида туғилган, деб айтишга ҳеч қандай
тўсиқнинг ўзи бўлмаслиги керак.

Менимча, «зоду буд» сўзининг таржимасига келсак,
«ватан» ва «юрт» сўзларининг маъноси «туғилган жой»
сўзининг маъносидан кенгрок.

Умид қиласманки, юқоридаги маълумотлар Сизнинг
тадқиқотингиз учун аскотади.

Энг яхши тилаклар ила,

Эйжи Мано.
Киото,
2008 йил 27 февраль

* * *

Қадрли жаноб Зокиржон Машрабов!

Ушбу хатим Сиз ва оиласизга эсон-омонлиқда етиб
боради, деб умид қиласман.

Дарҳақиқат, вақт учкур найзадир деганлари рост
экан.

Ўзбекистондан Японияга қайтганимдан бери анча
вақт ўтди. Ушбу хатим кечикканлиги учун Сиздан узр
сўрайман.

Менга кўрсатган самимий меҳмондорчилигиниз
учун Сиздан миннатдорман. Менга нисбатан аъло
даражадаги илтифотингиз мен кутгандан ҳам юксак
бўлди ва бундан ниҳоятда хурсандман. Сизнинг
ғамхўрлигинизни умрбод унутмайман. Менга Ан-
дижон, Самарқанд ва Тошкентда кўрсатилган хур-
мат-эҳтиромдан хурсандман. Самарқанд яқинида жой-
лашган Имом Бухорий мақбарасини илк маротаба
зиёрат қилишимиз таассуротларга бой бўлди. Менинг-

ча, бу макбара Ўзбекистон мустақиллигининг бир рамзи ҳамда ислом анъаналарининг барҳаётлигидан гувоҳлик беради.

Темур билан Бобур қароргоҳ сифатида фойдаланган Конигил водийсини ҳам зиёрат қилдим. Бу водий жуда гўзал ва ўсимлик дунёси ҳам бой эди. У ерда туриб, улар нима сабабдан бу ерни қароргоҳ учун танлашганини тушундим.

Андижондаги «Бобур ва бобурийларнинг жаҳон цивилизацияси тарихида тутган ўрни» мавзуидаги халқаро конференция юқори савияда ўтди. Мен Бобур ва бобурийларга кизиккан жуда кўп олимлар билан танишдим. Масалан, афғонистонлик Муҳаммад Ҳалим Ёрқин ва Шафиқа Ёрқин билан неча йиллардан бери учрашишни орзу қиласардим, аммо ҳеч имкони бўлмаганди. Мен ўзбекистонлик етук бобуршунос олимлар – Азиз Қаюмов, Сайдбек Ҳасанов, Ҳасан Қудратиллаев, Ваҳоб Раҳмонов, Ансориддин Иброҳимов, ёш магистрант Дилдораҳон Ҳошимова ва бошқалар билан бўлган учрашувларни ҳали узоқ эслайман.

«Бобурнома»нинг бир боби ҳақидаги Ваҳобнинг фикри мени жуда қизиқтириб қўйди. Унинг айтишича, Хитойдан келаётган минг бош қорамолдан иборат (сигир ёки қорамол) карвон Андижон якинида кучли кор бўронига дуч келади. Аннетта Бевериж ва мен карвонда қорамол бўлиши мумкин эмас, балки матн «минг дона чодир ёки минг бош уйли» кўринишида таржима қилиниши керак, деб ҳисоблаганмиз. Ишончим комил бўлдики, биз нотўғри таҳлил қилган эканмиз. Ваҳоб ҳақ. Бундай мисоллардан кўпини келтиришим мумкин. Дарҳақиқат, кўп нарса ўргандим ва шулар асосида Бобурга оид билимларимни янада мустаҳкамлаш ниятидаман.

Бобурнинг туғилган жойи ҳақидаги масалага келсак, Бобур Андижонда туғилиб ўсган. Электрон хатимда таъкидлаганим ва «Бобурнома»да ёзилганидек, Бобурнинг зоду буди (туғилиб-ўсган жойи) Андижон. Янаям аникроги, Бобур «Бобурнома»да ёзганидек, унинг зоду буди Андижон вилояти. Менинг авваллари, яъни Бобур даврида Андижон вилояти таркибига Ахси ҳам кирган бўлиши мумкин-ку, деган тахминим ҳам йўқ эмасди. Аммо энди ишончим комилки, бундай бўлиши мумкин эмас. «Бобурнома»нинг бир жойида Ахси вилояти деган ибора учрайди (Эйжи Мано, «Вақоевъ» («Бобурнома»). Танқидий матн, 33-бет, 17-қатор).

Бундан маълум бўладики, Бобур даврида Андижон ва Ахси алоҳида-алоҳида вилоятлар бўлган, Ахси Андижон вилояти таркибига кирмаган. Дунё бобуршунос олимлари, жумладан, Бакю Грамонт, Рашид Раҳмати Арат, Азиз Қаюмов, Сайдбек Ҳасан, мен ва бошқалар, хеч шак-шубҳасиз, Бобурнинг туғилиб ўсган жойи Андижон эканлигини эътироф этишга ҳақлимиз.

Бобуршунос олимFaфуржон Сотимовнинг менга таржимонлик қилгани жуда яхши бўлди. У мохир таржимон ва Бобур ҳақида жуда кўп нарса билади. У билан гаплашиб киши роҳат қиласди. Сафарларим давомида у билан дилдан сухбатлашиб, яйрадим. Унга ҳам саломимни етказиб кўйсангиз.

Сизга ва оиласизга Яратгандан соглик, омад ва баҳт тилайман.

Самимилик ила,

Эйжи Мано
Киото,
2008 йил 8 сентябрь
«Маърифат» газетаси,
2008 йил 6 декабрь

МУНДАРИЖА

Умрим дафтарининг сахифалари	3
Тоғлар ортидаги ҳаёт	16
Бобур изидан	26
Бобур қадамжолари кўзга тўтиё	32
Муқаддас масканлар бўйлаб	39
Ўн олтинчи аср бунёдкори	49
Садоқат синови.....	67
«Хатти Бобурий» Бобур Ватанида.....	76
Иккинчи умр.....	84
Комил инсон	98
Бобурнинг замбараклари	103
«Бори элга яхшилиғ қилғил...»	107
Беназир сиймо	116
Забардаст шоир, йирик давлат арбоби ва хушхулқ инсон	123
Машхури жаҳондир аждодларимиз	137
Муҳаммад Ҳайдар Мирзо – тарихчи, шоир ва шоҳ	146
Бобурнинг тошбитиклари	152
Қадимий Андижон	167
Бобур меҳри, Кашмир сехри..	181
Буюқ саркарда	193
Турон сultonи Темурбек	199
Соҳибқирон изларини излаб..	211
Амир Темур юрган йўлларда	226
Андижондан Бенгалиягача	242
Захматкаш олим	247
Бобур – сайёҳ ва табиятшунос олим	253
Жаҳонгашта	259
Ёзишмалардан намуналар	293
Хиндистондан мактуб	293
Мисрдан мактуб	295
Япониядан мактублар	298

Адабий-бадиий нашр

Зокиржон Машрабов

БОРИ ЭЛГА ЯХШИЛИГ ҚИЛГИЛ

Мақола ва сұхбатлар, ёзушмалардан намуналар

Мұхаррирлар: *И.Бұрибаев, Ж.Меликұлов*

Бадиий мұхаррир *Ш.Мирфаёзов*

Техник мұхаррир *Т.Смирнова*

Мұсақхы *Д.Түйчиева*

Компьютерда саҳифаловчы *А.Сулаймонов*

Нашриёт лицензия рақами AI № 154. 14.08.09.

2013 йил 13 августда босишга рухсат этилди.

Бичими 84x108 $\frac{1}{32}$. Times New Roman гарнитураси. Офсет босма.

17,22 шартлы босма тобоқ. 13,1 нашр тобоги.

Адади 1000 нұсха. 277 рақамли буюртма.

Баҳоси шартнома асосида.

Ўзбекистон Матбуот ва ахборот агентлигининг

Фафур Гулом номидаги нашриёт-матбаа ижодий уйида чоп этилди.

100128. Тошкент. Шайхонтохур күчаси, 86.

Телефон: (371) 241-25-24, 241-48-62, 241-83-29

Факс: (371) 241-82-69

www.gglit.uz, e-mail: iptdgulom@sarkor.uz, info@gglit.uz